





Ex Bibliotheca  
majori Coll. Rom.  
Societ. Jesu

48! 5. 33.

14. 17. d. 7. 8

48  
C  
33.







# PHYSICA VNIVERSALIS

juxta principia Aristotelis.

*Authore P. IAC. CHANNEVELLE,  
Societatis IESV Sacerdote.*

TOMVS II.



PARISIIS,  
Apud EDMUNDVM MARTINVM,  
Iacobæâ, sub Sole aureo.

---

M. DC. LXIX.  
CVM PRIVILEGIO REGIS.

PHYSIC  
UNIVERSITY

THE UNIVERSITY OF


THE UNIVERSITY OF

THE UNIVERSITY OF



THE UNIVERSITY OF

THE UNIVERSITY OF



# INDEX.

## PARS TERTIA PHYSICÆ VNIVERSALIS, AD LIBRVM III. PHYSICORVM.

De quantitate & infinito. p. 1

*DISPVATIO I. De natura continui, seu quantitatis.* p. 2

ART. **N**atura continui aperitur, in qua, & distinctione quantitatis. p. 24

p. 4 §. 7. Proprietates quantitatis. p. 30

§. 1. Notio vocum aperitur. ibid. ART. II. An quantitas

§. 2. An dentur partes entitativa in substantia materiali, & accidentibus independenter à quantitate. p. 8

constet partibus sine fine dividuis. p. 31

§. 3. Diluuntur objecta. p. 12 §. 1. Prenotanda quædam. ibid.

§. 4. In quo posita sit essentia quantitatis. p. 15 §. 2. Refellitur sententia Zenonis. p. 33

§. 5. Diluuntur objecta. p. 20 §. 3. Refellitur secunda sententia. p. 37

§. 6. De causa materiali ART. III. Quomodo Aristotelis. p. 39

§. 5. Diluuntur objecta. p. 44

# I N D E X.

- partes in continuo distinguantur. p. 62
- §. 1. *Prænotanda quædam.* ibid.
- §. 2. *Solvitur quæstio.* p. 64
- §. 3. *Diluuntur objecta.* p. 70
- ART. IV. *De punctis continuantibus, & terminantibus.* p. 82
- §. 1. *An dentur indivisibilia realia in quantitate.* ibid.
- §. 2. *Explicatur magis unio partium continui.* p. 87
- §. 3. *Diluuntur objecta.* p. 91
- §. 4. *Diluuntur objecta pro punctis continuantibus.* p. 100

## *DISPUTATIO II. De infinito.* p. 106

- ART. I. *De natura & principiis infiniti.* p. 107
- §. 1. *Quid sit infinitum.* ibid.
- §. 2. *Divisio infiniti.* p. 109
- §. 3. *Quædam pronuntiatæ de natura infiniti.* p. 112
- ART. II. *An detur actu infinitum, aut dari possit.* p. 112
- §. 1. *An detur infinitum actu creatum in rebus, aut naturaliter dari possit.* ibid.
- §. 2. *Diluuntur objecta.* p. 114
- §. 3. *An detur infinitum potentiâ in rebus.* p. 129
- §. 4. *An saltem divinitus possit dari infinitum actu creatum.* p. 136
- ART. III. *Diluuntur objecta.* p. 143
- §. 1. *Diluuntur objecta ex omnipotentia Dei petita.* ibid.
- §. 2. *Diluuntur objecta ex parte scientiæ & bonitatis divinæ.* p. 152
- §. 3. *Diluuntur objecta ex parte creaturæ.* p. 161

# INDEX.

## PARS QUARTA

### PHYSICÆ VNIVERSALIS, AD LIBRVM QVARTVM PHYSICOR.

De loco, & vacuo. p. 168

DISPUTATIO I. De loco. p. 169

ART. DE existentia,  
I natura, &  
affectionibus loci. p.  
170.

§. 1. Multiplex loci par-  
titio. ibid.

§. 2. An sit locus ex-  
ternus. p. 172

§. 3. Quid sit locus exter-  
nus. p. 173

§. 4. Vnde petatur loci  
immobilitas. p. 175

§. 5. Proprietates loci. p.  
181

ART. II. De forma  
constitutiva rei in lo-  
co. p. 185

§. 1. Quæstio definitur.  
p. 186

§. 2. Varia quæstiones  
de natura ubicationis.  
p. 191

§. 3. Diluuntur objecta.

p. 196

§. 4. An res aliqua possit  
esse nullibi. p. 202

ART. III. Quibus re-  
bus conveniat esse in  
loco, & quomodo. p.  
206.

§. 1. An rebus quântis  
per se primò conveniat  
esse in loco. ibid.

§. 2. Quomodo Deus sit  
in loco, & qua illius  
immensitas. p. 209

§. 3. Affertur altera  
sententia, & proba-  
tur. p. 214

§. 4. Diluuntur objecta.  
p. 221

§. 5. De loco spirituum  
creatorum. p. 229

ART. IV. De corpori-  
bus in uno, aut plu-  
ribus locis. p. 232

# INDEX.

§. 1. De penetratione corporum. ibid.

§. 2. Quomodo fiat penetratio corporum. p. 236

§. 3. De eodem corpore in pluribus locis posito. p.

## DISPUTATIO

ART. I. De natura, & existentia vacui. ibid.

§. 1. Quid sit vacuum. ib.

§. 2. An detur vacuum in natura, aut naturaliter dari possit. p. 253

§. 3. Diluuntur objecta. p. 257

§. 4. Diluitur gravis objectio. p. 261

§. 5. Quâ virtute natura resistat vacuo. p. 266

240

§. 4. Diluuntur objecta.

p. 242

ART. V. Quanam praedicata conveniant corpori replicato. p. 245

II. De vacuo. p. 252


ART. II. De virtute vacui effectrice, & motibus qui sunt in vacuo. p. 270

§. 1. Quâ virtute induci possit vacuum. ibid.

§. 2. An saltem divinâ virtute vacuum induci possit. p. 273

§. 3. De motu in vacuo. p. 278

§. 4. Diluuntur objecta. p. 282



## PARS QUINTA

PHYSICÆ UNIVERSALIS,

AD LIBRUM QUARTVM ARISTOTEL.

De duratione, & speciebus illius. p. 288


DISPUT. VNICA. De duratione. ibid.

ART. I. Natura durationis & species. p. 289

§. 1. Quid sit duratio. ib.

# INDEX.

- |   |  |
|---|--|
| §. 2. Quotuplex sit duratio. p. 290                                     | §. 1. An detur tempus reale. p. 307                    |
| §. 3. Quid sit aternitas, & ævum. p. 291                                | §. 2. Quid sit tempus. p. 308                          |
| §. 4. Quomodo duratio distinguatur à re durante. p. 296                 | §. 3. Quaestiones de natura temporis solvuntur. p. 313 |
| §. 5. Diluuntur objecta. p. 303   | §. 4. Quibus partibus constet tempus. p. 315           |
| ART. II. De tempore, seu duratione externa rerum corruptibilium. p. 306 | §. 5. Diluuntur objecta. p. 319                        |
|   | §. 6. Quanam sint in tempore. p. 329                   |



## PARS SEXTA

### PHYSICÆ VNIVERSALIS,

### AD RELIQUOS PHYSICÆ VNIVERSALIS LIBROS.

De motu. p. 332

DISPUT. VNICA. De natura motûs in communi. p. 333

- |  |  |
|--|--|
| ART. I. <b>N</b> atura motûs explicatur. ibid. | motûs propriè dicti à mutatione, ejûsque partitione. p. 342  |
| §. 1. Quadam observantur. ibid.                | §. 4. De motu relato ad immobile, & terminum ad quem. p. 349 |
| §. 2. Definitur motus. p. 336                  | §. 5. De unitate motûs. p. 351                               |
| §. 3. De distinctione mo-                      |  |

# INDEX.

§. 6. De contrarietate motuum, & quietum. P.

356

ART. II. De motu locali.. P. 361

§. 1. An sit motus localis.

P. 362

§. 2. Quid sit motus localis. P. 366

§. 3. Solvuntur variae quaestiones de natura motus localis. P. 368

§. 4. Variae species motus localis. P. 374

§. 5. Affectiones motus localis. P. 377

§. 6. Quomodo res incipiant, & desinant. P. 379

§. 7. De velocitate, & tarditate motus. P. 383

§. 8. Diluuntur objecta. P. 388

ART. III. De motu violento projectorum, & de impetu. P. 390

§. 1. Praenotanda quadam. P. 391

§. 2. Pronunciata quadam de natura, ortu, progressu, & interitu impetus. P. 395

§. 3. Diluuntur objecta. P. 401

§. 4. De motu directo, & reflexo. P. 407

APPENDIX, De primo motore. P. 410







# PARS TERTIA PHYSICÆ VNIVERSALIS,

AD LIBRUM TERTIVM PHYSICORVM.

**L**IBRVS potissimùm partibus continetur methodus scientiæ naturalis, subiecto, principiis, & affectionibus, hanc doctrinam tradit Aristoteles lib. 1. de cælo : *Scientia*, inquit, *de natura est circa corpora, horumque magnitudines, & affectiones, atque harum affectionum principia.* Subiectum est corpus naturale; principia vel sunt interna, nempe materia, & forma: vel externa, nempe causa efficiens, & finalis; affectio alia passiva, alia activa; passiva est vel prima, vel à prima orta; prima est quantitas: orta à prima est locus, & tempus: activa quoque est vel prima, vel secunda; prima est qualitas physica, & motrix: secunda est motus, qui à qualitatibus motricibus oritur.

De corpore naturali, ejusque principiis egit  
*Tom. II. Phys. univers.* A

Aristoteles duobus primis libris Physic. affectiones hoc tertio libro, aliisque prosequitur; naturam, & species motus ab initio hujus libri ad text. 24. edisserit; tum intermissâ disputatione de motu, & ad quintum librum, tresque alios rejectâ, agit de infinito, quia cum motus sit essentialiter continuus, & infinite secari possit; natura illius non potest perfecte intelligi sine rudi aliqua notione infiniti.

Nos, ut tota, quam de motu instituemus, tractatio perpetuâ serie connectatur, eam ad librum, rejicimus, huicque insistimus vni hac tertiâ parte, ut naturam quantitatis primum, deinde infiniti indagemus: quare duplex erit disputatio. Prima de quantitate, secunda de infinito.

## DISPUTATIO PRIMA.

### *De natura continui, seu quantitatis.*



**D**UPLEX finitudo entis creati; altera essentiae, altera quantitatis; quodlibet enim ens creatum terminis suae essentiae concluditur; physicis quidem, si habeat essentiam physicam, puta materiâ, & formâ; metaphysicis autem, si metaphysicam, nempe genere, & differentiâ. Præterea alia est finitudo, quam certa, ac determinata extensio materiæ facit, & à qua habet ens corporatum, ut longum, latum, & profundum sit, adeoque certis, ac definitis locorum spatiis circumscribatur; prima finitudo propria est spirituum creatorum, qui definitos habent essentiae

## PHYSICÆ VNIVERSALIS. ;

terminos; secunda corporum, quam à quantitate mutuatur, de qua hîc nobis eò est accuratiùs agendum, quò latiùs in reliquas Philosophiæ partes funditur hæc tractatio. Si enim Mathematicam spectes, in quanto tota est; si Physicam, non quantitatem modò considerat, sed etiam singula, de quibus agit, cum quantitate habet immixta; si Metaphysicam, nec à quanto ipsa abstinet, discretum enim invenit in numero substantiarum spiritualium, & virtuales in iisdem extensionem rimatur, vt multis Philosophis placet.

De continuo paucis quidem egit Aristoteles tum in Physicis, tum in aliis operibus; vnicam enim quæstionem tractavit 6. Physic. an corpora consistant partibus infinitè dividuis, aut punctis; sed plures in Philosophiam de natura continui quæstiones invexit malè feriata quorundam Philosophorum curiositas, quibus non tam naturam illius explicant, quàm addiscentium ingenia implicant, vt meritò & labyrinthus Philosophiæ, & crux ingeniorum dici consueverit, & verò sit. Ne tamen à communi philosophandi instituto discedere videamur, 1. examinabimus naturam continui, seu quantitatis tum secundum se, tum in ordine ad substantiam, quæremusque quid sit, & quomodo à substantia distinguatur. 2. Ipsiùs compositionem discutiemus; an ex partibus infinitè dividuis, & iis quidem potentiâ distinctis, an ex punctis physicis, aut mathematicis constet, inquiremus. Denique an puncta saltem continuantia, & terminantia admittat, definiemus.

## PARS TERTIA

### ARTICVLVS I.

#### *Natura continui aperitur.*

**Q**UATVOR in hoc articulo de quantitate examinamus ; 1. certarum vocum vim , & notionem aperimus , 2. essentiam quantitatis , 3. subiectum illius , 4. nativas illius affectiones.

#### *§. I. Notio vocum aperitur.*

1. **P**LURES hinc voces in examen vocandæ , ut quæ vis illis subfit , & notio , clariùs pateat , cuiusmodi sunt quantitas , extensio , mensura , divisibilitas , impenetrabilitas , &c.

1 1. Quantitas generatim duplex ; altera virtutis , & impropria : altera molis , & propria. Prima est gradus perfectionis vel essentialis , vel accidentalis , a quo res dicitur magna , vel parva : sic Dens dicitur esse maximus , seu infinitæ magnitudinis ob infinitas perfectiones , quas includit. Secunda est accidens physicum , per quod res dicitur habere partes extra partes , extendi loco , longa , lata , & profunda fieri. Univerſim ſumpra extensionem ſonant , vnde interroganti , quanta res ſit , examinatâ ipſius extensione , reſpondere ſolemus eſſe pedalem , bipedalem , &c.

1 1 1. Extensio est positio vnius partis extra alteram ; hinc omne quantum debet constare partibus , quæ non ſint omnes ſimul , ſed ſitu , loco , & ſpatio , aut tempore diſſitæ ; & quoniam partes poſſunt non eſſe ſimul vel loco , vel tempore ; hinc

1 1 1. Prima partitio quantitatis ſit in permanen-

# PHYSICÆ VNIVERSALIS.

tem, & successivam; illa est extensio rei permanentis in ordine ad locum, & dicitur magnitudo; hæc extensio rei successivæ in ordine ad tempus; omnis quippe quantitas habet partes extra se invicem, sed interdum simul existunt, vti sunt partes magnitudinis, interdum non simul existunt, sed vna post aliam, vti sunt partes temporis, quæ nunquam sunt simul permanentes.

v. Permanens, & successiva subdividuntur in continuam, & discretam. Continua est, cujus partes communi termino copulantur, seu cujus extrema sunt idem divisibiliter: sic baculus est aliquod continuum, quia ejus extrema sunt idem lignum divisibiliter. Discreta, cujus partes nullo communi termino copulantur: sic decem unitates in numero denario nullo communi vinculo colligantur; discretæ duplex species, numerus, & oratio, de quibus fusè part. 3. Logicæ, disp. 3. art. 1. §. 3.

v i. Quantitas permanens triplex, linea, quæ est extensio in longum: superficies, quæ est extensio in longum, & latum: corpus, quod est extensio in longum, latum, & profundum, vbi corpus sumitur pro entitate accidentaria, à qua corpus naturale dicitur trinè dimensum. De triplici hac specie quantitatis egimus part. 3. Logicæ, disp. 3. a. 1. §. 2.

v i i. Extensio, vt sic, sonat partium extraneitatem; hinc extensum dicitur, quod habet partes extra partes, inextensum, quod habet partes intra partes; sed quia partes sumuntur vel in ordine ad totum, vel ad se, vel ad locum; hinc

v i i i. Extensio æquivoca est, significat enim 1. proprietatem substantiæ in eo positam, quod habeat partes extra partes in ordine ad se, idest, quarum vna distinguitur ab altera, idcòque vocatur

entitativa, & substantiæ materialis propria. 2. Sumitur in ordine ad totum, & posita est in exigentia quadam aptitudinali, ut partes, quæ sunt in toto, certum quemdam ordinem inter se teneant, caput immediatè collo nectatur, collum humeris; quam ad substantiam pertinere postmodum ostendemus. 3. Sumitur in ordine ad locum, pro exigentia quadam occupandi locum, expellendo aliud corpus; estque vel remota, quæ substantiæ convenit, vel proxima, quæ est propria quantitatis. 4. Rursus in ordine ad locum, dupliciter sumitur, 1. pro exigentia proxima occupandi locum per extrusionem cujuslibet alterius corporis, vel alterius partis ab eadem parte loci, diciturque extensio interna quantitatis: 2. pro actuali occupatione loci cum expulsionem actuali cujuslibet corporis, aut alterius partis, diciturque extensio externa.

**I x.** Vis illa expellendi quodlibet corpus, siue aptitudinalis sit, siue actualis, dupliciter intelligitur, 1. pro vi quadam, quæ in vna parte existens, habet vim excludendi aliam partem ejusdem corporis: sic extensio existens in brachio, excludit ab eodem loco humerum, aut manum: 2. pro vi per totum corpus diffusa ad excludendum aliud corpus è suo loco: sic corpus humanum per vim extensivam, vel potius per extensionem actualem excludit quodlibet aliud corpus à loco, in quo est.

**x.** Extensio dividitur in formalem, & virtuales; prima est, quæ respondet quantitati molis, & est propria rerum corporatarum, per quam diversis loci partibus secundum diversas sui partes, easque impenetrabiles correspondent. Secunda dicitur competere substantiis spiritualibus, quæ licet sint in toto loco, & totæ in qualibet parte realiter, ta-

men quatenus coexistunt totius spatii partibus pluribus, virtualement quendam habent extensionem, quâ dicuntur in qualibet parte loci non esse totaliter, quamvis realiter totæ sint.

x i. Impenetrabilitas tertia vox est, de qua hæc accipe. Differunt impenetrabilitas, & impenetratio, penetrabilitas, & penetratio; impenetrabilitas est ipsa quantitas, prout exigit non penetrari, seu excludere aliud corpus, aut certè vnâ partem ejusdem corporis ab alia. Breviùs est impotentia recipiendi in se aliud corpus, impenetratio est actualis expulsio duarum quantitatum ab eodem loco, & accidens modale quantitatis internæ, quod potest ab ea abesse, vt patet in corpore Christi.

x i i. Penetrabilitas est non repugnantia corporis quanti ad aliud admittendum secum in eodem loco; seu capacitas obediens in corpore quanto ad recipiendum aliud corpus.

x i i i. Penetratio est duarum quantitatum, seu corporum quantorum in eodem loco simul positio.

x i v. Divisibilitas duplex, externa vnâ, & physica, quæ in actum reducitur per actualement separationem partium vnitarum in ordine ad locum: altera interna, & entitativa, quæ in actum reducitur per dissolutionem partium vnitarum substantiæ in ordine ad se: prima est propria quantitatis, secunda substantiæ materialis.

x v. Mensura duplex, passiva, & activa; de passiva egit Aristoteles 5. Metaph. de activa in Categoriis.

x v i. Passiva est res apta, vt mensuretur ab alia: activa, res apta ad aliud mensurandum, seu id, quo cognoscimus, quantum aliquid est: sic panis est mensura passiva, vlna activa. Quanquam

utraque sumitur vel aptitudine, vel actu; activa aptitudine illud est, quod potest assumi ad aliud mensurandum: activa actu, quæ mensurat aliquid actu. Passiva aptitudinalis, quæ potest assumi, ut mensureretur, diciturque mensurabilitas: passiva actualis, quæ actu mensuratur. Porro mensurare actu, nihil aliud est, quàm unius rei quantitatem ad aliam applicare, ut per eam ejus quantitas cognoscatur: sic unâ pannum mensuramus; hinc ex Aristotele mensura est id, quo cognoscimus quantum, idest, id quod aptum est, ut per ipsum alterius quantitas cognoscatur.

XV I I. Mensuratio vel fit per accommodationem unius ad aliud, cum res mensurata vel æquatur mensuræ, vel si minor est, per repetitionem mensuræ adæquatur: sic palmo ad metiendam vlnam utimur; hic autem modus est proprius numeri, nec circa continua corpora exercetur, nisi prout illis numerus aliquis inesse apprehenditur; utrumque modum Philosophus complexus est his verbis: *cognoscitur autem quantum, ut quantum, aut uno, aut numero*, idest, aut unâ mensurâ applicatâ, aut ejusdem repetitione.

§. II. *An dentur partes entitative in substantia materiali, & accidentibus independenter à quantitate.*

FVERUNT in ea sententia plures è Thomistis, ut dicerent, substantiam nullas planè habere partes, nisi dependenter à quantitate, contra quos fit

I. A S S E R T I O. Res corporatæ, etiam sejunctæ à quantitate, habent partes entitativas, adeo-



que possunt dividi à Deo. Probatum factâ hac hypothefi ; fumatur lignum bipedale fuâ affectum quantitate , tum in duas partes A , & B dividatur , ferveturque Lutetiæ pars A , & pars B Romam deportetur ; deinde destruatut vtriufque quantitas , fervatâ vtriufque fubftantiâ , fic argumentor : Pars materiæ , quæ erat fub pede A , diftinguitur realiter à parte materiæ , quæ erat fub pede B quantitatis : ergo datur in fubftantiis corporatis pars , & pars entitativa independenter à quantitate. 2. Subftantia corporea exigit extendi ad exigentiam quantitatis : ergo id habet ratione partium entitativarum , quas in fe continet. Probatum antecedens , in hoc differt fubftantia corporea à fpirituâli , quod corporeæ repugnet eſſe totam in toto loco , & totam in qualibet parte. 3. Partes fubftantiæ funt fubjectum , & cauſa materialiſ partium quantitatis : ergo dantur partes in fubftantia priores partibus quantitatis : ergo funt independentes à quantitate.

Dices 1. fubftantiam materialeſ habere quidem partes virtuales ex ſe , at formales accipere à quantitate. Contra : partes illæ vel funt virtuales per ſe , vel non ; ſi primum , ergo nunquam poſſunt fieri formales per quantitatem , quia quod eſt virtualiter tale per ſe , nunquam poteſt fieri tale per aliud : ſic Deus , qui eſt virtualiter diſcurſivus , nunquam poteſt fieri formaliter diſcurſivus. Ratio eſt , quia virtualiter illud tale eſt , quod in ſe perfectiori modo continet quod ab aliis formaliter continetur cum imperfectione : ergo illud nunquam natura deprimit ad imperfectam poſſeſſionem formæ cum jactura nobilioris.

Dices 2. partes eſſe priores quoad entitatem , non quoad rationem partium. Contra : dum quantitas

educitur ex materia , non tota educitur ex qualibet parte substantiæ , quia singulæ partes in tota substantia reciperentur , adeoque penetrativè ponerentur : ergo singulæ educuntur ex singulis partibus substantiæ , in quibus postmodum recipiuntur : ergo substantia habet partes entitativas independentes à quantitate.

Confirmatur 1. quia ratio reddi non posset , cur unica aquæ guttula non posset naturaliter quantitatem tantam in se recipere , quantam integer fluvius. 2. Consecret aliquis sacerdos mediam hostiam , tunc dividetur substantia panis , alterâ quidem mediâ parte superstite , alterâ verò destructâ , licet non dividatur quantitas , accidentia siquidem per consecrationem non pereunt. 3. Agens condensatum , v. g. ignis in furnulis Chymicorum ideo majorem vim exerit , quia sub minori extensione plures partes entitativas substantiæ igneæ continet ; at ubi dantur plures , & plures partes , ibi datur ratio partium.

II. A S S E R T I O. Partes entitativæ aliæ sunt extra alias tum in ordine ad se , tum in ordine ad totum independentes à quantitate , adeoque habent extensionem entitativam ex se. Prob. 1. materia secundum diversas sui partes , ut dixi , recipit , & sustentat in se diversas quantitatis partes : ergo præsupponitur materia extensa ad receptionem quantitatis ; quod enim inextensum est , non potest extenso congruere , & aptari. 2. Sublatâ quâlibet quantitate corporis humani , adhuc tamen caput jungeretur immediatè collo , & collum humeris : ut de facto ordinantur partes corporis Christi in Eucharistia.

Dices , sublatâ quantitate , manere partes ordi-

natas per accidens, quatenus ex se sunt indifferentes, ut ordinatæ sint, vel confusæ. Contrà: ordinatio, quæ manet in partibus, est effectus formalis alicujus causæ formalis, non quantitatis, quæ non existit: ergo alicujus, quod in substantia per se insit. 2. Quodlibet ens naturale exigit partium ordinationem ad operationes obeundas; nam deordinatio partium repugnat modo operandi cujuscunque entis corporei: ergo & modo essendi, quia modus operandi sequitur modum essendi.

III. ASSERTIO. Substantiæ materiales, quantitate sublatâ, habent partes extra partes, non tantum in ordine ad se, & ad totum, sed etiam in ordine ad locum, & extensionem aptitudinalem, quâ petunt aliquem situm. Prob. 1. substantia materialis exigit divisibiliter extendi: ergo seclusâ quantitate, exigit esse in spatio divisibili. 2. Deus auferat quantitatem à cælo, tunc vel partes illius entitativæ remanebunt in proprio situ, vel confluent in punctum; at non confluent in punctum; vel enim confluerent in punctum per instans, at implicat dari motum localem in instanti; vel per aliquod tempus: ergo eo tempore, quo in punctum partes coibunt, substantia materialis occupabit locum sine quantitate, & concipietur à nobis substantia sine quantitate. 3. Substantia materialis, habet partes eodem modo inter se unitas, quo sunt unitæ sub quantitate: ergo cum sub quantitate habeant tantam extensionem ad locum, quantam habet ipsa quantitas, tunc sequitur substantiam illam per se, sublatâ etiam quantitate, non tantum extensionem internam in ordine ad totum, quæ in unione partium ordinata consistit, sed etiam externam: non quantitativam quidem, sed enti-

rativam ad locum habituram : ita ut una pars uni parti respondeat , & altera alteri.

### §. III. *Dilununtur objecta.*

**O**B I I C I E S I. ex Aristotèle 1. Phys. tex. 15. Sublatâ quantitate , substantia omnis indivisibilis est : ergo materia non habet partes entitativas distinctas independenter à quantitate.

Resp. dist. ant. Divisione physicâ , & quantitativâ , concedo : metaphysicâ , & entitativâ , nego ; physicam divisionem voco , quæ à quantitate oritur , & quâ unum corpus per gladii sectionem divideretur : metaphysicam , quâ per vim angelicam v. g. una pars ab altera separaretur , & hæc convenit substantiæ materiali , etiam dum à quantitate separatur. Prima oritur proximè ab extensione quantitativa in ordine ad locum. Secunda ab extensione entitativa partium materialium , in ordine quidem ad locum , sed remotè ; de prima agit Aristoteles , quam substantiæ à quantitate sejunctæ negat.

Instabis : Ergo partes substantiæ materialis essent divisibiles , & mensurabiles sine quantitate.

Resp. dist. Divisione , & mensurabilitate internâ , seu entitativâ , concedo : externâ , seu quantitativâ , & physicâ , nego.

Objicies 2. Omnis compositio est inter materiam , & formam : partes entitativæ non se habent ut materia , & forma.

Resp. 1. falsissima major , in compositione qualitatum. Resp. 2. dist. maj. Compositio physici compositi constitutiva , concedo : entitativa , nego ; hæc enim resultat ex partibus materiæ integra-



liter, & entitativè componentibus.

Instabis 1. Si partes entitativæ, sublatâ materiæ quantitate, tenent eundem situm, habent figuram: figura resultat ex terminatione extensionis quantitativæ: ergo &c.

Resp. dist. majorem: Si tenent eundem situm quantitativum, concedo: entitativum, nego; ad sublatâ quantitate, habent partes materiæ situm duntaxat entitativum, quatenus non exigunt esse in indivisibili; non autem situm quantitativum, à quo oritur figura, aut ut alii volunt, habent figuram organicam, non situalement, quæ à quantitate petitur.

Instabis 2. Saltem essent in eodem corpore plures lineæ, & superficies.

Resp. dist. Plures entitativæ, esto; nam substantia cum extendatur loco sine quantitate, habet suam superficiem entitativam, etiam à quantitate sejuncta: quantitativæ, nego; unde si quantitas materiæ jungitur, tunc erit duplex superficies, una entitativa, altera quantitativa.

Objicies 3. Materia individuatur à quantitate ex D. Thoma: ergo non habet partes independentes à quantitate.

Resp. dist. ant. Sensibiliter, & quoad nos, concedo: secundum se, nego. Audi D. Thom. opusc. 32. de materiæ individuatione sic loquentem: *Materia, inquit, sub certis dimensionibus dicitur esse causa individuationis, non quod dimensiones causent individuum; accidens enim non causat suum subjectum, sed quod per dimensiones certas demonstratur individuum, quod non esset nobis cognitum, si non esset affectum quantitate; nullo enim sensu percipi posset, si non coextenderetur loco externo, quod*

*obtinet beneficio quantitatis.* Porro quod dixi de substantia corporea, idem dicendum de accidentibus corporatis, quæ præter gradus intensiōis, & remissionis, habent partes entitativas accidentales sine substantia.

Quæres 1. Si corpus spoliaretur quantitate internâ, & externâ, quid de eo fieret?

Resp. 1. Tunc non exigeret amplius, saltem proximè, & immediatè loco externo impenetrabiliter coextendi, quia non haberet amplius quantitatem internam, quæ est radix proxima extensionis externæ; exigeret tamen remotè, quia quodlibet corpus naturale exigit naturaliter justam extensionem, sine qua forma cujusque compositi non potest vires suas exerere, nec operari. 2. Partes illius remanerent in eodem loco, in quo antea erant; possent tamen à Deo, vel ab Angelo contrahi in minus spatium, aut ad majus extendi, prout esset plus, vel minus materiæ. 3. Non tamen confluëret in punctum, quia punctum dari non potest. 4. Foret penetrabile, & invulnerabile, quia careret quantitate externâ, à qua oritur proxima impenetrabilitas; quin etiam Christi corpus cum sua quantitate interna penetrabile est, & corpora beatorum post resurrectionem, licet quantitatem habitura sint, se penetrabunt.

Quæres 2. an corpus spoliatum suâ quantitate visibile foret?

Resp. Si destructâ quantitate, maneret color extensus, videri posset, nisi fortè in angustissimum spatium se contraheret. Item si maneret gravitas, projectum deorsum vsque ad centrum terræ sine ullo sui incommodo perveniret; quin & haberet ubi internum, partesque illius servarent eundem situm,

nec foret tota substantia in eadem parte.

Quæres 3. à quo eadem substantia ad talem, vel talem extensionem localem determinaretur?

Resp. 1. à majori, vel minori multitudine partium entitativarum, quas haberet; major enim multitudo partium, cæteris paribus, requirit majorem tum quantitatis, tum extensionis molem, sicut minor multitudo minus exigit quantitatis; non tamen ita convenit certa, ac determinata extensio materiæ alicui, quin naturaliter vel paulò major, vel paulò minor eidem possit attribui. Ratio est quòd eadem quantitas condensari, & rarefieri naturaliter possit: ergo huic rarefactioni, & condensationi materia accommodari debet.

Resp. 2. sumendam esse determinationem raritatis, vel densitatis, præsertim à forma substantiali; nam quòd in igne materia sit admodum rara, non tam id habet ratione sui, quàm ratione formæ igneæ, quæ per se cùm sit multum calida, & sicca, hanc raritatem exigit, cui materia se accommodat. Contrà verò materia, quæ subest formæ terræ, majorem patitur condensationem, quia ejusdem exigentiæ se accommodat; hinc si materia existeret ab omni forma prorsus spoliata, nullam per se haberet raritatem, aut densitatem, nisi quam Deus vellet ei tribuere.

§. IV. *In quo posita sit essentia quantitatis.*

I. OBSERVATIO. CERTA sunt duo. Primum, essentia quantitatis, non est posita in extensione partium in ordine ad totum, aut inter se, aut ad locum, si sit tantum entitativa extensio, quia triplex illa extensio convenit substantiæ ma-

teriali independenter à quantitate, vt jam probatum est.

Secundum, non est quoque posita in extensione externa, quâ corpus occupet locum, aliudque actu expellat ab eodem, vel pars vna alteram ejusdem corporis, quia in Eucharistia corpus Christi existit indivisibiliter quoad locum, & simul penetrativè cum speciebus sacramentalibus; ita vt in eadem parte spatii sint omnes partes corporis Christi. non tantum cum sua quantitate, sed etiam cum quantitate panis, & vini; at corpus Christi non habet extensionem externam, quæ est modus quidam ab interna realiter distinctus, qui proinde manente internâ quantitate, mutatur, vt in rarefactione, & condensatione contingit. Superfunt itaque quatuor sententiæ: prima Alberti Magni respondentis essentiam quantitatis in mensura: secunda in divisibilitate: tercia in impenetrabilitate. Dixi in impenetrabilitate, non in extensione impenetrabilitatem exigente: ita Oviedo in Metaph. contr. 7. quarta denique in radice impenetrabilitatis, hoc est, in extensione aptitudinali per ordinem ad spatium, quæ sit exclusiva alterius corporis, aut alterius partis ejusdem ab eodem loco, in quo est altera pars. Rem vt definiam, quatuor principia statuo.

Primum, quælibet forma virtualiter multiplex habet multos effectus formales. Patet exemplo albedinis, dum vnitur parieti; facit enim eum 1. album, 2. visibilem, 3. similem alteri parieti albo, 4. non nigrum.

Secundum, hinc inter effectus formales ejusdem formæ, alii sunt primarii, alii secundarii; primarius est, ex quo secundarii nascuntur, sive sint re-



lativi, five negativi. Primarius à forma inhærente subjecto etiam divinitus separari non potest, quia formam esse in, est formam informare, informando autem tribuit effectum formalem, saltem primarium: secundarii effectus sunt separabiles; alii quidem naturaliter, ut relativi: sic destructo termino, paries non denominatur amplius actu relatus, sed referibilis, quia tunc respicit terminum, ut possibilem, non ut actu existentem: alii supernaturaliter, ut negativi.

Tertium, quælibet forma definiri solet per effectum formalem primarium, quia definitio est explicatio essentia, essentia principium proprietatum; primarius porro effectus est principium, & radix aliorum effectuum: ergo per illum essentia formæ debet explicari.

Quartum, itaque quantitatis essentia, cum forma accidentalis sit, debet explicari per effectum illius formalem primarium, non per secundarios; hoc pronuntiatum sequitur ex aliis. His observatis, sit

**VNICA ASSERTIO.** Essentia quantitatis consistit in extensione partium interna, cum exigentia proxima impenetrabilitatis: seu quemadmodum alii loquuntur, in eo, ut per se sit loci proximè repletiva, tribuatque proximam aptitudinem essendi in loco repletivè; hæc enim eodem recidunt. Ita Suares Granat. disp. 4. Metaph. sect. 2. n. 21. & sect. 4. per totam, Comptonus disp. 9. Metaph. sect. 2. Conimbricenses, & alii.

Probat: Essentia cujusque formæ in eo constituitur, quod est primarius illius effectus, ex 3. principio: effectus primarius quantitatis est dare extensionem partium, cum exigentia proxima impenetrabilitatis, seu esse per se loci repletivam, &

tribuere proximam aptitudinem substantiæ corporatæ essendi in loco repletivè : ergo essentia quantitatis consistit in extensione partium interna, cum exigentia impenetrabilitatis. Probatur minor : si quis esset alius effectus primarius quantitatis, vel extensio entitativa partium substantiæ in ordipe ad totum, aut ad se, aut ad locum, cum exigentia remota replendi locum, vel mensura, vel divisibilitas, vel impenetrabilitas, aut impenetratio, quâ expellat corpus aliud à loco, in quo est : nihil horum primarius quantitatis effectus esse potest.

Non triplex extensio entitativa, quia partes materiæ entitativæ habent illam trinam extensionem ex vi naturæque sua, etiam sublatâ quantitate, ut jam confectum est superiori §.

Non mensura, 1. quia mensura est id quo cognoscimus quantum à posteriori : ergo mensura supponit quantitatem, adeoque illius essentiam. 2. Omnis mensura est vel activa, vel passiva : neutra est primarius effectus quantitatis ; non activa, quia potest dari quantitas, quæ non actu mensuret ; non passiva actualis, quia nihil potest esse sine sua essentia ; at quantitas potest esse, & non mensurari actu, si sit penetrata ; non aptitudinalis, quia prius est quantitatem esse extensam, quàm aptam commensurari ; vlna enim ideo est commensurabilis alteri vlnæ, quia extensa : ergo mensurabilitas est effectus secundarius, qui proinde supponit primum.

Non divisibilitas, quia supponit unitatem extensionis ; prius est enim partes esse vnum unitate continuationis, quàm posse separari ; separabilitas enim supponit unitatem, & extensionem aptitudinalem.

Non impenetratio, tum quia potest separari à quantitate; duo enim corpora divinitus possunt esse penetrata: tum quia impenetratio supponit impenetrabilitatem à qua fluit.

Non impenetrabilitas, quia supponit extensionem loci repletivam: ergo superest, ut effectus primarius quantitatis sit extensio partium, cum exigentia proxima impenetrabilitatis, adeoque essentialiam quantitatis constituat.

Porro licet quantitas dicat in suo conceptu extensionem cum exigentia impenetrationis, non tamen dat necessarium impenetrationem actualem, sed proximam tantum aptitudinem ad illam, quam connaturaliter exigit, ut radicale illius principium; cum enim partem unam substantiæ extra aliam ponat in ordine ad locum, exigit consequenter, ut partes ejusdem corporis non se penetrent, adeoque altera alteram à suo loco expellat; non efficienter quidem, quia quantitas non est actiuosa, ut pote sequens materiam, sed formaliter duntaxat; dum alia aliam expellit resistendo, quantum potest alteri, ne loco suo dimoveatur.

Quæres, an extensio externa distinguatur ab vbi interno, quo res constituitur in loco?

Respondeo probabilius non distingui, quia frustra distingueretur; quidquid enim convenit extensioni externæ, convenit vbi interno; extensio est modus quantitatis internæ, quo partes materiæ ita ordinantur ad locum, ut una respondeat vni parti loci, altera alteri; at hoc ipsum facit vbi internum: ergo &c.

Objicies 1. Si extensio externa non distinguitur ab vbi, quo res constituitur in loco, sequitur mutato vbi, mutari extensionem externam.

Resp. concedo, quid inde?

Instabis 1. Patet experientiâ manere eandem extensionem externam in corpore, quod ab vno loco ad alterum transit.

Resp. dist. Manet eadem æquivalenter, concedo: realiter nego; duo quippe sunt effectus extensionis externæ, 1. ponit partes corporis extra alias partes, 2. partes ita positas facit esse hîc potius, quàm alibi. Extensio quoad primum effectum manet eadem æquivalenter, non realiter; quoad secundum, nec realiter, nec æquivalenter manet eadem.

Instabis 2. Corpus potest acquirere novam quantitatem, nec acquirere novum vbi, v. g. in accretione: ergo acquirere novam quantitatem, non est acquirere novum vbi.

Resp. dist. antecedens: Corpus potest acquirere novam quantitatem internam, & non acquirere novum vbi, esto: novam quantitatem externam, nego; potest enim corpus acquirere novas partes quantitatis internæ sine nova extensione externa, si partes illæ condensentur, nec plus loci occupent, quàm priores; sæpius autem acquiritur nova extensio externa sine nova quantitate interna: v. g. cum lac rarefit rarefactione strictâ in lebere per ebullitionem, tunc non sunt plures partes materiæ, sed novum vbi internum majus acquiritur, amisso priori.

### §. V. *Diluantur objecta.*

**O**B I E C T I O N E S I. Substantia materialis habet extensionem partium per se tum in toto, tum in loco: ergo non habet à quantitate, vt proximè exigat replere locum.

Resp. dist. ant. Extensionem in loco entitativam, concedo : quantitativam, nego ; distingue itaque duplicem exigentiam in corpore in ordine ad locum ; remotam, quæ oritur à partibus entitativis materiæ, & proximam, quæ oritur ab interna quantitate ; sicut duplex est divisibilitas, altera entitativa, altera quantitativa.

Instabis : Extensio proximè loci repletiva supponit extensionem in ordine ad locum, aut ad totum.

Resp. dist. Entitativam, concedo : quantitativam, nego ; nam extensio entitativa partium materiæ exigit tantum remotè impenetrationem, quantitativa verò proximè.

Objicies 2. Qualitates spirituales habent extensionem aliquam in anima, quamvis careant quantitate.

Resp. dist. Entitativam, concedo : quantitativam, nego ; habent enim gradus intensiōis, & remissionis, prout sunt magis, vel minus intensæ ; at gradus illi non habent partes distantes à se invicem, saltem proximè, & impenetrabiliter per se, & ex natura sua, unde earum augmentum non dicitur extensio, sed intensio.

Objicies 3. Accidens cum sit reale ; habet essentiam realem, & positivam : quantitas est accidens reale : ergo debet habere essentiam realem, & positivam.

Resp. concedo totum ; atqui esse aptum ad replendum locum cum exigentia proxima impenetrabilitatis, non est quid positivum, sed tantum non repugnantia ad occupandum locum.

Resp. dist. subsumptum : Non est positivum quid nomine tenus, concedo : reipsa, nego ; licet enim per aptitudinem aliquando significetur non

repugnantia, hîc tamen innuitur forma positiva ad occupandum locum; sicut dum dicitur ignis esse calefactivus, non tantum mera non repugnantia ad calefaciendum significatur, sed forma etiam realis, & positiva, per quam fit aptus in actu primo ad producendum calorem. Itaque effectus primarius quantitatis non consistit in hac negatione, sed in conceptu positivo fundante negationem actualis penetrationis.

Instabis: Accidens inhærens subjecto, non illud tantum reddit aptum ad formam, sed actu illam habet, & sibi vendicat: sic albedo facit subjectum actu album, quantitas actu substantiæ inhæret: ergo denominat illam actu occupantem spatium, non tantum aptam, ut illud actu occupet.

Resp. dist. majorem: Non illud reddit aptum ad ipsum accidens, quod inhæret, ejusque effectum formalem primum habendum, concedo: aptum ad alteram formam, ad quam disponit, seu effectum secundarium, nego. Certè dum intellectus reddit animam actu habentem intellectum, simul reddit & aptam ad habendam, seu eliciendam intellectionem: ergo à pari quantitas, dum reddit substantiam actu habentem quantitatem, reddit etiam aptam ad habendam ubicationem circumscriptivam, seu extensionem actualem in ordine ad spatium; & ita duplicis generis sunt formæ, aliæ quæ ita informant subjectum, ut formaliter dent actualitatem, cujusmodi est calor, qui denominat subjectum actu calidum: aliæ dant tantum aptitudinem proximam ad formam actualem, ut intellectivum ad intellectionem.

Objicies 4. Ex Aristotele mensura est id, quo cognoscimus quantum. Item continuum definitur

quod est divisibile in ea, quæ insunt.

Ad 1. dist. Mensura est id, quo cognoscimus quantum, ut proprietate, concedo: ut essentiâ, nego: quare dum Philosophus probat orationem esse quantitatem ex ratione mensuræ, probat tantum à posteriori, non à priori.

Ad 2. Ibi quoque describit Philosophus quantitatem per nativam affectionem, quæ oritur ex extensione; non enim dividitur, nisi quod est unum.

Instabis: Prius est esse divisibile, quam esse extra se, quia esse extensum est habere partes extra partes, sive partium pluralitatem potentialem; at pluralitas partium potentialis supponit divisibilitatem, quia ita se habet pluralitas partium potentialis ad divisionem potentialem, sicut pluralitas partium actualis ad divisionem actualem; at partium actualis pluralitas supponit divisionem actualem: ergo partium pluralitas potentialis supponit divisibilitatem, seu divisionem possibilem.

Resp. cum Suare Lusit. partes habere extra partes, considerari posse, vel prout sunt unum, vel prout plures esse possunt. Porro habere partes primo modo constituit extensum, & est prius pluralitate potentiâli, quia prius est quantum esse unum, quam posse dividi; divisibilitas ergo antecedit hoc quod est habere partes extra partes, prout possunt esse plures, concedo: prout sunt quid unum, in quo consistit ratio continui, nego.

Ex dictis duo colliguntur. 1. Quantitas rectè definitur, accidens extensum proximè exigens impenetrabilitatem, seu proximè repletivum loci, per se impenetrabiliter. 2. Causa quantitatis efficiens est res, quæ magna est, suamque quantitatem ex se emanativè profundit pro exigentia formæ: finalis

est generatio , & conservatio naturalis corporis ; quia quantitas est prima inter dispositiones ad generationem , & conservationem corporis naturalis requisitas : formalis definitione explicatur : materialis ex qua , sunt partes magnitudinis , vel potius partes entitativæ materiæ : materialis , in qua recipiatur , superest indaganda. Quare sit

§. V I. *De causa materiali in qua , & distinctione quantitatis.*

**D**V o hîc examinanda. Primum , quomodo quantitas à substantia distinguatur. Secundum , quodnam sit subiectum illius immediatum , an sola materia , an forma , an totum.

Duplex est circa distinctionem quantitatis sententia ; altera Aristotelis , quæ distinguit quantitatem realiter à substantia : altera veterum Stoïcorum , quam Nominales , & Cartesius sequuntur , quæ distinguit tantum virtualiter ; hæc autem principia statuunt Nominales post Stoïcos.

I. Quantitas non differt à substantia , nisi conceptu , quia substantia , ut est ens per se subsistens , dicitur substantia : ut habet partes extra partes , quantitas.

II. Quantitas non tantum est idem cum qualibet substantia materiali , sed cum qualibet re quantâ ; hinc color est quantitas , quatenus habet partes extra partes.

III. Penetratio quantitatum ad invicem non repugnat , ratione quantitatis præcisè , sed talis quantitatis , quia quædam sunt quanta , quæ non sunt apta informare aliud , ut substantiæ materiales individua , quædam verò apta , ut color , & calor.

IV. Hinc



IV. Hinc quantitas in substantiis corporatis est impenetrabilis; in formis, & accidentibus est penetrabilis.

V. Quantitas tum interna, tum externa, est idem realiter cum substantia. Haftenus Nominales.

I. A S S E R T I O. Quantitas interna distinguitur realiter à substantia. Ita D. Thom. 1. part. q. 77. art. 2. & in 4. d. 12. quæst. 1. a. 1. post Aristotelem. Probatur 1. ex Aristotele 5. Metaph. text. 18. ubi omnia accidentia vult esse quanta per accidens, & 7. Metaph. cap. 1. quantitatem vult non esse substantiam, sed substantiæ inesse. Denique 1. Phys. tex. 15. ait substantiam non esse per se divisibilem, sed per quantitatem, probâtque contra Parmenidem, & Melissum docentes omnia esse vnum ens, substantiam, & quantitatem saltem esse duo: *Si substantia, & quantum sunt, duo sunt*, quæ argumentatio nulla est, nisi quantitas à substantia realiter distinguatur. Respondent esse duo saltem potentiâ, quia substantia divisibilis est, quatenus quanta. Deinde ad alia loca, aiunt Aristotelem dubitanter locutum.

Prob. ratione: Ita se habet substantia in ratione potentiæ passivæ, sicut in ratione potentiæ activæ: sed non est activa, nisi mediantibus qualitatibus realiter distinctis: ergo nec receptiva actuum accidentalium, nisi mediante aliquo accidente passivo realiter distincto. 2. Si materia esset extensa per se ipsam sine quantitate superaddita, nunquam fieri posset inextensa localiter; quia quod ex se tale est, quandiu manet, semper tale est, nec potest non esse tale: v. g. quia materia per se ipsam corporea est, nunquam potest fieri incorporea: substantia materialis potest fieri aliquando inextensa

localiter : ergo per se ipsam non est extensa , sed per quantitatem sibi additam , quam amittit.

Respondent materiam esse extensam localiter , non per se ipsam præcisè , sed per se ipsam , & aliquid negativum , quod nihil aliud est , quàm carentia virtutis penetrandi suas ipsius partes , quæ virtus est accidens supernaturale.

Contrà 1. In hoc peccant Nominales , quòd supernaturale accidens admittant , vt fugiant naturale distinctum realiter à substantia , quod est multiplicare miracula sine necessitate. 2. Virtus illa penetrandi , per quam supernaturaliter concessam , corpora penetrabilia fieri dicuntur , non potest tollere repugnantiam naturalem , quam habent duo corpora , respectu ejusdem spatii simul occupandi , sicut nulla qualitas potest tollere repugnantiam , quam habent duæ formæ v. g. calor , & frigus , respectu ejusdem subjecti simul informandi. 3. Illa substantia non est per se ipsam extensa , quæ modò est sub minori , modò sub majori extensione , vt patet in condensatione , & rarefactione : ergo substantia non est per se ipsam extensa , sed per quantitatem realiter distinctam. 4. Ea distinguuntur realiter , quorum vnum existit separatim ab alio : quantitas tum interna , tum externa existit sine materia in Eucharistiæ sacramento , in quo destructâ substantiâ panis , & vini remanet quantitas utriusque tum interna , tum externa. 5. In Eucharistia datur intensio , & remissio qualitatis ; at intensio fit in eadem parte subjecti : ergo debet esse aliquod subjectum illius intensificationis ; non aliud , quàm quantitas , siquidem substantia perit : ergo existit quantitas sine materia.

Respondent manere solam quantitatem acciden-

tium propriam , non panis , & vini.

Contrà 1. Concilium Tridentinum sess. 13. docet manere accidentia panis ; at vnum ex accidentibus panis est quantitas : ergo remanet quantitas panis. 2. Videmus eandem omnino quantitatem , consecratione peractâ , quæ erat antè ; at erat antè quantitas panis. 3. Quæro , cur accidentia tam constantem vnionem inter se retineant , vt ad motum vnus moveantur alia , nisi quia in eadem quantitate , tanquam in communi subiecto inhærent , quâ mediante , propriæ substantiæ antea vniebantur. 4. Sequeretur , cùm accidentia illa simul sint loco , multas habere quantitates naturaliter simul in eodem loco , & se penetrare.

Si dicas quantitati accidentium non repugnare penetrabilitatem , quæro , cur potius quantitates accidentium sese invicem penetrant , quàm substantiarum ? 5. Non posset in speciebus produci calor , nisi ex præexistente quantitate , vt ex subiecto educeretur , aut certè crearetur ; si primum , ergo quantitas distinguitur à calore ; nam qualitas non educitur ex qualitate : si secundum , ergo calor fit ex nihilo per creationem ab igne , quod naturaliter repugnat ; & aliunde Nominales multiplicant miracula. Deinde cur dicas Deum ad præsentiam ignis , creare species , cùm ignis eodem modo agere in ipsas post consecrationem , atque in res alias videatur ? hinc

Tria colliguntur , 1. quantitas distinguitur à substantia , distinctione maioris realitatis , quia separata à substantia , existit. 2. Quantitas externa potiori iure distinguitur realiter à substantia , quia quantitas externa distinguitur realiter à quantitate interna , potèstque abesse , remanente quantitate

internâ , vt patet in corpore Christi. 3. Alia accidentia non redduntur quanta , nisi quatenus in ipsa quantitate recipiuntur , quæ suum formalem effectum ipsis tribuit. De distinctione quantitatis tantum , jam de subiecto illius.

**I I. A S S E R T I O.** Materia prima est subiectum receptivum quantitatis immediatè. Prob. 1. vel totum distinctum à partibus sumptis collectivè , vel materia simul , & forma substantialis , vel sola materia est subiectum quantitatis. Non totum à partibus collectivè sumptis distinctum , quia fictitium quiddam est. Non materia simul , & forma , 1. quia forma substantialis simul est penetrativè cum materia , cui vnitur : ergo duo quanta naturaliter simul essent penetrativè. 2. Anima rationalis est incapax effectûs formalis quantitatis , utpote spiritalis , & uniusmodi. 3. Dum corrumpitur equus , remanet eadem quantitas cum aliis accidentibus , quæ erant in equo , licèt forma equi corrumpatur : ergo superest vt materia sit subiectum quantitatis inherens.

**I I I. A S S E R T I O.** Reliqua accidentia immediatè in ipsa quantitate , & eâ mediante , in materia recipiuntur. Hæc assertio sequitur ex dictis ; hinc

Tria colliguntur , 1. dum quantitas materiæ inheret , eadem formæ adhæret. 2. Forma substantialis materialis fit formaliter extensa , & proximè divisibilis ex adhæensione quantitatis , quatenus recipitur in materia formaliter extensa , & divisibili. 3. Quantitas divinitus à materia separari potest , vicissimque materia à quantitate.

Obijcies 1. Materia separata à quantitate interna exigeret adhuc replere locum impenetrabiliter.

Resp. dist. Remotè , hoc est ratione extensionis

entitativæ, concedo : proximè, nego ; nam abesset quantitas interna, à qua habet, vt sit loci proximè repletiva.

Instabis 1. Ad id sufficit externa quantitas, in qua recipiantur accidentia.

Resp. nego ; Debet enim afferri subiectum immediatum reliquorum accidentium, cuiusmodi non potest esse quantitas externa ; ipsâ siquidem corpus Christi caret : ergo superest, vt accidentia recipiantur in interna quantitate.

Instabis 2. Quidni materia sit subiectum immediatum aliorum accidentium ?

Resp. quia in Eucharistia, accidentia panis, & vini essent sine subiecto ; destruitur enim materia panis, & vini.

Obicies 2. in 2. assertionem : Quantitas totum denominat : ergo toti inhæret.

Resp. dist. conseq. Adæquatè, nego : inadæquatè, concedo : sic scientia vni animæ inhærens, denominat totum hominem scientem.

Obicies 3. Ergo accidens esset subiectum immediatum accidentium. Concedo, quid inde ? vt enim qualitates activæ instrumenta sunt, quibus mediantibus, forma substantialis agit, ita quantitas est instrumentum passivum, quo mediante, cætera accidentia materia recipit.

Instabis : Quantitas reciperet in se qualitates contrarias successivè, quod est vnius substantiæ proprium ex Aristotele.

Resp. dist. Quantitas reciperet, vt instrumentum materiæ, concedo : vt causa principalis, nego ; at substantia recipit, vt causa principalis.

§. VII. *Proprietates quantitatis.*

**P**R I M A , substantia est apta recipere reliqua accidentia corporata , quantitate intermediâ , hinc substantia pati naturaliter non potest ab agente , nisi per quantitatem sit localiter extensa.

Secunda , physica , & quantitativa divisibilitas , de qua antea.

Tertia , mensurabilitas tum passiva , tum activa ; nulla enim magnitudo mensurare , aut mensurari potest , nisi quanta sit.

Quarta , extensio externa , seu occupatio loci actualis , quæ est modus vocationis circumscriptivæ , superadditus quantitati internæ , & ab eadem realiter distinctus. Prob. quia hoc sufficit , ut corpus quantum extendatur in ordine ad spatium , vel cum impenetrabilitate in nostris corporibus , vel cum penetrabilitate , ut in corporibus beatorum.

Quinta , per localem extensionem fit rarefactio , aut condensatio corporum naturalium.

Sexta , æqualitas , aut inæqualitas ; æqualia enim definiuntur , quorum quantitas est una , id est , tanta in vno , quanta in altero : inæqualia , quorum quantitas diversa.

Septima , finitudo , & infinitudo , saltem potentialis ; finitum enim est , quod mensurari potest ; infinitum quod non potest.

Octava , partium homogeneitas , quæ sunt ejusdem rationis cum toto : dantur tamen partes homogeneæ in qualitatibus , de quibus alias agemus.

## ARTICVLVS II.

*An quantitas constet partibus sine fine  
dividuis.*

**S**TATVS quæstionis est, an quantitas constet  
partibus individuis, an sine fine dividuis.

§. I. *Prænotanda quedam.*

I. **N**ON hîc est quæstio de quibuscumque partibus  
continui, sed de minutissimis tantum, in  
quas ultimò distingui, & dividi à Deo, vel ab An-  
gelo potest; non de quibuscumque individuis, cujus-  
modi sunt exiguæ arenulæ, quæ moraliter dicun-  
tur indivisibiles, quia ob tenuitatem, & exilitatem  
suam arte humanâ secari non possunt; sed vel de  
individuis mathematicis, quæ nullam habent ex-  
tensionem realem, aut virtualem, vel de physicis  
punctis, quæ virtualem quidem habent, quamvis  
realem respiciant.

II. Punctum definitur ab Euclide, cujus nulla pars  
est; pars autem id, in quod dividitur quantum;  
hinc genus indivisibiliū triplex, aliud, quod non  
habet partes sensibiles: aliud, quod non habet intel-  
ligibiles: aliud, quod utrasque habet, sed non mu-  
tuò separabiles.

III. Punctum mathematicum illud est, quod  
nullas partes habet, realiter separabiles, aut men-  
te, & sensu assignabiles, ideòque caret partibus,  
tum realibus, tum virtualibus.

IV. Punctum physicum est, quod non habet par-  
tes realiter separabiles, sed virtualiter tantum, vi-

de dicitur inflatum, & extensum virtualiter.

v. Indivisibile aliud secundum quid, quod secundum aliquam dimensionem; non secundum omnem est divisibile: sic linea est indivisibilis secundum longitudinem, quia sic constat ex punctis, & potest dividi juxta Mathematicos: sic superficies est indivisibilis secundum profunditatem, licet divisibilis sit secundum latitudinem, & longitudinem; hinc docent Mathematici corpus constari ex superficiebus, superficiem ex lineis, lineam ex punctis, quibus nihil potest dari magis indivisibile mathematicè, quia puncti nulla pars est, aut actu, aut potentiâ. Indivisibile simpliciter est, quod nullam dicit extensionem.

vi. Indivisibile mathematicum aliud copulans, aliud terminans; copulans medias continui partes necit; terminans extremas continui partes finit: sic termini lineæ sunt puncta; superficiei, lineæ; corporis superficies.

vii. Quantum potest comparari vel ad se ipsum, vel ad aliud corpus, quod sit vel ejusdem rationis, vel diversæ; hinc dicitur continuum, contiguum, & deinceps, seu consequens. Consequens est, quod est post aliud, aliquo tamen mediante. Contiguum, quod ita est post aliud, ut nihil mediet: contigua sunt, inquit Aristoteles, quorum extrema sunt simul, id est, immediatè junguntur; contiguitas verò est rerum quantitate separatarum contactus. Continuum, cujus partes ita simul junguntur, ut proprios terminos non retineant, nec habeant, nisi vnum commune extremum, qualis est superficies, continuitas, partium cohærentia: sic continuus est baculus, cujus partes inter se cohærent; hinc quæ continua, eadem sunt entitas,



sed divisibiliter; quæ contigua, realiter actu distinguuntur. Porro hîc non agitur de partibus rei essentialibus, materia nempe & forma, sed de integrantibus. His positis

Triplex de compositione continui sententia celebrior. Prima Zenonis, vt refert Aristoteles 6. Phys. docentis, constare ex solis indivisibilibus mathematicis; corpus v. g. constari ex superficiebus, superficiem ex lineis, lineam ex punctis. Secunda recentiorum, qui volunt componi ex punctis physicis realiter quidem, sed non virtualiter individuis; habent enim virtualement extensionem instar Angeli, aut animæ rationalis, idcôque vocantur inflata, turgida, & angelica. Tertia Aristotelis docentis, coalescere ex partibus sine fine dividuis.

### §. II. Refellitur sententia Zenonis.

VNICA AS- **C**ONTINUUM non potest consistere ex punctis mathematicis. Hæc assertio est contra Zenonem, Pythagoram, Democritum, & alios plures, docerûrque ab Aristotele lib. 8. Phys. cap. 1. tex. 1. ἀδύνατον εἶναι τὸ συνεχὲς, οἷον γεωμετρικὴν ἐκ σημείων, ἢ περὶ ἢ γεωμετρικὴν μὲν συνεχὲς, ἢ σημειοειδὴς ἀδιαίρετον: fieri non potest, vt ex indivisibilibus aliquid constet, vt linea ex punctis; siquidem linea continuum est, punctum autem individuum. & 1. de gener. tex. 8. ex punctis non fit quantum.

Probatur ratione, 1. linea non componitur ex punctis mathematicis: ergo nec vllum continuum permanens. Prob. ant. si linea constaret ex punctis, vel essent continua, vel contigua, vel deinceps; nihil horum dici potest: ergo linea non con-

ſtat ex punctis mathematicis. Prob. minor per partes ; continua ſunt ea, quorum extrema ſunt vñum : contigua , quorum extrema ſunt ſimul : deinceps , inter quæ nihil intercedit ejusdem generis, quamvis aliquid diverſi generis interjici nihil vetet ; atqui punctorum in linea extrema non poſſunt eſſe vñum , aut ſimul , quia carent extremis , cùm nec partes reales , nec virtuales habeant : nec deinceps , quia quæ ſunt deinceps , contigua ſunt alicui intermedio ; at puncta non poſſunt eſſe contigua : ergo nec deinceps.

Prob. 2. Si quantitas conſtaret ſolis punctis , corpora continua eſſent extenſa , & non eſſent ; eſſent , vt ſupponitur ; non eſſent , quia quidquid extenſum eſt , habet partes extra partes ; at puncta non habent partes extra partes , quia non habent partes virtuales , nec reales : ergo non poſſunt eſſe extra ſe mutuò : ergo nec corpora ex iisdem conſtata.

Prob. 3. Quod tangitur totum ab altero toto totaliter , non eſt extra illud alterum totum ; at totum punctum A , tangeretur à toto puncto B totaliter : ergo punctum A , non eſſet extra punctum B ; hinc illud placitum , inextenſum additum inextenſo , non facit extenſum : at punctum A eſt inextenſum : ergo additum puncto B , non facit extenſum , ſed cum ipſo ponitur penetrativè : ergo non facit magis extenſum ; quod enim non facit tale , non facit magis tale.

Reſpondent punctum A à puncto B non tangi , ſed eſſe immediatum , quia tangi eſt proprium quidem corporum ; punctorum autem , eſſe immediata.

Contra : Vel punctum A ſe toto eſt immediatè junctum puncto B , vel tantùm ex parte ; ſi ſe toto ,

ergo est penetrativè cum ipso ; si ex parte , ergo punctum erit mathematicum , & non erit.


Prob. 4. argumento invictissimo Aristotelis : Si quantitas constat ex punctis mathematicis , sequitur motum velocem esse æqualem tardo : falsum consequens : ergo & antecedens. Prob. sequela , factâ hypothese , sit linea duplex constans utraque octo punctis , tum lineam A percurrat testudo , & lineam B Achilles , ita ut duplò velociùs moveatur Achilles , quàm testudo. Inde sic arguo : eodem tempore testudo lentigrada iter æquale conficiet cum Achille duplò velociùs properante ; nam cum Achilles tria confecerit puncta , vel testudo confecerit tria , vel duo , vel vnum cum dimidio ; si vnum , aut duo , mutatur hypothesis , quia supponitur Achilles duplò velociùs currere ; si tria , ergo motus velox erit æqualis tardo ; si vnum cum dimidio , ergo datur pars in puncto mathematico , quia testudo supponitur vnum punctum cum dimidio percurrisse , quod dici non potest.

Hoc argumentum supponit tria principia. 1. Æquæ velocia sunt , quæ idem spatium eodem tempore conficiunt. 2. Inæqualis sunt velocitatis , quæ vel inæqualia spatia æquali tempore conficiunt , vel spatia æqualia inæquali tempore. 3. Motus est continuus , non interjectis morulis discretus , & quasi intercisus ; quare qui stant à Zenone , respondent motum constare morulis , & saltatiunculis instantaneis , quasi interceptis. Sed

Quæro , ubinam sit testudo , sive quieverit illa , sive saltitârit , cum Achilles tertium punctum percurrit ? deinde morulas illas suo loco resurabimus.

Respondent alii testudinem confecisse vnum punctum , aut duo , nec tamen inde sequi , quòd Achil-

les non duplò celerius testudine sensibilibiter motus sit, quia cùm punctum sit ferè nihilum, non potest facere differentiam motus ad sensum. Contrà, suppono Achillem conficere centum millia punctorum, tum certè motus in sensum incurreret.



Prob. assert. eadem argumentis mathematicis. Primum sit, sequeretur lineam non posse dividi in duas partes æquales, si constet tantum tribus, aut quinque punctis; at docet Euclides lineam posse dividi in duas partes æquales.

Secundum, diameter esset æqualis semicirculo, quod dici non potest. Prob. illa sunt æqualia, quæ ex totidem punctis constant; diameter, & semicirculus totidem punctis constarent; nulla enim essent puncta in semicirculo, à quibus lineæ ductæ, ac propagatæ, in totidem puncta diametri non caderent: ergo diameter esset æqualis semicirculo.

Tertium, ponamus ex quatuor punctis continuum quadratum constitui; quæro, quâ ratione se quatuor hæc puncta tangant; nam se tangere debent, ut constituent quadratum perfectum: ponamus itaque punctum A, & punctum B, se tangere immediatè, & constituere lineam diametralem; duo alia puncta C, & D sunt sibi immediata, vel non? non potest negari, quòd se tangant, aliàs quadratum non facerent: at se tangere non possunt; vel enim se tangerent se totis, & adæquatè, & ita se penetrarent: vel inadæquatè tantum, & ex parte,

& ita essent puncta mathematica, & non essent, quia in illis daretur pars, & pars.

Denique linea diametralis quadranguli, quæ ab angulo vno ad alterum angulum transversa ducitur, esset æqualis lineis costalibus, cū tamen sit longior. Pater sequela, quia nulla linea duci potest ab vna costa ad alteram, quin transeat per aliquod punctum lineæ diametralis.

### §. III. *Refellitur secunda sententia.*

I. ASSERTIO. CONTINUUM permanens continuo. C stare non potest ex punctis physicis, iisque inflatis. Prob. illā sententia non est admittenda, quæ rerum spiritalium naturam, & proprietates cum materialium natura, & proprietatibus confundit, nec solvit difficultates, aut saltem æquè gravibus implicatur: talis est sententia, quæ puncta physica, eaque inflata admittit: ergo non est admittenda.

Prob. prima pars minoris: Extensio virtualis propria est substantiæ spiritualis. Item nativa ejus affectio est esse totam in toto, & totam in qualibet parte spatii: utramque hanc affectionem sibi vendicant puncta physica: ergo &c.

Prob. secunda pars: Nempe quod non solvat difficultates, aut æquè gravibus implicetur. 1. Linea constans ex septem punctis inflatis, non posset dividi in partes duas æquales physicè, & realiter, quod est contra Euclidem.

Respondent satis esse, si linea per assignationem extrinsecam in duas partes æquales ad sensum dividatur.

Contrà: Euclidis pronuntiatum de linea secabili

in duas partes ab eodem non restringitur. 2. Quamcumque in partem chartæ forfices immittam, experientiâ patet, eandem secari posse, at non ita res fieret in linea ex septem punctis composita; nisi enim in commissuram indivisibilium inciderent, chartam neutiquam secarent. 3. Vnum punctum, dum tangeret alterum, tangeret secundum aliquid sui: ergo secundum se totum, & ita penetrativè esset cum ipso, nec faceret majus.

Respondent, tangere tantum secundum partem virtuales. Contrà: tangit realiter, & secundum se totum: ergo cum secundum id, quo se tangunt, sint simul duo puncta inflata, superest, ut secundum se tota simul sint, adeoque se penetrent. Rursus quæro, utrum pars virtualis unius puncti possit esse penetrativè cum alia? si potest: ergo & aliæ omnes, quia una pars non est magis impenetrabilis, quam altera: ergo punctum, quod tangit aliud punctum, & secundum unam partem virtuales est penetrativè cum alia parte puncti, ponetur etiam penetrativè secundum alias.

Denique concoquant inflatores oportet absurda omnia, quæ in sententiam Aristotelis intorquentur. 1. Quòd Deus per æternitatem nunquam venire possit ad ultimam partem unius aciculæ. 2. Ex eadem acicula velum tegendo toti orbi par confieri possit: Eadem autem sequuntur ex punctis inflatis; Deus enim applicet omnipotentiam minuendæ semper, & semper unius indivisibilis extensioni, nunquam ad minimam extensionem totâ æternitate perveniet. 2. Deus posset ita inflare punctum, ut tegeret totum mundum, aut plures alios, si essent. 3. Ex unico indivisibili ceræ mollissimæ vinculum tenacissimum confici posset, quo ita quis

arctè ligaretur, vt per divinam potentiam frangi non posset; quid quod Parisina civitas rarefacto vel vno puncto ita obtegi vndequaque, ita muniri posset, vt omnes ictus tormentorum bellicorum nullo negotio eluderet? quid quod contactum globi, & plani nihilo facilius explicant?

Prob. vltimò, quia indivisibile virtualiter extensum debet occupare spatium extensum formaliter, ac dividuum; at de illo spatio eadem argumenta fieri possunt, quorum solutio in sententia Aristotelis tam difficilis est.

Respondent, id non sequi, quia punctum illud est tantum virtualiter extensum.

Contrà: Omnis extensio virtualis explicari debet per ordinem ad formalem: ergo assignandum est aliquid formaliter extensum; & verò cur anima rationalis dici debet extensa virtualiter per totum corpus, nisi quòd per entitatem simplicem realiter correspondet corpori realiter extenso, & se perinde habet in ordine ad corpus, ac si esset formaliter extensa?

#### §. IV. Statuitur sententia Aristotelis.

I. A S S E R - **Q**UANTITAS continua permanens  
TIO. componitur ex partibus sine fine  
dividuis. Hæc assertio sequitur ex dictis; vel enim  
quantitas constat ex punctis mathematicis, vel ex  
physicis, vel ex partibus sine fine dividuis; non ex  
punctis mathematicis, vt confectum est §. 2. non  
ex physicis, vt probatum 3. ergo superest, vt ex  
partibus sine fine dividuis constet. Verum, vt asser-  
tionis veritas clariùs pateat, sit

I. O B S E R V A T I O. Quantitas spectari potest;

vel absolutè, & secundùm se, vel respectivè ad formam physicam corporis mixti, aut simplicis. Porro hîc agitur de quantitate secundùm se, aut quatenus est in corporibus simplicibus, quorum partes cùm sint homogeneæ, non videntur exigere definitam extensionem, sed sub qualibet mole quantitatis possunt existere. Secus evenit in formis mixtorum organicorum, quæ certam, ac definitam extensionem sic exigunt, ut sub minori stare nequeant: v. g. potest esse tam exigua pars ligni, ut si ampliùs dividatur, desinat forma ligni, teste Aristotele I. Phys. text. 38. Si, inquit, *neceſſe eſt omne corpus, aliquo ablato, minus fieri; carnis autem quantitas definita eſt ratione paucitatis, manifestum eſt ex minima carne, nullum corpus, quod sit caro, secretum iri; alioquirit minus carne minimâ*: ergo ex Aristotele caro ita potest esse exigua, ut manens caro dividi ulterius nequeat, quamvis ulterius dividi possit in corpora minima, quæ jam non sint caro.

I I. O B S E R V A T I O. Tria in quantitatis divisione spectanda, 1. id quod dividitur, seu divisum, 2. id quo dividitur, 3. ipsum dividens.

I I I. O B S E R V A T I O. Partes, in quas continuum dividi potest, aliæ sunt communicantes, aliæ non communicantes; aliæ vni certæ æquales, aliæ proportionales, sive inæquales vni certæ; aliæ aliquotæ, & aliquantæ.

Communicantes sunt, quæ in aliquo communicant, seu quarum vna continetur in altera: sic in linea bipedali semipes, & pes communicant; semipes enim in pede, pes in linea bipedali continetur.

Non communicantes, quarum vna tota est ex-



tra aliam , v. g. in linea bipedali duo pedes ; si enim dividantur , non possunt in duos alios pedes subdividi , licet possint in quatuor semipedes , qui dicuntur partes communicantes.

Æquales vni certæ sunt , quæ cum parte aliqua assignata habent æqualitatem , v. g. pedes , & palmi , qui in vna assignantur ; aut si dividatur linea in octo octavas : tunc enim in partes æquales vni certæ , nempe vni octavæ dividitur.

Proportionales sunt , in quas ita dividitur continuum , vt proportionaliter crescant , vel decrescant : v. g. si eadem linea dividatur in duos pedes , tum duo illi pedes in duos semipedes , deinde quisque semipes in duas medietates , & ita deinceps , tunc linea dividetur in partes proportionales , & proportionaliter decrescientes. Dicuntur proportionales , quia licet ex qualibet divisione partes resultent inter se æquales , sunt tamen dimidio minores partibus illis , quæ ex prioribus divisionibus supersunt. Vt enim pes ex aliqua priori divisione residuus , se habet ad bipedem , ita semipes ex consequenti divisione residuus , se habet ad pedem , quia est utrobique proportio in æqualitate ; hinc definiuntur , quarum prima se habet ad secundam , vt secunda ad tertiam. 2. crescunt vt duo , quatuor , octo , & è contra decrescunt.

Aliquotæ sunt , quæ aliquoties repetitæ , & multiplicatæ adæquant finitam multitudinem : sic linea duorum pedum est pars aliquota mensuræ duodecim pedum , quia sexties repetita lineam duodecim pedum æquat ; hinc Euclides 3. lib. element. definit partem aliquotam : est magnitudo minor maioris , cum minor metitur maiorem.

Aliquantæ sunt , quæ totum suum non metiuntur.

& adæquant, cujusmodi est linea duorum pedum in linea quinque pedum; hinc pars vniversaliter sumpta definitur, quæ repetita totum vel adæquat, vel superat; quæ definitio convenit vnivocè partibus aliquantis, vel aliquotis. Denique partes aliquantæ aliæ sunt simpliciter æquales, aliæ secundum quid; illarum eadem est longitudo, latitudo, & profunditas: harum verò, licet eadem sit longitudo, non est vel eadem latitudo, vel certè eadem profunditas; hinc primæ definiuntur, quarum est eadem prorsus mensura: secundæ verò, quarum non est eadem omnino mensura.

I. A S S E R T I O. Quantitas non potest dividi in partes proportionaliter in infinitum crescentes. Pater in linea decem pedum, quæ non potest ita dividi, vt primò tollatur vnus pes, tum duo, deinde quatuor, post octo, denique sexdecim, quia constat tantum decem pedibus ex suppositione.

II. A S S E R T I O. Continuum potest dividi in partes æquales vni certæ non communicantes, non tamen in eodem genere dimensionis, secundum quam fit divisio. Prob. v. g. si lignum bipedale secundum latitudinem, & bipedale secundum longitudinem dividatur in infinitum secundum longitudinem in partes proportionaliter decrecentes, ex qualibet divisione secundum longitudinem facta, supererunt partes æquales vni certæ non communicantes secundum longitudinem, in qua fit divisio; at non secundum latitudinem, ideòque dicuntur æquales secundum quid, quia ipsarum eadem est longitudo, & diversa latitudo.

III. A S S E R T I O. Continuum est divisibile in partes minores, & minores in infinitum, hoc est, finitas quidem semper actu, sed quæ perpetuò sine

sine proportionaliter decrefcere poffint. Prob. 1. ex Aristotele. Deinde quia quantitas nec conftat ex punctis mathematicis, nec phyficis: ergo conftat partibus sine fine dividuis. 3. Argumento mathematico; defcribatur linea E, F, fic argumentor: In ea linea defignari poffunt partes novæ, & novæ in infinitum proportionaliter decrefcetes: ergo quantitas poteft dividi in partes minores, & minores in infinitum. Prob. ant. factâ hac hypothefi: producantur in infinitum parallelæ A, B, C, D, tum ex puncto G, funis fucceffivè ducatur per fingulas partes lineæ fuperioris A, B, inde fiet, vt lineæ E, F, finitæ novæ fempër defignentur partes, nec tamen vnquam ad extremum venietur, quia funis G, H, fupponitur fempër traduci per puncta A, B, quæ nunquam coëunt cum parallela inferiori C, D, quod tamen deberet contingere.

I V. A S S E R T I O. Continuum in partes minores, & minores in infinitum à folo Deo dividi poteft. Prob. experientiâ, quia agens naturale non poteft lignum, nifi in certas partes dividere.

V. A S S E R T I O. Quantitas non eft divifibilis in infinitum, etiam à Deo, in partes vni certæ fimpliciter æquales. Prob. 1. quia fi ex linea fex pedum demas fex pedes, nihil ampliùs dividendum fupererit: 2. daretur quantitas actu infinita, fi quidem haberet partes non tot quin plures, vni certæ conftanter assignatæ æquales.

V I. A S S E R T I O. Continuum permanens eft divifibile in partes proportionales communicantes in infinitum, hoc fenfu, quòd posteriores in prioribus includantur. Prob. quia lignum bipedale v. g. divifibile eft in duas medietates, & duæ illæ in duas alias medietates, & fic in infinitum: atqui partes

ejusmodi sunt proportionales, quia posteriores sunt minores prioribus, proportionem inæqualitatis; deinde sunt communicantes, quia posteriores in prioribus includuntur.

V I I. A S S E R T I O: Continuum permanens etiam divisibile est in infinitum, in proportionales non communicantes, quarum posteriores non sint inclusæ in prioribus. Prob. sit quantum bipedale, cui detrahatur primò semipes, tunc restabit pes cum semipede; jam detrahatur pedis quarta pars, deinde octava, tum decima sexta; certè nunquam exhaurietur illud quantum, & tamen partes illæ erunt proportionales simul, & non communicantes; proportionales quidem, quia erunt minores, & minores proportionaliter: non communicantes verò, quia posteriores non includuntur in prioribus.

Quæres, an aliquod continuum divisibile sit infinite in partes non communicantes unâ certâ majores?

Resp. ita censere Mathematicos; idque probant in angulo contingentia, & in angulo rectilineo; nam juxta eorum principia, angulus rectilineus divisibilis est in infinitum in angulos minores rectilineos non communicantes, quorum quilibet major est angulo contingentia quolibet assignato.

### §. V. *Diluantur objecta.*

O B I E C T E S I. Vnitas addita unitati, facit numerum, licet vnitas non sit numerus: ergo punctum additum puncto, potest facere extensionem, licet ex se nullam habeat.

Resp. nego consequ. Disparitas est, quod unitates faciant quantitatem discretam, puncta conti-

quam ; at discreta quantitas sumitur à multitudine , & distinctione ; continua ab extensione , seu magnitudine : duæ porro vnitates possunt facere multa , quia vt duo faciant numerum , satis est , si sint hoc , & hoc , siue materiale , siue spiritale , siue extensum , siue inextensum : duo verò puncta non possunt facere magna ; nihil enim facit magnum , nisi idem sit extensum , habeâtque partes extra partes.

Objicies 2. Ex his componitur individuum , in quæ resolvitur : resolvitur in indivisibilia ; aliàs ne vna quidem aquæ guttula posset ab Angelo totâ æternitate in omnes partes dividi. 2. Vna guttula aquæ posset obtegere centum millia mundorum , quia dividi posset in tot superficies , quot. tegendis iisdem sufficerent.

Resp. nego minorem , ad probationem , concedo totum ; quid enim dissimulem naturam ipsius continui in eo positam , vt constet partibus sine fine dividuis ? ergo partes illius , quâlibet factâ divisione , remanent adhuc continuæ , atque adeo dividuæ , quid in eo implicantia ? nonne docent Philosophi , nullam posse dari creaturam adeo perfectam , vt perfectior dari non possit , quia illud est de ratione entis finiti , vt infinitum esse non possit ? quid quod Angelus , licet per totam æternitatem , materiam in partes dividat , nunquam tamen ultimò dividet , quia ultimò dividendo destrueret , non potest autem destruere , quia annihilare non potest.

Instabis , quis concipiat ? Resp. Aristoteles lib. 6. Phys. D. Augustinus , D. Thomas , & Albertus Magnus concipere ; deinde dum agimus de divisione in partes proportionales , easque infinite dividuas , concedimus id tantum fieri posse à Deo ,

quia formæ substantiales non possunt naturaliter stare, nisi sub certa quantitate, quam si per divisionem amittant, illico à corpore suo abeant necesse est. 3. Quia nullum agens naturale potest aliud corpus in infinitum dividere, sed ubi ad certas partes venit, cessat agere, quia vim ejus actuosam suâ tenuitate, ictumque effugiunt.

Instabis 2. Punctum ex Aristotele 1. Topic. c. 14. se habet in linea, sicut vnitas in numero: numerus resolvitur in vnitates individuas: ergo & linea in puncta individua.

Resp. dist. majorem: Punctum se habet, vt vnitas, quatenus est principium, aut terminus in numero, concedo: sic enim punctum, saltem virtuale est principium, aut terminus lineæ juxta Aristotelem: ita vt sit perinde indivisibile, ac discretum, sicut vnitas, nego.

Objicies 3. Quantitas non constat partibus infinitis potentiâ: ergo non est infinitè dividua. Probant. quod constat partibus infinitis potentiâ, est infinitum actu: quantitas non est infinita actu: ergo non constat partibus infinitis potentiâ.

Resp. 1. nego maj. sed ad summum est infinitum potentiâ. 2. Dist. quod constat partibus infinitis potentiâ, vni certæ constanter assignatæ æqualibus, & non communicantibus, esto: quod constat partibus proportionalibus, & inter se communicantibus, nego; at quantitas constat tantum partibus potentiâ infinitis proportionalibus, & inter se communicantibus.

Instabis 1. Infinitum definitur ab Aristotele, ex quo semper accipientibus, restat aliquid accipiendum: talis esset quantitas ex nostris principiis: ergo quantitas esset infinita.

Respondeo, hanc definitionem, ut jacet, esse infiniti, ut sic, prout abstrahit ab infinito potentiâ, & infinito actu, adeoque posse convenire quantitati, quæ est infinita potentiâ. Porro ut infinito actu, seu categorematico hæc definitio conveniat, sic concinnari debet, infinitum actu est, ex quo semper accipientibus, restat semper aliquid accipiendum vni parti certæ constanter assignatæ æquale, & non communicans, quo sensu non convenit quantitati, de qua hîc agimus.

Instabis 2. Quantitas dividatur in id omne, quod continet. Resp. non posse.

Instabis 3. Frustra est potentia, quæ non reduci-  
tur ad actum.

Resp. dist. ad actum, saltem inadæquatum, concedo: adæquatum, nego; at potentia quantitatis reduci potest ad actum inadæquatum, hoc est, in partes actu semper finitas dividi.

Instabis 4. Quantitas potest dividi in omnes partes, quas continet.

Resp. dist. In omnes distributivè, concedo: in omnes collectivè, nego; dicitur autem quantitas distributivè dividi, cum in has, vel illas determinatè partes, putà in mille, bis mille dividitur, quarum singulæ rursus in alias distribui possint; collectivè autem divideretur, si factâ divisione, collectio quædam possibilium partium in vnam summam conflueret; at hæc collectio chimærica est, quia infinitum potentiâ, quâ tale, implicat reduci ad actum adæquatum, est enim hoc, & aliud.

Instabis 5. Deus potest facere, quidquid potest facere: ergo potest dividere continuum in omnia, in quæ ipsum dividere potest, quâ factâ divisione,

nihil utique dividendum restabit.

Resp. 1. hoc argumentum esse ex falso supponente, quia non datur in quantitate *quidquid*, *omne*, *totum*, seu *collectio*. Ratio est, quia ejusmodi voces colligunt, ac determinant; at in infinito potentiâ nihil colligi potest, quia indeterminatum est ex natura sua, utpote hoc, & aliud.

2. Dist. Deus potest facere successivè, quidquid potest facere successivè, concedo: potest facere simul quidquid potest facere successivè, nego; Deus enim potest dividere continuum in omnes partes, in quas dividi successivè potest; at non potest facere, ut simul sint omnia divisa, sicut non potest facere, ut duo dies sint simul, licet facere possit, ut sint successivè, hoc est, unus post alterum.

Instabis 6. Deus potest facere simul, quidquid potest simul facere; hoc ergo faciat, tunc quantitatem reducet ad indivisibilia; nam si semel posuerit omnes simul divisiones continui, quas potest ponere simul, nulla restabit ponenda.

Resp. dist. Quidquid potest facere simul distributivè, concedo: collectivè, nego; 2. nego maj.

Instabis 7. Hæc propositio est identica: ergo summè vera.

Resp. nego conseq. Non enim quælibet propositio identica est semper vera, ut hæc; *Antichristus justus est Antichristus justus*.

Instabis 8. Deus cognoscit simul collectivè omnes divisiones possibiles quantitatis: ergo potest simul & collectivè ponere.

Resp. dist. ant. Simultaneitate objecti, nego: simultaneitate cognitionis, concedo; cognoscendo enim quantitatem, cognoscit, ut est: at habet partes



partes potentiâ distinctas, non actu; hinc cognoscit divisibiles in non tot, quin plures.

Instabis 9. Sunt in mente divina omnes divisiones possibiles: ergo videt vsque ad indivisibilia.

Resp. dist. Eo modo, quo sunt possibiles ex parte objecti, concedo: aliter nego; at ex parte objecti sunt possibiles, vt hoc, & aliud, ac proinde divisio continui exhauriri non potest: ergo Deus non videt vsque ad indivisibilia.

Objicies 4. Omnes quantitates saltem essent æquales; æqualia enim sunt, quæ totidem habent partes.

Resp. dist. Quæ totidem habent partes, & tantas, seu vni certæ constanter assignatæ æquales, concedo: quæ totidem habent, & non tantas, hoc est, proportionales, nego; deinde duæ quantitates non habent partes tot quot nisi determinatas, nec quæ sunt infinitæ potentiâ, comparari debent.

Instabis 1. Quantitas est divisibilis in partes æquales vni certæ; nam linea bipedalis dividi potest in duos pedes, pes in duos semipedes.

Resp. dist. Æquales vni certæ constanter assignatæ, respectu singularum divisionum, nego: vni certæ pro qualibet divisione, concedo; dum enim bipedalis dividitur in duos pedes v.g. & pedalis in duos semipedes, semper mutatur pars vni certæ æqualis, quia duo pedes sunt partes communicantes inclusæ in toto bipedali, licet æquales sint inter se: quare vt valeret antecedens, sic informandum esset; quodlibet continuum divisibile est in partes æquales vni certæ constanter assignatæ, & non communicantes, quæ propositio falsa est, adeoque neganda.

Objicies 5. In quolibet composito dantur prima

componentia : prima componentia sunt indivisibilia : ergo &c.

Resp. dist. majorem : Prima componentia vel absolutè , vel comparativè ; concedo : absolutè semper , nego majorem , & dist. minorem : prima componentia absolutè sunt indivisibilia , esto : prima tantùm comparativè , nego ; at in quantitate dantur tantùm prima componentia comparativè , quia nulla pars est componens , quæ non possit ulterius dividi : sic in linea trium pedum , primus pes dicitur componens , sed comparativè tantùm , quia idem potest dividi in duos semipedes ; hinc prima componentia continui sunt communia.

Resp. 2. dist. Dantur prima componentia in toto substantiali , concedo : in toto integrali , nego ; totum enim integrale infinitè dividuum est , non substantiale , quod constat ex materia , & forma , ut primis componentibus.

Objicies 6. Si lapis politus , & vndeunque æquabilis in planum vitreum decidat , illud dividet in omnes partes : ergo usque ad indivisibilia.

Resp. nego ant. Vel enim nullo modo frangat , quia non est potior ratio unius partis , quàm alterius , aut si frangat in aliqua parte , Dei erit partem dividendam determinare , quia non est potior ratio unius , quàm alterius.

Objicies 7. Dum flamma successivè comburit chartam , ita ut prius partes priores , deinde remotiores inflammet , dividit tandem chartam in suas omnes partes : ergo usque ad indivisibilia. Prob. ant. cum flamma comburit partem priorem , dividit eam à parte posteriore , & superstitè , quia hæc jam est ignis , alia verò charta. Confirmatur : quia

# PHYSICÆ VNIVERSALIS. 51

ignis à charta divisus est, siquidem heterogenea non continuantur inter se.

Resp. dist. Dividit divisione propriè dictâ, & actu distincto, seu discreto, nego: divisione impropriè dictâ, & actu per omnes partes continuo, concedo; duplex itaque divisio, impropriè dicta, quâ quidpiam, dum comburitur, dicitur dividi actu continuo per omnes partes, ita ut charta non comburatur in hoc aliquo, sed in hoc, & alio, & quidem motu continuo, quatenus non hoc aliquid chartæ sit ignis, sed hoc, & aliud. Divisio propriè dicta est, quâ vnum separatur ab alio in aliquo tempore determinato, & ut hoc ab hoc; at in nullo tempore determinato præcisè hæc chartæ pars discreta fuit ab illa parte ignis, quia flamma nunquam sic attingit mediam hujus chartæ partem, ut non plus, vel minus combusserit, quàm mediam. Ratio est, quòd nihil hujus chartæ simul comburat permanenter: ergo quamlibet assignaveris, ut mediam, non combussit tantum, sed aliquid aliud, aut certè aliquid illius partis comburendum superest: ergo tunc nondum verum est, quòd charta sit divisa in mediam partem, vel quòd jam totam flamma combusserit, incipiâtque vicinam partem comburere: sed vel tunc combussit. plus, vel minus, quàm medium.

Hæc doctrina quatuor principia supponit: 1. in continuo etiã successivo vna pars non distinguitur actu ab alia: 2. quod sit motu continuo, non habet esse determinatum, id est, non est hoc aliquid, sed hoc, & aliud: 3. motus continuus est, qui non habet negationem posterioris motus ejusdem rationis: 4. cum motus continuus non habeat partes actu distinctas, id quoque quod per illum

producitur, non habet partes actu distinctas.

Instabis 1. Dum partes chartæ successivè comburuntur, distinguuntur inter se actu : ergo propriè dividuntur. Prob. ant. quæ habent diversam formam substantialem, distinguuntur actu : tales sunt successivè partes chartæ, nempe forma chartæ, & ignis.

Resp. dist. maj. Quæ habent diversam formam substantialem, tanquam hoc aliquid, & motu discreto, concedo: tanquam hoc, & aliud, & motu continuè successivo, nego; at dum comburitur charta, non comburitur hoc aliquid chartæ in eo præcisè sistendo, sed hoc & aliud successivè, quia est in hac, & in aliis sequentibus partibus; itaque nulla fit divisio partium. Deinde cum comburitur charta, nondum est forma ignis in charta, sed fit, & incipit esse, sicut forma chartæ est desinendo, hoc est, desinit: unde id quod videtur, dum charta comburitur, nec est ignis simpliciter, nec charta sed est ignis in fieri, & charta in desinendo, vel potius est vnum totum, quod fit ignis, & desinit esse charta.

Instabis 2. Dum partes chartæ inflammantur, quæ propinquior est flammæ comburenti, ante aliam remotiorem inflammatur.

Resp. dist. Quæ propior est, ante aliam inflammatur, ut hoc, & aliud, concedo: ut hoc aliquid determinatè, nego.

Instabis 3. Ignis, dum comburit primam medietatem, comburit & secundam: ergo comburit totam paleam simul.

Resp. dist. conseq. Totam simul divisibiliter, concedo: simul indivisibiliter, nego; comburit enim totam simul actione divisibili, & continua-

tivâ, non indivisibili, & instantaneâ: ita dicitur aliquis simul totum aliquod opus confecisse, non quòd in instanti confecerit, sed quòd sine interruptione confecerit.

Instabis 4. Si forma ignis sisteret in primo pede chartæ, primus pes distingueretur à secundo: ergo licet ibi non sistat, tamen distinguitur.

Resp. nego conseq. Nam si sisteret in primo pede, daret illi esse certum, ac determinatum, & ita separaret primum pedem à secundo, adeoque aliam differentiam numericam acquireret, priori amissâ; at quandiu morus continuatur, tandiu nihil est, quod sit hoc tantum, sed omnia sunt, hoc, & aliud. Quin etiam licet sisteret in primo pede, & materia esset adhuc continuata, esset adhuc una continuativè, quia haberet duas formas in variis partibus non actu distinctis, sed distinguibilibus.

Instabis 5. Angelus numeret singulas partes, quæ comburuntur, nonne numerabit infinitas, aut certè ultimam indivisibilem?

Resp. non posse numerari id quod non est; at non est vlla pars actu in continuo, quæ sit distincta; deinde cum in nullo momento constet chartam in duas medietates esse divisam, utique non poterit dicere Angelus in tempore determinato, charta divisa est in duas medietates.

Instabis 6. Cum ultimò combusta est charta, nonne numeravit partes singulas?

Resp. nequaquam; dicitur enim ultimò absumi charta, quatenus non potest fieri ulterius combustio. At, inquires, nonne Deus saltem videt ultimam partem combustam? Resp. non videre, quia non videt tanquam hoc aliquid, sed tanquam hoc, & aliud, nisi fortè de parte determinata intelligas.

Objicies 8. Datur quantitas in partes vnâ certâ majores divisibilis : ergo à fortiori in partes vni certâ æquales. Prob. ant. angulus rectilineus acutus est aliqua quantitas ; at potest dividi infinitè in angulos rectilineos , semper majores angulo contingentia ; ergo datur quantitas infinitè dividua in partes vnâ certâ majores. Prob. minor ex Euclide , 3. elem. prop. 16. vbi demonstrat , quòd angulus contingentia quocumque angulo rectilineo sit minor. In locum , inquit , inter rectam lineam , & peripheriam comprehensum , altera recta non potest cadere , & angulus contingentia , qui continetur tangente rectâ , & peripheriâ , minor est omni angulo rectilineo. Ratio est , quòd angulus contingentia sit pars rectilinei ; pars autem semper est minor toto : deinde non potest fieri ex angulo contingentia , vel minimus rectilineus , licet ex quolibet angulo contingentia possit fieri semper minor alter angulus contingentia , dato scilicet majori circulo , in quo fiat contactus.

Prima responsio est Pellerarii contra Clavius , qui negat angulum esse quantitatem , sed vult tantum quantitatis esse affectionem ; angulus enim est inclinatio linearum ; inclinatio autem est proprietas quantitatis.

Resp. 2. transeat , angulus sit quantitas , nego ideirco angulum rectilineum aut majorem , aut minorem , aut æqualem esse angulo contingentia ; Ratio est , quia angulus contingentia , & rectilineus sunt quantitates diversi generis ; at non fit comparatio inter quantitates diversi generis : sic angulus factus ex linea circulari non habet proportionem , aut comparisonem cum angulo facto ex lineis rectis. Audi Euclidem. Rationem , inquit ,

id est, proportionem, dicuntur habere, quæ multiplicata, superare se mutuo possunt, velinea duorum, aut trium pedum, & linea centum pedum; non habent autem proportionem, quæ quantunvis multiplicata, se superare non possunt, talis est finita linea, & infinita, talis etiam angulus contingentiae, & quilibet rectilineus; nam angulus contingentiae, quantumvis multiplicetur, nunquam potest adæquare angulum minimum rectilineum.

Instabis ex eodem Euclide, duabus magnitudinibus inæqualibus propositis, si à majori auferatur magis, quàm dimidium, & ab eo quod reliquum est, magis detrahatur, quàm dimidium, & hoc semper fiat, relinquetur tandem magnitudo, quæ minor erit propositâ minore magnitudine.

Confirmatur ex duobus numeris inæqualibus; v. g. octonario, & binario, quia si ab octonario abstuleris magis, quàm dimidium, nempe quinarium, & rursum magis, quàm dimidium, nempe binarium, relinquetur vnitas proposito numero minori minor: ergo à pari, propositis duobus angulis inæqualibus, nempe rectilineo, & angulo contingentiae, si auferatur à rectilineo magis, quàm dimidium, & ita continuè ex reliquis partibus semper plus, quàm dimidium, relinquetur tandem aliquis angulus rectilineus minor angulo contingentiae.

Resp. Euclidem Euclidi conciliandum; at loco jam citato docet rectilineum, & angulum contingentiae inter se non proportionari; aliunde verò hoc loco docet duas magnitudines inæquales proportionari inter se, & maiorem posse infra minorem minui. Quare dist. si sint magnitudines, quæ inter se proportionem habeant, concedo: secus,



nego. Porro angulus rectilineus, & angulus contingentiae non habent proportionem; hinc

Colligunt Mathematici hoc paradoxum: aliqua quantitas, nempe angulus contingentiae, potest continuè, & infinitè augeri; & altera quantitas, nempe angulus rectilineus, infinitè minui, & tamen illius augmentum, quantumcumque sit, semper minus erit hujus decremento.

Objicies 9. Si quantitas partibus constaret infinitè dividuis, nunquam posset spatium 20. pedum percurri. Prob. quod est in infinitum divisibile, non potest percurri, nisi partes infinitae percurrantur, quia motus est successivus: ergo prius currens pervenit ad medietatem, quam ad finem. Rursus cum prima illa medietas in alias dividi possit, & ita deinceps, prius debet attingere primam medietatem, quam secundam, & primam medietatem primae medietatis, quam secundam; at quod est infinitum, non potest percurri, nisi tempore infinito. En Achillem Zenonis.

Respondet Aristoteles lib. 6. Phys. cap. 1. text. 19. infinitum non posse quidem pertransiri tempore finito, posse autem infinito; at tempus, quo spatium pertransitur, perinde infinitum est potentiâ, ac spatium, quod percurritur. Valet quidem, teste Aristotele 8. Phys. hæc responsio ad infringendam Zenonis interrogationem petentis, quâ fieri posset, ut finito tempore infinitae spatii partes proportionales percurrerentur, sed non solvit difficultatem, ut fatetur Aristoteles; quæro enim de ipso tempore, quomodo pertransiri possit, cum habeat partes infinitas.

Resp. 2. dist. Infinitum potentiâ non potest percurri, quâ infinitum est, concedo: quâ finitum



est, nego; spatium autem percurritur motu locali, non quā infinitum per se, sed quā finitum est. Nempe spectari potest spatium vel secundum extensionem, quam actu habet v.g. tripedalem, vel secundum eam, quam habere potest, ut est infinitum potentiā; primo respectu percurritur, non secundo. Ut solvas, tres canones accipe.

I. In quolibet spatio est finitudo ejusdem spatii, & infinitudo partium, quia partes spatii continui habent extensionem, ac multitudinem.

II. Partes spatii, ut habent extensionem, sunt finitæ, v.g. viginti pedum, aut triginta: ut habent multitudinem, sunt potentiā infinitæ; itaque finitudo actualis est infinitudo potentialis; illa determinata, hæc indeterminata.

III. Dum mobile movetur in spatio, non percurrit partes, ut plures, seu ut habent multitudinem, sed quatenus extensæ sunt, & finitæ. Ratio est, quod motus, utpote continuus, non fiat per partes, ut sunt multæ, quia ut sunt multæ, sunt discretæ, faciuntque numerum, sed ut habent continuam extensionem. Quid plura? fit transitus in spatio secundum id quod habet actu, non secundum id quod habet potentiā.

Instabis 1. Mobile percurrit dimidia bipedalis quantitatis; sed insunt dimidia infinita: ergo percurrit infinitum.

Resp. dist. majorem: Percurrit dimidia per accidens, ut sunt sub partibus aliquotis, concedo: simpliciter, & per se, nego; percurrit enim simpliciter, & per se spatium, quatenus est finitum, hoc est, determinatum, & extensum actu, non autem quatenus est infinitum potentiā, seu hoc, & aliud: quare observat Averroës argumenti Zi-

nonis fallaciam oriri ex mixtione ejus, quod est per se, cum eo, quod est per accidens, hoc est, ex mixtione extensionis actualis finitæ, quam per se mobile percurrit, cum multitudine potentiali partium, quæ se habet per accidens ad motum; hinc Aristoteles 8. Phys. cap. 8. tex. 68. *Qui continuè movetur, infinita transit accidentaliter, simpliciter minimè*, videlicet quia illa non transit, quatenus infinita.

Instabis 2. Priùs debet esse mobile in media leuca, quàm in fine, & priùs in medio mediæ leucæ: ergo nunquam percurreret leucam.

Resp. dist. ant. Priùs in media leuca continuo motu, & partes proportionales non designante, concedo: motu discreto, & in singulis medieta-ribus subsistente, nego.

Instabis 3. Dum percurrit spatium successivè, designat singulas partes, & distinguit.

Resp. nego, quia non percurrit, ut habent rationem numeri, sed tantùm ut sunt vnus locus fluens, in quo motus totus continuè exercetur.

Instabis 4. Si quiesceret, designaret: ergo dum movetur successivè, designat.

Resp. nego conseq. Cùm enim quiescit, tangitur vna pars continui permanenter, nec alia pars tangitur eodem tempore, ideòque per contactum ejusmodi quasi subsistentem, & permanentem, quo tangitur pars determinata aliis non tactis, distinguitur quodammodo extrinsecè; at dum tangitur in fluxu, & successivè pars aliqua, nullo tempore tangitur, quin eodem quoque tempore per eundem fluxum altera tangatur; vnde contactus ille, utpote multis communis, non est distinctivus, aut designativus partium, aut si quas designat,

non designat, nisi determinatas, putà pedem.

Instabis 5. Saltem Achilles testudinem nunquam assequeretur, licèt duplò celerius moveretur; nani dum Achilles percurrit spatium, testudo conficit mediam partem.

Resp. cum Aristotele, Achillem tandem affecturum testudinem, quia per partes determinatas, easque majores, majoribus passibus Achilles designabit, dum minores percurrit testudo: quare distinguo, nunquam assequeretur testudinem, si percurrit spatium, prout habet multitudinem partium, seu actu-discreto, & partes designante, concedo: si prout habet extensionem tantum, & actu continuo successivo, & fluente, nego; itaque fit motus per partes determinatas, nec singillatim partes spatii numerat Achilles, sed partes infinitas potentiâ per modum vnius actu finiti decurrit.

Instabis 6. Numeret Angelus à tergo sequens Achillem, certè nunquam numerabit singulas medietates: ergo nec Achilles decurret.

Resp. nego consequ. Ratio est, quia hîc instituitur comparatio extensionis spatii cum ejus divisibilitate, & multitudine, quæ tamen non habent inter se proportionem, quia Angelus numerans respicit spatium, quâ est potentiâ infinitum, Achilles verò decurrit, quâ finitum.

Instabis 7. Non sunt plures partes numerandæ, quàm decurrendæ.

Resp. dist. Et diverso modo attinguntur numerando, quàm decurrendo, concedo: eodem modo, nego. Certè si omnes numerarentur, continuum dividendum foret vsque ad indivisibilia; at continuus decursus non attingit partes secundum multitudinem infinitam, sed secundum finitam extensionem.

Instabis 8. Si partes quantitatis bipedalis essent actu divisæ, tam possent pertransiri, quàm cum sunt actu indivisæ. Prob. quia non facerent majus actu, si divisæ forent, quàm si continuæ. Confirmatur: cum spatium est actu divisum in 20. partes proportionales, non plus requiritur temporis ad illud continuè percurrendum, quàm si non esset actu divisum, ut videre est in ligno pedali, cujus prima medietas sit lignum, secunda aqua, & ita deinceps: ergo si idem spatium esset actu divisum in omnes omnino partes proportionales, non plus temporis requireretur ad spatium illud percurrendum, quàm cum non est divisum.

Prima responsio est non valere paritatem, quia si partes essent actu divisæ, essent actu infinitæ, & ut plures pertransiri deberent, facerentque spatium actu infinitum. Ratio est, quòd partes proportionales infinitæ essent omnes majores aliquâ certâ, & determinatâ, nempe palmo v. g. Deinde non licet argumentari à quantitate infinita potentia, ut est reducibilis ad actum inadæquatum, ad quantitatem, ut est reducibilis ad actum adæquatum, quia fit transitus à statu reali ad statum chimericum; & sic mutatur hypothesis, perinde ac potentia, quâ ponitur quantitas aliqua divisa actu in omnes suas partes proportionales.

Ad confirm. Disparitas est, quòd in quantitate constante 20. partibus proportionalibus se immediatè tangentibus, non augeatur extensio quantitatis illius, sed eadem permaneat; at contra dum supponitur illa quantitas dividi actu in omnes partes proportionales, sicut mutatur potentia ejus divisibilitatis, ita mutatur extensio, fitque infinita ob rationem jam allatam.

Secunda responsio negat partes in hac hypothesi impossibili, infinitæ extensionis fore, quia non plus esset extensionis in omnibus simul sumptis, quàm in prima medietate; unde fit, vt si Deus ad vnum pedem adderet dimidium pedem, & ad illum dimidium pedem partem hujus dimidii, & ita semper decrescendo per medietates medietatum, non modò per æternitatem non faceret quantitatem infinitè extensam, sed illam ne extenderet quidem ad duos pedes.

Instabis: Partes proportionales, in quas continuum diuisum esset, essent æquales vni certæ, & aliquotæ; haberent enim extensionem certam, & determinatam singulæ: itaque cùm essent numero infinitæ, facerent quoque extensionem infinitam, quia finitum in extensione infinities replicatum facit infinitum in extensione.

Resp. dist. Singulæ partes proportionales essent æquales vni certæ constanter: signatæ, respectu omnium, nego: diuersæ, respectu singularum, concedo; ad pronuntiatum, distinguo: finitum in extensione infinities replicatum per vnâ, & eandem extensionem æqualiter crescentem, facit infinitum, concedo: replicatum per diuersam extensionem semper minorem, & minorem æqualiter decrescentem, nego; decrements enim illa proportionata, licèt in infinitum multiplicarentur, nunquam deberent superare primam partem proportionalem, aut si superarent, extensio non fieret per decrements semper æqualia.

Porro hîc duo errores oboriri solent. Primus, volumus môtum per momenta metiri, quod Aristoteli repugnat, & rationi; quomodo enim indivisibile posset mensurare rem diuisibilem? quare

nunquam concedendum Achillem testudinem assequi in momento aliquo certo, aut locum ab eodem relictum occupare; nam utrumque fit in tempore dividuo, in quo cum sit prius, & posterius, quo tempore Achilles assequitur testudinem, duobus in locis esse potest, & in eo, quem reliquit testudo, & in eo, quem acquisivit Achilles, dum successive moveretur, itaque movens se continue, sic est in hac parte, ut etiam sit in alia.

Secundus, volumus metiri localem motum per motum cogitationis nostræ; cum enim intellectus nostri motus simultaneus sit, nam cogitatio non existit per partes; hinc fit, ut dum Achilles assequitur testudinem, cum tota simul sit cogitatio nostra, quam de assecutione illa informavimus, simultaneitatem ipsam in assecutionem refundamus, quæ est objectum ipsius, ipsamque adeo, ut simultaneam, permanentemque concipiamus.

### A R T I C V L V S I I I.

*Quomodo partes in continuo distinguantur.*

**S**T A T V S quæstionis est, an partes distinguantur actu in continuo, an tantum potentiâ; sed ut status quæstionis clarior fiat, fit

#### §. I. *Prenotanda quedam.*

**I.** IN continuo sunt partes, ut patet ex illius divisione; continuum enim non dividitur nisi in ea, quæ insunt.

**II.** Continuum aliud heterogeneum, quod constat partibus diversæ rationis; ut homo brachiis,

capite, &c. aliud homogeneous constans partibus ejusdem rationis cum toto, ut lignum, de quo hinc agitur.

III. Partes, dum uniuntur in toto, possunt adhuc distingui realiter, ut materia, & forma unitæ in composito distinguuntur realiter actu. Ratio est, quia unio non opponitur distinctioni, sed divisioni.

IV. Dum quaeritur an partes sint actu in continuo, quaestio fieri potest de quintuplici actu, 1. entitatis, 2. existentiae, 3. distinctionis, 4. discretionis, seu divisionis, 5. actu quantitativo, qui nihil est aliud quam figura.

Certum 1. partes esse in continuo actu entitatis, quia habent veram, & realem entitatem, etiam ante divisionem; dum enim dividitur continuum, non producit, nec quidquam novæ entitatis acquirit, adeoque ante divisionem habebat totam suam entitatem.

Certum 2. esse actu existentiae ante divisionem, quia sunt extra causas, nec purè possibiles.

Certum 3. esse indiscretas inter se, & indivisas actu, quandiu continuum non dividitur actu, licet sint potentiâ divisibiles, quia sunt unitæ actu; at unio actualis repugnat divisioni.

Certum 4. partes non esse actu quantitativo in continuo, id est, cum figura singularum partium propria, quia non habent primos terminos. Quaestio ergo tantum est de distinctione actuali.

Certum 5. duplex genus distinctionis hoc in negotio esse; altera est extrinseca, quæ fieri potest vel per intellectum distinguentem unam partem ab altera, vel per assignationem, sive contactum, demonstrando aliam, & aliam subinde partem, vel per



receptionem diversæ formæ accidentalis , vt si vna pars continui dealbetur , altera denigretur , vel per positionem diversam loci , vt si vna pars ejusdem continui sit in Oriente , altera in Occidente , hæc sursum , illa deorsum.

Altera est intrinseca , quam habent partes ex natura rei independenter ab omni extrinseco , easdem distinguente ; hîc porrò agitur de distinctione intrinseca , non extrinseca ; nam continuum distinguui posse extrinsecè , vel per operationem intellectûs , vel per contactum partis vnus , vel per informationem , cùm calor informat vnâ partem quantitatis , & frigus aliam , vel denique per positionem diversam loci , nemo est , qui dubitet.

### §. II. Solvitur questio-

I. A S S E R - P A R T E S non sunt in continuo actu, T I O. & per se realiter distinctæ , sed potentiâ duntaxat. Ita Aristoteles , Simplicius 8. Physic. Alexander , Themistius , Albertus Magnus , D. Thomas , Tannerus , Amicus , contra Suarezem Gran. Toletum , Arriagam , Hurtadum , & alios plures.

Prob. 1. ex Aristotele 3. de anim. *In linea* , inquit , *non dantur dimidia* ( hoc est actu , sed solâ potentiâ. ) Clariùs 8. Phys. tex. 68. *In continuo non sunt dimidia actu , sed potentiâ ; quòd si actu fuerint , continuum non facient.* Et 8. Metaph. cap. 5. *Et modo inest in solido figura qualibet , quo est Mercurius in rudi lapide : quare si neque Mercurius in lapide est , neque in tessera dimidium tessera , ita vt determinatum sit , profectò nec superficies , &c.* Hinc sic arguo , non est magis actu in toto continuo medie-



tas, quàm in ligno figura Mercurii: sed in ligno non est actu figura Mercurii, at tantùm potentiâ: ergo in toto continuo non est medietas actu, sed tantùm potentiâ. Prob. minor, si figura Mercurii esset actu in ligno, jam in ligno essent actu rerum quarumlibet infinitæ figuræ: non sunt actu in ligno rerum quarumlibet infinitæ figuræ, quia non sunt infiniti termini: ergo in ligno non est actu figura Mercurii.

Respondent, non sunt dimidia actu completo, concedunt: incompleto, negant, quia partes, quæ sunt in continuo actu incompleto, fiunt completæ actu, per divisionem totius continui. Contrà ex Aristotele, in toto non est dimidium actu, sicut nec Mercurius: Mercurius nec est actu completo, nec incompleto in ligno. Accedit D. Thom. 8. Physic. text. 37. *Pars, inquit, in toto, non est in actu, sed in potentia, maxime in continuis.*

Probatur ratione 1. positis duobus principiis. 1. Quæ differunt numero, habent differentiam numericam adæquatè diversam; aliàs res eadem partim esset eadem numero, partim numero diversa ab alia re, & ita haberet duas differentias numericas, quod dici non potest, secus esset duæ res, & non una; haberet enim differentiam numericam, per quam differret ab alia re, & insuper haberet differentiam alterius rei numericam; esset enim idem numero cum illa; hinc cùm differentia numerica rei ex multis coalescit, non potest vnum perire, quin pereat differentia numerica. Tolle à numero ternario vel vnâ vnitatem, peribit numerus ternarius. Tolle à quantitate bipedali negationem vltioris negationis, licet remaneat totum positivum, peribit terminus illius bipedalitatis.

2. Differentia numerica partium continui permanentis, præter entitatem positivam, dicit præterea negationem unionis cum aliis partibus, unde illius differentia coalescit ex positivo, & negativo. Probatur, quia positivum junctum cum negativo constituit quamlibet quantitatem in ratione hujus numero quantitatis; quælibet enim pars est hæc numero, quia constat ex his partibus certis, ac determinatis, & non unitur cum aliis; at hoc dicit positivum aliquid, & aliquid negativum; positivum quidem, quia quantum est divisibile in eas, quæ insunt, hoc est, in eas partes, ex quibus constat, unde si ex quinque numinis duos tollas, duobus aliis suffectis, alius utique numerus quinaris resultabit; negativum verò, quia posito quòd quantum aliquod habeat has partes, non est hoc numero quantum, posito verò quòd habeat has partes, & non uniatur cum aliis, est hoc numero quantum; sublatâ autem negatione unionis cum aliis, definit esse hoc numero quantum; itaque præcisè est hoc numero quantum, quia has habet partes, & non unitur cum aliis; junge lignum pedale, cum alio pedali, definit esse hoc lignum pedale, & fiet bipedale aliud: guttam aquæ aliis guttis affunde, definit esse hæc numero gutta, & unam cum aliis aquam faciet, quibuscum unietur, sublatâ solâ negatione unionis; hinc inferes, detractâ unâ guttâ maris, non fore idem numero mare, nisi ad sensum, si adæquatè sumitur, quia aliam differentiam numericam habet; non tamen ideo diceretur produci novum mare, quia mare, quod remanebit, erat antea secundum positivum, sed non secundum negativum, quod per deductionem guttulæ incipit habere. His positis

Probatur assertio : In continuo partes non differunt numero : ergo non sunt multæ actu, itaque non distinctæ actu. Probatur anteced. in continuo non est principium constitutivum differentię numericę partium singularum : ergo in continuo partes non differunt numero. Prob. ant. principium constitutivum differentię numericę partium, est negatio vnionis cum aliis partibus, includens partes secundum esse positivum ex 1. & 2. principio : partes in continuo non habent negationem vnionis cum aliis partibus : ergo non habent principium constitutivum differentię numericę : ergo non distinguuntur numero, adeoque non sunt multæ actu.

Probatur 2. Partes homogeneę, dum in vnum coalescunt, desinunt esse multæ actu ; partes continui homogeneę sunt, & coalescunt in vnum actu : ergo desinunt esse multæ actu. Major probatur ex natura homogeneorum, quę constant ex partibus ejusdem rationis, & naturę, seu quę non repugnat fieri idem ; vnde sic arguo, quę sunt ejusdem rationis, & sunt indivisa in se actu, & divisa à quolibet alio, non sunt multa actu : quę sunt homogenea, & coalescunt in vnum, sunt ejusdem rationis, & sunt indivisa in se, & divisa à quolibet alio : ergo non sunt multa actu.

Confirmatur : quia homogenea in hoc distinguuntur ab heterogeneis, quod heterogenea essentialiter repugnet fieri idem, adeoque sub qualibet vnione maneanť distincta ; manent autem distincta, quia sub vnione manent semper diversę speciei, & naturę incompletę, quia in composito heterogeneo semper duę sunt naturę incompletę, ex quibus tertia completa exurgit, quę in suo conceptu semper includit duas naturas incompletas, spec-

cie inter se distinctas ; homogenea autem cū habeant partes ejusdem rationis , & naturæ , quas non repugnat fieri idem , dum in vnum coalescunt , sunt eadem entitas divisibiliter , sicut per separationem incipiunt distingui , manente eorundem essentiâ , quia nec sunt actu idem , nec diversa per suas essentias , sed per aliquid sibi contingenter additum , nempe vel per vltiorem extensionem , vel per negationem illius.

Probatur 3. contra eos , qui admittunt continuum constare ex partibus infinitè divisis , & tamen actu distinctis. Si dantur partes in continuo realiter actu distinctæ , sunt plures realiter actu in continuo : non sunt plures realiter actu in continuo : ergo partes non sunt in continuo actu distinctæ realiter ; major certa , quia multitudo nihil aliud est , quàm plures quantitates , quarum vna non sit alia. Prob. minor , quæ partes sunt plures , faciunt multitudinem finitam , vel infinitam : partes in continuo non possunt facere multitudinem finitam , aut infinitam : ergo nullam. Probatur minor , non finitam faciunt , quia quantitas ex essentia sua dividua est : non infinitam , quia infinitum actu dari non potest.

Respondent , multitudinem illam , nec esse finitam simpliciter , nec infinitam simpliciter , sed finitam in infinitum , sive indeterminatam ; ita ut nulla sit assignabilis multitudo adæquans totum , quin major possit assignari multitudo hoc ipsum totum adæquans ; nempe , inquiunt , in continuo quatuor sunt quartæ , mille millesimæ , nec tamen ejusmodi partes vnicam constant multitudinem , 1. quia sunt partes communicantes , 2. quia sunt diversi generis ; multitudo autem constat unitatibus ;

unum est indivisum in se, & divisum à quolibet alio: partes communicantes non sunt divisæ aliæ ab aliis, nec quæ diversi sunt generis, à se dividuntur, v. g. octo octavæ, nihil aliud sunt realiter, quàm quatuor quartæ: ergo ex octo octavis, & quatuor quartis, non fit duodenarius numerus.

Contrà: vel Deus videt primam partem in continuo, vel non videt: primum dici non potest; nam quæro, pars illa prima, quam Deus videt, vel est divisibilis, vel indivisibilis? non divisibilis, quia posset dividi in duas, adeoque non esset prima; non indivisibilis, quia continuum constaret ex partibus indivisibilibus? secundum quoque dici non potest, quia partes distinguuntur actu in continuo: ergo Deus videt eas distinctas; videt enim, ut sunt.

Respondent dist. Deus videt primam indeterminatam, concedo: determinatam, nego; porro determinatam vocant quæ est alicujus denominationis, ut prima, secunda, &c.

Contrà, quæ partes sunt in continuo distinctæ, sunt determinatæ, quia quod distinctum est actu, est hoc, non aliud, adeoque determinatum: partes ex adversariis sunt actu in continuo, & quidem distinctæ: ergo & determinatæ.

Prob. 3. Si partes sunt actu distinctæ, sunt actu infinitæ secundum multitudinem; falsum consequ. &c. Prob. sequela, si omnes actu essent divisæ inter se realiter, essent actu infinitæ secundum multitudinem: ergo si sunt inter se actu distinctæ realiter, sunt etiam actu infinitæ secundum multitudinem, quia quæ sunt distincta, tam sunt multa, quàm quæ sunt divisa. Respondent non facere actu numerum, quia non habent divisionem.

Contrà 1. Corpus, & anima faciunt numerum, quia distinguuntur actu in composito, licet non dividantur; item personæ in divinis. Deinde Deus conservet omnes continui partes, destructis illarum unionibus, tunc certè dividantur actu: ergo dabitur infinitum actu. Confirmatur à pari: si continuum esset actu divisum in suas omnes partes, singulæ essent indivisæ in se, & indivisibiles, ac proinde continuum constaret ex solis indivisibilibus: ergo à pari si continuum sit actu distinctum in omnes suas partes, singulæ erunt indistinctæ in se, & indistinguibiles in alias; at quod est indistinctum in se, & indistinguibile, est etiam indivisibile, & indivisum, quia est hæc entitas, & non alia.

Probaturn denique, quia nulla est necessitas distinctionis ullius realis; si quæ enim esset necessitas, maximè ob prædicata contradictoria, putà esse sinistrum, & non esse sinistrum, esse calidum, & non esse calidum, esse oriens, & non esse oriens; at hæc salvari possunt per æquivalentiam continui, quod est ens extensum, & expansum; ita ut sit vnum ens, sed dilatatum, & diffusum, quod æquivaleret multis entibus distinctis: sic cælum, licet vnum realiter continuum sit, tamen æquivaleret multis palmis, aut vlnis, adeoque de eo affirmari possunt prædicata diversa, ob multiplicem æquivalentiam, & potentiam distinctionis.

### §. III. *Diluuntur objecta.*

**O**BIICIENS I. ex Aristotele 5. Metaph. cap. 8. *continuum est id, quod est divisibile in ea, quæ insunt*, id est, in partes, quæ sunt in continuo. Item 5. Phys. ea distinguuntur, quæ habent diver-

ſam generationem, & corruptionem, vt patet in continua nutritione animalis : ergo partes diſtinguntur realiter actu in continuo.

Reſp. ad 1. diſt. continuum eſt diſiſibile in ea, quæ inſunt, actu entitatis, ſeu compoſitionis in continuo, concedo : actu diſtinctionis actualis, nego. Ad 2. diſt. maj. ea diſtinguntur, quæ habent diſerſam generationem, ſi ſint heterogenea, tranſeat, ſi homogenea, nego.

Inſtabis. 1. Vnio rerum homogenearum in quantitate, non opponitur diſtinctioni ; vel enim opponeretur, vt eſt præciſè vnio, vel vt eſt vnio rerum homogenearum ; non vt præciſè eſt vnio, quia in homine v. g. materia, & forma vniuntur, & tamen ſeruant diſtinctionem actualem ; non vt eſt vnio rerum homogenearum, quia non eſt ratio, cur potiùs homogenea ſiant vnum in ratione continui, quàm heterogenea non ſiant vnum quid eſſentiale.

Reſp. non ex vnione ipſa, vt ſic, ſed ex vnione rerum homogenearum, quæ diſtinctioni ex natura ſua opponitur, id oriri. Ad paritatem homogeneorum, & heterogeneorum, diſparitas eſt, quòd homogenea ſint ejuſdem, & vnius eſſentiæ, heterogenea verò ſubſtancialiter vnita, ſint diſerſæ prorsus eſſentiæ : ergo heterogenea non poſſunt facere vnum eſſentiale, quod ſit vnius vbique eſſentiæ, quia ſuam vbique retinent eſſentiam, itaque ſemper diſerſam. E contra homogenea definiuntur, quæ non repugnat fieri eſſentialiter idem : ergo cum vniuntur, & continuantur, ſunt actualiter idem. Rurſus cum retineant eſſentiam ſuam, in ipſo continuo, ſunt potentiâ diſerſa, quia homogenea non ſunt eſſentialiter idem, ſed tantum non



repugnat ea fieri idem : ergo cùm fiunt idem , ita sunt idem , vt sint potentiâ diuersa , & hæc est ratio à priori nostræ sententiæ juxta principia Aristotelis 1. Physic. hinc

Colliges , dum sanguis , & caro , aqua , & vinum vnâ miscentur , non continuari inter se , quia sunt heterogenea ; Aristoteles enim docet 6. Phys. cap. 4. ea tantùm inter se continuari posse , quæ vnum continuum fieri possunt ; at non possunt fieri vnum continuum , nisi quæ sunt homogenea , siue vt loquitur , nisi ea , quorum extrema sunt vnum , & idem , id est , sunt vnius , & ejusdem essentia.

Instabis 2. Materia aëris , & materia aquæ sunt omnes homogeneæ : ergo dum se tangunt , continuantur inter se.

Resp. negari consequentiam à multis , quia formarum diuersitas illam continuationem impedit. Ratio est , quodd actus separet , & distinguat juxta principia Aristotelis , & D. Thomæ in 7. Metaph. lect. 13. *Vnumquodque* , inquit , *diuiditur per propriam formam , vnde ad hoc quodd aliqua fiant vnum actu , oportet quodd omnia concludantur sub vna forma , & quodd non habeant singula singulas formas , per quas sint vnum actu.*

Objicies 2. Partes insunt continuo , ergo vel multæ actu , vel multæ potentiâ , quia non fiunt actu multæ , sed tota quædam : ergo non sunt multæ potentiâ tantùm , sed multæ actu.

Resp. dist. minorem : Non fiunt actu partes compositionis , seu continui , quod actu component , concedo : non fiunt actu partes resolutionis , seu continui resoluti , nego ; nempe partes quantitatis bipedalis v. g. vel spectantur , vt sunt in toto bipedali ,



bipedali, vel vt actu diuisæ: vt sunt actu in toto sunt tantum partes potentiâ; post diuisionem autem possunt dici vtrunque partes actu respectivè ad totum, quod componebant, aut possunt componere, licet absolutè sint tota quædam.

Instabis 1. Quæ partes sunt actu in continuo, sunt actu distinctæ: duo pedes v. g. sunt in continuo bipedali actu: ergo sunt actu distincti.

Resp. dist. maj. Quæ sunt actu distinctionis, concedo: quæ sunt actu entitatis, & existentiae tantum, nego; at partes sunt tantum in continuo, actu entitatis, & existentiae, non actu distinctionis.

Instabis 2. Quæ partes uniuntur actu, distinguuntur actu: partes uniuntur actu in continuo: ergo actu distinguuntur, adeoque sunt actu distinctionis in toto.

Resp. dist. maiorem: Quæ uniuntur actu in toto actuali, formali, & heterogeneo, esto: in toto virtuali, & homogeneo, quale est continuum, nego. Totum quippe aliud formale, & heterogeneum, quod constat ex materia, & forma diversæ rationis, vt compositum humanum; aliud virtuale, & homogeneum, quod constat partibus ejusdem rationis; illud habet partes actu distinctas, hoc tantum potentiâ.

Instabis 3. Partes componunt actu continuum: ergo sunt multa actu distincta.

Resp. dist. conseq. Actu virtuali, & æquivalente realiter distinctis, concedo: actu formali, nego.

Instabis 4. Nihil potest sibi vniri, quia vnio est inter extrema distincta; at pars A vnitur parti B in continuo.

Resp. dist. maiorem: Nihil indivisibile, conc. nî-

hil, quod divisibile sit, nego; quod enim divisibile est, & quasi virtualiter multiplex, sibi ipsi v-niri potest inadæquatè sumpto. Resp. 2. dist. vnio est inter extrema distincta, saltem potentiâ, concedo: distincta semper actu, nego.

Instabis 5. Partes continui nunquam essent partes illius actu, sed tantum potentiâ; vel enim essent ante vnionem actualem, vel sub vnione actuali, vel post separationem.

Resp. 1. sub vnione actuali partes esse in continuo actu entitatis, existentiae, & compositionis, non distinctionis. 2. Etiam post separationem, possunt dici partes respectivè ad totum, cujus sunt fragmenta quædam, licet absolutè sint totula quædam toto priori minora. 3. Sub vnione actuali sunt partes potentiâ.

Instabis 6. Ergo partes producuntur per divisionem.

Resp. distingo: In ratione partium totius destructi, aut novorum totulorum, concedo: in ratione entis, nego; at inquires quid mutationis sit, dum separantur? Resp. eas incipere proprios habere terminos, & esse quædam minora tota, sicut dum uniuntur inter se, non corrumpuntur secundum entitatem, sed quatenus quædam tota sunt, quæ per vnionem desinunt habere proprios terminos, adeoque non sunt ampliùs quædam tota.

Instabis 7. Generans distinguitur realiter à genito; in continuo vna pars est generans, altera genita, vt patet in igne, qui successivè producitur.

Resp. dist. maiorem: Aliquando actu, & aliquando potentiâ, concedo: semper actu, subdistinguo, in heterogeneis, esto: in homogeneis, nego; sufficit enim in homogeneis distinctio poten-

tialis inter partes, & æquivalentia, ut una in alteram agat. Hinc dum ignis accensus in prima parte paleæ producit ignem in secunda sibi continuum, distinguitur ab eo tantum potentiâ, non actu: unde non est necesse causam semper distingui realiter ab effectu, nisi effectus sit diversæ rationis.

Instabis 8. Docent Theologi Patrem in divinis ideo distingui realiter actu à Filio, quia Pater est generans, & Filius genitus: ergo si ignis A generat ignem B, distinguitur actu in continuo.

Resp. dist. ant. Quia Pater generat Filium terminatum suâ hypostasi incommunicabili, concedo: communicabili, nego; at ignis A dum sibi aggenerat ignem B, non terminatur hypostasi incommunicabili, quia tum vnitur ipsi, & amittit proprios terminos, adeoque fit vnus continuativè cum altero.

Objicies 3. Distinctio est prædicatum intrinsecum, & essentiale rei, juxta illud placitum, per id res distinguitur, quo constituitur: ergo si partes continui non sunt actu distinctæ, nunquam possunt etiam divinitus actu distingui.

Resp. dist. In heterogeneis, concedo: in homogeneis, nego; rationem disparitatis jam attuli.

Instabis 1. Quæ sunt idem realiter, non possunt separari.

Resp. 1. distingo, in heterogeneis, concedo: in homogeneis, nego; vel dist. quæ sunt idem realiter indivisibiliter, concedo: divisibiliter, nego; hinc in heterogeneis separabilitas est signum distinctionis actualis; in homogeneis autem est signum distinguibilitatis.

Instabis 2. Ens, & vnum non distinguuntur: sed quidquid est ens, est tale per se ipsum, non per

aliud sibi superadditum : ergo si partes homogeneæ sunt vnum , hoc habent à se , nec fieri possunt multæ ; quæ enim semel identificantur , semper identificantur.

Resp. ens posse esse vnum , vel vnitate simplicitatis , vel vnitate virtuali , & compositionis ; vera est tantum prima propositio de iis , quæ sunt vnum vnitate simplici , & individuâ , non de iis , quæ sunt vnum vnitate compositâ , & divisibili , quale est continuum.

Instabis 3. Vnitas est idem cum entitate : in continuo remanent entitates partium : ergo & vnitates : ergo & partes plures actu.

Resp. dist. maj. Vnitas est idem cum entitate , secundum esse positivum , concedo : secundum esse negativum , nego ; vnitas quippe partium in toto homogeneo præter partium entitatem , quam possi-ivè dicit , insuper dicit negationem vnionis cum aliis partibus , quia vnum est indivisum in se , & divisum à quolibet alio. Porro à partibus continui abest negatio vnionis cum altero , quandiu sunt in continuo : ergo deest vnitas cuiusque partis propria , nec remanent multa vna , ideoque multitudinem non faciunt , licet propriam entitatem , & existentiam partialem cum aliarum partium entitate continuatam retineant ; vnitas itaque duo includit , alterum positivum , quod est essenziale , & intrinsecum rei , alterum negativum , quo rei entitas spoliari potest , amittendo vnitatem formalem , & retinendo entitatem , seu vnitatem materialem.

Instabis 4. Nihil distinguitur ab aliquo per aliud , sed per aliquid sui : ergo vna pars non potest distingui ab altera per negationem vnionis ex

divisione ortam. Pr. ant. nihil potest esse unum per aliud : ergo nihil potest distingui ab aliquo per aliud.

Resp. 1. illud negativum pertinere etiam ad partem divisam, ut est una formaliter, sed amittere illud ipsum, amittendo unitatem formalem, dum pars homogenea jungitur alteri.

Resp. 2. cum aliis, dist. per aliud, quod sit positivum, concedo : per aliud, quod sit negativum, hoc est, per negationem unionis cum altero, nego.

Instabis 5. Negatio unionis est aliquid contingens entitati partium : ergo ab illa non potest peti illarum differentia numerica.

Resp. dato antecedente, dist. conseq. Non potest peti ab illa negatione in recto, concedo : in obliquo, nego ; ut enim subsistentia distinguitur à natura per negationem unionis, quam connotat, ita terminus quantitatis continuæ differt per negationem ulterioris extensionis.

Objicies 4. Ea distinguuntur realiter, quibus conveniunt prædicata contradictoria ; partibus continui conveniunt prædicata contradictoria, nempe esse album, & non album, sinistrum, & non sinistrum, &c. ergo distinguuntur realiter.

Respondeo, dist. maj. Distinguuntur realiter actu semper, nego : realiter potentiâ, concedo ; deinde æquivalentia multiplex partium in toto salvat contradictionem, quæ debet esse de eodem secundum idem indivisibiliter acceptum,

Objicies 5. In linea duodecim pedum, sunt verè pedes duodecim actu distincti.

Resp. dist. Per assignationem, & extrinsecè, concedo : intrinsecè, nego.

Objicies 6. Ea distinguuntur actu realiter, quo-

rum vnum, nemine cogitante, non est aliud : in continuo vnum, nemine cogitante, non est aliud; v.g. in cælo pars orientalis non est occidentalis, in pyramide cuspis non est basis, in homine caro non est os : ergo in continuo vnum non est aliud.

Resp. dist. In cælo pars orientalis non est occidentalis, extrinsecè, & per assignationem, concedo : intrinsecè, realiter, & continuativè, nego; nam licèt ante omnem assignationem id quod dicitur pars orientalis in cælo, sit entitativè occidentalis, quia ante omnem assignationem non est pars, & pars, sed omnia sunt vnum per continuationem; tamen ex parte intellectûs distingui possunt, saltem extrinsecè cum fundamento in re. Et quoniam non alio modo de rebus loquimur, quàm quo repræsentantur intellectui præscidenti, ac dividenti, ideo in sensu formali potest dici, Oriens non est Occidens, & basis pyramidis non est ejus cuspis, licèt in sensu reali, & identico sint idem; hæc quippe vis est mentis humanæ, ut quæ naturâ coherens, cogitatione distrahat.

Ad 3. esto, caro non sit os, id probat tantùm partes heterogeneas actu distingui; at hîc de homogeneis sermo est.

Objicies 7. Partes ejusdem continui habent realem ad se relationem: ergo distinguuntur actu, quia relatio realis est inter duo extrema realiter distincta. Probatur ant. habent distantiam realem : ergo & relationem realem distantiae. Prob. ant. primus pes ligni constantis 20. pedibus distat actu à vigesimo pede : ergo &c.

Resp. 1. nego antecedens; partes enim continui non referuntur ad se formaliter, sed tantùm fundamentaliter; ad probationem distingo ant. ha-

sent distantiam realem potentiâ, concedo : realem actu, nego ; itaque primus pes, vt vnitur cum vigesimo, & facit vnum totum cum eo, non distat actu ab eodem, licet vel realiter separatus, distet actu realiter, aut separatus per mentem, distet tantum relatione rationis. Secunda responsio est, sufficere ad relationem realem, quod continuum habeat partes potentiâ distinctas, & æquiualeat multis realiter distinctis.

Instabis 1. Nisi primus pes distet realiter actu à vigesimo, vbi est primus pes, ibi est & vigesimus; quod falsum.

Resp. dist. Vbi est continuativè, & divisibiliter primus pes, ibi est vigesimus, esto : vbi est indivisibiliter, nego ; occupant enim locum vnum, & eundem continuativè, & divisibiliter, non tamen indivisibiliter.

Instabis 2. Si hoc esset, aër Romanus esset aër Parisinus, quo nihil absurdus.

Resp. dist. Esset aër Parisinus continuativè, & divisibiliter, concedo : indivisibiliter, nego ; hinc non dicitur simpliciter, aër Romanus est aër Parisinus, sed cum addito, aër Romanus est continuativè aër Parisinus.

Objicies 8. Entia completa non possunt fieri vnum : duæ guttæ vini sunt entia completa : ergo non possunt fieri vnum.

Resp. dist. maj. Entia completa, quatenus completa, concedo : quatenus incompleta, nego. Duæ guttæ vini sunt entia completa, dist. minorem, & sunt vnum, quatenus sunt completæ, nego : quatenus incompletæ, concedo ; guttæ enim vini spectari possunt vel secundum essentiam, vel secundum partium integritatem : primo sensu sunt quid

completum, non secundo, & ita vna gutta potest per aliam integraliter compleri.

Confirmatur exemplo Christi, in quo naturæ divina, & humana non fiunt vnum per se vi vnionis hypostaticæ, quia completæ sunt per se, quatenus naturæ; at fiunt vnum in persona, quia natura humana in Christo, vt pote nudata suâ hypostasi, est complebilis in ratione personæ.

Obijcies 9. Aër partis orientalis sit calidus, occidentalis verò frigidus, tunc distinguuntur realiter.

Resp. dist. Distinguuntur realiter, ratione qualitatis, & substantiæ, concedo: ratione materiæ, & quantitatis, nego; erunt enim idem continuativè, & divisibiliter; hinc licet idem continuum informetur duabus formis substantialibus, vt ramus, cuius pars vna sit viridis, altera sicca, & mortua, potest tamen dici idem actu ratione materiæ, & quantitatis, licet dici possint partes duæ actu distinctæ, quod habeant diversas formas substantiales, adeoque sint duo tota diversæ rationis.

Obijcies 10. Aristoteles 7. Metaph. text. 48. sic loquitur: Impossibile est substantiam esse in substantiis, quæ sic in eis sit, vt dicatur esse actu; nam quæ duo sunt actu, nunquam vnum actu sunt: sed si potentiâ duo sint, tunc vnum erit actu: sic duplum actu fit ex duobus dimidiis potentiâ, actus enim separat. Et paulò pòst: aut non est vnum dualitas, aut non est in ea vnitas, &c. ergo ex Aristoteleanima, & corpus sunt vnum actu, & duo tantum potentiâ: ergo falsum est heterogenea distinguui sub vnione actuali.

Resp. Aristotelem ibi agere contra Platonem, & probare tantum ea, quæ sunt duo actu completo,



non posse fieri vnum per se : ex quo concludit contra eundem, vniversalia non esse substantias primas, id est, completas, alioqui ex multis substantiis completis fieret vnum ens per se, quod est impossibile; aut enim non est vnum per se, aut sunt duo actu completo.

Instabis 1. Quæ non habent divisionem, quatenus non habent divisionem, eatenus vnum sunt : anima, & corpus non habent divisionem.

Resp. dist. Sunt vnum vnitatem compositam, concedo : vnitatem simplicem, & identitatis indivisibilem, nego ; at corpus, & anima sunt vnum vnitatem compositam, quæ non impedit distinctionem ; hinc esse distinctum latius patet, quam esse divisum ; nam omne divisum est distinctum : at non omne distinctum est divisum, ut patet in composito humano.

Colliges 1. continuum esse formaliter simplicem entitatem cum virtuali compositione, & æquivalentia quadam, quæ compositio fit ex partibus, quæ ante ipsam erant formaliter multa, sed in ipsa compositione fiunt vnum continuativè, & divisibiliter, sublatâ negatione vltioris extensionis. 2. Totum virtuale à formali in hoc distingui, quòd formale constet partibus realiter actu distinctis ; virtuale autem partibus virtualiter, & potentiâ distinctis. 3. Ut aliquid incipiat esse totum in ratione quanti, nihil amittere, sed vniri cum altero, & acquirere extensionem vltiorem : contra verò, ut ea, quæ erant vnum, fiant duo per divisionem, non acquirere aliquid, sed amittere, quia amittunt unionem sui cum altero, & extensionem vltiorem.

Nec dicas acquirere negationem unionis, aut extensionis vltioris, quia acquirere negationem rei, non est acquirere, sed perdere.

*De punctis continuantibus, & terminantibus.*

**T**ERMINVS quantitatis vel quantitatem inchoat, vel claudit, vel partes in medio conjungit; hinc punctum & inchoat lineam, & claudit, & ejus partes in medio conjungit.

A ————— C ————— D ————— B.  
In hac magnitudine terminus A lineam inchoat, B claudit, terminus C, & D partem parti annectit; hinc punctum, quod lineam inchoat, aut claudit, dicitur punctum terminans; punctum, quod partes in medio conjungit, dicitur punctum continuans.

Haftenus probatum est continuum non constare ex puris indivisibilibus, sed nondum probatum est punctis, seu indivisibilibus non continuari, aut terminari. Suares Granat. puncta, quibus partes continui inter se conjungantur, vel terminentur, agnoscit, licet componentia non admittat; prima dicuntur continuantia, secunda terminantia. Nos hic tria quæremus, 1. an indivisibilia, nempe punctum, linea, & superficies sint entia realia, an fictitia tantum, 2. an partes continui se ipsis uniantur, an per modum unionis, 3. an ipsum continuum terminetur indivisibili realiter distincto.

§. I. *An dentur indivisibilia realia in quantitate.*

**I. ASSERTIO.** ID quod vocamus indivisibile in quantitate, est verum ens. Hæc assertio est contra Okamum, aliósque Nomina-

les. Prob. 1. ex Aristotele 6. Phys. text. 86. ubi ait, *indivisibile non moveri per se, sed ad motum ejus, in quo est, sicut ad motum navis moventur, qua continentur in navi.* Lib. 1. de anim. cap. 1. docet corpus perfectè sphaericum tangere planum in puncto indivisibili; at corpus perfectè sphaericum, tangit in aliquo ente vero, & reali: ergo indivisibile est ens verum, & reale.

Prob. 2. ratione. Punctum, linea, & superficies habent veras, & reales proprietates: ergo sunt realia. Prob. ant. Mathematici varias affectiones de puncto demonstrant; Geometræ de lineis, & superficiebus; quin ipse Euclides ait globum perfectum non tangere planum perfectum, nisi secundum punctum indivisibile, & dum fit contactus plani super planum, fieri secundum longitudinem, & latitudinem. Ad hæc, lux recipitur in sola superficie corporis opaci, ut multi volunt; at recipitur in reali subjecto: ergo datur realis superficies.

Denique probatur de punctis terminantibus. 1. Omne continuum est finitum, igitur terminatum; sed omnis terminus dicit indivisibile, quia dicit ultimum, hoc est, negationem ulterioris extensionis. 2. Id quod terminat quantum secundum omnem dimensionem, hoc est, secundum longitudinem, latitudinem, & profunditatem, est punctum terminans, quod dicit extremum, seu negationem ulterioris extensionis, secundum omnem dimensionem, ut globus, pyramis in apice, &c. ergo dantur puncta terminantia.

Probatur de copulantibus; sit enim linea bipedalis, inter duos pedes est unio, seu commissura indivisibilis: ergo punctum continuans, quod dicit negationem extremi, seu extremorum.

I I. A S S E R T I O. Indivisibilia quantitatis, quamvis realia sint, non tamen simpliciter, & adæquatè sunt realia, sed includunt aliquam negationem, ut patebit ex mox dicendis.

I I I. A S S E R T I O. Indivisibilia, siue continuantia, siue terminantia, non sunt realiter à partibus continuis distincta. Prob. 1. quia nulla est necessitas distinctionis realis; vel enim illa distinctio requireretur ad terminandum continuum, vel ad copulandas illius partes; non ad terminandum continuum, quia continuum sufficienter terminatur per entitatem suam, ut habet negationem ulterioris extensionis; deinde si auferatur indivisibile terminans à quantitate v. g. bipedali, adhuc intelligetur finita, nec ulterius extensa: ergo frustra est indivisibile terminans realiter distinctum, non ad copulandas partes, quia partes continui possunt copulari se ipsis, ut mox ostendam.

Respondent, quantitatem terminari negativè, sublato puncto terminante, non positivè.

Contrà: quæro, quid præstet positiva terminatio, & ad quid requiratur? Ad contactum, & actiones physicas, inquirunt. Contrà, quæro an ignis detractò indivisibili suam terminante quantitatem, stupæ applicitus ipsam combureret, aut lapis in virrum impactus, ipsum frangeret? utique.

Confirmatur: Inter punctum primum, terminans quantitatem ab una parte, & secundum, quod est primum continuans, vel mediat aliquid, vel non; si nihil mediat: ergo dantur duo puncta immediata, quæ non se penetrant, quod est contra Aristotelem: si quid interjectum est, vel est divisibile, vel indivisibile; neutrum dici potest. Quid quod, primum punctum continuans esset, & non

esset continuans ; esset , vt supponitur ; non esset autem , quia nulla pars esset interjecta , adeoque nihil continuaret.

I V. A S S E R T I O: Indivisibilia terminantia nihil aliud sunt in continuo , quam ipsum continuum , prout negat vltiorem extensionem.

Prob. 1. explicatione rei ipsius : continuum v. g. præscindendo à longitudine , latitudine , & profunditate , est punctum ; quatenus potest concipi , vt in longum extenditur , præscindendo à latitudine , & profunditate , est linea ; quatenus potest concipi , vt in longum , & latum exporrigitur , præscindendo à profunditate , est superficies.

Hanc doctrinam illustrat D. Aug. lib. de quant. cap. 11. & 7. de gen. ad litteram , cap. 17. *Longitudo* , inquit , & *latitudo non sunt realiter in corpore ab eo distincta ; sed quia idem corpus est longum , latum , & profundum , concipitur à nobis , vt est longum , & latum , præscindendo ab eo , quod sit profundum*. 2. Ex Aristotele 3. de anim. tex. 25. *Indivisibile* , inquit , *cognoscitur , vt privatio : ergo est aliquid privativum , aut negativum , saltem inadæquatè ; nam indivisibile est terminus quantitatis , terminus autem significat aliquam negationem , aut privationem in re terminata*. Accedit Themistius in Aristotelis locum : *Intellectus* , inquit , *cognoscit indivisibilia , præscindendo dimensionem , aut magnitudinem , non autem primariâ , & directâ intentione*.

Denique , positâ hac doctrinâ de natura indivisibilium , facîle explicantur multa Aristotelis pronuntiata de ipsis indivisibilibus ; 1. habetur 3. Metaph. cap. 5. *Indivisibile* , inquit , *neque fit generatio per se , neque corruptio ; sed illa resultant ex*

*seçãoe, sicut resultat Mercurius ex rudi ligno. 2.*

Indivisibile non movetur per se, sed tantum per accidens; hæc, inquam, facile explicabis, si dicas indivisibile non habere propriam entitatem, sed esse ens ipsius continui, cujus est terminus.

Vt ergo justitia, & misericordia distinguuntur in Deo per conceptus inadæquatos, licet sint eadem entitas, quia potest Deus concipi vt justus, abstrahendo ab eo quod sit misericors: ita à pari potest concipi substantia eadem realiter vt corpus, & in ordine ad quasdam operationes, quas habere non potest, nisi vt afficitur triplici dimensione; deinde vt linea, quatenus præscindit à profunditate, & latitudine: denique vt punctum, præscindendo à trina dimensione.

Porrò puncta terminantia, alia sunt actu in quantitate, nempe quæ in extremis partibus continui sunt actu, quia quantitas actu secta, & terminata est: alia tantum potentiâ, nempe quæ in media quantitate, quia quantitas ibi non est actu secta, & terminata, sed tantum potentiâ; hinc Aristoteles 8. Phisic. cap. 8. ait, quodcumque rectæ lineæ punctum, quod inter extrema positum sit, potestate medium esse, non actu, nisi mobile lineam dividerit.

Dicuntur quoque mathematica, non actu, & formaliter, quia non sunt entia positivè inextensa, & realiter distincta, sed virtute tantum, & æquivalentiâ; licet enim reipsâ extensa sint, æquivalent tamen inextensis, quia idem præstant, quod præstarent, si positivè inextensa forent; hinc planum dicitur tangi ab alio plano, non secundum profunditatem, quia fieret naturaliter corporum penetratio, sed tantum secundum ultimas partes, pro-

ut æquipollent superficiei realiter distinctæ : cylindrus tangit planum secundum lineam virtualem, hoc est, secundum partem æquivalentem lineæ mathematicæ. Denique perfectus globus non tangit alium globum perfectum, aut planum, nisi secundum punctum virtuale, hoc est, secundum partem divisibilem quidem realiter, sed æquivalentem puncto mathematico, seu indivisibili.

Colliguntur tria. 1. Punctum formaliter est id, quod per nostros conceptus abstrahit à trina dimensione, licet identicè primam illam dimensionem à parte rei habeat : linea est corpus longum, quod formaliter abstrahit à latitudine, & profunditate, licet à parte rei, & identicè habeat latitudinem, & profunditatem ; superficies denique est corpus longum, & latum, quod formaliter præscindit à profunditate, licet à parte rei, realiter, & identicè habeat profunditatem.

2. Dum superficies tangit planum, ipsi applicatur duntaxat secundum longitudinem, & latitudinem : linea secundum longitudinem : punctum secundum nullam dimensionem.

3. Indivisibilia partim aliquid positivum, partim aliquid negativum dicunt, ideòque distinguuntur tantum conceptu à quantitate, sicut privatio à subiecto distinguitur.

## §. II. *Explicatur magis unio partium continui.*

I. OBSERVATIO. **H**ic non agitur de vnione, quæ est inter materiam, & formam, sed inter partes continui, quatenus faciunt unum totale continuum permanens.

**I I. O B S E R V A T I O.** Partes continui spectari possunt vel prout unitæ inter se, & indivisæ, vel prout illigatæ, & complicatæ; hinc duplex nascitur continuatio. Prima, quæ prout est vnio, & indivisio, non suscipit magis, aut minus; ær enim tam continuus est æri, quàm ferrum ferro, quâ sunt perfectè homogenea. Secunda minùs propriè dicta est colligatio partium, quæ suscipit magis, aut minus; prima convenit tantùm homogeneis, exigítque corpora perfectè homogenea: secunda heterogeneis, putà elementis, quâ v g. connectuntur, illigantúrque partes elementorum in mixtis, tenaci quadam, & viscosâ qualitate, quæ corpora inter se implicat, agglutinátque, vel ut aliis placet, humido aqueo. His positis.

**I. A S S E R T I O.** Inter partes continui non datur vnio modaliter distincta. Prob. 1. quia nulla est necessitas: 2. illa vnio vel esset omnino indivisibiliter divisibilis, vel divisibilis simpliciter; si divisibilis simpliciter: ergo in partes integrantes aliquas, de quibus quæro, an vniantur se ipsis, necne? si se ipsis: ergo à pari partes quantitatis se ipsis vniri possunt; si per aliam vnionem distinctam: ergo dabitur vnio vnionis; si indivisibiliter divisibilis, seu ex partibus ita conflata, ut vnâ pereunte, reliquæ omnes pereant: ergo dum vna aquæ gutta in Oceanum defluit, tota multitudo vnionum, quæ Oceani, singulísque fluminum partibus inferuntur, perit; idémque sentiendum de superficiebus.

Confirmatur ex Aristotele 3. Metaph. text. 15. Quæ sunt homogenea, inquit, id habent ex se quòd fiant vnum eo ipso, quòd se contingunt: ergo Aristoteles rejicit omnem vnionem modalem à partibus continui.



**II. ASSERTIO.** Partes continui non vniuntur per indivisibilia, Pr. vel enim indivisibile continuans tangeret partes continuatas, secundum aliquid ipsarum, vel non; si non tangeret: ergo nec continuaret; si tangeret, illa pars, quam tangeret, vel esset divisibilis, vel indivisibilis; si primum, ergo indivisibile continuans foret divisibile, quia adæquaretur divisibili; si secundum, ergo duo indivisibilia essent inter se immediatè conjuncta, & ita totum continuum constaret ex puris indivisibilibus.

Confirmatur: Vel inter punctum, & punctum; lineam, & lineam, superficiem, & superficiem, mediat pars indivisibilis, vel divisibilis; si indivisibilis, ergo nihil est in continuo, nisi indivisibile; si divisibilis, ergo continua est sine puncto: ergo reliquæ partes poterunt quoque sine partibus inter se continuari.

**III. ASSERTIO.** Unio partium continui homogenei non est distincta realiter à partibus homogeneis sibi immediatè per contactum præsentibus. Prob. quia nulla est necessitas distinguendæ unionis à partibus homogeneis se immediatè tangentibus, si hæc quatuor concurrunt. 1. Si partes sint perfectè homogeneæ; nam heterogeneæ non habent propriè dictam continuationem. 2. Si sint sibi immediatè præsentibus; inferre enim corpus heterogeneum, vel modicum, non facient vnum continuum; hinc si inter duo plana, etiam homogenea, tantillum aëris intercipiatur, non erunt continua. 3. Si contactus talis sit, qui non faciat res esse penetrativè, sed una pars sit extra aliam; unde lapides penetrativè positi, non essent vnus lapis continuus, sed duo, quia contactus non fig-

ret secundum partes varias variis partibus respondentes, sed per adæquationem, ratione penetrationis. 4. Si præsupponantur certæ dispositiones, qualis est humiditas concreta, & quasi viscosa pro quantitatibus solidis, aut fluida pro fluidis. His, inquam, conditionibus positis, bellè explicatur unio continui homogenei: ergo frustra est unio realis.

Hinc punctum continuans nihil aliud est in linea v. g. quam ipsa linea, quæ cum posset hîc terminari, nec ulterius extendi, tamen non hîc terminatur, sed ulterius extenditur; seu, ut alii loquuntur, est linea, prout dicit negationem extremi, sive extremorum; unde quæ ante unionem erant extrema, in continuo post unionem extrema non sunt, potestque dici in quocunque puncto continui, exceptis extremis, hîc non terminatur continuum: ergo est negatio extremi continui: nec tamen sequitur, punctum continuans esse negationem negationis, quia punctum terminans dicit negationem illius positivi, quod dicit copulans; copulans autem negationem illius positivi, quod dicit terminans.

Quæres, cur Aristoteles 4. Phys. dixerit punctum nec esse partem, nec accidens quantitatis.

Resp. ad 1. quia pars componit totum; at punctum non componit continuum. Ad 2. quia punctum ex natura sua prius est quantitate, utpote illius principium; at nullum accidens prius est suo subjecto.

Hinc punctum definitur, principium quantitatis indivisibile, unde quantitas fluit, per quod terminatur, & continuatur.

§. III. *Diluuntur objecta.*

**A**LIA impugnant realitatem indivisibilium, alia puncta continuantia, & terminantia videntur astruere. Singulis satisfacio.

Objicies 1. Non datur à parte rei corpus, quod non sit longum, latum, & profundum: ergo non datur à parte rei corpus, quod sit punctum, linea, & superficies.

Resp. dist. ant. Quod non sit longum, latum, &c. realiter, & identicè, concedo: formaliter, & virtualiter, nego; licèt enim misericordia sit in Deo identicè justitia, tamen potest cognosci præscindendo à justitia, saltem imperfectè; abstrahentium enim non est mendacium; ita corpus quantum, quod est formaliter longum, latum, & profundum, potest tangere, prout æquivaler puncto, vel lineæ, vel superficiæ; vt enim à parte rei datur misericordia Dei cognoscibilis per intellectum, & per præcisionem actualem cognitam, præscindendo à justitia, ita datur punctum, & linea tangens, vt longa est, & verè præscindibilis per intellectum.

Objicies 2. Superficies non est profunditas: ergo, &c.

Resp. dist. Realiter, divisibiliter, & identicè; nego: indivisibiliter, & formaliter, subdist. formaliter potentiâ, concedo: formaliter actu physico, nego; superficies enim distinguitur virtualiter à profunditate; at virtualitas est inchoatio distinctionis formalis metaphysicæ, quæ per intellectum perficitur.

Instabis 1. Multa fiunt secundum superficiem;

quæ non fiunt se. undùm profunditatem : ergo superficies distinguitur realiter à corpore.

Resp. nego consequ. Ad id enim sufficit distinctio virtualis, & æquipollentiæ.

Instabis 2. Potest superficies produci, & corrumpi, nullâ productâ, aut corruptâ parte ipsius continui : ergo superficies distinguitur à continuo. Prob. ant. duæ guttæ aquæ, dum uniuntur, non pereunt entitativè, licèt pereant superficies, sicut dum ex gutta aquæ fiunt duæ guttulæ, producuntur duæ superficies, quæ antea non erant.

Resp. dist. ant. Possunt produci, & corrumpi superficies secundùm id quod dicunt negativè, concedo : positivè, nego ; superficies enim duo dicit, vnum positivum, nempe rem, quæ longa, & lata est, alterum negativum, nempe negationem vterioris extensionis ; cùm duæ guttæ in vnam confluent, perit negatio tantùm vterioris extensionis, sicut perit privatio, cùm materia incipit habere formam, quâ antea carebat.

Objicies 3. Lumen recipitur tantùm in superficie corporum indivisibili : ergo datur superficies realiter distincta.

Respondent quidam lumen non recipi in corpore opaco, sed tantùm in aëre illi contiguo. Alii respondent recipi etiam in corpore opaco, & ad aliquam profunditatem penetrare, quia nullum volunt esse corpus ita opacum, quod non habeat aliquam perspicuitatem, vt patet dividenti Ferrum in tenuissimas laminas, quæ pellucidæ apparent.

3. Dist. cum Suare Lusit. Recipitur in superficie extrema indivisibiliter accepta, concedo : divisibiliter accepta, nego ; quamvis autem indivisibiliter accepta distinguatur formaliter à continuo, tamen

realiter idem est, habetque profunditatem omni minimâ minorem.

Instabis : Ergo corpora opaca non distinguuntur à diaphanis, quia lux recipitur in parte divisibili corporis opaci, perinde ac diaphani.

Resp. nego subsumptum. Ad probationem, dist. Lux recipitur in parte divisibili opaci corporis indivisibiliter accepta, concedo : divisibiliter accepta, nego. Porro corpora diaphana vel secundum se tota, vel secundum maiorem partem profunditatis transparent : opaca verò tantum quoad extimam partem minorem omni minimâ, seu indivisibiliter acceptâ.

Objicies 4. Sine mathematicis indivisibilibus non potest explicari actio vniformiter difformis, hoc est, ea, quâ agens producit lumen, aut calorem vniformiter difformiter per totum spatium; ita vt quò longiùs disceditur ab agente, eò minor fiat decretio vniformis, nec assignari possint duæ partes spatii, in quibus æqualis calor producat, quemadmodum in pyramide duæ lineæ transversæ paris longitudinis assignari non possunt. Prob. sit v. g. calor, qui producat sex gradus caloris in medio, sextum non producet in parte divisibili : ergo in indivisibili, & quidem mathematico. Prob. ant. pars illa spatii, in qua producit sextum gradum, constat ex aliis minoribus, quarum aliæ aliis minis distant ab agente calido : ergo non producet sextum gradum in singulis illis partibus, quia actio non esset vniformiter difformis.

Resp. i. juxta aliquos, actionem non dari omnino vniformiter difformem, sed in primo pede spatii v. g. produci gradum caloris, in secundo semigradum, &c. sed hoc non satisfacit; nam quæro

de ea parte, in qua finitur primus pes, an sit divisibilis, an indivisibilis? si indivisibilis, ergo dantur indivisibilia in continuo: si divisibilis, ergo ultra tendit sextus gradus. Resp. 2. esto, detur actio uniformiter difformis, quid inde?

Instabis: Ergo non possunt assignari in toto spatio duæ partes, quæ habeant eandem caloris intensiorem.

Resp. Ita est, sicut non possunt assignari in pyramide duæ lineæ transversæ ejusdem longitudinis, at quam partem assignabis?

Resp. faciendam esse divisionem, dicendumque partem agenti calido vicinior, esse magis calidam qualibet remotiore: unde sequitur partes illas tantum distingui per assignationem extrinsecam.

Objicies 5. Globus perfectus non posset tangere planum perfectum, quod est contra Euclidem: ergo datur indivisibile, quod tangat.

Prob. conf. Id, quo globus tangit planum, nec plano commensuratur, aut adæquatur, tangit tantum secundum indivisibile; corpus perfecte sphericum, dum tangit globum perfectum, non potest commensurari plano, & adæquari: ergo tangit secundum indivisibile. Prob. minor: quod habet partes curvas, & æqualiter distantes à centro, non potest commensurari, & adæquari plano perfecto, quod nihil habet curvi, quia rectum adæquaretur curvo: sed globus perfectus habet partes omnes extimas curvas, & æqualiter distantes à centro; planum verò perfectum, habet omnes partes rectas: ergo globus perfecte sphericus non potest adæquari perfecte plano. En argumentum, quod multos abduxit ab Aristotelis sententia, & cui vix ulla solutio solida dari possit. Nos ut qualemcum-

que afferamus, hos canones præscribimus.

I. Si quid hoc argumentum probarer, quodlibet continuum constare ex puris indivisibilibus probaret: ergo nihil probat, quia nimis probat. Prob. ant. nam si contactus globi fiat cum puncto in plano, volvâtque Deus globum ejusmodi super planum, nihil tangeret nisi puncta, ubi ubi porro contactus fiat: ergo planum illud continuum debet constare puris indivisibilibus. Hoc argumentum solvendum quoque est inflatoribus, & iis qui admittunt continuantia, aut terminantia puncta realiter distincta. Certè ipse Suares Gran. air indivisibilia continuantia vniri partibus indivisibiliter.

II. Contactus est duorum corporum simul positio, & indistantia, ita vt inter ipsa nihil quidquam intercedat actu, aut intercedere possit, quandiu sic se contingunt; hinc contigua definivimus cum Aristotele, quorum extrema sunt simul, id est, quorum superficies ita sunt indistantes, vt nihil quidquam inter eas mediet actu, aut potentiâ; ea verò dicuntur non se tangere, inter quæ immota, vel mediat actu aliquod corpus, eadem separans, vel saltem potentiâ.

III. Duplex est contactus in corpore; primus immediationis tantum, sive per indistantiam, cum duo corpora à se invicem non distant, nec tamen adæquantur, quia secundum nullam dimensionem sibi applicantur, vt cum globus perfectus tangit planum. Secundus immediationis, & commensurationis, sive adæquationis, quo duo corpora ita sunt immediata, vt secundum aliquam dimensionem sibi applicentur, qualis est contactus cylindri planum tangentis, ipsique secundum longitudinem commensurati, aut plani tangentis

planum, & eidem secundum longitudinem, & latitudinem commensurati, aut denique corporis cum altero penetrativè positi, & secundum omnem dimensionem eidem appliciti; primus dicitur negativus, secundus positivus: primus fit secundum partem divisibilem, indivisibiliter acceptam: secundus secundum partem divisibilem, divisibiliter acceptam.

IV. Pars divisibilis tunc sumitur indivisibiliter, cum sine villa determinata dimensione sumitur, idque præstat in ordine ad contactum, quod præstaret, si reipsâ foret indivisibilis. His positis

Respondent aliqui præ desperatione, non posse dari globum perfectè sphæricum: sed refutantur à Mathematicis; afferant enim implicantiam; nempe, inquit, non potest dari summa curvitas, quia quidlibet potest semper magis ac magis curvari; at negant id ipsum Mathematici; sufficit enim ad perfectam curvitatē pedalis globi v. g. quòd habeat omnem curvitatē, quam habere debet pedalis globus, quamvis non habeat omnem possibilem; majorem enim habet tripedalis globus: unde infertur curvum globum, & perfectè sphæricum non idem esse. Alii globum perfectè sphæricum possibilem negant ob hanc ipsam difficultatem, quam hîc proposuimus. Ego distinguo, globus perfectus non potest tangere planum, nisi in puncto virtuali, concedo: formali, & positivo, nego: formale punctum voco, quod realiter indivisibile sit, & à partibus realibus distinctum; virtuale autem, quod est pars realis, sed indivisibili æquivalens.

Instabis I. Vel illud punctum est divisibile, vel indivisibile.

Resp.



Resp. dist. Est divisibile realiter, concedo : virtualiter, & æquivalenter, nego; hinc simul est divisibile, & indivisibile, sed diverso respectu.

Instabis 2. Ergo simul tangit divisibiliter, & indivisibiliter, quia tangit secundum aliquid sui realiter divisibile.

Resp. nego subsumptum; ad probationem, dist. tangit secundum aliquid realiter divisibile indivisibiliter acceptum, concedo : divisibiliter acceptum, nego; tangit quippe globus indivisibiliter, quia tangit secundum aliquid sui inadæquatè sumptum, prout æquivaler puncto indivisibili.

Instabis 3. Vel totus globus tangit planum, vel tantum pars; si totus, ergo penetrativè ponitur cum plano; si pars, ergo illa est indivisibilis realiter.

Resp. totum globum tangere totum planum, sed non totaliter. Verbo dicam, globus tangit planum secundum partem divisibilem realiter, sed virtualiter indivisibilem.

Instabis 4. Quæ se totis tangunt se, ponuntur penetrativè: globus, & planum se tangunt se totis: ergo &c.

Resp. dist. majorem: Quæ se tangunt se totis totaliter, & adæquatè, concedo: inadæquatè tantum, nego. Porro tangunt se totaliter se totis, quæ se tangunt secundum omnes partes; unde sequitur penetratio: inadæquatè verò, & contactu immediationis, quæ ita se tangunt, ut inter illa immota nihil mediet actu, aut potentiâ: quare dum globus tangit planum, non adæquatur plano, nec ipsum penetrat, quia non tangit secundum omnem dimensionem.

Instabis 5. Deus videt fieri contactum in parte,

quæ qualibet parte datâ fit minor : ergo in puncto.

Resp. dist. ant. Quæ fit minor virtualiter , concedo : realiter , nego , & dist. conseq. videt fieri in puncto virtuali , concedo : reali , nego.

Instabis 6. Si Deus interrogaretur , qualis esset pars illa , in qua fit contactus , quid responderet ?

Resp. quòd verè respondere posset , nempe contactum in minori parte , & minori qualibet certâ determinatâ fieri : ergo , inquires , minimam assignabit. Resp. dist. minimam virtualiter , id est , punctum virtuale , concedo : minimam realiter , nego ; non enim datur pars minima realis.

Instabis 7. Saltem contactus globi , & plani esset tantum per mentem ; fit enim in parte , quatenus præscindit à trina dimensione ; sed pars , quatenus præscindit à trina dimensione , est tantum per mentem : ergo &c.

Resp. nego majorem ; ad probationem , dist. fit in parte , quatenus præscindit potentiâ , & aptitudine , concedo : quatenus præscindit actu , nego ; non enim contactus fit in parte , prout actu præscindit per operationem mentis , sed prout apta est præscindi : quare dum contactus fit in puncto virtuali , non fit in parte , quæ realiter , & extra intellectum actu præscindat , id est , separatur realiter à sua longitudine , latitudine , & profunditate , sed quæ realiter , & actu tangat , non quia est lata , longa , & profunda , sed præcisè quia puncto æquivalet à parte rei ; sicut Deus aliqua operatur , ut justus à parte rei , quæ non operatur , ut misericors , quamvis hæc duo in Deo sint idem realiter.

Instabis 8. Dum globus tangit planum , contactus globi dividit aërem : ergo fit aliquod foramen per ejusmodi contactum in aëre , in quo proinde

fit vacuum. Prob. sequela: nisi divideretur aër sub globo, partes aëris essent continuæ; at non possunt esse continuæ, quia vel impedirent quominus globus tangeret planum immediatè, vel globus penetrando aërem, tangeret subjectum planum.

Resp. 1. ita tangi planum à globo, vt partes aëris divisi contiguæ maneant, nec tamen globum à plano arceri. Resp. 2. nullum fieri vacuum, quia partes illæ, quatenus sunt sub globo divisæ, desinunt in perfecta indivisibilia negativa; quod vt concipias, finge aërem sub globo divisum in quatuor partes acuminatas contiguas; tunc enim acmina illa quatuor, cum sint puncta mathematica virtualia, licet singula se immediatè tangant, globum tamen à plano non arcebunt: sic in contactu cylindri supra planum, partes aëris sub cylindro hinc inde affusæ, & divisæ sibi contiguæ sunt. Denique tunc idem contingeret, quod contingeret, si globus perfectus in quatuor partes à summo ad imum divideretur, reponerenturque illæ partes, & vnà jungerentur; tunc enim in perfectam lineam interiùs desinentes, tangerent se immediatè secundum longitudinem singulæ partes oppositæ, aliàs plus loci occuparent post divisionem repositæ, quàm antea occupabant.

Instabis 9. Partes illæ aëris, quas dicis sub cylindro contiguas, essent continuæ. Probatur, partes homogeneæ, quæ contiguæ sunt, fiunt continuæ, ex antè dictis.

Resp. nego sequelam; ad probationem, dist. homogenea, si contigua sint, fiunt continua, modò nihil impediat, concedo: modò aliquid impediat, nego; at cylindrus partes aëris premens, dividens.

que in duas virtuales lineas, continuitatem impedit; ea enim tantum continuantur, quæ se tangendo immediatè, fiunt vnum: itaque tunc nulla foret distantia extremorum, quia distantia interjecta dicit aliquod extensionis genus intermedium; at tunc extrema aëris divisi, per contactum globi à se invicem distracta, non aliter se haberent, quam duo plana immediatè sibi invicem applicata. Ratio est, quia indivisibile non facit distantiam inter extrema, quæ se tangunt.

Instabis 10. Si super plano perfecto traheretur cylindrus nigri coloris, vel imprimeret lineam nigram, vel non; si nigram imprimeret: ergo tangeret secundum plures partes; sin minus: ergo non tangeret.

Resp. impressurum lineam virtuales, quæ non ideo diceretur constare ex punctis, quia lineam non describeret, nisi per motum continuum, non autem puncta, & puncta successivè designando. Quod si planum denigraretur, id contingeret ex partibus nigredinis hinc inde in ipso motu affusis, & plano allitis.

#### §. IV. *Diluuntur objecta pro punctis continuantibus.*

**O**BIECIENS 1. Aristoteles meminit indivisibilium continuantium, cum definit continuum, id cujus partes communi termino copulantur: atqui terminus ille est indivisibilis, adeoque realiter distinctus: ergo dantur puncta continuantia realiter distincta.

Resp. 1. ibi Aristotelem loqui ex more Mathematicorum, qui ejusmodi indivisibilia supponunt,

abſtrahendo à rei veritate, aut falſitate. Certe Ariſtoteles 8. Metaph. de illis tantum agit ex hypotheſi, quodd dentur. Reſp. 2. hoc ſenſu partes continui communi termino copulari, quodd vniantur ſub communi eademque ſuperficie virtualiter diſtincta.

Inſtabis 1. Continuum eſt, cujus extrema ſunt vnum: ergo per indiviſibile ſunt vnum.

Reſp. 1. ſenſus eſt Ariſtotelis, continui partium eſt eadem entitas. 2. Diſt. per indiviſibile virtualiter diſtinctum ſunt vnum, concedo: realiter diſtinctum, nego; nam illa indiviſibilia identice, & realiter ſunt dividua, licet prout terminant extrema, aut dicuntur vnire, præſcindant à diviſibilitate, & per conceptus inadæquatos diſtinguantur.

Objicies 2. Continuitas, & contiguitas inter ſe differunt: non differunt, ſi continuitas ſit contactus immediatus partium homogenearum: ergo.

Reſp. diſt. maj. Contiguitas, & continuitas inter ſe differunt abſolute, concedo; dantur enim multa contigua, quæ non ſunt continua: in rebus perfecte homogeneis, nego, aut ſubdiſt. differunt inadæquate, concedo: adæquate, nego. Dixi inadæquate, quia continuitas præter contiguitatem, dicit quasdam diſpoſitiones in homogeneis ad continuationem prærequiſitas.

Inſtabis 1. Continua ſunt ea, quorum extrema ſunt ſimul, id eſt, ſimultaneitate loci: atqui duo non poſſunt eſſe ſimul in eodem loco, quin ſe penetrent, niſi terminentur indiviſibilibus, poſitivis realiter diſtinctis: ergo, dantur indiviſibilia realiter diſtincta.

Reſp. diſt. maj. Contigua ſunt, quorum extrema ſunt ſimul ſimultaneitate negativâ, concedo: po-

fitivâ , nego ; dicuntur enim esse simul simultaneitate negativâ , hoc sensu , quòd inter extremum , & extremum nihil mediet positivum ; non autem simul simultaneitate positivâ , qua duo extrema sint penetrativè in eodem loco.

Instabis 2. Inter extremum , & extremum nihil mediat : ergo sunt in eodem loco.

Resp. dist. nihil mediat positivum , concedo : negativum , nego ; mediat enim negatio vltioris extensionis , qua vtrumque contiguum terminatur.

Objicies ;. Materia , & forma sunt vnum per unionem realiter distinctam : ergo à pari partes continui.

Resp. Disparitas est , quia positis quatuor conditionibus antea recensitis , impossibile est perfectè homogenea non fieri vnum ; at possunt esse decem animæ penetrativè in eadem parte materiæ , nec ipsam informare : ergo requiritur vnio realiter distincta , quæ vnam determinet , potius quàm aliam.

Instabis 1. Materia , & forma debent penetrativè poni , vt faciant compositum : ergo à pari partes continui se penetrare debent , nisi interjiciatur aliquod indivisibile.

Resp. Dispar ratio est , quòd vnio informativa requirat vtriusque partis , hoc est , materiæ , & formæ præsentiam intimam , & quasi compenetrationem , quia omnes partes materiæ debent actuari , & pervadi à forma ; at vnio continuativa non requirit talem penetrationem ; immò omnis pars quantitatis continuæ dicit negationem alterius compartis secum , quia est quantitas ; satis itaq ; est partes non terminari , & mutuò tendere vite-

rius communi continuatione.

Objicies 4. Vt partes continui de non vnitæ fiant vnitæ, requiritur mutatio realis: at non potest dari terminus illius mutationis præter indivisibile continuans realiter distinctum.

Resp. nego minorem, & assigno actionem, per quam partes de se immediatè non tangentibus, fiunt immediatè se tangentes.

Instabis 1. Partes continui sunt vnitæ: ergo per vnionem. Dist. per vnionem formaliter distinctam à contactu immediato, esto: realiter distinctam, nego.

Objicies 5. Si duo ligna inter se distarent vno pede, & corpus interjectum destrueretur à Deo, essent adhuc immédiate, licèt non continua: ergo non satis est partes homogeneas se immediatè tangere, vt fiant continuæ.

Resp. in hac hypothefi, licèt nihil mediet actu positivum, tamen mediare aliquid potentiâ, adeoque non esse immédiate. Contrà verò in partibus continui se immediatè tangentibus, nihil mediat nec actu, nec potentiâ, quandiu servant eundem situm.

Objicies 6. Non possunt fieri vnum per se, quæ se non respiciunt, vt actus, & potentia: partes continui non se respiciunt, vt actus, & potentia: ergo non possunt fieri vnum per se.

Resp. dist. maj. Non possunt fieri vnum ens per se substantiale, & heterogeneousum, concedo: quantitativum, & homogeneousum, nego; id enim habent ex natura sua partes continui, vt statim atque immediatè se tangunt, continguntur inter se, nisi intersit aliqua durties, aut alia qualitas impediens identitatem. 2. Distinguo, si pars vna vnitur alteri,

ut actus subiecto, concedo : ut pars continua, & homogenea parti continuæ, & homogeneæ, nego.

Instabis 1. Duæ aquæ possunt simul poni penetrativè, licèt non continuentur inter se : ergo admittendum est indivisibile, quo continuentur.

Resp. dist. ant. Si impediatur qualitas divinitus producta, concedo : si non impediatur, nego ; nam juxta se positæ statim fient eadem entitas, vniensque necessariò inter se absque indivisibili continuante.

Instabis 2. Aliud est facere vnum cum altero, aliud ipsum tangere.

Resp. dist. in heterogeneis, concedo : in perfectè homogeneis, nego.

Instabis 3. Duo marmora perfectè homogenea non possunt per contactum fieri vnum, licèt immediatè ponantur.

Resp. Ita est, tum quia semper aliquid aëris intermediat, tum quia non habent præsuppositas condiciones ad continuationem requisitas.

Objicies 7. Partes materiæ corporis Christi sunt homogeneæ, & sibi intimè præsentibus in Eucharistia, nec tamen continentur inter se : ergo unio partium continui, non est contactus immediatus partium homogenearum dispositarum.

Resp. 1. Viderint Theologi. 2. transeat ant. quia partes corporis Christi non se tangunt contactu corporeo, quippe quæ non sint localiter extensæ.

Colliges ex dictis, si sanguis Christi fuit præsens materno sanguini intimo contactu corporeo, dum penetravit matris uterum, eundem fuisse continuum in transitu cum sanguine matris. Certè sanguis Christi, dum fuit in utero Virginis, continuabatur per venam umbilicalem cum sanguine



materno. Ex dictis colliguntur quædam pronuntiata de quantitate.

I. Quodlibet ens corporatum duplici termino clauditur, altero essentiæ, & formæ, altero extensionis quantitativæ; hinc ubi non est justa corporis extensio, forma non potest obire sua munera, ut patet in embrione, qui nihil sentire, agere nihil potest, quia justa illi membrorum, totiùsque adeo corporis extensio deest.

II. Vnde non quælibet forma jungi potest cum qualibet materia, quia quælibet forma non copulatur, nisi cum materia certæ extensionis pro exigentia sui; itaque forma nani minùs commodè habitare videtur in corpore gigantis, juxta eos, qui volunt animas substantialiter differre.

III. Licet per se forma actiosa sit, nihil tamen agere potest, saltem commodè, quandiu non est materiæ satis extensæ conjuncta: sic forma hominis nihil ageret in corpore elephanti, aut muscæ, quia hujus corpus angustius est, illius verò vastius.

IV. Quantitas formæ attemperata, licet parva sit, non tamen impedit operationes formæ mirabiles; immo sæpè vi agendi corpora exigua ob virtutem unitam grandia superant; virtus enim unita fortior: vnde illud Averrois, *divinitas natura sæpè magis elucet in parvis, quàm in magnis*, & *scientia naturalis plura specimina ferè habet in materia parva, & aspectu vili, quàm in materia ampla, & valde spectabili*.

V. Quantitas dicitur infinita *dividua*, seu potentia, quia magnitudo quandiu est magnitudo, semper dividua est; vnde paradoxum illud physicum, *in natura nihil est minimum*.

VI. Quantitas, ut talis, non est actiosa, id est,

nec alterat, nec calefacit, &c. Vnde ineptè philosophantur, qui per quantitates, id est, per literas, aut characteres à sagis, aut magis acceptos, curari morbos docent. Ratio est, quod omnis morbus, utpote ex intemperie ortus, vel calefactione, vel frigefactione, vel humectatione, vel exsiccatione sanetur. Quin etiam ipsa vulnera non curantur, nisi consolidatione; at nulla consolidatio sine exsiccatione. Quare istiusmodi characteres, & literæ sunt tantum signa ex instituto, ad quæ convolant dæmones, opera præter consuetudinem naturæ communem patraturi.

## DISPUTATIO SECUNDA.

### *De infinito.*



**Q**UÆSTIONI quantitatis questionem de infinito annectimus, quia, ut monet Aristoteles 1. Phys. tex. 15. finitudinis, aut infinitudinis ratio in corporibus, non ex essentia, aut qualitate propriè, sed ex quantitate debet æstimari. *Infinitum*, inquit, est in quantitate, substantia verò, aut qualitas, aut affectio non potest esse infinita, nisi ex accidente, si simul quædam quanta sint; nam in definitione infiniti quantum adhibetur, non substantia, nec quale.

De infinito egit Aristoteles tribus præsertim locis, 4. Phys. tex. 24. & sequentibus, deinde 1. de cælo, denique 12. Metaph. cap. de infinito; quem tamen librum aliqui rejiciunt, ut spurium.

Nos quæremus 1. quid sit infinitum, & quomodo

plex, 2. an detur infinitum potentiâ, 3. an reipsâ detur infinitum aëtu, 4. an saltem divinitus dari possit.

## ARTICVLVS I.

*De natura, & principiis infiniti.*

**H**ic articulus tria continebit, 1. definitionem infiniti, 2. multiplicem ejus partitionem, 3. quadam principia ad illius intelligentiam.

§. I. *Quid sit infinitum.*

**I.** QVAMVIS dixerit Aristoteles infinitum nobis esse ignotum, clarâ nempe, & distinctâ cognitione, quia quidquid in sensu occurrit, finitum per se: nihil autem ab intellectu nōscitur, quod prius non fuerit in sensu; cognosci tamen a nobis confusâ, & imperfectâ cognitione potest, quatenus ipsum concipimus per modum alicujus, quod non habeat finem. Quare infinitum vniuersim describitur, quod finem non habet, sed hæc descriptio negativa est; quantitatem porro finimus aut numerando, si discreta sit, aut metiendo, si continua; hinc infinitam multitudinem dicimus innumerabilem, magnitudinem verò immensam. Ex hac notione duplex eruitur descriptio infiniti.

II. Prima negativa: infinitum est, quod pertransiri non potest; pertransiri autem dicuntur, ultra quorum terminos itur; itur porro vel locali motu, seu mensurâ, vel motu mentis, seu numero, vel intelligentiâ, seu comprehensione. Hæc descriptio sat bona est; illud enim finem non habet, ultra

quod iri non potest , petiturque ex Aristotele 3. Phys. tex. 34. & 11. Metaph. c. 9. *Infinitem dicitur , aut quod non est natum transiri , aut quod transitum habet , sed inconsummabilem.*

111. Secunda positiva ex lib. 3. Phys. tex. 63. petitur : *Infinitem est , ex quo secundum quantitatem accipientibus , semper aliquid accipere extra est.* Vbi nomine quantitatis intelligitur vel magnitudo , vel multitudo , vel perfectio , seu virtus ; sed hæc descriptio convenit infinito genericè sumpto , non specificè , prout abstrahit ab infinito potentiâ , & infinito actu , vel potius , prout utrique convenit , ut interpretantur Averroës , & D. Thomas ad textum 62. & 63.

1 v. Ex Aristotele , infinitum sumi potest multis modis. 1. Pro eo , quod non potest pertransiri , quia non est in genere eorum , quæ pertransiri possunt : sic punctum est infinitum , quia non habet extensionem , quæ sola transitus est capax , sed est infinitum negativè. 2. Pro eo , quod omnino transiri non potest , licet sit in genere eorum , quæ transiri possunt : sic linea carens fine , & principio est infinita. 3. Pro eo , quod difficulter pertransitur : sic spatium quinquaginta leucarum equo debili , & exhausto videtur infinitum. 4. Pro eo , quod augeri , aut minui potest magis , ac magis , ut quantitas. *Infinitem* , inquit Philosophus 3. Physic. tex. 34. & 11. Metaph. c. 9. *dicitur uno modo , quod impossibile est transiri , quia non aptum est naturâ transiri ; aliter autem transitum habens inconsummabilem , aut quod vix , aut quod naturâ aptum est habere , non tamen habet transitum , aut finem. Amplius ; infinitum omne aut secundum appositionem , aut secundum divisionem ; aut utroque modo.*

Colliges definitionem infiniti ab antiquis sic traditam, *est id, cuius nihil est extra*, ab Aristotele meritò fuisse rejectam, quia convenit toti; totum enim est id, cuius nihil extra est, id est, cuius nulla pars est extra ipsum; sed ut accuratiùs species infiniti definiantur, sit

## §. II. Divisio infiniti.

I. **I**NFINITVM spectatur velex parte modi, vel ex parte materiæ, vel ex parte finis. Ex parte modi, dividitur præsertim in infinitum actu, & infinitum potentiâ. Infinitum actu est id, quod secundùm ea, quæ actu continet, nullo fine clauditur. Breviùs, cuius actus est infinitus. Infinitum potentiâ, quod in ratione actuali, quam habet, aut quæ in eo assignari potest, semper finitum est, sed semper potentia ad aliud sine termino; hinc ab Aristotele dicitur *hoc, & aliud*; hoc secundùm ea, quæ habet actu, *aliud* secundùm ea, ad quæ est in potentia: sic linea divisa in 20. partes, finita est secundùm actualem divisionem, infinita secundùm divisibilitatem. Breviùs, cuius potentia est infinita; hinc in infinito est aliqua successio, ex Aristotele: *Infinitum*, inquit, *non oportet accipere sicut hoc aliquid, ut hominem, aut domum, sed ut dies dicitur, aut certamen, quibus esse, non ut substantia quadam factum est, sed in generatione semper, aut corruptione finitum, sed semper alterum, atque alterum.* 3. Phys. tex. 58.

II. Infinitum actu vocatur infinitum simpliciter, & categorematicum; infinitum verò potentiâ, infinitum secundùm quid, & syncategorematicum. Ut enim apud Logicos categorema est vox per se,

& sine addito significans, ita infinitum categorematicum est simpliciter, & sine addito infinitum; & sicut syncategorema est vox significans cum addito, ita infinitum potentiâ est infinitum cum addito, & quatenus est in potentia ad aliud; hinc

III. Infinitum actu est, quod habet partes suas simul existentes, & secundum eas actu existentes æquales vni certæ constanter assignatæ, & ejusdem generis caret sine; v. g. infinitum actu quantitas ea est, ex qua secundum quantitatem accipiuntur partes vni certæ constanter assignatæ æquales, semper restant ejusdem generis accipiendæ.

IV. Infinitum potentiâ, quod secundum ea, quæ habet actu, finitum est, secundum ea verò, quæ habet potentiâ, semper infinitum est, adeoque partes nunquam habet simul actu existentes; hinc medium est inter finitum actu, & infinitum simpliciter, quia ratione eorum, quæ habet actu, finitum quoddam est, ratione verò eorum, quæ habere potest, infinitum, quia semper habet potentiam ad actum ulteriorem: item essentialiter est indeterminatum. Ratio est, quia semper involvit potentiam ad aliquid indeterminatè, & sine termino.

V. Infinitum potentiâ dividitur in infinitum additione, & infinitum diminutione, quia quantitas potest augeri additione partium, vel minui eorumdem detractiōe. Porro ratio divisionis infiniti in infinitum actu, & potentiâ, hæc est, quod omnis vox, quæ tribuitur subjecto, aliquam formam significet; at duobus modis significare potest, vel ut actu existentem, vel ut possibilem; quæ actu existentem significat, exprimitur per *τὸ sum, est, est*, quæ possibilem per *τὸ possum*; hinc

v 1. Divisum, & divisibile differunt, quia divisum dicit potentiam ad actum redactam; divisibile verò potentiam ad actum reducibilem.

v 1 1. Ratione finis dividitur 1. in infinitum ex utraque parte, ut linea ex utraque parte in infinitum extensa, & infinitum ex vna tantum parte, talis est linea finita quidem ab Occidente, sed versus Orientem infinite protensa. 2. In infinitum privativè, & infinitum negativè; privativum est, quod non habet finem, sed potest, & debet habere ex natura sua, ut linea, quæ careret terminis longitudinis, adeoque pertransiri non posset, licet ut quantitas, posset, & deberet ex natura sua terminari. Negativum, quod nec habet finem, nec habere debet, aut potest, ut solus Deus.

Nec dicas infinitum, ut tale, non posse habere finem, proindeque non dari infinitum privativè; nam distinguunt antecedens infiniti creati assertores, ratione speciei, & quâ infinitum est, concedo: ratione generis, & ut est quantitas, nego.

Ratione materiæ dividitur in infinitum in magnitudine, multitudine, & essentiâ. Primum, quod immensum dicitur, est id, quod mensurando finiri non potest. Secundum, quod innumerabile est, numerando finiri non potest. Tertium, quod comprehensione intellectûs finiti non potest finiri. Huc revoca infinitum duratione, quod tempore mensurari nequit, & infinitum in intensione, qualis esset calor infinite intensus.

Infinitum in essentia dicitur simpliciter infinitum, hoc est, in omni genere entis; aliud verò quodlibet infinitum, per accidens, secundum quid, & in aliquo genere entis, quod nempe in aliqua ratione sibi accidentali finem non habet.



Porrò Aristoteles propriè agit de infinito , quatenus quantitati convenit.

§. III. *Quædam pronuntiata de natura infiniti.*

1. QUID QUID est æquale alteri , aut inæquale , secundum se totum accipitur ; hinc quod est infinitum potentiâ , non potest dici æquale alteri , aut inæquale , quia non potest accipi secundum se totum ; cum enim partim sit in actu , partim in potentia ; nunquam habere potest determinatam quantitatem , quin sit indeterminatum , prout est infinitum potentiâ : ergo nec æquale , nec inæquale esse potest. Quare in tempore , ut infinito potentiâ , non sunt tot dies consequentes , quot antecedentes , nec plures , aut pauciores ; nam voces illæ non tribuuntur infinito potentiâ , sed hæ tantum , non tot , quin plures finitæ in infinitum.

I I. Omne totum est finitum , ita Aristoteles 3. Phys. tex. 64. Ratio est , quod totum perfectum sit , & omne perfectum finitum : sed fortè minùs bene ; nam Deus est quid perfectum , nec tamen finem habet , hinc duplex totum Philosophi distinguunt , vnum terminatum , quod est totum possibile successivè accipi , de quo ibi Aristoteles , intelligitque per  $\tau\omicron$  perfectum idem , ac terminatum ; alterum , quod est totum simul acceptum , quod est interminatum , ut Deus.

I I I. Finitum non potest esse pars infiniti , quia ex Euclide , pars multiplicata totum adæquare potest , vel superare ; finitum etiam multiplicatum , non potest adæquare , multò minùs superare infinitum , neque adeo illius esse pars.



I v. Finitum additum finito, facit tantum finitum. Ratio est, quia totum sequitur naturam partium. Audi Aristotelem 6. Physic. & 1. de cælo, tex. 34. *Quod finitis simplicibus constat, necesse est finitum esse compositum; quod enim ex finitis, & multitudine, & magnitudine componitur, finitum est, & multitudine, & magnitudine; tantum enim erit, quanta sunt, ex quibus est compositum.*

v. Finiti ad infinitum nulla proportio, ex Aristotele 1. de cælo, tex. 51. Sensus est, finiti, quatenus finitum est formaliter, ad infinitum, quatenus infinitum formaliter, non est proportio; nam si spectentur realiter, & identicè, aliquatenus proportionantur: sic duo corpora, quorum alterum habeat infinitam longitudinem (si tamen habere potest,) alterum finitam; si pedalis ambo sint latitudinis, proportionantur in latitudine, licet non in longitudine. Proportio autem definitur ab Euclide, lib. 5. elem. duarum magnitudinum homogenearum mutua habitudo, secundum quantitatem, hoc est, mensuram: quare proportionari dicuntur, quorum vnum multiplicatum, potest alterum æquare, vel excedere. Ratio pronunciati est, quia si finiti ad infinitum esset proportio, finitum multiplicatum posset æquare infinitum: finitum multiplicatum non potest æquare infinitum. 2. daretur utrique mensura communis; at infinitum immensurabile est.

Objicies 1. Est aliqua proportio inter partem, & totum: finitum est pars infiniti, quia multiplicatum infinities æquabit infinitum.

Resp. nego min. juxta 3. pronuntiatum.

Objicies 2. Inter potentiam, & objectum est aliqua proportio; at objectum aliquod est infini-

tum, nempe Deus, & aliqua potentia finita, nempe intellectus.

Resp. dist. majorem: Est aliqua proportio virtutis, concedo: quantitaris, nego: proportio quantitatis est proportio mensuræ, ita ut una quantitas alteram mensurando, æquare, vel superare possit; virtutis autem proportio est quædam habitudo causæ, & effectûs, objecti, & cognitionis, in eo posita, ut causa effectum, & objectum sui cognitionem producere possit: hæc vocatur proportio geometrica; illa arithmetica.

Obicies 3. Ergo inter finitum, & infinitum non est comparatio, adeoque linea infinita non potest dici major digito.

Resp. subsumptum negari à Mathematicis; docet enim Euclides angulum rectilineum esse majorem quolibet angulo contingentis, licet non sit proportio inter utrumque; hinc differunt inter se proportio quantitarum, & comparatio.

v r. Spatium finitum non potest decurri tempore infinito, nec spatium infinitum finito tempore, quia inter finitum, & infinitum esset proportio; omne enim spatium infinitum decurri tantum potest tempore infinito, & tamen supponitur decurri posse tempore finito: ergo inter utrumque esset aliqua proportio.

v r r. Infiniti ad infinitum non est proportio, ex Aristotele, tex. 15. quia non habent communem mensuram; non habent autem, quia infinitum est ex natura sua immensum: quod autem immensum, idem immensurabile, quia mensura debet esse finitæ, & determinatæ magnitudinis; nam ratio mensurationis ex D. Thoma 2. de vetit. ad 10. consistit in hoc, quod fiat certitudo de quantitate

alicujus corporis determinata.

Objicies 1. Quidni detur vtrique infinito mensura communis infinita ? tunc non desinet esse immensum. 2. Personæ sanctæ Trinitaris sunt infinitæ, & tamen vna est æqualis alteri.

Ad 1. resp. quia omnis mensura est essentialiter certæ, & determinatæ quantitatis : ergo repugnat esse infinitam. Ad 2. dist. ant. id est, sunt vna natura infinita, concedo : id est, sunt tria infinita, nego ; nam infinitudo non convenit personæ, vt persona est, sed naturæ, vt natura est ; at natura in Deo vnica est : deinde hîc est quæstio de æqualitate positiva, non negativa, qualis est inter personas divinas. Ex hoc principio

Colliges in quantitate divisibili in infinitum ; quæ sit duorum pedum, non esse pauciores partes, quàm in quantitate centum pedum, si agitur de partibus indeterminatis.

Quæres, an infinitum potentiâ possit comparari cum infinito actu ?

Respondeo non posse, quia si comparetur secundum partem sui, est finitum ; & aliunde non potest comparari secundum se totum, quia nec est, nec sumi potest secundum se totum ; hinc infinitum potentiâ non potest dici æquale, aut inæquale infinito actu, quia infinitum potentiâ est quid indeterminatum, nec dici potest aliquod totum ; infinitum autem actuale est aliquod totum : quare non valet, tot sunt homines possibiles, quot essent in infinita hominum multitudine, quia voces *tot*, *quot*, *plures*, aut *pauciores* dicunt aliquid determinatum ; in infinito autem potentiâ, vt infinitum est, nihil est determinatum.

VIII. Omne infinitum est immensurabile, id

sequitur ex dictis ; vel enim haberet mensuram infinitam , vel finitam ; non infinitam , quia impossibilis est : huc adde mensuram debere esse nobis notiore[m] mensurato , infinitum autem ignotum , ergo nec est notius altero : non finitam , quia finiti ad infinitum nulla proportio. Deinde ex Aristotele lib. 1. de cælo , tex. 63. *Infinitum à finito aliquid pari impossibile est* : mensurari est aliquid pari ; hinc infinito , quæ tale , non convenit æqualitas stricta , quia æqualia dicuntur , quorum eadem est mensura : infinitum est immensurabile ex hoc pronuntiato. Item vnum infinitum non est majus alio , aut minus , quia majus dicitur secundum excessum , minus secundum defectum , æquale secundum commensurationem.

1 x. Infinitum caret figurâ , quia figura certam extremi quanti partibus positionem tribuit : ergo terminat , ac finit ; at finitudo rationem infiniti perimit ; hinc si daretur corpus infinitum , non esset figuratum.

x. Infinitum clausum terminis dari non potest. Prob. 1. ex Aristotele 8. Phys. vbi negat fore primum , si detur processus in infinitum in causis subordinatis , & actu existentibus , quia in infinito non potest reperiri terminus ; at rueret hoc argumentum , si daretur infinitum clausum terminis ; responderetur enim inter primam , & ultimam causam infinitas interjici , ita vt si quis ab ultima incipiens versus primam interjectas numeret , nunquam ad ultimam perventurus sit.

2. Ex eodem lib. de sensu , & sensili , cap. 6. *quorum ultima sunt , necesse est finita esse , quæ intus , id est , quæ illis clauduntur.*

3. Si daretur linea ex hac schola versus Orien-

tem infinitè protensa, & tamen terminis clausa, quantitas finita posset, addito tantùm pede, fieri infinita; infinita verò, detracto tantùm pede, fieri finita, quod absurdum. Prob. sequela, factâ hypothefi, lineæ infinitæ singulis pedibus Deus singulos Angelos imponat; tum jubeat quemlibet Angelum dicere, an ab hac schola finitè distent singuli, an infinitè, certè non singuli dicent se distare infinitè, neque dicent omnes se distare finitè; at aliqui dicent se distare finitè, alii verò infinitè: ergo necesse erit inter eos duos esse vicinos, quorum vnus finitè tantùm, alter verò infinitè distabit.

4. Nullum corpus figuratum potest esse infinitum actu: corpus vtrinque terminis clausum est figuratum: ergo nullum corpus clausum terminis potest esse infinitum actu. Major patet ex terminis; quia quantitas figurata, & quantitas terminata sunt voces synonymæ; figura enim est terminus quantitatis corporeæ, sicut infinitum, & interminatum idem sonant: ergo figuratum, & infinitum sunt termini repugnantes, qui se destruunt.

Denique si ab vno puncto determinato ad aliud determinatum duci potest linea infinita, ducantur tres ejusmodi lineæ æquales, quæ triangulum æquilaterum constituent; tum è parte superiori, seu acumine illius trianguli ducantur lineæ ab vno latere ad alterum, à se invicem vno pede distantes vsque ad basim: vel omnes illæ lineæ erunt finitæ, vel infinitæ; vel aliquæ erunt finitæ, & aliquæ infinitæ: non potest dici, quòd sint omnes finitæ; quia saltem basis erit infinita, & vltima linea eadem proxima erit quoque infinita, quia à basi superabitur vno duntaxat pede: ergo si basis est infinita, etiam illa erit infinita: nec omnes sunt infi-

nitæ ; quia prima constat tantum vno pede , secunda verò duobus : nec aliqua etiam sunt finitæ , aliqua autem infinitæ , quia prima , quæ incipit esse infinita , distat tantum vno pede ab vltima , quæ finita est , & sic est vno duntaxat pede longior : porro finitum additum finito non facit nisi finitum , juxta pronuntiatum 4. Hoc argumento fatetur Arriaga se imprimis vexari.

Objicies : Inter hominem , & vltimam creaturam continentur species animalium aliæ aliis perfectiores in infinitum : ergo datur infinitum clausum terminis.

Resp. dist. conseq. Infinitum potentiâ , concedo : infinitum actu , nego ; nam species illæ perfectiores infimâ creaturâ , & imperfectiores homine , sunt tantum infinitæ potentiâ.

Instabis : Ergo saltem infinitum vt sic , abstrahens ab infinito potentiâ , & infinito actu , non repugnat claudi terminis.

Resp. dist. conseq. Claudi terminis generis , & ordinis diversi , esto : ejusdem , nego ; nempe implicat infinitum , quâ infinitum , habere terminos ; at non implicat , quod est infinitum in vna ratione , finiri , & claudi terminis in altera , qualis esset regula infinita in longitudine , & finita in latitudine : sic species animalium inter hominem , & creaturam infimam , si tamen detur infima , sunt quidem infinitæ potentiâ , & sic sumptæ non habent terminos. Verum clausæ sunt terminis ex parte rum superiori ab homine , tum inferiori à creatura infima ; at duo illa extrema sunt diversæ rationis ab ea , secundum quam species illæ infinitæ sunt , hoc est , in ratione animalium sensitivorum.

x 1. Nullum corpus infinitum moveri potest , ex

Aristotele ; *Phys. tex. 48. Prob. vel enim moveretur motu violento, vel naturali, vel recto, vel circulari : nullo ex his motibus moveri potest ; non violento, aut naturali, quia nullus locus est naturalis infinito ; locus enim naturalis cuiusque partis, est totum ; at totum dari non potest, cuius pars sit infinitum, quia pars esset æqualis toti : ergo nec locus naturalis : ergo nec motus naturalis : ergo nec violentus, quia supponit naturalem possibilem : non recto, quia quidquid movetur motu recto, movetur in spatio maiori se, & à loco ad locum ; at corpus infinitum occupat omnia loca. Deinde si moveretur motu recto, relinqueret locum unum, & acquireret alterum : ergo clauderetur duobus terminis, quod repugnat naturæ infiniti ex 10. pronuntiato.*

Nec refert, quòd linea infinita moveri possit secundum latitudinem, quia tunc movetur, quàm finita. Non denique motu circulari ; nam quidquid movetur circulariter, movetur circa centrum ; at corpus infinitum non habet centrum, quia centrum est punctum medium, ubi autem non est finis, non est medium. Deinde sequeretur lineam, si tantisper moveretur in gyrum, conficere spatium infinitum, finito tempore ; sit enim v.g. centrum aliquod unde dux lineæ *A B*, & *A C* in infinitum ducantur ; tum deinde spatium *D*, ducatur circulus, cuius arcus sit *B, F, D*. Ex hac hypothese sic argumentor : si corpus moveretur in circulum, deberet linea *A B* venire in locum relictum à linea *A C* ; at hoc fieri non potest, quia ut linea *A B* succedat in locum lineæ *A C*, decurrendum illi est spatium inter utramque medium ; at non potest decurrere, vel enim decurreret tempore finito, vel infinito ;



non finito , quia spatium infinitum finito temporis percurri non potest ; non infinito , quia spatium infinitum , tempore infinito decurrendum , exhaustiri non potest.

xii. Infinitum pertransiri non potest , quia tandem finis illius attingeretur ; at infinitum finem non habet ; unde à quantitate infinita , si daretur , possent extrahi in infinitum novæ , & novæ magnitudines vni certæ æquales , & majores , nec tamen exhaustiretur : ex quo sequitur

xiii. Corpus infinitum occupat omnem locum possibilem , aliter clauderetur terminis ; hinc non possent dari duo corpora infinita , nisi se mutuo penetrarent.

xiv. Infinitum , quia infinitum , non potest cognosci , cognitione clarâ ( intellige de privativo , non negativo ; ) vel enim sensu , vel imaginatione , vel mente cognosceretur. Non sensu , quia organum , utpote finitæ extensionis , non potest proportionari infinito in extensione , aliter finiti ad infinitum esset proportio ; non imaginatione , tum quia imaginando tantum cognoscimus , quæ sensu externo percipimus : tum quia dum imaginatio lineam sibi fingit infinitam , statim eam partem , quæ in infinitum porrigitur , fingit , ut nebulosam : ergo confusè tantum cognoscit. Non denique mente , quia daretur infinitum clausum terminis ; intellectus enim v. g. cognoscat distinctè duo infinita , & partes partibus componat , tum vni addat centum partes. Quæro , utrum videat singulas vnius infiniti partes alterius partibus respondentes , necne ? si videt respondentes : ergo antea vna vni respondebat ; si non respondentes : ergo vnum superatur ab alio , ab eoque terminatur , quod est contra principium 10. Nec



Nec refert, quòd Deus se perfectè cognoscat, quia est infinitum negativè, non privativè. Item cùm intellectus fabricando universale, cognoscit aliquo modo individua ex Nominalibus, non ea cognoscit, vt infinita; deinde cognoscit tantùm confusè.

xv. Infinitum, quia tale, est improducibile, etiam à Deo, quia quidquid producit Deus, producit ex idea, & vt artifex: at Deus non potest producere infinitum ex idea, & vt artifex, juxta principium 14. quia quidquid ex idea producitur, id ex distincta rei cognitione producitur; idea enim debet esse distincta cognitio, vt dirigat: deinde idea est mensura operis; at Deus non potest habere distinctam cognitionem infiniti privativi, ex principio 14.

xvi. Ad rationem infiniti non sufficit, vt superet omne possibile in aliquo genere, alias homo esset infinitus, quia nullum animal possibile perfectionem ejus assequi potest; sed requiritur 1. vt à nullo alio superari possit; 2. vt rerum possibilium perfectiones, quas superat, in se aliquo modo contineat; hinc musca, licet supra montem infinitæ altitudinis posita, non diceretur infinita, quia illius infinitudinem montis in se non contineret, nec suâ; sed alienâ esset granditate sublimis; hinc Deus est ens infinitè perfectum, quia 1. est supra omnia; 2. continet in se vel formaliter, vel eminenter omnium rerum possibilium perfectiones.



*An detur actu infinitum, aut dari possit.*

**C**V M infinitum duplex sit, alterum potentiâ, alterum actu, triplex nascitur quæstio. Prima, an reipsâ detur infinitum actu creatum, aut naturaliter dari possit. Secunda, an detur saltem infinitum potentiâ, actu. Tertia, an divinâ virtute dari possit infinitum actu in aliquo genere entis, sive in essentia, sive in quantitate tum continua, tum discreta, sive in qualitate, &c.

§. I. *An detur infinitum actu creatum in rebus, aut naturaliter dari possit.*

**U**N I C A A S- **N**V L L V M datur infinitum actu creatum in rebus; nec naturaliter dari potest. Dux sunt partes assertionis; prima est de facto, quod non detur; altera de possibili naturaliter.

Primam partem probat Aristoteles lib. 3. Physic. multis textibus. Probatur à nobis sic: nulla est necessitas admittendi infiniti actu creati: ergo non datur. Probatur antecedens: si quod daretur actu infinitum creatum, illud vel esset in perfectione essentiali, vel in magnitudine, vel in multitudine, vel in intensione qualitatum: nihil horum dici potest: ergo &c.

Non in perfectione essentiali, quia nullum ejus vestigium apparet, nec vllum ens creatum est, quod non habeat essentiam limitatam, sive physice, sive metaphysicè sumatur.

Non in magnitudine ; nam corpus illud vel contineretur intra spatium cæli ultimi, vel esset cælum ultimum, seu sphaera suprema, quæ ceteros orbes ambitu suo coerces, & continet : non corpus contentum intra cælum, tum quia sphaera elementaris concavo lunæ ambitur ; tum quia sydera complexione sua suprema sphaera continet, & ita daretur infinitum clausum terminis, quod repugnat pronuntiato 10. Ad hæc, sydera moventur in gyrum circa aliquod centrum : ergo describunt motu suo circulum : ergo non distant infinitè à centro, nec à terra, quæ est intra centrum ; consequentia patet, ex natura circuli, qui est figura terminata unicâ lineâ, à centro æqualiter distante ; quod autem terminatum est, infinitum esse non potest. Ratio est, quia quidquid terminatum est, idem & finitum, & quod finitum est, infinitum esse nequit. Certè linea illa, quæ describit illum circulum, habet in vno extremo sydus, & in alio centrum, & ita vtrinque clauditur. Denique non ipsum cælum infinitum est ; illius enim spatium viginti quatuor horis sol ipse percurrit : ergo infinitum finito tempore percurreretur, quod repugnat pronuntiato 6.

Non in multitudine, quia nulla apparet, tum in rebus corporatis, tum in spiritalibus infinitas, diciturque Deus fecisse omnia in numero, pondere, & mensura.

Non in intensione qualitatum, quia qualitas quælibet aut naturalis est, aut supernaturalis ; naturalis proportionatur virtuti agentis naturalis ; virtus porro agentis cuiuslibet naturalis finita est ; quod patet à posteriori ; nullus enim cernitur effectus re ipsâ infinitus : ergo nec datur causa creata virtutis infinitæ, aliàs vim suam aliquando exereret. Su-

pernaturalis quoque actu infinita nulla assignari potest, ut patebit ex solutione objectionum.

Secunda pars probatur, quia ne divinitus quidem dari potest infinitum actu creatum: ergo naturaliter dari non potest.

### §. II. *Diluuntur objecta.*

**O**BJICIES I. Finitudo, & infinitudo sunt proprietates quantitatis: proprietates quantitatis sunt reales: ergo finitudo, & infinitudo sunt reales.

Resp. dist. maj. Infinitudo potentialis, & syncategorematica, concedo: infinitudo actualis, nego.

Instabis I. Ex finitis partibus fit finitum actu: ergo ex infinitis partibus quantitatis fit infinitum.

Resp. dist. conseq. Fit infinitum in eo genere, in quo sunt partes infinitae, concedo: in alio, nego. Porro partes quantitatis sunt tantum infinitae potentiâ: ergo resultat tantum infinitum potentiâ. Deinde finitum aliter convenit quantitati, aliter infinitum actu; illud convenit actu, & positivè: hoc verò solum per non repugnantiam, quatenus si daretur, nonnisi in quantitate dari posset: unde nonnulli dixerunt, si daretur infinitum actu, in prædicamento quantitatis poni debere.

Objicies 2. Homo est ens creatum: homo est infinitus actu: ergo datur ens creatum infinitum actu. Prob. min. illud ens, quod superat species infinitas perfectiores in infinitum possibiles, est infinitum actu: homo superat infinitas species animalium alias possibiles in infinitum intra gradum animalis, & quidem perfectiores: ergo &c.

Resp. dist. maj. Quod superat, & continet illa-

rum specierum perfectiones aut formaliter, aut eminenter, est infinitum actu, esto: quod superat, nec continet, nego; at homo nec formaliter, nec eminenter continet in se perfectiones specierum inferiorum, quia nec ipsas species, nec earum effectus singulos valet per se producere. Musca superat species corporum inanimatorum in infinitum perfectiores, an ideo infinita? minimè ex 16. pronuntiato.

Instabis 1. Creentur actu omnes illæ species, tunc erunt infinitæ actu, & tamen ab homine superabuntur.

Resp. nego hypothesim, quia infinitum potentia non potest reduci ad actum adæquatum, utpote quod sit hoc, & aliud ex natura sua; itaque tantum distributive produci possunt, non collectivè ejusmodi species.

Instabis 2. Homo habet intellectum, & voluntatem: per utrumque potest effectus perfectiores in infinitum producere, quia potest versari circa objectum perfectius, & perfectius cognitum, aut amatum, nempe circa Deum ex hypothesi, quod augeatur lumen gloriæ, aut vberior concursus Dei adjungatur: ergo homo est actu infinitus.

Resp. dist. maj. Potest versari circa objectum perfectius, & perfectius, ita ut eliciat effectus perfectiores se superantes in essentiali perfectione; ut causa principalis, propriis viribus, per vim creativam in quolibet genere, nego: ut causa instrumentalis, alienis viribus, in aliquo tantum genere, & non per actionem creativam, concedo; nam intellectus producit illas intellectiones supernaturales elevatus lumine gloriæ, non principaliter, nec per creationem.

Instabis 3. Saltem versabitur intellectus circa Deum infinitum : ergo erit infinitus.

Resp. dist. ant. Finito modo, concedo : infinito, nego : vnde sequitur tantum esse infinitum terminativè, non physicè, & entitativè.

Instabis 4. Què perfectius objectum, eò perfectior cognitio : ergo cognitio Beatorum est infinita.

Resp. dist. ant. Eò perfectior, crescendo proportionè geometricà, concedo : arithmetica, nego ; nam cognitio Beatorum crescit tantum geometricè, quia Deum non comprehendit, nec attingit, quantum est cognoscibilis.

Objicies 3. Deus non potest facere cognitionem perfectiorem visione sui intuitivâ, quia nullum perfectius objectum : ergo est infinita.

Resp. dist. conseq. Terminativè, concedo : entitativè, nego : vnde est tantum infinita secundum quid, hoc est, ratione objecti, quod non refundit perfectionem infinitam in cognitionem ; quid multa ? est tantum superioris ordinis inter possibiles cognitiones, non infinitæ perfectionis.

Instabis 1. Saltem si Deus se ipsum comprehendit, non erit infinitus, quia ex principio 14. infinitum intelligentiâ mensurari non potest.

Resp. nego sequelam ; licet enim Deus se comprehendat, cognitio ejus est infinita, adeoque non desinit esse infinitus. Porro cognitio, ut ait Aristoteles, fit per quandam adæquationem mentis, & objecti ; at adæquarei ei, quod est infinitum, est esse infinitum. Vnde D. Thomas ait 1. part. q. 14. art. 13. in resp. ad 1. & 2. *Non est contra naturam infiniti, quod comprehendatur ab infinito.*

Objicies 4. Aristoteles in rebus spiritualibus,

nempe animabus rationalibus, admisit infinitum actu: ergo ex Aristotele, possibile est infinitum actu. Probatur antecedens; admisit mundum ab æterno: ergo æternas hominum generationes; unde sic arguo: si mundus ab æterno est, & homo hominem generat, vel animi hominum sunt immortales, vel non: si immortales, ergo infiniti; nam singuli perseverant extincto corpore: si finiti, & immortales, necesse est ex vno corpore in aliud transmigrare; at docet Aristoteles animos esse immortales, negatque eorum transmigrationem in corpora: ergo sunt infiniti actu.

Responsio multiplex: alii dicunt Aristotelem animorum immortalitatem negasse, quod ego non puto; alii transmigrationem de corpore in corpus admisisse, cum hoc discrimine à Pythagora, quod hic transmigrationem animorum humanorum promiscuè in belluina, & humana corpora admitteret, ille in corpora tantùm humana. Alii dicunt Aristotelem in substantiis spiritualibus infinitam actu multitudinem agnovisse, licet negaverit infinitum in quantitate possibile; ideoque volunt Aristotelem in contradictionem incidisse.

Objicies 5. In Christo multa sunt infinita simpliciter, etiam creata; nam 1. humanitas vi hypostaticæ unionis contraxit infinitudinem, 2. subsistit per subsistentiam infinitam, 3. est sancta sanctitate infinita, 4. habet gratiam sanctificantem infinitam, 5. actiones theandricas valoris infiniti.

Resp. ad 1. Humanitas Christi contraxit infinitudinem, terminativè, concedo: entitativè, & physicè, nego.

Ad 2. Subsistentia Christi est increata, adeoque verbi propria.



Ad 3. Duplex est gratia in Christo veluti habitualis, altera increata, nempe divinitas Christum sanctificans, & in se infinita; altera creata, quæ dicitur omnium possibilium maxima, non quidem ex natura sua, sed ex vno Dei decreto, qui decrevit nullam dare maiorem cuilibet homini: sic gratia beatæ Virginis eo sensu est omnium maxima, quas Deus statuit dare puræ creaturæ; at non est infinita simpliciter, quia major absolutè dari potuit.

Ad 4. Licet actio quælibet Christi fuerit meriti infiniti, non tamen est infinitæ perfectionis entitativæ; ideo enim fuit meriti infiniti, quia erat à persona infinita, dignificante ipsum opus, & ius tribuente ad præmium infinitum, juxta illud principium morale, quò persona dignior, eò majus meritum: ergo persona infinita præmium meretur infinitum, id est, semper majus, & majus. Deinde valor ejusmodi est tantum infinitus moraliter, non physicè, nempe per denominationem sumptam à supposito divino, non ab aliqua perfectione eidem actioni intrinseca, quæ finita fuit intrinsecè.

Objicies 6. Peccati mortalis malitia est simpliciter infinita.

Resp. nego, sed tantum terminativè, ut est contra personam infinitæ dignitatis à persona vilissima; sed entitativè finita est, nec malitia unius peccati continet possibilem cujuscumque alterius, saltem specie distincti, malitiam.

Instabis 1. Opponitur infinitæ Dei sanctitati ea malitia, ergo est infinita.

Resp. nego consequ. quia opponitur tantum finito modo, aliter malitia peccati venialis esset infinita.



Instabis 2. Eò gravior malitia, quò dignior persona offensa; at Deus offensus est infinitus.

Resp. dist. Eò gravior est secundum genus, & ordinem malitiæ, concedo: secundum gradus malitiæ, nego; sequitur enim tantum malitiam peccati mortalis esse ordinis superioris, adeoque non posse æquari, aut superari per malitiam ordinis inferioris, licet infinities multiplicatam.

Instabis 3. Illa malitia est infinita simpliciter, cui à creatura finita satisfieri non potest: talis est malitia peccati.

Resp. rationem insufficientiæ illius petendam esse ex defectu proportionis inter injuriam Deo illatam, & satisfactionem puræ creaturæ. Ratio est, quòd offensa crescat pro dignitate personæ offensæ, decrescat autem satisfactio pro vilitate personæ satisfaciæntis; hinc Deus magis censetur inhonorari per peccatum creaturæ, quam glorificari possit per quamcumque satisfactionem à pura creatura oblatam; quare opus fuit Christo, hoc est, personâ infinitâ, quæ Deo condignè pro peccatis satisfaceret.

### §. III. *An detur infinitum potentiâ in rebus.*

UNICA OB-**I**NFINITUM potentiâ aliud est SERVATIO. **I**per descensum, quod in quantitate v. g. habet extensionem sine carentem, & impertransibilem, secundum partes proportionales: aliud per ascensum, quod potest magis, ac magis crescere, per additionem partium majorum in infinitum.

I. A S S E R T I O. Datur infinitum potentiâ utroque modo. Prob. infinitum potentiâ illud est, à

quo semper est aliquid ultra accipere, nec tamen est totum actu existens; seu quod potest minui partium detractiōe, aut augeri partium additiōe: atqui datur tale infinitum. 1. In quantitate continua, quia datā qualibet, potest dari major, & minor; ut enim crescere potest magis, ac magis additiōe partium, ita & minui in infinitum, factā divisiōe partium minorum. 2. In quantitate discreta; dato siquidem quolibet numero, potest dari major, & major in infinitum, sicut assumptis minutiis potest esse minor, & minor. 3. In substantiis, quia datā qualibet creaturā, Deus potest perfectiorem producere; quācumque enim detur, infinitè distabit à Deo in perfectione substantiali; distabit autem infinitè, quia nunquam ita erit perfecta, ut illius perfectionem omnem participet, repræsentet, & imitetur, quantum participabilis, repræsentabilis, & imitabilis est: ergo Deus erit adhuc participabilis, repræsentabilis, & imitabilis, & quidem perfectiori modo ab alia, & ita in infinitum. Certè de essentia participationis est, ut partem capiat ejus, quod participat; aliàs si totam capiat, non jam participatio erit, sed reduplicatio perfectionis illius: ergo si quælibet creatura, sub quacumque ratione sumatur, ex essentia sua sit participatio Dei, illius duntaxat perfectionis partem capit, non totam.

Hinc 1. quælibet creatura ex essentia sua includit finitudinem. 2. Deus, cum sit perfectissimus, potest magis, ac magis participari, licet nunquam adequatè participari possit, adeoque quamlibet participationem superet. 3. Nullam creaturam perfectissimam Deus videt, nec ultimam in serie perfectiorum, quia nec maxima, nec ultima est possi-

bilis ; videt itaque suam essentiam magis , ac magis participabilem peræquè , ac immensitatem , sapientiam , & potentiam sine termino. 4. Creaturæ perfectiores , & perfectiores in infinitum non possunt adæquatè colligi , quia illa collectio omnem participabilitatem complecteretur ; & aliunde Deus ita participari non potest , quin magis , ac magis participari possit : quare licet creaturæ singulæ distributivè , & seorsim produci queant , collectivè non possunt ; vnde non valet illatio à sensu distributivo ad collectivum , cùm prædicata important aliquod genus quantitatis : v. g. nullum est in bibliotheca volumen , quod non possim vno mense legere : ergo possum omnia volumina vno mense legere ; consecutio nulla , quia est aliquid in consequente , quod non est in antecedente ; valet tamen , cùm prædicata singulis secundùm se conveniunt : v. g. quilibet homo est rationalis , animal , substantia : ergo omnes homines.

Confirmatur : Deus non potest producere maximum numerum , quia dato quocumque numero , major adhuc possibilis est : ergo non potest producere creaturam perfectissimam.

Objicies 1. Deus potest producere rem perfectissimam , quam potest producere : res illa erit perfectissima creatura : ergo Deus potest producere creaturam perfectissimam.

Resp. primam propositionem perinde falsam esse , atque hæc est : Deus potest producere chymaram perfectissimam , quam potest producere , aut potest producere numerum maximum , quem potest producere ; supponunt enim ejusmodi propositiones id , quod probandum est , nempe possibilem creaturam perfectissimam , aut numerum maximum.

Objicies 2. Deus non potest essentiam hominis perfectiorem efficere ; ergo nec species in infinitum perfectiores producere.

Resp. transf. ant. nego conseq. quia essentia hominis posita est in indivisibili , adeoque perfectior fieri non potest , quàm reipsâ sit ; at non implicat intra speciem hominis , & lapidis produci species alias perfectiores in infinitum , quæ nunquam adæquent perfectionem hominis ; deinde argumentum retorqueo : Deus non potest efficere numerum quaternarium perfectiorem ; nam in indivisibili consistit : ergo non potest numeros perfectiores in infinitum efficere , quæ consecutio ?

Instabis 1. Progressus specierum est progressus ad vnam , quæ omnes perfectiones inferiorum contineat : ergo species illa erit perfectissima.

Resp. nego ant. Non enim est progressus ad unitatem , sed ad multitudinem , ita ut non detur aliqua , ad quam primò Deus descendat. Certè in numeris progressus non fit ad vnum maximum numerum , sed ad plures , & plures in infinitum , in quibus inferiores numeros superiores contineant.

Objicies 3. Deus intuendo omnes possibles creaturas , potest eam producere , quam videt inter eas perfectissimam : at videt perfectissimam.

Resp. nego minorem , an Deus videt chymazam : porro creatura perfectissima est chymaza.

Instabis 1. In collectione possibilium creaturarum , videt aliquam sibi proximam , at hæc est omnium possibilium perfectissima.

Resp. argumentum esse de falso supponente ; supponit enim dari collectionem creaturarum possibilium , quæ impossibilis , quia ubi collectio , ibi est totum ; infinitum autem totum esse nequit ex Ari-

Aotele. Deinde infinitum potentiâ partim est actu, partim potentiâ, id est, cuius vna pars actu habetur, & altera est tantùm possibilis: ergo colligi non potest. Denique infinitum potentiâ ex Aristotele non est, vt hoc aliquid, sed vt hoc, & aliud; hinc in infinito non vsurpatur hæc vox, hic, hæc, hoc, quia est pronomen demonstrativum, aliquid determinatè significans, sed additur aliud; vnde infinitum potentiâ, quâ tale, involvit aliquam successionem temporis, præsens quidem secundùm ea, quæ dicit actu; futurum verò secundùm ea, quæ dicit potentiâ; at successiva colligi non possunt, quia vnum habent essentialiter post aliud; quare non est possibilis dierum collectio, nec valet consequentia: dies hodiernus, & crastinus sunt possibiles: ergo ambo nunc possunt simul existere, quia à possibilitate rerum successivarum ad actum simultaneum non valet consecutio, sed ad successivum duntaxat: itaque cùm infinitum potentiâ dicat successionem secundùm divisibilitatem, nunquàm potest totum simul poni; at res aliter se habet in infinito categorematico, quia in eo debent actu singula existere.

Instabis 2. Probatur existentia causæ primæ; quia in tota collectione creaturarum est aliqua, quæ non est à creatura: ergo supponitur illa collectio possibilis.

Resp. nego consequentiam: sed assumitur collectio illa ex hypothesi impossibili, ex qua licet argumentari contra eum, qui ejusmodi hypothesim admittit, vt possibilem: sic ex hypothesi infiniti actu, licet refellere infinitum actu contra illius assertores.

Instabis 3. Creaturæ illæ possibiles sunt entia per-

manentia, non successiva: ergo non repugnat eas simul coexistere.

Resp. dist. ant. Sunt entia permanentia secundum se, & prædicata singularia, concedo: secundum quod efficiunt numerum infinitum syncategorematicum, nego; nam sub eo respectu habent aliquid partim actu, partim potentiâ, adeoque dicunt successionem; hinc Deus non potest illas colligere.

Instabis 4. Illa species, ad quam primò descenditur, incipiendo à Deo, vel est infinitæ perfectionis, vel finitæ: non finitæ, quia continet infinitarum sequentium perfectiones: ergo infinitæ.

Resp. supponi ab adversariis, quod probandum est; nulla enim datur prima species, descendendo à Deo, quia infinitudo versùs Deum, datur in illis speciebus; at infinitum, quâ infinitum, non habet primum, & ultimum, quia clauderetur terminis: ergo non datur species perfectissima, & prima, incipiendo à Deo, in qua aliæ omnes contineantur; sed quælibet ex illis continet aliquatenus in se species inferiores, & in superioribus continetur.

Instabis 5. Vbi datur ordo, ibi datur primum, & ultimum: inter creaturas possibles datur ordo: ergo primum, & ultimum.

Resp. dist. majorem: Vbi datur ordo essentialis, concedo; hinc enim confecimus existentiam causæ primæ: accidentalis tantum, subdistinguo, datur ultimum; nec datur primum, concedo: datur ultimum simul, & primum semper, nego; hinc qui defendunt æternitatem mundi à parte antè, licet ultimum diem admittant, negant tamen dari primum, quia ille ordo dierum sese consequen-

tium est in multitudine infinita, in qua non datur primum, licet detur ultimum: sicut ex rei veritate, licet detur primus mundi dies, non dabitur ultimus, quia mundus infinito tempore duraturus est. Duplex itaque ordo causarum, primus essentialis, qui est inter primam, & secundam; prima enim ita prior est secundâ, ut sine ea, secunda nec agere, nec concipi possit: secundus accidentalis inter causas per accidens sibi subordinatas, qualis est inter Socratem, & Calliam; ita enim prior est Socrates Callia, ut possit concipi posterior. Præterea datur ordo essentialis inter species creaturarum, quarum superiores, ideo dicuntur tantum continere essentias inferiorum, quia sunt altioris ordinis, & essentia. Porro in ejusmodi ordine essentiali non datur primum, licet fortè detur ultimum, nempe imperfectissima creatura; sicut in numeris finitis datur ultimus, nempe binarius; at non datur primus, sive summus, quia augeri magis, ac magis potest. His positis, sic dist. ubi est ordo causarum essentialis, ibi est primum, & ultimum, concedo: ubi est ordo, vel causarum accidentalis, vel essentialis inter species, qualem descripsimus, nego.

Instabis 6. Datur aliquod ens imperfectissimum in ratione substantiæ, nempe materia prima: ergo potest dari perfectissima substantia creata:

Resp. nego antecedens, & consequentiam; antecedens quidem, quia potest dari substantia, quæ non sustentet, sed tantum recipiat; ideoque imperfectior materiâ primâ; consequentiam verò, quia licet daretur creatura imperfectissima, quæ non posset minus de Deo participare, non ideo daretur perfectissima, quia Deus est infinite partici-



pabilis, secundum perfectiones plures, & plures, sicut datur numerus primus, non maximus. Porro cum sit distantia infinita inter ens, & non ens, non potest ideo dari creatura imperfectissima, quia qualibet datâ, semper aliqua supererit, quæ propius possit ad non ens accedere.

Instabis 7. Videt Deus ab elementis usque ad divinitatem ascendentes creaturarum species: ergo sicut videt secundam post terminum imperfectionis, ita & secundam post terminum perfectionis.

Resp. nego paritatem: Ratio est, quod in infinito secundum potentiam semper crescenti, detur primum, secundum, tertium; non autem detur ultimum, aut penultimum; qua enim parte primum habet, est finitum, quatenus autem infinitum, non habet terminos. Porro creaturæ sunt infinitæ potentiâ, ascendendo versus Deum.

Objicies 4. Possunt ex dictis multiplicari in infinitum creaturæ: ergo mundus non est perfectus, quia posset admittere species perfectiores, aut saltem plures.

Resp. eo sensu mundum esse perfectum, quod omnia creaturarum genera possibilea contineat, quæ sunt triplicis ordinis, nempe rerum purè spiritualium, purè corporatarum, & ex ambabus mixtarum; non tamen continet omnes species, quæ sub illis generibus produci possunt, quia ad ejus perfectionem non requiruntur.

§. IV. *An saltem divinitus possit dari infinitum actu creatum.*

**T**RIPLEX est de hac quæstione sententia. Prima, quæ est Okami in 2. dist. 1. pugnat per



absolutam Dei potentiam, posse dari infinitum actu creatum in quolibet genere. Secunda, quam tenent D. Thomas, & Scotus, negat absolute posse dari infinitum actu in vlllo genere entis. Tertia, quæ quasi media est, & ex utraque temperata, in certo genere admittit, putà in rebus spiritualibus, in alio genere respuit, v. g. in rebus corporatis; quæstionem vt definiam, fit

I. A S S E R T I O. Non potest dari, etiam divinitus, ens creatum infinitum actu in essentia. Ita D. Thomas, & alii plures. Probatur 1. ens creatum quodlibet distantia infinita superatur à Deo, quia infinite distat à Deo: ergo dato quolibet ente creato, potest dari aliud, quod propius ad Deum accedat, adeoque non potest esse actu infinitum in essentia. Consequentia ultima patet, vnumquodque enim ibi intelligitur finiri, vbi intelligitur superari. Prima consequentia patet quoque, quia si Deus adhuc infinite distat ab illo ente creato, utique & aliud dari potest, quod Deum magis imitetur, & repræsentet, vt jam probavi superiori §. Hæc doctrina nititur pronuntiato 10. quo confestim non posse dari infinitum clausum terminis; inde enim consequens est infinito, quatenus infinitum est, additionem fieri non posse, aliàs clauderetur ab illa parte, cui fieret additio.

Confirmatur: positâ qualibet creaturâ perfectissimâ, adhuc est major potentia ex parte Dei in infinitum, & ex parte creaturæ, nulla repugnantia in perfectiori creatura apparet. Probatur à nonnullis hoc argumento, quod exhauriretur Dei omnipotentia; sed minus validè, tum quia posset adhuc Deus idem infinitum jam productum destruere, ac reficere: tum quia idem jam productum

posset conservare : tum quia potentia Patris æterni infinita, licet dicatur in generatione Filii exhausta, cum alium producere nequeat, non ideo definit esse infinita.

II. **A S S E R T I O.** Nullum potest dari infinitum actu creatum in magnitudine, sive in extensione. Probat<sup>ur</sup> 1. illa magnitudo esset infinita, & non esset; esset ut supponitur; non esset autem, quia haberet partes, & quidquid habet partes, est finitum, quia ubi datur pars, & pars, ibi datur & totum, quia totum est, quod ex omnibus suis partibus componitur; pars, quæ totum cum aliis componit: ac omne totum est finitum ex 2. pronuntiato: ergo illa magnitudo non esset infinita: ergo finita, quia inter finitum, & infinitum in communi subjecto existente, non datur medium; porro inter finitum, & infinitum non datur medium, quia idem est esse infinitum, & non finitum; nam extensio non finita illa est, quæ caret terminis, & fine, & extensio infinita, quæ caret terminis; ac finitur, & non finitum sunt differentię contradictorię in subjecto constante: igitur finitum, & infinitum non habent medium.

Probat<sup>ur</sup> 2. factâ hypothesi, Deus producat infinitam magnitudinem versùs Orientem ex palmis alternatim nigris, & albis; deinde annihilat in instanti per subtractionem concursus, omnes palmos, qui albi sunt, relictis nigris; tum omnes residuos simul conjungat, faciâtque contiguos; hinc sic argumentor: vel nigri, qui relictis sunt, tantum spatii occupant, quantum occupabant albi simul, & nigri, vel minùs; primum dici non potest, tum quia pars esset æqualis toti, tum quia supponuntur albi destructi, tum quia non plus loci occupare

possunt, quàm antea occuparent; at tantumdem loci non occupabant palmi nigri, quantum nigri simul, & albi occupabant. Secundum quoque dici non potest 1. quia vel daretur infinitum clausum terminis, vel certè finitum duntaxat locum occuparent, adeoque finiti essent: ergo juncti albis finitum quoque locum occupabant, quia finitum additum finito, facit tantum finitum, ex 4. pronuntiato.

Prob. 3. Sequeretur partem esse æqualem toti; producat enim à Deo filum infinitum secundum longitudinem versùs Orientem, & Occidentem; ejus crassitudo sit unius digiti; tum Deus illum convolvat in globum: ille globus occupabit infinitum spatium omni ex parte, quia superabit quodlibet aliud corpus cujusque crassitudinis, & longitudinis finitæ, cum tamen antea occuparet spatium secundum longitudinem infinitum: ergo linea erit æqualis globo, hoc est, pars toti.

Prob. 4. Si repugnat infinitum actu creatum in numero, & multitudine: ergo repugnat in extensione. Consequentia probatur, quia extensio infinita creata dicit infinitos palmos actu, vel potentia. Ut antecedens probetur, sit.

III. ASSERTIO. Non potest dari multitudo actu infinita, seu numerus actu infinitus. Probatur 1. non potest dari multitudo omnium maxima, seu numerus omnium maximus: multitudo infinita est omnium maxima: ergo non potest dari multitudo actu infinita. Probatur major; v. g. si daretur multitudo omnium hominum maxima, multitudo oculorum esset major multitudine hominum, duplum enim est majus subduplo; numerus autem oculorum est duplus numeri hominum;

quia ut se habent duo ad unum, ita se habet collectio omnium oculorum ad collectionem omnium hominum: ergo numerus hominum non est omnium maximus, potest siquidem major excogitari.

Respondent esse maximum numerum hominum, non oculorum; sed contra: ergo non est numerus maximus; ita enim se habent duo illi numeri, ut duæ extensiones, quæ tot habeant palmos æquales, quot habent prædicti numeri unitates: itaque sit una extensio, quæ habeat tot palmos, quot sunt homines in illa multitudine hominum, quæ dicitur esse maxima; sit præterea alia extensio tot palmis constans, quot sunt oculi in illa multitudine oculorum; ut se habet extensio prima ad secundam, ita numerus primus ad secundum, quia numeri sunt, ut quantitates: at prima extensio non potest esse maxima: ergo nec primus numerus maximus.

Probatur minor: numerus maximus est, quo major excogitari non potest: numero infinito non potest excogitari major: ergo numerus infinitus est omnium maximus. Minor prob. quia numerus infinitus continet infinitas infinitates infinitatum in infinitum; continet enim infinitas unitates, & infinitos binarios: ergo duas infinitates unitatum; infinitos ternarios: ergo tres, &c. in infinitum; itaque infinitas infinitates unitatum; si enim infiniti binarii bifariam dividantur, cum singuli binarii in duas unitates dividantur, utique infinitas binariorum in duas infinitates unitatum dividitur; ut enim se habet binarius ad duas unitates, ita infinitas binariorum ad duas infinitates unitatum; igitur infinitas ternariorum ad tres infinitates unitatum, & ita in infinitum: sed infinitus numerus

continet infinitos binarios ; item infinitos ternarios binariorum , & ita in infinitum : ergo continet infinitas infinitates binariorum , itémque ternariorum , centenariorum , atque ita in infinitum : ergo infinitas infinitates infinitatum in infinitum : sed non potest excogitari numerus major. Ita Pater Fabri in Metaph. lib. 11. de infinito , vbi plura argumenta congerit , ipsum consule.

Prob. 2. Pars non potest esse æqualis toti ; esset autem , si daretur multitudo infinita ; creentur enim homines infiniti, in illa multitudine tot essent vnitates , quot binarii ; tot essent oculi , quot homines , quo nihil insulsius ; aut certè si plures essent , daretur numerus major maximo. Deinde Deus producat infinita dolia versùs quatuor mundi partes , quæ singula mille pugillos aquæ capere possint ; tum superimponat infinitas phialas , quarum singulæ contineant aquæ pugillum ; certè dolia illa infinita possent repleri pugillis aquæ intra phialas contentis ; nam ad replenda dolia infinita satis esse possunt infinita millia pugillorum aquæ : at infinita millia pugillorum aquæ continentur in illis phialis , vtpote infinitis : ergo possent illa dolia impleri aquâ phialis illis contentâ , quod dici non potest , nisi vel vnum infinitum sit majus alio , vel certè totum sit æquale suæ parti.

Dices aquâ illarum phialarum implenda finita tantum dolia. Contrà : sequeretur pugillos aquæ phialis contentos esse finitos , quod est contra hypothesein.

Idem argumentum fieri potest de infinitis hominibus , quorum singuli conjicerent vnum numerum in eundem acervum ; jam si ex illo acervo singuli duos nummos accipere vellent , vel satis

esset omnibus, quod dici non potest, quia plus sumerent ex acervo, quàm in eum coniecissent: vel non satis esset, & ita nummi essent finiti, ipsique adeo homines essent finiti, quod est contra hypothesim. Alia quæ fieri possunt in hac materia argumenta, omitto, ne nimius videar.

I. V. A S S E R T I O. Non potest dari qualitas infinitè intensa. Probatur: omnis qualitas vel est naturalis, vel supernaturalis: neutra potest esse infinitè intensa: ergo nulla. Dux sunt partes majoris.

Probatur prima. 1. Qualitas naturalis infinitè intensa vel constaret gradibus heterogeneis, vel homogeneis: neque heterogeneis, neque homogeneis constare potest; non heterogeneis, quia alii aliis essent perfectiores, adeoque inter se ordinarentur; at ordinari non possunt, quia ordo est conveniens partium dispositio secundum prius, & posterius usque ad unum primum, & ut ait D. Augustinus lib. 19. de Civit. c. 15. *Ordo est parium, dispariumque rerum sua cuique loca tribuens dispositio*; at in infinito non est primum, & ultimum, nec partes sunt dispositæ secundum prius, & posterius. Deinde gradus illi terminarentur, & ita daretur infinitum clausum terminis: non homogeneis propter absurda, quæ attulimus superiori assertionem, in qua infinitum in multitudine rejecimus; nam in illa qualitate infinitè intensa, essent infiniti binarii, infiniti ternarii, &c.

2. Maxima omnium multitudo dari non potest, ut jam probatum est: in maxima intensione esset infinita multitudo graduum, adeoque maxima. 3. Sit imperus infinitè intensus, erit quoque maximus motus, qui dari non potest. 4. Positâ maximâ, seu

infinitâ intensione caloris, ex hac sequetur maxima rarefactio, & maxima extensio; at hæc repugnat, vt jam ostendimus.

Probat̃ur pars secunda, v. g. non potest dari gratia habitualis infinita, quia daretur maxima sanctitas, quæ vni Deo competit. Deinde homo instructus illâ gratiâ infinitâ, vel novam mereri posset gratiam, vel non; si primum, ergo posset fieri sanctior per additionem novæ illius gratiæ, & ita infinito fieret nova additio: si secundum, id per se absolum videtur; cur enim instructus gratiâ finitâ potest mereri, instructus infinitâ non potest? Denique si daretur gratia habitualis infinita, deberet ei respondere visio Dei infinita, vt præmium, & ita deberet Deus comprehendi à creatura, quæ gratiâ illâ habituali foret instructa.

## ARTICVLVS III.

### *Diluuntur objecta.*

**A**LIA petuntur ex parte omnipotentia Dei: alia ex parte ejusdem scientia, aut bonitatis: alia denique ex ipsa creatura; singulis ordine satisfacio.

#### *§. I. Diluuntur objecta ex omnipotentia Dei petita.*

**O**BIECTES I. Quæ potentia est infinita, potest producere infinitum actu: omnipotentia Dei est infinita: ergo potest producere infinitum actu.

Resp. dist. majorem: potest producere infini-



tum actu in modo, concedo : in entitate, nego : sic Deus potentiam habet infinitam respectu effectus creati, licet in entitate finitus sit, quia ipsum producere potest per creationem, ut causa principalis, qui modus agendi est unius Dei proprius.

Instabis 1. Potentiæ debet æquari effectus : ergo potentiæ infinitæ infinitus respondere effectus.

Resp. dist. ant. Secundum modum, concedo : secundum entitatem, nego. Porro vel musca exigit potentiam Dei secundum modum infinitam, ut ab ipso principaliter creetur.

Instabis 2. Actus secundus respondet actui primo : ergo actui primo infinito debet respondere actus secundus infinitus : at potentia Dei est actus primus infinitus : ergo &c.

Resp. 1. respondere illi potentiæ infinitæ actum secundum infinitum in modo, licet finitus sit in entitate. Resp. 2. dist. Potentiæ infinitæ ad actum adæquatum, respondet actus infinitus, esto : potentiæ infinitæ ad actum semper inadæquatum, & nunquam adæquatum, subdistinguo, respondet actus infinitus in modo ; concedo : in entitate, nego.

Instabis 3. Potentia finita effectum producit finitum : ergo infinita infinitum.

Resp. dist. conseq. In modo, concedo : in entitate, nego ; sic enim potentia infinita penes modum sibi proprium distinguitur à finita. Certè cum creatura limitata sit, debet agere semper intra sphaeram, non extra : ergo non potest producere aliquid majus finito ; at potentia Dei, utpote infinita, cum possit producere intra sphaeram potentiæ suæ, potest utique finitum producere, tam penes modum, quàm penes substantiant ; & cum aliunde  
implicet



implicet contradictionem infinitum in entitate ad extra produci à Deo , saltem producit infinitum in modo , cùm principaliter creat.

Instabis 4. Modus operandi sequitur modum essendi : in Deo est modus essendi infinitus : ergo & modus operandi infinitus.

Resp. concedo totum , quid inde aliud sequitur , quàm creationem esse modum operandi infinitum , quatenus est modus Dei proprius , licet in entitate determinata sit ?

Instabis 5. Eâdem proportionem crescit effectus , quâ ipsa potentia crescit : ergo effectus erit infinitus entitativè , si potentia sit entitativè infinita.

Resp. dist. ant. Eâdem geometricè , concedo : arithmeticè , nego. Ratio est , quia inter potentiam , & effectum requiritur tantum proportio virtutis , non entitatis ; itaque in hoc est infinitas divinæ potentiæ in ordine ad effectus creatos , quod possit producere effectus , se superantes in perfectione essentiali , ut causa principalis , & per creationem ; nam quæ potentia gaudet triplici istâ conditione , utique infinita est.

Objicies 2. Deus potest producere , quidquid potest produci à causis infinitis creatis , si darentur , at producerent infinitum in entitate : ergo potest producere infinitum in entitate.

Resp. dist. majorem : quidquid potest produci à causis infinitis , potentiâ verâ , concedo : potentiâ impossibili , & fictitiâ , nego ; at causæ illæ infinitæ , si crearentur , producerent tantum ex hypothesi impossibili : deinde retorqueo , Deus potest producere , quidquid posset chymæra producere , si existeret : si chymæra existeret , produceret chymæras.

Instabis 1. Deus potest producere omne producibile : sed omne producibile semel productum erit infinitum actu , quia nullo finito numero claudetur.

Resp. 1. nego dari omne producibile in infinito, quia  $\pi$  omne colligit. 2. Dist. omne producibile distributivè , concedo : collectivè , nego ; producibile autem distributivè est hoc , vel illud ; collectivè autem est collectio omnium creaturarum , quæ chymærica est.

Instabis 2. Deus potest hoc momento producere, quidquid jam nunc potest existere : sed quod nunc potest existere , est infinitum : ergo Deus potest producere infinitum.

Resp. dist. majorem : quidquid nunc existere potest distributivè , concedo : collectivè , nego ; at quidquid existere potest distributivè , finitum est, putà mille homines , duo hominum milliones , &c.

Instabis 3. Quæ sunt simul possibilia , possunt simul poni actu : homines infiniti sunt simul possibiles : ergo &c.

Resp. dist. majorem : Quæ sunt simul possibilia , simultaneitate tum potentia , tum objecti , concedo : simultaneitate tantum potentia , nego ; at infiniti homines sunt simul possibiles simultaneitate potentia , esto : simultaneitate objecti , nego ; quamvis enim homines possibiles in infinitum simul contineantur in potentia , simul ex parte potentia , non sunt tamen possibiles simul ex parte objecti. Ratio est , quia sunt possibiles , ut hoc , & aliud , & infiniti potentia ; at infinitum potentia non potest reduci ad actum adæquatum , aliàs destrueretur ejus essentia , in hoc posita , ut sit partim actu , partim potentia.

Instabis 4. Nulla est ex creaturis possibilibus, quam Deus hoc instanti producere non possit.

Resp. dist. Si distributivè sumitur, concedo : si collectivè, nego ; porro distributivè sumpta est hæc, vel illa ; collectivè, hæc cum aliis.

Instabis 5. Deus potest jam omnia producere, quæ potest velle producere ; sed potest velle producere collectivè omnes creaturas posibles.

Resp. nego minorem ; nam collectio creaturarum est quid chymæricum, cuius proinde ideam practicam Deus non habet, juxta principium 15.

Instabis 6. Deus potest collectionem creaturarum producere majorem qualibet datâ, & dabili.

Resp. dist. Qualibet datâ, & dabili determinatè, & distributivè, concedo : qualibet datâ, & dabili indeterminatè, & collectivè, nego.

Instabis 7. Deus potest in singulis unius horæ partibus Angelos producere : ergo post horam finitam erunt Angeli infiniti.

Resp. dist. ant. Potest in singulis distributivè, concedo : in singulis collectivè, nego. Certè Deus non potest omnes unius horæ partes numerare, quia sunt hoc, & aliud ; & tamen ut producat Angelum in aliqua parte horæ, debet eam partem determinare ; potest autem determinare, non tot, quin plures, ita tamen ut numerus finiatur per ipsam determinationem, puta mille momenta, bis mille, &c.

Objicies 3. Deus non est minus potens in agendo, dum agit libere, quam si ageret necessariò : si ageret necessariò, produceret infinitum. Confirmatur, quia modus utendi potentia, nihil detrahit, aut minuit de potentia, at libertas, & neces-

fitas sunt modi vtendi potentiâ.

Resp. nego paritatem, quia non valet comparatio inter statum chymæricum, & realem; at status necessitatis in Deo respectu actionum ad extra, est chymæricus, 2. transeat maior, licet falsa, nego minorem; nam si Deus ageret necessariò ad extra, ageret, & non ageret: ageret, vt supponunt aduersarii; non ageret autem, quia vt agit ad extra, est causa vniuersalis, & prima: ergo indifferens: ergo debet determinari vel à se, vel ab alio extrinseco; at non potest à se determinari, nisi sit liber: non ab alio, quia non esset superior aliâ causâ: ergo non ageret. Hoc argumentum eo vitio laborat, quod vulgò dici solet à subiecto non supponente, nempe quod additur subiecto, ejus essentiam destruit.

Instabis 1. Si omne possibile hoc instanti, existeret hoc instanti, infinitum actu existeret: omne possibile hoc instanti, potest poni hoc instanti: ergo potest poni infinitum actu hoc instanti.

Resp. dist. maiorem: Si omne possibile hoc instanti, posset poni hoc instanti: id est, si collectio omnium possibilium hoc instanti, posset poni hoc instanti, existeret infinitum actu, concedo: id est, si quodlibet possibile hoc instanti, posset poni hoc instanti, existeret infinitum actu, nego: sed omne possibile potest poni hoc instanti: id est, quodlibet possibile potest poni hoc instanti, concedo: id est, collectio omnium possibilium potest poni hoc instanti, nego minorem, & consequentiam. Duplex quippe hujus propositionis, *omne possibile est possibile*, sensus est; primus, isque falsus; collectio omnium possibilium est possibilis: secundus, isque verus,

quodlibet possibile est possibile ; sicut hæc propositio , *omne ens est infinita multitudo* , patitur duos sensus : primus est verus , collectio omnium entium est infinita : secundus falsus , quodlibet ens est infinita multitudo.

Instabis 2. Ex concessis , omne possibile non potest poni hoc instanti : ergo est aliquod possibile hoc instanti , quod non potest poni hoc instanti ; geminæ enim hæc propositiones sunt contradictoriæ : ergo si prima falsa est , secunda vera est. Confirmatur , quia perinde se habent duæ illæ propositiones , ut istæ duæ , *omnis homo est homo : aliquis homo non est homo*.

Resp. 1. nego utramque propositionem esse contradictoriam , si prima sumitur collectivè , quia propositiones contradictoriæ sunt , universalis affirmans , & particularis negans ; at omne possibile est possibile , si sensus sit , collectio omnium possibilium potest poni hoc instanti , non est universalis affirmans , quia subiectum universalis affirmantis sumitur distributivè : v. g. quia hæc propositio , *omnis homo est homo* , est universalis , ideo *omnis* distribuit subiectum , huncque sensum efficit , *quilibet homo , est homo* : unde fit ut ex Aristotele , hæc altera , *omnis homo est omnis homo* , si universaliter sumitur , sit falsa , quia hunc sensum efficit , *quilibet homo est omnis homo* ; hinc falsa quoque ista , *omne ens est infinita multitudo* , si sumitur universaliter , quia hunc sensum efficit , *quodlibet ens est infinita multitudo* ; at si *omne* sumitur collectivè , contrà quàm debeat in propositione allata , habet vim termini singularis , vel ad summum communis indefiniti : quare contradictoria hujus propositionis , omne possibile collecti-

vè est possibile, erit ista, aliquod possibile collectivè non est possibile, quæ vera est, quia prima falsa.

Pater 1. hanc propositionem, *omne possibile est possibile*, si sumitur universaliter, hunc sensum efficere, quodlibet possibile est possibile; secundo verò sensu, nempe collectio omnium possibilium est possibilis, non esse universalem, adeoque non opponi contradictoriè huic alteri, *aliquod possibile non est possibile*.

Pater 2. quis sit sensus hujus propositionis, *omne possibile collectivè est possibile collectivè*; nam vera est hoc sensu, quodlibet possibile collectivè est possibile collectivè; falsa autem isto, collectio omnium possibilium est possibilis collectio.

Instabis 3. Propositio illa est identica; ergo vera.

Resp. dist. ant. Sensu à me dato, concedo; nam in sensu concessio, qui verus, *est*, habet idem subjectum, & prædicatum, quia *re omne*, ita afficit subjectum, ut non sit pars subjecti; sicut in altera hac propositione vera, & identica, *omnis homo est homo*, particula, *omnis*, non est pars subjecti, sed ipsum subjectum distribuit: in sensu negato, & falso, nego, hoc est, collectio omnium possibilium est possibilis hoc instanti; non enim tum habet idem subjectum, & prædicatum, quia prædicatum est possibile, seu posse poni, subjectum verò possibile omne, id est, collectio omnium possibilium; unde in propositione sic accepta *re omne* est pars subjecti, sicut in ista in sensu germano sumpta, *omne ens est infinita multitudo*, *re omne* est pars subjecti.

Instabis 4. Si quodlibet possibile hoc instanti, est possibile hoc instanti, quodlibet possibile nunc

existat, certè infinitum erit.

Resp. nego suppositionem; cùm enim dicitur, quodlibet possibile est possibile, non sensus est, quòd possibile quodlibet existere simul possit, sed quòd ens quodlibet seorsim possit existere, neque ullum ens assignari possit ex possibilibus, quod nunc produci non possit; sicut cùm dico, quamlibet quantitatis divisionem esse possibilem, verum dico, & tamen non potest supponi, quòd existat simul, & collectivè quælibet divisio quantitatis, quia sic existerent omnes divisiones posibles.

Instabis. Omne possibile continetur collectivè in causa: ergo omne possibile collectivè est possibile. Prob. ant. non continetur distributivè: ergo collectivè. Prob. ant. ibi non est omne distributivè, vbi non est distributio, nec ibi est finitum in infinitum, vbi totum est in actu: in causa non est distributio, & totum est in actu.

Resp. dist. primum antecedens: non continetur in causa omne possibile distributivè, distributione se tenente ex parte causæ, concedo: distributione se tenente ex parte effectûs, nego; nam in causa nec est distributio, nec collectio effectuum propriè, quia non est multitudo, sed vnitas causæ, à qua non distinguitur ejusmodi effectûs continentia; effectus autem, quatenus in se poni debet, est finitus in infinitum, quia dum ponetur finitum in rerum natura, ita finitum erit, vt non exhauriat potentiam causæ; ponetur enim hoc, & non aliud.

Objicies 4. Deus potest facere quidquid cognoscit: Deus potest cognoscere infinitum: ergo & facere infinitum actu. Prob. maj. tum quia omnipotentia Dei non est minor, quàm scientia: tum quia optimi artificis est agendo exprimere id omne,



cujus ideam informavit.

Resp. 1. nego majorem ; Deus enim contradictoria simul cognoscit , putà ens , & non ens , peccatum , & gratiam ipsi oppositam , aut formam honestatis , nec tamen potest simul ponere contradictoria , aut facere peccatum : quare vera tantum est hæc propositio , Deus potest facere , quidquid se posse facere cognoscit ; at non cognoscit se facere posse infinitum. Ad confirmationem , fateor scientiam Dei non esse majorem potentiâ , sed inde tantum infertur potentiam Dei perinde esse infinitam in sua propria ratione , atque infinita est scientia in suo genere ; ut enim scientia est infinita , quia nihil est cognoscibile , quod non cognoscat ; ita potentia est infinita , quia nihil est factibile , quod non possit facere , ut causa principalis , & per creationem. 2. Nego minorem ; Deus enim non magis informat ideam practicam infiniti actu creati , aut creabilis , quàm chymaræ , licet habeat ideam speculativam infiniti negativè sumpti , id est , sui ipsius ; sed ut clariùs respondeam , sit

§. II. *Diluvuntur objecta ex parte scientia ,  
& bonitatis divine.*

Q V A T V O R solutionum principia accipe.

1. Triplex in Deo scientia ; prima simplicis intelligentiæ , quæ cognoscit omnia possibile , sive futura sint , sive non : secunda visionis , quæ cognoscit res existentes , aut futuras : tertia media , seu conditionalium , quæ versatur circa res conditionatè futuras.

II. Objectum scientiæ simplicis intelligentiæ est finitum in infinitum , quia Deus cognoscit res , ut



in se sunt; at res possibiles sunt infinitæ potentiâ: ergo cognoscit, vt infinitas potentiâ. Accipiunt tamen à cognitione diuinâ denominationem extrinsecam, quâ dicuntur simul cognitæ simultaneitate intrinsecâ cognitioni diuinæ, & rebus extrinsecâ; cave itaque, ne putes res, dum à Deo cognoscuntur, ejus menti instar cuiusdam acervi obijci, in quem Deus oculos conjiciat, quasi colligendo ex parte rerum: sed ipsas vi. suæ cognitionis pervadit, vt in se sunt, licet separentur inter se, aut sibi seriatim succedant: v. g. dum hesternum, & hodiernum diem videt, non conjungit eos simul ex parte objecti; quomodo enim res sibi essentialiter succedentes possent ex parte sui vnâ jungi, & quasi colligi? sed cognitionem suam simul exporrigit ad vtrumque diem in propria differentia temporis remanentem: vnde simultaneitas tota est ex parte cognitionis, non ex parte objecti.

111. Duplex tamen objectum cognitionis diuinæ, primum, & secundarium: primum est essentia diuina imitabilis à creaturis, in qua res possibiles continentur, seu Verbum diuinum: secundarium sunt creaturæ secundum se; primum est infinitum actu, nempe Deus ipse, non autem secundarium. In primario Deus videt omnia possible distributivè, quæ in essentia diuina non colliguntur per modum compositionis; (nam hac ratione omne possibile implicat contradictionem quia habet partes formales,) sed per simplicitatem, quatenus continentur in essentia simpliciter infinita.

1v. Vnica est Dei cognitio infinita entitativè, quippe quæ infinitis cognitionibus æquivalet; at terminativè dicitur finita, quatenus terminatur

ad res, quæ pro quocumque tempore reali assignato sunt finitæ. His positis.

Objicies 1. Dum Deus videt res possibiliẽs per scientiam simplicis intelligentiæ, videt infinitum actu : ergo infinitum actu dari potest. Prob. ant. objectum illius scientiæ sunt possiblea non tot, quin plura : hæc possiblea sunt actu in ratione objecti : ergo in ratione objecti sunt infinita actu. Confirmatur : ut sunt in mente divina, non sunt partim actu, partim potentiâ, secundum præsentiam sui, sed omnes actu præsentis sunt menti divinæ secundum esse objectivum; aliter essent aliquæ creaturæ, quas Deus non cognosceret actu : at omnes cognoscit actu : ex quo sic argumentor ; si quæ sunt infinita potentiâ, realiter actu ponerentur, essent infinita actu : ergo si cognoscuntur simul non tot, quin plura, seu possiblea omnia, sunt actu cognita à Deo infinita. Confirmatur amplius : res possiblee cognitioni divinæ præsentis, perinde faciunt collectionem suæ præsentis, atque duæ horæ præsentis divinæ menti faciunt collectionem suæ præsentis : duæ horæ præsentis menti divinæ faciunt collectionem suæ præsentis : ergo, &c.

Resp. dist. hanc propositionem : Res omnes possiblee sunt præsentis, actu, & collectivè divino intellectui, per sui cognitionem, concedo : per se, & ratione objecti, nego : ergo sunt infinitæ actu ; dist. conseq. per aliud, & secundum cognitionem entitativè infinitam, concedo : per se, & ratione objecti, seu secundum aliquam similitudinem formalem, nego. Non sunt ergo infinitæ actu ex parte sui ; sed infinitæ ex parte cognitionis entitativè infinitæ ; & ita infinitas actualis ipsis extrinseca

planè est, & intrinseca Dei cognitioni.

Ad probationem, dist. Omnia possibilea simul sunt, simultaneitate cognitionis, concedo: objecti, nego; cum enim infinitum potentiâ sit hoc, & aliud, non attingitur à Deo speculativè, nisi ut hoc, & aliud, id est, ut possibile distributivè, non collectivè. Porro simultaneitas esset intrinseca cognitioni, & objecto, si Deus per vnam eandemque physicè, & realiter cognitionem se coextenderet ad res futuras, & possibilea, ut futuras, & possibilea, simul, & semel permanentes: at est soli Deo intrinseca, & extrinseca objecto, quatenus Deus suâ illâ cognitione unicâ, & indivisibili realiter, coextendit se ad omnes res futuras, & possibilea, in propria cujusque temporis differentia existentes, adeoque successivè, & ut hoc, & aliud futuras, sicut videt dies æternitatis.

Instabis 1. Si nulla res esset possibilis, quæ actu non existeret, daretur infinitum actu existens à parte rei: ergo à pari, si nulla res sit possibilis, quæ non sit posita in mente, est infinita in ratione existentia objectivæ.

Resp. nego paritatem, quia existentia realis, quæ res ponitur extra causas, est intrinseca rei, eamque actu determinat; objectiva autem existentia determinat tantum rem extrinsecè, & ex parte cognitionis, quæ non definit esse hoc, & aliud secundum se.

Instabis 2. Illa multitudo creaturarum tota simul est, & actu in esse Dei cognito: ergo tota simul cognoscitur: ergo colligitur in esse cognito.

Resp. dist. ant. Est simul actu ex parte cognitionis, concedo: ex parte objecti, subdistinguo, est actu simul, & distributivè, concedo: simul colle-

ctivè, nego; sic enim est partim actu, partim potentiâ.

Instabis 3. Deus cognoscit infinita actu.

Resp. dist. Actu cognitionis, id est, per cognitionem actualem, eamque infinitam, concedo: actu objecti, id est, multitudinem actu infinitam totam simul existentem, nego.

Instabis 4. Sunt actu objecta, & simul objiciuntur menti divinæ: ergo sunt simul actu in mente divina.

Resp. dist. conseq. Simultaneitate cognitionis, concedo: simultaneitate objecti, nego; sunt enim actu in ratione objecti cogniti, id est, actu cognoscuntur per cognitionem actualem: at non sunt actu in ratione objecti, abstrahendo à cognitione, per quam cognoscuntur, quia non sunt actu ex parte sui infinita entia simul collecta, sed plura semper, & plura; cavè itaque, ne actum, vel potius actualitatem cognitionis refundas in objectum, quod est semper, ut hoc, & aliud.

Instabis 5. Illud objectum in ratione entis est multiplex.

Resp. dist. Multiplex potentiâ; concedo: actu, nego; nam possibilia non sunt extra causas actu existentia, habentque se, ut unum realiter in causa, cujus in virtute continentur.

Instabis 6. Vel Deus videt se posse producere objectum suæ cognitioni adæquatum, vel se tantum posse producere partem objecti.

Resp. Videt se posse producere partem objecti, sed indeterminatam, id est, minorem, vel majorem in infinitum, quia ita videt se posse producere hoc, ut possit, & aliud; at

Quæres, dum Deus videt possibilia, videtne finita?

Respondeo, videt infinita potentiâ, videt tamen finita tantum posse existere, seu videt infinitum potentiâ cum finito semper actu; finitum actu cum infinito potentiâ.

Instabis 7. Cognitio Dei esset indeterminata, & confusa, quia esset circa infinitum potentiâ indeterminatum, & confusum.

Resp. nego seq. ad probationem, dist. Esset circa objectum confusum, & indeterminatum secundarium, esto: primum, nego; habet enim pro objecto primario, divinam essentiam, in qua objecta secundaria videntur, id est, omniaabilia distributivè, modo à me explicato principio 3.

Instabis 8. Cognitio Dei est distincta: ergo circa objectum distinctum, & determinatum.

Dist. conseq. primum, esto: secundarium, nego. Dixi, esto, quia objectum cognitionis divinæ primum, non debet propriè dici determinatum, cum sit essentia Dei infinita.

Instabis 9. Nisi objectum secundarium cognitionis divinæ determinatum sit, non poterit dicere Deus determinatè, quid possibile videat: at hoc dedecet cognitionis divinæ claritatem.

Resp. nego minorem; nam proprium est certæ, & claræ cognitionis, res nosse, ut in se sunt: at possibile in se non est determinatum: ergo Deus non potest nosse, quid possibile sit determinatè, nisi sumas distributivè.

Objicies 2. Scientia visionis habet objectum infinitum, v. g. cogitationes Angelorum totâ æternitate futuras, quia sunt actu, non tantum in ratione objecti, sed etiam in ratione entis, & existentis; atqui adæquatum objectum illius scientiæ, quod totum est actu in æternitate, non est finitum.

actu : ergo infinitum actu.

Resp. nego illud objectum esse totum actu in ipsa æternitate , sed partim actu , partim potentiâ ; nempe cogitationes illæ Angelorum spectari possunt , vel secundum quod futuræ sunt per aliquod certum tempus , v. g. mille annos , vel secundum quod futuræ sunt absque termino. Primo sensu , sunt actu finitæ , & certo numero definibiles , quem videt Deus : secundo , infinitæ sunt potentiâ , adeoque indeterminatæ , & futuræ absque termino , quia semper verum erit dicere , non sunt , neque fuerunt omnes , eò quod æternitas tota nunquam transierit. Certè nunquam verum erit dicere , fluxerunt infiniti dies ; igitur nunquam erit collecta illa æternitas ; igitur nec vsquam erunt infinitæ actu illæ cogitationes , sed semper finitæ in infinitum , ita vt semper detur vltima præteritarum , nunquam tamen vltima futurarum.

Instabis 1. Collectio omnium futurorum per æternitatem , continetur totâ simul æternitate adæquatè sumptâ , sicut tota collectio futurorum per hunc diem , est tota simul in illo die : at ejusmodi collectio tota est actu in æternitate : ergo est tota infinita actu.

Resp. nego majorem ; sicut enim implicat totam æternitatem colligi , quia vbi est totum , & collectum , ibi aliquid est , extra quod nihil sit : ita implicat colligi cogitationes per illam futuras ; at implicat sic colligi æternitatem , vt extra eam nihil sit , aliter finiretur æternitas , quæ est infinitum potentiâ ; hinc Deus non potest videre illum diem , quo claudatur æternitas , quia nunquam erit vltimus : ergo nullum videt vltimum ; hinc omnes dies æternitatis non sunt omnes fluxuri , omnes,

inquam, collectivè, quamvis successivè, id est, ita ut sit adæquata, & perfecta, & tota successio.

Instabis 2. Partes æternitatis à parte antè, possunt colligi: ergo & à parte pòst.

Resp. Disparitas est, quòd æternitas à parte antè, licèt careat principio à parte antè, finem tamen habet, secundùm quam colligi potest; at æternitas à parte pòst non habet finem; ut enim in æternitate à parte antè, nulla est possibilis duratio, quæ priorem habere non possit; ita in æternitate à parte pòst, nulla est, quæ posteriorem habere non possit.

Instabis 3. Totum objectum cognitionis divinæ est actu in æternitate: ergo est vel finitum, vel infinitum actu.

Resp. Vel sumis id quod est actu totum in aliqua parte virtuali æternitatis; & sic fateor objectum esse finitum, ac determinatum: vel sumis objectum adæquatum cognitioni divinæ in omnibus partibus æternitatis virtualibus collectivè sumptis; & sic colligis æternitatem, quod fieri nequit.

Instabis 4. Ex D. Thoma 1. p. q. 14. art. 12. necesse est, inquit, dicere, quòd Deus scientiâ visionis cognoscat infinita, quia Deus etiam affectiones, & cogitationes cordium scit; quæ in infinitum multiplicabuntur; creaturis rationalibus permanentibus absque fine. Deinde ad 1. sic loquitur: *Deus cognoscat infinita, non numerando partem post partem, cùm cognoscat omnia simul, non successivè.*

Resp. 1. velle tantùm D. Thomam, quòd Deus cognoscat infinita potentiâ ex parte objecti, non infinita actu, sicut videt dies æternitatis infinitos tantùm potentiâ. 2. dist. Deus videt simul simultaneitate cognitionis, concedo: objecti, nego.

Instabis 5. Cognitio, quâ Deus attingit res pos-



sibiles , licèt vnica sit , est multiplex virtualiter : ergo sunt in ea virtualitates infinitæ.

Resp. dato antecedente , distinguo consequens : sunt virtualitates infinitæ actu inter se distinctæ , nego : potentiâ , & per assignationem intellectûs , concedo ; vt enim illæ virtualitates faciant numerum , debent per intellectum distingui , & consummari : sicut qui relationem putant fundari in alia , non idcirco admittunt virtualitates actu infinitas , sed tantum potentiâ , quia non sunt actu distinctæ , sed tantum distinguibiles.

Colliguntur duo ; primum , hæ quatuor propositiones multum differunt : *datur potentiâ infinitum actu : datur actu infinitum potentiâ : datur actu infinitum actu : datur potentiâ infinitum potentiâ*. Prima falsa est , quia non est potentia infiniti actu productiva ; secunda vera , quia datur actu corpus , quod sine fine augeri , aut minui potest ; non tamen hæc est convertens respectu primæ ; tertia , falsa in creatis ; quarta denique vera , quia datur potentia productrix corporis quanti , quod cum existeret , erit infinitum potentiâ.

Secundum , hæ quoque quatuor propositiones inter se differunt : *objectum cognitionis diuina est infinitum simul , & actu* , quæ falsa : *objectum cognitionis diuina est infinitum cognitum actu , & simul* , quæ vera : *objectum cognitionis diuina est infinitum actu* , quæ falsa : *objectum cognitionis diuina est infinitum successivè , & potentiâ , cognitum actu , & simul* , quæ vera.

Ratio primæ , & tertiæ falsitatis est , quod simultaneitas , & actualitas cadant supra objectum , adeoque dicant infinitum actu positum. Ratio , cur secunda , & quarta veræ sint , est , quia simultanei-



tas actûs cadit supra cognitionem, non supra ob-  
jectum, quod est infinitum potentiâ.

Objicies ; Dei bonitas est infinita, & se amat,  
quantum est amabilis : ergo procurat sibi gloriam  
infinitam, quia bonum desideratum est benevolen-  
tiæ mensura, aut effectus ; at Deus non potest sibi  
procurare gloriam infinitam ad extra, nisi produ-  
cat infinitam ; nam potest tantum esse infinita vel  
ex parte objecti, cum est infinitum, vel ex parte  
subjecti, seu intellectûs cognoscentis ; at gloriam  
infinitam sibi Deus procurare non potest ex parte  
objecti, nisi ex infinitis operationibus cognitis, vel  
ex infinito actu producto.

Resp. i. hoc argumentum redolere concionato-  
rem ; nec enim necesse est Deum colligere gloriam  
infinitam ex rebus creatis : sed satis est, quod se  
glorificet infinitè, se ipsum cognoscendo, hoc est,  
producendo Verbum, quod cum sit cognitio infi-  
nitè perfecta, & adæquans cognoscibilitatem Dei,  
est infinita Patris gloria, & essentialis, tum ex par-  
te subjecti, tum ex parte objecti : deinde bonitas  
Dei dicitur infinita respectivè ad creaturas, quia  
communicat se illis quodammodo infinitè, non  
quoad substantiam rerum creatarum, quæ per se  
finita est, sed quoad modum, quo producuntur,  
hoc est, per creationem, quæ Dei vnius est pro-  
pria.

### §. III. *Diluvuntur objecta ex parte creature.*

OBJICES I. Conceptus infiniti non destruit  
conceptum entis creati : ergo non implicat  
contradictionem, dari actu infinitum creatum. Pr.  
antecedens : ea non se destruunt, quorum vnius con-

cepus objectivus non destruit conceptum objectivum alterius : conceptus infiniti non destruit conceptum entis creati, quia non est negatio illius : ergo conceptus infiniti non destruit conceptum entis creati. Prob. minor : nec ex parte entis, ut sic, destruit, quia infinitudo reperitur in ente divino, nec ex parte producti ab alio, quia persona divina ab alia producitur : ergo nulla ex parte destruit.

Resp. implicantiā se tenere ex parte infiniti conjuncti cum ente creato.

Instabis 1. Conceptus entis creati, ut sic, abstrahit à finitudine, & infinitudine, dicitque tantum in essentia esse ab alio : ergo conceptus infiniti non destruit conceptum entis creati.

Resp. dist. conseq. Non destruit formaliter, concedo : consequenter, nego ; finitudo enim, cum sit proprietas inseparabilis à re creata, sicut risibile à rationali, quemadmodum negato risibili de rationali, perit consequenter rationale : ita negatā finitudine de ente creato, perit consequenter conceptus entis creati, quia incipit habere rationem essendi Dei propriam, quæ est infinitas.

Instabis 2. Illa creatura non intelligeretur esse Deus.

Resp. Esset Deus, & non Deus ; esset quidem Deus, quia haberet modum essendi Deo debitum : non esset autem, quia esset creatura.

Objicies 2. Si quid impediret infinitum creatum actu, maximè quia esset vnum minus alio : at hæc ratio nulla est, quia infinitum formaliter, quā tale, non erit majus alio, aut minus, sed tantum secundum materiale, v. g. numerus infinitus hominum non crescit, quā infinitus formaliter, sed tantum ratione materiæ, seu unitatum.

Respondet Pater Fabri prop. 4. de infinito, distinctionem illam nullam esse, quia formale extensum adæquat materiale; & quamvis non sit magis infinitum, quàm aliud, est tamen majus; sicut licet vnum non sit magis quantum, quàm aliud, nihil tamen impedit, quin vnum sit alio majus: v. g. licet vnus circulus non sit magis circulus, quàm alius, est tamen vnus alio major: ita prorsus vnum infinitum (ex illius hypothese) non esset magis infinitum, quàm aliud, quamvis posset esse majus alio. Et verò in extensione infinita categorematicè numerus semipedum est duplus numeri pedum; igitur vna infinitas est dupla alterius: igitur, & major. Quin etiam vnum infinitum, si daretur, esset æquale alteri, aut inæquale: v. g. si dentur homines infiniti, numerus corporum videtur æquare numerum animarum. Ad hæc, cùm infinita extensio sit quanta, utique est tanta, vel non tanta; igitur æqualis, vel non æqualis: denique finitum non est tantum, quantum est infinitum; igitur inæquale infinito; immò si nulla est proportio finiti ad infinitum, igitur inæqualitas, sed impropor-tionata.

Instabis 1. Infinito potentiâ hæc prædicata non conveniunt: ergo nec infinito actu.

Resp. nego consequentiam, quia infinitum potentiâ non potest accipi secundum se totum, excluditque totum actuale; dicit enim non tot, quin plura; & quidquid actu dicit, finitum utique dicit, quod verò dicit potentiâ, est infinitum; hæc autem potentia semper est ad viteriorem actum, nunquam tamen ad totum actum: at infinitum actuale totum est actu.

Instabis 2. Si infinitum actu esset capax ejusmodi

prædicatorum , essent in numero infinito plures quadrati , quàm non quadrati , & non plures , quod repugnat.

Resp. ex hypothesi , quòd detur tale infinitum , hanc sequi repugnantiam , ideòque ex hoc capite repugnat infinitum actu , vt jam ostendi.

Objicies 3. Dantur negationes infinitæ actu Deo liberæ , quia earum numerus à Deo assignari non potest , quin major possit assignari : vnde sic argumentor : tanta est multitudo negationum Angelorum assignabilium , vt superet multitudinem quamlibet assignabilem : talis multitudo est infinita actu : ergo dantur infinitæ negationes actu ; jam hoc instanti tollantur à Deo illæ negationes , certè erit infinitum actu positum. Confirmatur : tot existunt negationes Angelorum , quot Angeli non existunt : sed Angeli infiniti actu non existunt : ergo existunt negationes Angelorum infinitæ. Pr. maj. hoc ipso , quòd non intelligitur existere forma , intelligitur negatio existere suo modo : sed non existit collectio infinita Angelorum : ergo collectio infinitarum negationum Angelorum actu existit.

Resp. 1. hoc argumentum nimis probare ; probaret enim ipsum continuum nunc posse actu dividi in omnes partes , quia existunt negationes divisionis omnium partium continui.

Resp. 2. negationes illas non existere in ratione multitudinis , sed tantùm per modum vnius realiter negationis , quæ opponitur entibus possibilibus finitis in infinitum , non omnibus possibilibus simul poni collectivè , quia negatio opponitur eo modo enti , quo ens potest poni actu à parte rei , hoc est , secundùm actualem existentiam , non au-

tem eo modo, quo est impossibilis; at omne possibile in actu positum collectivè est quid chymæricum, distributivè autem, aliquid reale; rectè itaque assignamus negationes  $\tau\theta$  omnis possibilis distributivè sumpti, collectivè autem sumpti repudiamus. Ratio à priori est, quòd negatio opponatur enti positivo; at impossibile non est ens positivum, vnde daretur negatio negationis. Porro dum quærit adversarius, ut assignes multitudinem negationum, quâ major assignari non possit, quære ab eo, ut prior assignet, & tunc ipse maiorem qualibet datâ ab adversario assignabis; vel enim assignabit omnem negationum collectionem, & tum dices esse impossibilem, vel partem collectionis illius, dicetque esse finitam, vel infinitam; si finitam: ergo habebit negationem alterius majoris numeri, & tunc poteris maiorem assignare; si infinitam, certè erit quid chymæricum.

Ad confirmationem, distinguo: tot sunt negationes, quot Angeli possibles non existunt, concedo: quot impossibiles, nego; at non existunt omnes Angeli possibles actu, distinguo, & sunt impossibiles, concedo: & sunt possibles, nego. Et sanè Angelorum impossibilium non datur negatio, quia non datur negatio negationis.

Instabis 1. Multiplicanda est negatio pro multitudine formæ, quam negat: ergo vna negatio entibus finitis in infinitum non opponitur.

Resp. dist. ant. Multiplicanda est formaliter per mentem, esto: realiter, nego, quia per mentem intelligimus negationem per ordinem ad formam, cuius est negatio; at non multiplicantur realiter negationes, quia quodlibet multiplicatur, & distinguitur realiter per id, quod est intrinsecum ipsi,

& essentialē : at forma opposita negationi , non est ipsi intrinseca , & essentialis.

Instabis 2. Vna negatio tolli potest , alterā remanente , si Deus creet Angelum A , non creato Angelo B.

Resp. id negari à multis , qui pugnant tunc perire vnā negationem omnium Angelorum possibilitium distributivē , & alteram advenire omnium possibilitium præterquā illorum , quos Deus creavit , sicut perit actio rota , pereunte aliquā ex causis producentibus effectum. Ratio est , quod nullum sit principium distinctivum ejusmodi negationum ; nam si quod esset , maximè entia positiva : at non sunt tunc realia , nisi in causa , in qua sunt vnum : ergo non possunt esse principia actu distinctiva illarum negationum : sic in sinu materiæ , juxta hanc sententiam est vnica privatio omnium formarum , quæ perit accessu vnus formæ , aliā privatione accedente.

Alii sic distinguunt hanc propositionem , *existunt actu negationes infinitæ Angelorum* , in sensu negativo , concedunt : in sensu affirmativo , negant . ; nam hæ propositiones , *tenebræ sunt ; existunt negationes Angelorum* , licet in speciem videantur affirmativæ , quia à nobis concipiuntur instar entium positivorum , tamen quoad sensum , & significatum , negativis æquivalent : quare dum dicimus , *tenebræ sunt in aëre* , non significamus aliquid aëri per modum entis inhaerere , sed aërem duntaxat carere luce : pari ratione , cum dicimus , *existunt infinitæ hominum negationes* , sensus est , non sunt actu infiniti homines , non autem infinitæ hominum negationes habent actualem existentiam in rerum natura. Ratio est , quod negatio

hominis sit non existentia hominis : at non existentia non potest habere existentiam ; alioquin dici posset affirmando , non existentia realiter existit.

Instabis 1. Existunt à parte rei negatio hominis, & negatio equi , vt duæ negationes : ergo & negationes infinitorum hominum.

Resp. distinguo antecedens : in sensu affirmativo , esto : in sensu negativo , nego ; duo enim duas unitates dicunt , adeoque duas entitates.

Instabis 2. Diximus aliàs privationem esse quid reale , quia principiat realiter.

Resp. hoc dici in sensu negativo , non affirmativo , sensusque est hujus propositionis , privatio est ens negativum , à parte rei non est realiter forma aliqua in subiecto ; possunt tamen negatio , & privatio dici reales terminativè , hoc est , secundum id ad quod terminantur , & ratione formarum , aut objectorum diversorum , à quibus distinctionem sumunt , & diversitatem.







# PARS QVARTA PHYSICÆ VNIVERSALIS,

AD LIBRVM QVARTVM PHYSICORVM

*De loco, & vacuo.*

**P**ROPOSUIT Aristoteles sub initium lib.  
3. se dicturum de motu, & de iis, quæ  
consequenter sunt, nempe de infinito,  
loco, vacuo, & tempore, quæ videntur  
esse affectiones corporis naturalis. Postquàm de in-  
finito, & motu egit eodem libro, locum, vacuum,  
& tempus ita explicat libro quarto, vt in primis  
quinque capitibus de loco edisserat, quatuor se-  
quentibus de vacuo, in reliquis quinque de tem-  
pore. Priùs de loco, quàm de tempore agit, &  
quidem meritò: tum quia locus affinitatem, &  
cognitionem habet aliquam cum infinito; vt enim  
corpus est actu finitum, vel infinitum, ita debet  
esse & locus; cùm corpus locatum, & locus sibi ré-  
spondeant: tum quia locus ordine naturæ tempus  
antecedit;



antecedit ; immò & motum , ac corpus locandum , quia prius ordine naturæ debet esse locus , tum corpus in eo recipi , postea moveri ; quòd si Aristoteles prius egit de motu , quàm de loco , in causa fuit , quòd motus affectio sit magis cum natura connexa , quàm locus ; natura enim per motum definitur. Nos ordinem vtrunque immutabimus , agemusque 1. de loco , tum de vacuo , quod nihil aliud est , quàm locus carens corpore ; deinde parte 5. de tempore ; denique parte 6. de motu , quia iuvat à minùs difficilibus , cuiusmodi est locus , & vacuum , ad difficiliora , cuiusmodi sunt tempus , & motus , progredi.

## DISPUTATIO PRIMA.

### *De loco.*

**D**VPLEX affectio corporis naturalis , ut jam observavi sub initium 3. partis : altera activa , quæ qualitates primas , & secundas cuiusque agentis naturalis actuosas complectitur : passiva altera , eaque duplex , prima , & à prima orta ; prima est quantitas , de qua parte 3. egimus : à prima orta est determinatio corporis naturalis ad locum , & tempus ; ex trina enim dimensione corporis necessariò oritur ejusdem limitatio ad certam circumstantiam tum loci , tum temporis , quia omne quantum definitur loco , & tempore. Nos hîc loci existentiam , naturam , & affectiones 1. inquiremus : deinde per quid res constituitur in loco , examinabimus : 3. quibus rebus

conveniat esse in loco : 4. an idem corpus possit esse in pluribus locis , an plura corpora in eodem loco,

### A R T I C U L U S I.

*De existentia, natura, & affectionibus loci.*

**V**T natura loci tum externi , tum interni pateat , antè instituenda illius partitio ; tum existentia illius astruenda ; postremò definitio , & proprietates explicandæ.

#### §. I. *Multiplex loci partitio.*

**I. P**RIMA est in externum , & internum ; externus est locus ambiens , & extrinsecè terminans rem locatam , vt dolium continens vinum , aut aër turrim ambiens : internus , est forma intrinseca , per quam res locata constituitur formaliter in certo , ac determinato loco ; etiam independentè ab extrinseco immediatè ambiente : sic turris , licèt vento perflata , mutet locum externum , semper tamen internum servat.

**II.** Secunda loci externi fit in mathematicum , & physicum ; mathematicus est , in quo vna quantitas attenditur , secundùm trinam dimensionem , quia corpus sic spectatum est objectum Matheseos : physicus , in quo attenditur corpus secundùm sensibiles qualitates , naturamque propriam , & sic est objectum Physicæ.

**III.** Tertia est loci mathematici , in maiorem , minorem , æqualem , & communem plurium ; minor partem corporis tantùm continet ; major corpus continet , & aliquid ampliùs : æquale corpori

adæquatur, illudque proximè continet : communis plurium, qui plures res continet, vt schola.

I v. Huc pertinet divisio in locum per se, qui rem certam, & singularem continet, ambítque immediatè : sic dolium se habet ad vinum ; & in locum per accidens, qui multa continet : sic cella vinaria locus est communis, & per accidens cuiusque vasis.

v. Quarta est loci physici, in convenientem, contrarium, & neutrum ; conveniens idem est ac naturalis, qui conservativus est rei locatæ, & centrum ejusdem quietis ; sic aqua est locus naturalis piscium : contrarius, qui destructivus est rei locatæ : neuter denique, qui nec contrarius, nec conveniens est, sed præter naturam : talis est locus, quem sol motu annuo in cælo conficit.

v i. Quinta, in locum formalem, & virtualem ; formalis est corpus reale extensum, in quo res aliæ continentur : virtualis alius positivus, alius negativus. Virtualis dicitur, qui spatio formali æquivalet ob virtualem extensionem vel positivam, vel negativam : ita immensitas Dei, ex multis est locus virtualiter positivus, quo omnia continentur ; vacuum autem, negativus, quia æquivalet spatio formali in ordine ad locum Angeli, aut corporis, saltem divinitus, aut in ordine ad distantiam inter duo dissita corpora, etiam annihilato aëre fundandam : sic cælum, destructo aëre, non diceretur immediatè conjunctum terræ, idémque præstaret per proportionem vacuum interjectum, quod reale, & formale spatium.

§. III. *Quid sit locus externus.*

VNICA AS-**L**OCVS externus definitur ,  
 SERTIO. superficies prima , & immobilis  
 corporis ambientis. Ita Aristoteles lib. 4. Phyc. c.  
 4. Dicitur 1. superficies , non realiter quidem , sed  
 formaliter duntaxat à corpore distincta. 2. Prima ,  
 id est , proximè contigua locato corpori ; locus e-  
 nim locato æqualis est , ratione applicationis , &  
 conformationis : at sola superficies prima talis est.  
 3. Immobilis , hoc est , intransferibilis , vt locus  
 distinguatur à vase ; quamvis enim vas id quod in-  
 rus est , contineat , non est tamen propriè locus  
 illius corporis , quod continet , inquit Aristoteles ,  
 quia non est immobilis ipsius superficies : at locus  
 debet esse immobilis , tum quia res naturales fru-  
 stra haberent facultatem à natura sibi concessam  
 tendendi ad locum ; perinde enim locus posset ad  
 illas moveri , atque ipsæ ad locum : tum quia cor-  
 pus , quod est in loco , mutaret locum , & non mu-  
 taret ; mutaret quidem , quia moveretur cum loco  
 secum translato ; non mutaret autem , quia locum  
 semper secum devehret , servarétque , hoc est ,  
 eandem superficiem continentem , quod dici non  
 potest ; hinc pronuntiatum Philosophi , sicut vas  
 est locus mobilis , ita locus est vas immobile. 4.  
 Corporis ambientis , id est , locatum continentis ;  
 locus enim externus secundùm superficiem inte-  
 riorem , & concavam , debet ambire rem loca-  
 tam , eique commensurari , licèt secundùm super-  
 ficiem exteriorem , & convexam , corpus ambiens  
 sit semper contento majus. His ita explicatis ,

Probatur definitionis germanitas , quia 1. expli-

cat, quid sit locus, 2. omnes loci proprietates; & accidentia, quæ illi videntur inesse; 3. omnes difficultates, & dubia solvit, quæ circa naturam loci oriri possunt.

Objicies 1. Locus debet esse æqualis locato: superficies corporis continentis non est æqualis corpori contento; illa enim habet tantum duas dimensiones, longitudinem nempe, & latitudinem; istud autem tres habet, nempe longitudinem, latitudinem, & profunditatem: ergo &c. 2. Locus naturalis conservat rem locatam: superficies non conservat rem locatam, quia nihil habet efficientiæ. 3. Si locus est superficies corporis ambientis, sequitur aliquem posse moveri, quamvis maneat in eodem loco; v. g. si quis in curru clauso vndeque moveatur, movebitur ad motum currus, nec tamen mutabit locum, quia semper eadem superficie proximâ aëris inclusi ambietur, quia idem aër cum ipso in curru deferetur.

Ad 1. Respondeo, licet corpus ambiens adæquatè sumptum, majus sit corpore locato, tamen secundum superficiem concavam, quâ contiguum est corpori contento, ejusdem superficiiei extimæ commensurari, adeoque ipsi æquari, quia nihil inter utramque superficiem interjicitur, sed superficies concava corporis ambientis tota toti superficiiei extimæ corporis contenti, & per partes partibus ex æquo respondet.

Ad 2. Distinguo, locus naturalis, ut opponitur violento, conservat locatum, concedo: locus naturalis, ut opponitur artificiali, conservat locatum, nego. Porro locus naturalis primo sensu sumptus, non tantum superficiem includit, sed etiam qualitates aliquas rei locatæ conservatrices conno-

tar, quæ insunt ; quo sensu non hîc definimus.

Ad 3. fiet satis, cûm immobilitatem loci explicaturi sumus.

Colliguntur duo ex dictis. 1. Inter locum externum, & corpus locatum semper est distinctio realis actualis, quia vbi est locus externus, ibi est continentia, & contactus : vbi contactus, ibi distinctio ; contiguorum enim extrema sunt simul, non idem : hinc gutta aquæ infusa fluvio, non est in eo, vt in loco, sed vt pars in toto. 2. Corpora sunt propriè in loco, non spiritus, quia sola corpora propriè commensurantur loco.

#### §. I V. Vnde petatur loci immobilitas.

**H**Æc quæstio habet difficiles explicatus. 1. Quia mobile potest mutare locum, non mutato loco primo, siue superficie corporis ambientis, intra quam continetur, vt dum vas vino plenum aliè transfertur. 2. Quia potest mutari superficies ambiens, licèt non mutetur locus : sic turris manet in eodem loco, licèt superficies aëris ambientis aliè vento transferatur. 3. Quia merces arculis inclusæ, & Parisiis Romam translataæ, locum mutant, quamvis eâdem aëris superficie intra arculæ angustias compressi contineantur ; hinc

Multiplex est sententia de loci immobilitate : prima petit à corpore ambiente : secunda à partibus virtualibus immensitatis divinæ : tertia à supremo cælo : quarta à corporibus circumpositis, & immotis : quinta à superficie ambiente immobili, prout respicit puncta quædam fixa, siue realia, siue imaginaria : sexta ab vbi interno.

VNICA ASSERTIO. Immobilitas loci peti-

tur ab vbi interno realiter distincto à corpore locato, per quod res constituitur formaliter in certo, & determinato loco; ita vt ne diuinitus quidem possit aliò transferri, quandiu formâ illâ intrinsecè afficitur.

Probatur assertio argumento positivo, positis duobus principiis. Primum sit: Vbicatio est forma per se immobilis; quia est ratio existendi in loco immobiliter, & intransferibiliter, siue est id, quo res est potius hîc, quàm alibi, adeoque non potest res affecta tali vbi, aliò transferri; aliàs si res affecta tali vbicatone, aliò cum ipsa transferri posset, vtique illa vbicatio, per quam res erat hîc, constitueret ipsam alibi: at hoc dici non potest, quia si posset res per illud vbi, per quod est hîc, esse alibi, nulla esset ratio, cur per illud vbi formaliter esset hîc, & non alibi, siquidem per illud tam posset esse alibi, quàm hîc. Ad hæc, si locus intrinsecus esset mobilis, posset quispiam Parisiis ire Lugdunum, non mutato loco interno, quia cum re locata transferri posset; vel è contrà, posset locus internus, re immotâ, mutari, quia à re locata manente immotâ posset tolli.

Secundum princip. Immobilitas sumenda est secundum quandam æquivalentiam: quare licet superficies aëris ambientis vento aliò transferatur, alterâ in locum ipsius suffectâ, tamen perinde se habet corpus, ac si materiali superficie ejusdem perpetuò ambiretur, quia eundem locum æquivalenter servat ob formam vbicantem, à qua habet, vt sit hîc immobiliter, quamvis aëris superficies alia, atque alia corpus locatum afficiat, & materialiter mutetur. His positis

Probatur assertio: Rer v**u**bicationem rectè intel-



igitur loci immobilitas : ergo frustra recurritur ad alia principia ipsius immobilitatis loci. Probat-ur antecedens : locum esse immobilem, nihil aliud est, quàm superficiem ejusmodi vicatione affici, ita vt quādiu eam retinet, impossibile sit ejusmo- di superficiem aliò transferri, quia forma vbicans ex se determinata est, vt sit hîc immobiliter, & consequenter rem, quam afficit, faciat esse hîc, ex 1. principio, & quamvis superficies A vento au-feratur, superficies B ei succedens afficitur vbi al-tero priori æquivalente, ex 2. principio.

Probat 2. argumento negativo : Si loci immo- bilitas ab alio principio, quàm ab vbi interno pete- retur, vel à corpore ambiente, vel à partibus vir- tualibus immensitatis divinæ, vel à supremo cælo, vel à corporibus circumpositis, & immotis, vel à superficie ambiente immobili, prout respicit pun- cta fixa, sive realia, sive imaginaria : nihil horum dici potest : ergo superest, vt petatur ab vbi inter- no. Probat 3. minor per partes.

Non à corpore ambiente, tum quia merces ar- culis inclusæ, & eâdem superficie contentæ, aliò transferri possunt, adeoque locum mutare, ma- nente eâdem superficie aëris inclusi : tum quia tur- ris aliâ, atque aliâ aëris superficie ambita, non mutat locum formaliter.

Non à partibus virtualibus immensitatis divinæ, tum quia immobilitas vnus loci non distaret rea- liter ab immobilitate alterius, quia principium dis- tinctivum ejusmodi locorum essent variæ partes immensitatis, quæ in re sunt planè idem : tum quia quilibet locus habet differentiam sibi intrinsecam, haberet autem duntaxat extrinsecam, quia perere- tur à parte virtuali immensitatis, quæ cuilibet loco



est extrinseca : tum quia circulus vitiosus committeretur ; nam partes virtuales immensitatis diversæ essent pro diversis locis , quibus correspondent , & loca similiter diversa per diversitatem partium virtualium immensitatis , quibus responderent : tum quia istiusmodi partes virtuales probabiliter in Deo nullæ sunt , ut postea ostendemus.

Non à supremo cælo , à quo corpus , dum distantiam eandem retinet , dicatur immotum , aut ab aliis partibus univèrsi , quia si avis moveatur in æquatore cum cælo motu circulari , mutabit locum , licet à toto cælo semper æqualiter distet ; deinde totus orbis circa centrum volvatur , omnes partes eundem situm , & ordinis respectum inter se servabunt , nec tamen locum mutabunt : ergo locus non est ille respectus. Denique cælum , & partes mundi motu recto moveantur , erit motus : igitur & mutatio.

Non à corporibus circumpositis , & immotis , quia de iisdem corporibus potest quæstio eadem institui ; quæro enim , unde corpus illud immotum circumpositum dicatur immobile , & locum non mutet ; non enim est immobile per se : ergo per respectum ad aliud corpus , & ita in infinitum ; nam quod non est immobile per se , sed per aliud , debet esse immobile per id , quod est per se immobile ; cedo ergo aliquod corpus per se immobile.

Non à punctis fixis ; vel enim essent realia , vel imaginaria. Non realia quæ cælo affixa sint ; Deus enim cælum cum istis punctis annihilaret , aut aliò transferat , adhuc servabo eundem locum , quia in hypothesi adhuc locus meus erit immobilis. Non imaginaria , tum quia non est Physici proprietatem realem loci ab eo , quod nihil est , petere ;

tum quia denominatio locati non esset dicenda realis, sed rationis, quippe quæ à re prorsus fictitia peteretur; hinc non potest quoque peti à spatiis imaginariis, quia spatium illud nihil est: ergo respectum realem terminare non potest. Certè præsentia est relatio, duosque proinde terminos requirit; nec enim possum esse hîc per aliquid, quod neque est hîc, nec alibi: pars illa spatii imaginarii nec est hîc, nec alibi, quia nihil est: ergo per illam, seu per ordinem ad illam, non possum esse hîc.

Non à respectu ad corpus possibile, aut ad motum præteritum; non ad corpus possibile, seu ad spatium reale, quia illud spatium non minùs est possibile in alio loco, quàm in isto: ergo respectus ad tale spatium, non potest corpus constituere potius hîc, quàm alibi: non ad motum præteritum, tum quia si nihil ex prædicto motu remaneat, res perinde se habet, ac si motus ille non præcessisset: tum quia res potest hîc esse, aut alibi per productionem, aut reproductionem, absque vîlo motu prævio.

Quare superest, vt immobilitas loci petatur ab vbi intrinseco, quo quandiu locus afficitur intrinsecè, sit immobilis: sicut immobilitas rei locatæ petitur ab vbi interno, à quo res habet, vt sit potius hîc, quàm alibi; hinc

Tria inferuntur. 1. Locus non est tantùm superficies absolutè spectata, sed superficies tali vbcatione affecta, à qua habet, vt sit intrinsecè immobilis. 2. Res dicitur esse in hoc potius loco, quàm in alio, quatenus ambitur superficie aliquâ, quam afficit potius hoc vbi, quàm aliud. 3. Turris, vento perflante, non mutat locum formaliter, quia su-

perfacies alteri succedens acquirit vbi simile priori, à quo habet, vt turris fit in loco eodem æquivalenter : idem dixeris de pisce, qui aquâ præterlabente, immotus manet formaliter ; mutat enim locum materialiter duntaxat, non formaliter, quia alia atque alia aquæ superficies, quæ in fluxu ipsum ambit, afficitur eâdem æquivalenter vbicatione, servâtque idem piscis vbi internum ; contrâ verò merces arculis inclusæ, & aliò translatae locum mutant tum externum, tum internum, quia mutant superficiem ambientem æquivalenter, quatenus superficies ambiens vbicationem mutat in transitu, & se perinde habet, ac si nova materialiter foret, ipsæque merces aliud, atque aliud vbi novum acquirunt. 4. Dum corpus est in loco externo, duplex vbi distingui debet : alterum, quo afficitur superficies corporis ambientis rem locatam ; alterum, quo afficitur quoque res locata : primum vbi superficiem corporis ambientis, facit primò superficiem esse hîc, deinde facit nos esse in tali loco extrinseco : secundum vbi rei locatæ facit eam esse hîc intrinsecè, vbi est.

Obicies : Dum turris, flante vento, amittit vnam superficiem corporis ambientis, acquirit aliam : ergo amittit suum locum extrinsecum.

Resp. dist. consequ. Amittit locum extrinsecum materialiter, concedo : formaliter, nego. Ratio est, quòd in locum superficiem prioris, alia succedat habens idem specie vbi, quod habebat alia prior, cui suffecta est ; & ita turris non mutat hunc specie locum extrinsecum ; quin etiam idem numero locus æquivalenter manet. Itaque duo distinguenda in loco, materia, & forma ; materia est superficies ipsa entitativè sumpta ; forma est mo-

us superficiiei inexistens, per quem formaliter constituitur in ratione talis loci, & ita locus extrinsecus est ens per accidens.

### §. V. *Proprietates loci.*

I. **L**ocus spectari potest vel secundum se, vel relativè ad corpus locatum, vel comparativè ad motum, vel ut habet rationem principii, vel relativè ad corpora circumposita: unde multiplex affectio.

I I. Loci secundum se spectati nativa affectio est immobilitas, non formalis illa quidem, sed æquivalens duntaxat, ut patet in turri, quæ licet, flante vento, aliâ, atque aliâ superficie ambiatur, perinde tamen se habet, ac si eâdem superficie afficeretur.

I I I. Loci ad locatum relati plures sunt affectiones. Prima est unitas; unius enim rei unus est, totalis, & adæquatus locus naturaliter. Secunda, continet locatum; cum enim sit superficies ambiens, utique locatum continet, ac comprehendit; hinc non est aliquid locati, sed extra illud est, & ab eo distinguitur realiter; ubi enim est locus externus, ibi continentia, & contactus; ubi contactus, ibi distinctio; contiguorum enim extrema sunt simul, non idem; hinc gutta aquæ fluvio infusa, non est in eo, ut in loco, sed ut pars in toto. Tertia, debet ita mensurare locatum, ut illi sit æqualis, & totus toti, ac secundum partes partibus respondeat. Ratio est, quod superficies corporis locati coincidat, & simul sit cum superficie corporis locantis: nec refert, quod continens dicatur esse majus contento; id enim accipi debet de continente, ut quod,

non de continente, vt quo, cuiusmodi est superficies; hæc proprietas conuenit loco circumscripti-  
uo, de quo hîc potissimùm agitur. Quarta, sepa-  
rabilis est à locato, vtpote rei locatæ extrinsecus.  
Quinta, per locum dicuntur corpora naturalia esse  
præsentia, vel distantia; simul, inquit Aristote-  
les lib. 5. Phys. esse dicuntur, quæcunque sunt in  
eodem loco primo; ea verò separata, quæcunque  
sunt in diuerso loco primo; vbi per locum primum,  
intelligit proximam corporis ambientis superfi-  
ciem.

I v. Loci cum motu collati duplex affectio; pri-  
ma, locus est terminus motûs, quia res naturales  
tendunt ad locum, tanquam ad terminum, in quo  
quiescant: secunda, locus est motûs ipsius finis,  
ob eandem causam.

v. Loco, vt habet rationem principii, inest vis  
generandi, conservandi, perficiendique rem loca-  
tam, juxta illud pronuntiatum lib. 4. Physic. cap. 4.  
*locum locatum allicit, & conservat.* Certè patet ex-  
perientiâ, non omnia in omnibus locis generari,  
conservari, ac perfici, sed quædam in quibusdam  
locis, alia in aliis: hæc porrò affectio non conuenit  
loco, quia superficies est, quippe quæ actiuosa non  
sit, sed quatenus loco insunt qualitates actiuosæ,  
& conservatrices rerum, aut certè quia corpora  
in qualitate sibi similia, per mutuam propinqui-  
tatem, & contactum meliùs conservantur. Quan-  
quam dum locus dicitur rei locatæ conservator, id  
intelligi potissimùm debet de loco naturali corpo-  
rum mixtorum, non de loco simplicium, cuius-  
modi sunt elementa; potest tamen dici elemen-  
tum aliquatenus conservari à suo loco naturali,  
quatenus elementum superius conuenit cum infe-  
riori qualitate amicâ.

v.1. Loci ad corpora circumposita comparati, sex differentiæ, nempe sursum, deorsum, ante, & retro, dextrum, & sinistrum: ita Aristoteles tex. 9. & 10. l. 2. de cælo. Ratio est, quia tres tantum sunt dimensiones rei extensæ, & commensuratæ loco, longitudo, latitudo, & profunditas, quarum sex duntaxat possunt esse extremitates, duæ longitudinis, duæ latitudinis, & totidem profunditatis. Hæc porro sex differentiæ propriè reperiuntur in solis animantibus, quamvis per accommodationem vniuerso tribuantur. Sursum dicitur in animali eapars, vnde alimentum sumit; deorsum, illa, ad quam ultimò defertur, vt pedes; dextrum, illa pars, à qua incipit moveri; sinistrum verò pars illa, quæ posteriùs movetur; hinc dextram faciliùs movemus, & onera humero sinistro imponimus, vt pars dextra sit ad motum expeditior; ante dicitur illa pars, in qua sensus maximè vigent; retro, opposita: porro has sex loci differentias in animalibus perfectis reperire est, in imperfectis aliquas tantum, nempe sursum, & deorsum. In plantis nec est ante, & retro, nec dextrum, & sinistrum, sed sursum duntaxat, & deorsum; sursum quidem sunt radices, per quas, emissis quoquoversum fibris, succum trahunt, & alimentum, tum ad sui incrementum, tum ad stabilitatem; deorsum verò rami, & folia, ad quæ ultimò alimentum pervenit. Ex communi tamen usu, rami sursum esse dicuntur, radices deorsum, denominatione extrinsecâ per ordinem ad nos, aut ad partes præcipuas vniuersi. In reliquis rebus non dantur ejusmodi positiones, nisi vel per relationem ad animalia, vt docet Aristoteles; columna enim dicitur dextra, quia est à parte dextra alicujus animalis; vel per analogiam, vnde

cælum dicitur esse sursum , quia ab eo , velut à capite lumen , calor , & alia ejusmodi in hæc inferiora defluunt ; terra verò deorsum , quia ad eam vltimò cælestes influxus perveniunt ; at

Quæres , quinam sit locus naturalis corporum ? Respondeo , vel de corporibus simplicibus , cujusmodi sunt cæli , & elementa , vel de mixtis quæstionem posse institui.

Respondeo 1. cælos , si plures sunt , ita esse à natura ordinatos , vt proximè superior , inferioris sit locus.

Resp. 2. terræ locum naturalem , cūm gravior , & crassior ipsa sit , esse concavam aquæ superficiem , si observanda esset dispositio , quam natura postulabat ; sed propter generationem , & conservationem viventium , divinâ providentiâ factum est , vt aquæ in terræ lacunas defluerent ; vnde locus terræ partim est aquæ , partim aëris superficies. Locus aquæ est concava aëris superficies , quia aqua minus crassa , & gravis , quàm terra. Locus aëris est concava ignis superficies , quia terrâ , & aquâ subtilior. Denique ignis , vtpote subtilissimus , locum naturalem sibi vindicat sub concavo lunæ , à quo tanquam à proprio loco circumscribitur. Porro quòd elementorum ita constitutorum locus sit proprius , & naturalis. Probat 1. ex motu cujusque elementi ; nam terra , innato sibi pondere , medium mundi occupat , aqua eidem circumfunditur , ignis rectis lineis subvolat in concavum lunæ , aër supra terram , & aquam , etiam ruptis terræ repagulis assurgit. 2. Quia sic elementa vnâ qualitate associantur , & dissociantur alterâ : & ita discordem elementorum concordiam divinus mundi opifex temperat. Miscentur tamen ex parte elementa , ad



perfectionem vniuersi, vt hac qualicunque temperatione hominibus, & animalibus inserviant: vnde terra non ambitur aquâ vnde quaque, aër partes terræ subit, & multæ ignis particulæ cæteris elementis inferuntur.

Resp. 3. mixtorum locum esse elementum prædominans, quanquam mixta alia inanîmata, animata alia; illa partibus constant ejusdem rationis, hæc diversæ, & dissimilis indolis; in illis idem elementum dominatur, ideoque partes illorum eundem naturalem locum exigunt: in his partes aliæ magis terræ, aliæ magis aqueæ, magis aëreæ nonnullæ, quædam magis igneæ: vnde natura res animatas nec omnino à terra abduxit, nec omnino terræ addixit, aut alicui alteri elemento: porro non idem contingit animalibus, quod elementis, quorum perfectiora superiorem locum tenent, imperfectiora inferiorem, vt cernere est in homine, qui ab innata gravitate in terra retinetur, dum aves in aërem subvolant.

## ARTICVLVS II.

### *De forma constitutiva rei in loco.*

STATVS quæstionis est, an vt res sit in hoc loco potius, quàm in alio, requirat formam internam, præter suam entitatem, & locum externum, quæ realiter à re locata, & loco, vt modus, distinguatur: sicut datur actio realiter distincta à causa, & effectu. Vterque Suares, Ruvijs, aliique plures recentiores pugnant formam ejusmodi cuiuslibet rei existenti in loco inesse, quâ, & ibi, ubi est, & in loco collocatur, quam locum internum,



præsentiam localem, communiter ubi appellant; alii contrà non agnoscunt ejusmodi formam, nisi virtualiter distinctam.

### § I. *Quæstio definitur.*

I. ASSER-**D**ATUR forma ubicativa à corpore, & loco distincta realiter, distinctione minoris realitatis; duæ sunt partes assertionis.

Probatur prima pars. 1. Illa distinguuntur realiter, quæ possunt separari realiter: res, & locus possunt separari ab eo, à quo res habent, ut sint formaliter in loco; potest enim esse res, & non esse ipse huic loco: ergo id, per quod res est formaliter in loco, est aliquid distinctum à re locata, & loco.

Probatur 2. Motus localis est mutatio realis mobili intrinseca; motus enim est in re mobili: ergo debet assignari terminus illius mutationis realis: non aliud, quàm ubi internum realiter distinctum: ergo datur ubi internum realiter distinctum. Consequentia patet; nam motus localis non minùs debet habere terminum à se realiter distinctum, quàm aliæ species motûs: aliæ species motûs habent terminum à se realiter distinctum; sic motûs alterativi terminus est qualitas, ut illuminationis lumen, calefactionis calor; augmentativi verò terminus est quantitas.

Respondent 1. terminum mutationis illius esse complexum locale. Contrà 1. complexum locale nihil dicit præter rem locatam, & locum; erat antea res locata, & locus, & non erat complexum locale: ergo complexum locale est aliquid præter rem lo-

catam, & locum. Deinde debet assignari aliquid quodd Petrum determinet ad hoc potius, quàm illud complexum locale faciendum; quid autem aliud esse potest, præter ubi internum?

Respondent 2. mutationem illam esse tantum extrinsecam secundum locum extrinsecus ambientem. Contrà 1. dum Petrus de non posito in hoc loco, fit, & denominatur positus in hoc loco, illa denominatio est intrinseca: ergo petitur à forma intrinseca, & quidem nova. Probatur anteced. fit enim Petrus per horam in loco A; deinde horâ alterâ in loco B: tunc in Petro non est tantum mutatio extrinseca: ergo est mutatio intrinseca, adeoque illius terminus. Prob. ant. si mutatio foret extrinseca, maximè destructio loci veteris extrinseci, & productio novi; non destructio loci veteris extrinseci, quia semper idem remanet; non productio novi, quia antea erat locus, qui dicitur novus, & tamen non erat Petrus in eo. Deinde illa productio loci vel est aliquid distinctum realiter à Petro, & loco, vel non; si primum: ergo datur aliquid realiter distinctum à Petro, & loco, quod est ubi; si secundum: ergo non est facta nova productio loci. 3. Ad hoc tantum terminatur actio potentiae motricis, quod per ipsam producit: spatium non producit per motum localem: ergo spatium non est terminus actionis potentiae motricis. 4. Licet varietur corpus circumdans, corpus locatum ibidem manet, ubi antea erat, nec per variationem corporum circumdantium, mutatur realiter corpus circumdatum, ut cernere est in arbore in fluvio existente; vicissimque res, quæ erat hîc, alibi constituitur, licet eâdem superficie ejusdem corporis circumstantis ambiatur, ut patet in merci-

bus , quæ arculis inclusæ , aliò deferuntur. Denique licèt corpus aliquod vltra supremum cælum transferatur , non acquirat locum extrinsecum , quia nullo ibi corpore externo continebitur.

Respondent alii , motum terminari ad impetum , quo corpus movetur ad locum ; sed facilè refutantur , quia impetus est principium , vnde manat actio localis , vt videre est in projectis , quorum impetus actionem motivam producit.

Respondent alii , rem locatam esse in loco formaliter per novam relationem , quam habet ad locum : sed malè , tum quia potest annihilari à Deo locus extrinsecus , quo res circumdatur , & res eadem adhuc esse hîc , quo in casu non habet relationem ad locum extrinsecum , qui tum nullus erit : tum quia antequam res esset in hoc loco , erat res locata , & locus , nec tamen erat relatio realis locati ad locum : ergo facta est mutatio nova , cùm ad hunc locum incepit referri : ergo vel in termino , vel in fundamento ; non in termino , quia sive res sit in hoc loco , sive non sit , locus semper est idem : ergo superest , vt facta sit mutatio in fundamento , sive in re locata , cuius terminus sit vbi.

Nec dicas motum ipsum , quo res movetur , esse terminum , tum quia per motum res non est formaliter in loco , sed tantùm efficienter : ergo per motum , qui transit , res non est formaliter in loco : tum quia res est formaliter in loco per id , quod tandiu manet , quandiu res manet in loco : motus non manet , quandiu res manet in loco : ergo non est in loco formaliter per motum. Certè desinente formâ , per quam res erat in loco , debet desinere effectus illius formalis : at cùm res incipit esse in loco permanenter , non est ampliùs motus , sed antè fuit.

Probat<sup>ur</sup> 3. Petrus est indifferens , vt sit in loco A potius , quàm in loco B : ergo ad alterutrum determinari debet per aliquid reale ; non per aliquid aliud , quàm per vbi internum : ergo datur vbi internum.

Respondent , determinari formaliter per locum externum , materialiter per corpus locatum , efficienter per causam , quæ mouet. Contrà , hæc tria esse possunt , nec tamen Petrus erit in hoc loco : ergo Petrum esse in hoc loco , est aliquid distinctum ab his tribus. Reponunt , requiri duntaxat negationem loci interjecti inter Petrum , & locum , seu indistantiam ; vnde rem esse in tali loco , includit rem locatam , locum , & negationem distantiae , quibus positis , erit necessariò in loco. Refelluntur . 1. Hæc tria existere possunt , nec tamen locatum erit in eodem loco , in quo nunc est : ergo esse in hoc loco , est aliquid præter hæc tria. Prob. ant. v. g. hæc schola cum Petro , & aëre ambiente , Romam vsque diuinitus deportetur , tunc erit locus , locatum , & negatio distantiae inter vtrumque , nec tamen Petrus erit , vbi antea erat . 2. Destruatur aër inter cælum , & terram , in qua antea erat Petrus , tunc inter Petrum , & cælum erit negatio spatii interjecti , nec tamen Petrus præsens erit cælo . 3. Negatio distantiae vel est aliquid positivum , vel aliquid negativum ; si est aliquid positivum , est ipsum vbi , quod quærimus : si aliquid negativum , vel distantia ipsa est aliquid positivum , vel negativum ; non potest esse aliquid negativum , aliàs negatio distantiae esset negatio negationis , adeoque forma positiva , quia negatio negationis est aliquid positivum : si sit aliquid positivum , vel est corpus interjectum , vel aliud quid : at corpus in-

reijectum, putà hic aër inter parietes hujus scholæ, potest interjici, nec tamen dicetur esse distantia inter parietes, nempe si idem aër expellatur.

Respondent, non esse distantiam præcisè, ut est hic aër, sed ut est aër interjectus. Contrà, vel 7<sup>o</sup> interjectum addit aliquid supra entitatem aëris, vel nihil; si nihil, ergo verba dant adversarii; si aliquid, debet esse ubi aëris ipsius, vi cujus occupat locum interjectum: certè si aër interjectus esset tantùm hic aër, quoties esset hic aër, toties esset interjectus, quod falsum.

Probatur 4. Dum Petrus incipit esse præsens loco A, acquirit relationem realem: ergo debet dari novum fundamentum illius relationis; non aliud, quàm ubi internum: sicut dum incipit distare ab eodem loco, amittit relationem præsentia: ergo & ipsum ubi, quod antea habebat, novo acquisito. Ad hæc, si in inani extra cælum, duo corpora à se invicem motu locali sejungerentur, quanta esset utriusque distantia, Angelus cognoscere posset, quamvis motum illum non vidisset; quæro, unde illam distantiam nosse posset? non ex motu, quem suppono ab eo non esse visum; non ex corpore interjacente, quod nullum tunc foret; non ex utriusque substantia præcisè spectata, quia indifferens est ex se ad quamlibet distantiam, & vicinitatem: ergo ex sola forma ubicante, quia utrumque corpus per motum ibi fuisset constitutum.

Probatur secunda pars, quia licet corpora ab hoc, & illo ubi separata existere possint, tamen ejusmodi ubi non possunt existere sine corporibus, quæ afficiunt; effectus enim modi ubicantis est constituere subjectum suum hîc, vel illic; quandiu enim res conservat in se hunc modum præsentia,

semper ibidem manet, vbi prius erat, aliis omnibus, quæ circa ipsam sunt, immutatis.

**I I. A S S E R T I O.** Res constituitur in loco permanenter per vbi permanens; fluenter autem per vbi successivum. Probat, quia modus ex natura sua, est determinatio rei modificata: ergo si res sit permanenter in loco, id vtiq; habet ab vbi permanente, tanquam à forma tali loco affigentes; si fluenter, & in transitu, id habet ab vbi fluente.

Colliges ex dictis duo; 1. non minus necessariuna esse suum vbi loco ambienti, quàm rei locata; 2. vbi esse formam, cujus est rem constituere locatam in certo, ac determinato loco, seu alicubi; permanenter quidem, si sit vbi permanens: fluenter autem, si sit vbi fluens, hinc vbi permanens est forma interna, rem constituens in loco permanenter; vbi fluens, forma, per quam res successivè, & continuè omnibus loci partibus coextenditur, ita vt sit in hoc, & alio simul loco, in hoc desinendo, in alio incipiendo.

### §. I I. *Varia quæstiones de natura vicationis.*

**P R I M A**, quænam sint causæ vbi modalis? Respondendo, quoties res locata movetur, toties causam illius efficientem esse motum localem; sin autem incipiat res existere per creationem à Deo, per resultantiam vbi ab eadem re emanare incipit: causa finalis est, vt res sit formaliter in loco, vel alicubi: materialis est res vbiata, quam facit esse hîc: formalis est actualis determinatio, à qua res habet, vt sit hîc potius, quàm alibi. Porro cùm vbi sit ratio formalis existendi in loco, per se ipsum est

potius hîc , quàm alibi ; in iis enim , quæ talia sunt per aliud , veniendum est ad id quod est tale per se.

Secunda, per quid vnum vbi differat ab alio ? Respondeo : vel quæris , per quid differat specificè , vel numericè ; si primum , respondeo differre inter se specie , per differentiam specificam : porrò habent differentiam specificam , quæ rem faciunt esse in diversis locis : si secundum , respondeo differre numero per differentiam numericam sibi propriam. Quin etiam speciem sumunt aliquando per ordinem ad subiectum ; hinc vbi definitivum rei spiritualis , distinguitur specie ab vbi rei corporeæ , vbi rei supernaturalis ab vbi rei naturalis , denique vbi circumscriptivum substantiæ corporeæ ab vbi circumscriptivo quantitatis.

Tertia , an vbi sit accidens absolutum ? Respondeo hoc sensu esse , quòd possit secundum se , & ex natura sua , modificare independenter à quocunque loco externo , 1. quia quamvis esset vnicus Angelus , qui moveretur , posset acquirere diversa vbi interna , sublato quolibet loco externo. 2. Quamvis nullus locus externus supremum cælum ambiat , non ideo desinit habere locum internum , à quo determinatur , vt sit ibi , vbi est. Et verò vbi internum non pendet à loco externo , nec in genere causæ efficientis , quia corpus continens ex vi continentiæ suæ , nihil habet efficientiæ in corpore contento : nec in genere causæ materialis , quia non recipitur in eo : nec in genere causæ formalis , quia non resultat immediatè , vt effectus illius proprius formalis , nec mediatè , quia nullus est alius effectus immediatus , quo mediante , resultet : itaque esse hîc , est aliquid absolutum , habétque Deus distinctam



distinctam illius independentiæ ab omni extrinseco notitiam, quamvis non recurrat ad extrinseca. Respondeo tamen 2. sæpe non concipi à nobis differentias tum específicas, tum numericas ipsorum vbi, nisi dependenter ab aliquo extrinseco, eoque fixo, & immobili, siue reale illud sit, siue purè imaginarium; causa est istius fictionis intellectûs nostri imbecillitas, qui cùm differentias singulorum locorum ignoret, eas concipit per ordinem ad aliquod extrinsecum, quod fingit, putà ad diversas partes reales spatii alicujus, aut ad diversas partes virtuales immensitatis divinæ.

Quarta, an singulæ entitates ejusdem suppositi habeant suum vbi proprium, & distinctum? Respondeo cum utroque Suare probabiliùs habere. Probatur: quælibet accidentia habent suum vbi, suum & substantiæ; accidentia quidem, quia licèt moveantur efficienter ratione substantiæ, moventur tamen formaliter secundùm se: ergo habent suum vbi. 2. Modus vbicationis est intrinsecus rei locatæ: ergo multiplex est pro numero accidentium. 3. Quoties qualitates ejusdem suppositi alterantur, mutantur vbicationem totius suppositi, quod videtur absonum. 4. Accidentia in augustissimo Eucharistiæ sacramento sunt circumscriptivè in loco; non ratione vbicationis substantiæ, quâ carent; ergo ratione suarum vbicationum. 5. Tot sunt vbicationes, quot motus, quia vbicatio est terminus motûs localis: tot motus, quot mobilia: sed omnia accidentia, quæ distinguuntur à substantia, moventur cum substantia: ergo habent vbicationes suas, quæ termini sunt cujusque motûs. Substantiæ verò, 1. quia substantia corporea est capax propriarum operationum; itaque & suarum



vbicationum. 2. Deus potest substantiam omni spoliata quantitate ex loco ad locum movere : at motus localis movetur ad nōvum vbi.

Objicies 1. Accidentia moventur tantūm per accidens, ratione subjecti. 2. substantia est in loco, ratione quantitatis : ergo non habet proprium vbi.

Resp. ad 1. hoc sensu moveri accidentia per accidens, quōd secundariō moveantur ; prius enim movetur totum compositum substantiale, cui cūm alligentur accidentia, dicuntur moveri consequenter, & per accidens ; at hoc non impedit, quominus propriē moveantur : sicut primus catenæ annulus dicitur moveri per se primō, & alii secundariō per respectum ad primum, & tamen propriē moventur singuli concomitanter cum primo.

Ad 2. nego ; substantia enim, etiam sublatā quantitate, adhuc esset in loco : ergo per suum vbi.

Instabis 1. Substantia satis figuratur per quantitatem : ergo vbicatur per vbi quantitatis.

Resp. nego consequentiam, quia datur in substantia motus localis propriē, cujus terminus est ipsum vbi.

Instabis 2. Quæ sunt in eodem loco, debent habere idem vbi.

Resp. dist. Idem vbi specie, esto : idem numero, nego.

Quinta, quotuplex sit vbi ?

Resp. duplex esse, circumscriptivum, & definitivum ; quidam addunt vbi sacramentale, sed probabilius sub definitivo continetur, ut docet Cardinalis Lugo, disp. 5. de Eucharistia ; itaque prima divisio adæquata ; vel enim vbi rem totam ponit in toto spatio, & partem in parte spatii : vel totam in qualibet parte loci ; si primum, est vbi circumscri-

primum : si secundum , est ubi definitivum , quod potest esse vel spirituale , vel corporeum ; hinc cum rarefit hostia consecrata , adeoque acquirit majus ubi circumscriptivum , corpus Christi accipit aliud ubi definitivum , superiori amisso : sicut dum Angelus correspondens vni palmo , se ad totum sphaeræ spatium extendit , prius ubi amittit , & novum acquirit.

Sexta , an ubi circumscriptivum corporum quantum differat realiter ab extensione locali eorundem ?

Resp. probabilius non differre , quia nulla est necessitas distinctionis realis ; ut enim extensio in communi partium corporis in ordine ad locum , necessario ponit in loco ; ita ut res localiter extensa , necessario sit circumscriptivè in aliquo spatio : ita hæc extensio localis in individuo necessario ponit in hoc loco determinato , & non in alio , nec quidquam dici potest de extensione locali , quin ipsum dicatur de ubi circumscriptivo ; hinc moto corpore , & alium locum accipiente , mutatur extensio localis , sicut figura , & extensio localis corporum etiam durissimorum ad minimum motum amittitur , & in aliam æquivalentem facessit , quamvis sensus reclamant ; quemadmodum non est idem lumen hodie , quod fuit heri , & species ejusdem objecti , detectâ , vel occultatâ parte subjecti , clausis , vel apertis oculis , mutantur ex multorum sententia ; hinc ubi definitivum Angeli non distinguitur ab extensione virtuali ipsius ; virtuale dico , quia cum careant partibus , virtute illius non sunt toti in toto loco , & per partes reales in partibus realibus loci ; verum quia beneficio illius ubi substantiam quodammodo diffundunt per totum ali-

quod spatium , ita vt tota toti , & tota singulis partibus præsens fiat , ideo eorum extensio localis virtualis dicitur.

### §. III. *Diluuntur objecta.*

**O**BJICES I. Aristoteles lib. 8. Phys. tex. 59. ait motum localem , inter omnes motus , minimè mutare suum subiectum , vt contingit in motu alterationis , rarefactionis : ergo per motum localem non acquiritur vbi internum. Item hoc lib. tex. 45. negat cælum esse alicubi.

Resp. ad 1. distinguo , motus localis , inter omnes motus , minimè mutat subiectum , motu sensibili , & ad oculum , concedo : motu insensibili , nego. Ratio est , quia per alios motus ita subiectum immutatur , vt vel accipiat novum esse , vt in generatione ; vel esse alteratum , vel auctum , vt in alteratione , & auctione , quæ omnia in sensus incurrunt : at motus localis quoad sensum relinquit idem esse sensibile in mobili , tum substantiale , tum accidentale , & ita non immutat subiectum sensibilibiter , quod idem esse censetur ad oculum , siue sit in vno loco , siue in alio , quamvis realiter subiectum immutet. Rem illustrabis exemplo actionis , quæ effectum immutat realiter , licet illa mutatio videatur insensibilis. Ad 2. dist. cælum est nullibi , ratione loci externi , concedo : ratione loci interni , nego ; Et verò ipse Philosophus se explicat , dum ait cælum non esse alicubi ; *Siquidem* , inquit , *nullum corpus illud continet.*

Objicies 2. rem esse in loco , nihil aliud est , quàm esse rem ipsam , & locum , cum negatione distantiae : ergo frustraneum est vbi realiter distinctum.

Respondeo 1. nego antecedens; fac enim Petrum cum aëre ambiente ab hac schola Romam vsque transferri, an erit in eodem loco, in quo antea erat? minimè; & tamen erit Petrus, & locus externus cum negatione interjecti spatii. Deinde duæ quantitates penetrativè positzæ non distarent à se invicem, & tamen neutra propriè foret in loco alterius, quia neutra alteram contineret. 3. Fac destrui aërem hujus scholæ, non erit ampliùs reale spatium inter Petrum, & Paulum existentes in diversis ejusdem scholæ angulis, nec tamen dicentur esse propriè in eodem loco.

Respondeo 2. dist. ant. rem esse in loco, nihil est aliud, quàm esse rem ipsam, & locum, cum negatione distantiz relativâ ad vbi, ipsùmque supponente, concedo: absolutâ, & non præsupponente vbi constitutivum rei in loco, nego; negatio enim distantiz fundata in vbi facit rem esse in loco, non formaliter quidem, sed consequenter; nam res præsupponitur jam formaliter constituta in loco per vbi internum, quod fundat relationem præsentiz, vnde consequitur negatio distantiz, vel potiùs præsentia: v. g. posito, quòd homo non sit animal irrationale, sequitur quidem quòd sit rationalis, licèt formaliter sit rationalis per vim ratiocinandi, non per negationem irrationalitatis, quæ ad esse rationalis consequitur. Ad hæc, sola negatio poni non potest; cùm enim nihil sit, per se produci non potest, sed opus est produci aliquid reale, vel desinere, vt nova exurgat negatio: ergo cùm res dicitur de novo habere negationem distantiz ab aliquo loco, vtiq; debet dari aliqua forma, quæ sit fundamentum illius negationis, nempe ipsùm vbi.

Objicies 3. Locus ambiens rem locatam non minùs est præsens rei locatæ, quàm res locata loco: locus fit præsens rei locatæ, absque vbi interno: ergo & res locata.

Resp. nego minorem; corpus enim ambiens non minùs afficitur suo vbi interno, quàm res locata: itaque res locata est in loco intrinseco per suum vbi, at est in loco extrinseco per vbi ipsius loci suo vbi respondens; nam esse in loco extrinseco, nihil aliud est, quàm ambiri aliquâ superficie affectâ simili vbi, ac est vbi rei, quam continet.

Objicies 4. Petrus sit in hac schola, deinde Deus annihilet omnia præter ipsum, adhuc Petrus erit alicubi, nec tamen habebit vbi distinctum: ergo res non est in loco per vbi distinctum.

Resp. dist. minoris secundam partem: nec habebit vbi distinctum externum, concedo: internum, nego; quamvis enim non sit in loco externo, quia supponitur omne corpus ambiens distinctum, servabit tamen vbi internum, à quo habebit, ut sit hîc intransferibiliter: vnde hæc objectio potius confirmat sententiam nostram, quàm infringit.

Instabis: Supponimus etiam illud vbi internum destrui.

Respondeo, ex hypothese quòd Petrus ibi maneat, non posse destrui, aut si destruaturs hoc numero vbi, debet Deus ipsi dare aliud æquivalens, præsertim si res non possit esse nullibi.

Objicies 5. Res est in tempore per suam existentiam relativè spectatam ad tale tempus: ergo & in loco per coexistentiam sui ad talem locum, adeoque supervacaneum vbi internum.

Resp. 1. nego antecedens. Resp. 2. nego consequentiam; dispar ratio est, quia multa existunt

simul loca , ad quæ res est indifferens , non autem multa simul tempora : sed de hoc argumento pluribus infrâ.

Objicies 6. Si vbi per motum localem produceretur , daretur modus modi , quia vbi esset terminus ipsius motûs , motus autem non minùs est modus , quàm ipsum vbi : at non potest dari modus modi , aliàs in infinitum abiretur.

Resp. dist. majorem , daretur modus modi , in diverso genere , concedo : in eodem genere , nego ; at non repugnat dari modum modi in diverso genere , quia non inde sequitur processus in infinitum , vt patet.

Instabis : Vbi debet esse in loco , per aliud vbi : ergo daretur modus modi in eodem genere.

Respondeo , nego ant. Cùm enim vbi sit vltima determinatio , quâ res est in loco , non debet esse in loco per aliud vbi , sed se ipso ; sicut motus , quo ipsum vbi producit , non est in loco per vbi distinctum ab illo , quod producit. Ratio est , quòd motus localis sit essentialiter determinatus , vt producat hoc vbi , adeoque vt sit hîc.

Objicies 7. Esto , detur vbi permanens , saltem vbi fluens dari non potest ; aliàs quoties res moveretur , acquireret infinita vbi : deinde non potest assignari causa productrix , aut peremptrix illius vbi fluentis.

Resp. 1. nego antecedens. Ad 1. illius probationem , nego ; mobile enim acquirit vnum vbi totale , quod licèt dividuum sit in multa partialia , habet tantum partes potentiâ distinguibiles , non actu distinctas. Ad 2. probationem , vel motus est naturalis , vel violentus ; si naturalis , ipsum mobile per motum producit vbi fluens ; sin autem violentus ,

agens extrinsecum producit vt causa principalis, & mediata ipsum vbi, impetus vt causa instrumentalis, & immediata.

Instabis 1. Mobile dum moveretur, non potest dici esse hîc : ergo non habet vbi fluens.

Resp. dist. ant. Non potest dici esse hîc permanenter, concedo : fluenter, nego. Porrò esse fluenter in spatio, est esse hîc, & alibi, in hoc, & alio simul loco ; in hoc desinendo, in alio incipiendo ; moveri enim est actu transire ab vno loco ad alterum : at quod transit, relinquit vnum locum, in quo est desinendo, & acquirit alterum, in quo est incipiendo : itaque simul est in vno, & altero loco, sed fluenter, non permanenter : in nulla est parte certa, ac determinata, sed jugi, ac continuo fluxu alias, atque alias spatii, quod percurrit, partes occupat.

Objicies 8. Vel res acquirit vbi, antequam sit in loco, vel postquam est in loco ; non primum, quia sicut paries non habet albedinem, antequam sit albus, ita res non producit vbi, antequam ponatur in loco : non secundum, quia res jam supponitur esse in loco.

Resp. nego 1. propositionem : sed acquirit suum vbi, cùm ponitur in loco, & quemadmodum albedo se habet quodammodo concomitanter ad rationem albi, quia est forma formaliter constituens album, ita vbicatio ad rem vbicatam ; hinc valet mutua consequentia, res est affecta tali vbicatione : ergo est in loco, & vicissim.

Instabis 1. Prius est rem hîc esse, quàm producere vbi suum, per quod est hîc : ergo non potest incipere esse hîc per suum vbi. Probat. ant. Priusquam res operetur hîc, debet esse hîc ; vt enim se

habet esse ad operari, ita esse hîc ad operari hîc : at prius est esse, quàm operari : ergo prius est esse hîc, quàm operari hîc.

Resp. nego ant. Ad illius probationem, distinguo, priusquam res operetur hîc aliquid, quod non sit ipsum vbi, transeat : quàm operetur ipsum vbi per quod sit formaliter præsens huic loco, nego. Ratio est, quia in agentibus corporatis, esse hîc est conditio sine qua, antecedens, & necessaria, vt res aliquid operetur distinctum ab vicatione sua ; non autem est conditio necessaria, vt opere- tur hîc id, per quod formaliter est hîc.

Instabis 2. Antequam Petrus recipiat hîc albedinem, debet esse hîc : ergo antequam recipiat formam vbian-tem, debet esse hîc.

Dispar ratio est, quòd effectus formalis formæ vbian- tis sit constituere in hoc loco : vnde per causam productricem rei vbian- tæ res determinatur effi- cienter ad talem locum ; formaliter verò per ipsum vbi.

Instabis 3. In priori, quàm res producat vbi suum, non potest dici, vbi sit.

Respondeo, vel quæstio sit de instanti reali, vel de instanti naturæ, aut rationis ; si de instanti reali, eodem instanti reali est hîc, & simul producit vbian-tem suam hîc ; in priori autem naturæ, aut rationis, nec intelligitur res esse hîc, nec alibi, sed abstrahit ab omni loco.

Instabis 4. Ergo nullibi est ; nego subsumptum, sed tantum non intelligitur esse alicubi, quæ duo multum discrepant ; primum enim positivum aliquid sonat, secundum aliquid negativum, seu abstractivum.

Instabis 5. Omne accidens supponit subiectum suum esse alicubi.



Resp. nego, sed vel supponit, vel facit esse alicubi.

Objicies 9. Non sunt multiplicanda entia sine necessitate: ergo non debet ipsum ubi distinguí realiter ab actione, quâ res vel primò producitur, vel deinde conservatur.

Respondeo 1. Eriam si res esset in loco per actionem, non sequi inde, quòd esset alicubi per suam entitatem. Respondeo 2. actionem ad summum posse dici vbi-cationem causalem, non formalem. Respondeo 3. nego consequentiam, tum quia vbi-catio est terminus motûs, actio autem non est terminus motûs: tum quia per eam actionem, per quam Deus me producit hîc, potest me alibi producere: ergo non sum hîc per hanc actionem: quare satius est ubi distinguere ab actione.

Objicies 10. Si ubi internum distingueretur realiter, res posset esse nullibi, quia potest separari ab ubi interno; ut huic argumento faciam satis, sit

#### §. IV. *An res aliqua possit esse nullibi.*

CERT A sunt tria. Primum, res potest esse nullibi, si de loco externo agitur, quia cælum supremum v. g. nullo corpore externo ambitur; deinde Deus potest destruere aërem, quo nunc ambior, nullo alio suffecto. Secundum, si cælum supremum excipis, nulla res corporata potest naturaliter esse nullibi, id est, absque loco externo; nullum enim corpus mutat locum externum, quin statim in alterum deportetur. Tertium, res corporea extensa in ordine ad locum, non potest esse nullibi. Ratio est, quòd extensio illius sit ipsius ubi, &

res illa sit alicubi , cuius partes alicubi sunt ; partes autem alicubi sunt , quæ sunt extra se invicem positæ in ordine ad locum occupandum ; quin etiam nullum compositum potest esse nullibi , si partes illius vniri non possint , nisi prius vniantur vnione locali : quare quæstio videtur præsertim ad substantias , quæ non sint localiter extensæ , pertinere.

Duplex est sententia. Prima , quam tenet Marxatius 1. part. tract. de Angelis , disp. 19. sect. 1. rem posse esse nullibi his argumentis nritur evincere. 1. Quoties duo ita se habent , vt vnum sit posterius naturâ alio , & quidem ab illo realiter distinctum , potest Deus , posito priore , impedire illud posterius : vbi est quid naturâ posterius substantiâ vbicatâ , & realiter ab eadem distinctum : ergo Deus potest , posita substantiâ , non ponere vbi , & ita erit nullibi. Probatur minor , nam omne accidens est posterius naturâ subjecto suo : at vbi est accidens , respectu substantiæ creatæ , quam afficit.

Distinguunt maiorem , quatenus est posterius naturâ , concedunt : secus , negant : vbi est quid posterius naturâ substantiâ , distinguunt , vbi determinatè sumptum , id est , hoc , vel illud , concedunt : indeterminatè sumptum , negant ; vbicatio enim est conditio logica rei vbicatæ ad existendum prorsus necessaria , aut proprietas quarto modo , non hæc quidem determinatè , sed aliqua indeterminatè ; vt enim creatura est essentialiter à Deo , ita est in Deo , & cum Deo , adeoque non potest existere , quin ei præsens sit per aliquam vbicationem , quam Deus pro nutu suo voluerit determinare.

Contrà 1. Res vbicata potest esse sine hac , vel illa vbicatione determinata : ergo sine omni. 2. Deus potest supplere quamlibet conditionem. 3. Res ponatur in spatiis imaginariis , tunc nullibi erit.

Ad 1. negant consequentiam : possum videre sine hoc , vel illo oculo : ergo sine omni , quæ consecutio ? Ad 2. dist. Deus potest supplere conditionem physicam, concedunt : logicam, qualis est vbicatio, negant. Ad 3. non erit quidem in loco externo , sed erit in interno.

2. Ex eo quòd res nullibi sit , nulla sequitur contradictio ; nam hæc duo non se destruunt , res existit , & nullibi existit.

Distinguunt , non se destruunt formaliter , concedunt : consequenter , negant ; quia si res existit , sequitur necessariò , quòd sit alicubi.

Secunda sententia , quæ est vtriusque Suaris , pugnat ne divinitus quidem posse esse nullibi , probâtque 1. autoritate Aristotelis 4. Physic. tex. 1. *Ea quæ sunt* , inquit , *omnes existimant alicubi esse ; quod verò non est , nusquam esse* ; hinc cùm volumus probare aliquid non existere , sic ratiocinamur ; non est hîc , nec alibi : ergo nullo modo existit. Accedit D. Augustinus epist. 57. ad Dardanum : *Spatia locorum tolle corporibus nusquam erunt , & quia nusquam erunt , nec erunt*. Respondetur id intelligi de corporibus extensis , aut de loco externo , non de interno. 2. Sit aliqua res priùs in loco , tum definat esse in loco , destructo vbicationis modo , jam sic arguo ; vel aliò transfertur , vel non transfertur : si aliò transfertur ; igitur novum locum acquirit , præsertim si per motum localem tantùm transferatur : si non transfertur ; ergo ibi manet , vbi erat antea ; nam quod in

loco est, & aliò non transfertur, si non desinat esse, utique ibi manet, vbi antea erat.

Facilis solutio; id quod in loco est, & aliò non transfertur, si habeat id, per quod est in loco, ibi manet, vbi antea erat, esto: si non habeat amplius, nego; itaque nec manet, vbi antea erat, quia supponitur carere vicatione, quam antea habebat, nec aliò transfertur, quia novam vicationem non acquirit.

3. Sint duæ res nullibi, vel vna distat ab alia, vel non distat; si distat: igitur est aliqua distantia, adeoque locus; si non distat: igitur est præsens; præsens enim esse, & non distare idem sunt. Respondetur neque distare, neque non distare, quia distantia, & non distantia supponunt subjectum affectum loco interno: at duæ illæ res non habent locum internum: ergo neque distant, neque non distant, sicut Angeli Michaël, & Raphaël nec similes sunt in colore, nec dissimiles. At inquires distare, & non distare sunt contradictoria, negat Arriaga, quia neutrum convenit chimæ; at si essent contradictoria, conveniret alterutrum chimæ; quid enim est distare? habere vicationem procul; sicut non distare, est habere vicationem propè, quo sensu uterque terminus dicit aliquid positivum: at datur medium inter utrumque, nempe nullam vicationem habere: ita ille.

4. Tam implicat rem existere, & nullibi existere; quàm existere, & existere nunquam, hoc est, in nulla temporis differentia: ergo implicat rem existere, & existere nullibi. Ratio est, quia sicut creatura est essentialiter à Deo, ita est essentialiter in Deo, & cum Deo: at est in Deo per vbi internum, & cum Deo per durationem. Respondetur

in hac hypothesi rem fore præsentem Deo per suam entitatem, seu præsentiam entitatis, & substantiæ; non præsentiam loci. Sed contrà, id quod est intra sphaeram immensitatis divinæ, utique nullibi esse non potest, quia *nullibi* est extra sphaeram immensitatis divinæ: cum enim immensitas divina totius loci sphaeram, latitudinem, & ambitum includat, sicut æternitas totius temporis amplitudinem; quod est intra immensitatem divinam, non est extra omnem locum, sive ambitum totius loci: sed quod non est extra omnem locum, non est nullibi, quia nullibi est extra omnem locum. Hoc argumento rem confici putat P. Fabri proposit. 11. de loco: sed meo judicio non videtur rem conficere, nisi apud eos, qui partes virtuales in immensitate agnoscunt.

## A R T I C V L V S III.

*Quibus rebus conveniat esse in loco, & quomodo.*

**T**RIA esse in loco dici possunt, sive propriè, sive impropriè; 1. res corporatæ: 2. Angeli, & anima rationalis: 3. Deus. Videndum itaque breviter, an rebus quantis esse in loco per se conveniat: 2. an Angelis: 3. an Deo.

§. I. *An rebus quantis per se primò conveniat esse in loco.*

I. A S S E R-**R**EBUS quantis convenit primò, & TIO: **R**per se esse in loco. Probatur: Iis tantum rebus convenit esse per se in loco, quæ conti-

nentur, & commensurantur loco: sola corpora quanta continentur, & commensurantur loco: ergo sola corpora quanta per se sunt in loco. Et verò sicut esse visibile proprium est primò, & per se coloris: ita contineri in loco primò, & per se convenit corpori quanto; deinde locus est quasi forma extrinseca locati, ex D. Thoma 4. Phys. Corpus, inquit, contentum comparatur ad continens, sicut materia ad formam: at locus non potest esse forma, nisi corporis quanti, quia non est forma, nisi mensurando; hinc.

1. Omnia corpora mixta, omnia elementa, & orbes cælestes, si supremam sphaeram excipis, sunt in loco circumscriptivè per se, quia vnum corpus ambitur, & circumscribitur ab alio. Audi Aristotelem, tex. 43. lib. 4. *Cui igitur corpori est aliquod corpus extrà, continens ipsum, in loco est*, & tex. 46. ejusdem libri: *Terra in aqua est, hæc verò in aëre; hic autem in athere, & ather in calo.* Ratio est, quia esse in loco est esse in eo, ut in mensura: hæc autem corpora continentur, & mensurantur superficie corporis ambientis. 2. Quæ sunt in loco externo, & non sunt quanta per se, dicuntur esse in loco per habitudinem ad corpus quantum.

II. ASSERTIO. Supremum cælum non est in loco externo actu, sed tantum potentiâ. Probat-ur prima pars 1. ab Aristotele, qui tex. 43. hujus libri universè sancit illud corpus *esse in loco, cui est aliquod corpus extrà, continens ipsum: cui verò non, minimè*; tex. autem 45. Omne, inquit, corpus aut secundum lationem, aut secundum augmentationem mobile, per se alicubi existit: *cælum autem, id est, prima sphaera, ut dictum est, non est alicubi totum, neque vllò in loco est*; tum rationem sub-

jungit, *siquidem nullum corpus ipsum continet*. Probatur ratione, repugnat aliquod corpus esse actu, & propriè in loco, nisi actu contineatur ultimâ superficie corporis ambientis: supremum cælum non habet aliud corpus supra se, cujus superficie contineatur: ergo non est actu, & propriè in loco; nam *extra cælum neque est, neque contingit esse corpus*, ex Aristotele 1. de cælo, tex. 100.

Probatur secunda pars, 1. quia non repugnat supremum cælum alio corpore vastiori ambiri, si à Deo creetur. 2. si cæli partes actu distinguerentur inter se, tunc ipsum cælum foret in loco externo actu, ratione partium; sed quia distinguuntur tantum potentiâ, ideo dicuntur esse in loco. potentiâ proximâ.

Objicies 1. Omne corpus mobile est in loco: ultimum cælum est mobile: ergo est in loco.

Resp. distingo majorem, est in loco interno, concedo: in loco externo, subdistingo, semper actu, nego: saltem potentiâ, concedo: porro cælum ultimum est in loco externo potentiâ, non actu.

Instabis 1. Deus creet alterum mundum, & ponat penetrativè cum hoc mundo, erit in eodem loco, in quo hic est: ergo hic mundus est in loco.

Resp. dist. Erit in eodem loco potentiâ, concedo: actu, nego.

Instabis 2. Totus mundus est hîc: ergo est in loco actu.

Resp. dist. ant. Est hîc, id est, habet hoc vbi internum, concedo: id est, habet hoc vbi externum actu, seu est in spatio reali actu, nego; nihil enim extra cælum ultimum est reale; hinc Aristoteles: *Quod enim alicubi est, & ipsum aliquid est, & ad-*

*huc aliquid aliud esse oportet prater hoc, in quo sit, quod continet: prater autem universum, & totum nihil extrà est.*

Instabis 3. Quid si Deus duos mundos conderet corpusculo aliquo conjunctos; tum deinde corpusculum illud destrueret, nonne vterque mundus esset in loco actu?

Resp. non fore in loco externo actu, sed potentiâ tantum; vterque tamen haberet suum vbi internum, quod duplicem denominationem vtrique tribueret: relativam vnam ad locum externum possibilem, & ita denominaret locatum potentiâ: absolutam alteram, quâ vterque mundus diceretur esse hîc, non relativè ad locum externum, sed absolute.

## §. II. *Quomodo Deus sit in loco, & quæ illius immensitas?*

I. OBSERVATIO. **M**ULTIPLEX est præsentia Dei in rebus; prima est moralis, quâ Deus nobis est præsens, vel per amorem, vnde Sancti dicuntur Deo pleni; vel per certam directionem infallibilem, vt in Ecclesia; vel per assistentiam, & protectionem extrinsecam, juxta illud D. Augustini, circumvolabat me fidelis misericordia; vel per maiestatem, & gloriam, vt in cælis; vel per iustitiam remunerantem, vt in Beatissimis, aut vindicantem, vt in damnatis.

Secunda physica est, vel per potentiam, & operationem, vel per essentiam, sive substantiam; Deus præsens est per potentiam, & operationem, quatenus omnia per potentiam suam attingit, vt causa eorum procreatrix, & per concursum immediat-



tum operatur omnia in omnibus : per essentiam verò , seu substantiam , quatenus non tantum immediatione virtutis , sed etiam immediatione substantiæ præsens est rebus omnibus. Huc adde præsentiam per cognitionem , quâ omnia pervidet ; hîc agitur de præsentia physica , de qua duplex sententia celebrior. Prima , quæ est plurium Philosophorum , docet , Deum ubique esse præsentem per infinitam quandam diffusionem virtualem suæ immensitatis , etiam extra mundum. Secunda , quæ est D. Thomæ , præsentiam Dei physicam colligit ex operatione ipsius , pugnâtque Deum ideo esse immensum , quod sua operatione possit ubique producere quodlibet corpus ; primam sententiam hoc §. stabilio , secundam §. sequenti. Sed antè sit

II. O B S E R V A T I O. Nomine spatii imaginarii , intelligitur vacuitas quædam nullo corpore inlongum , latum , & profundum terminata , in quo convenit cum vacuo , & discrepat ; convenit quidem , quia tum in inani , tum in vacuo est capacitas ad recipiendum corpus , quod indidem abest ; discrepat autem , quod vacuum terminetur superficie corporis alicujus ambientis ; inane verò , seu spatium imaginarium vacuitatem dicat quasi in infinitum protensam : quare spatium imaginarium non dicitur ideo imaginarium , quod sit purum mentis nostræ figmentum ; est enim negativè saltem independenter ab intellectu nostro operâ , comodo , quo sunt negationes ; sed quod illud fingamus instar spatii cujusdam realis infinitè extensi , in quo proinde distinguimus , & designamus partes alias ab aliis diffitas. His observatis , sit

I. A S S E R T I O. Deus est infinitè diffusus extra celos. Probatur 1. ex Scriptura 3. Reg. *Celi ca-*

*lorum te capere non possunt. Iobi 22. An non cogitas, quòd Deus excelsior calo sit, & supra stellarum verticem sublimetur? Accedunt S S. PP. imprimis D. Hilarius lib. 1. de Trin. Deus mundo inest interior, & excedit exterior. D. Greg. 2. Mor. cap. 12. Ipse est intra omnia, extra omnia, infra omnia, supra omnia, extra circumdans, intra penetrans.*

Probatur ratione. 1. Non repugnat Deum esse extra cælos infinitè diffusum, nec ex parte Dei, nec ex parte spatii; non ex parte Dei, quia Deus ibi est actu, ubi potest creare Angelum: Deus potest creare Angelum extra cælos: ergo est actu diffusus extra cælos; non ex parte spatii, tum quia Deus non penderet à spatio, tum quia spatia illa imaginaria, licèt non sint ens formaliter, tamen sunt suo modo negativè; & quemadmodum licèt omnia corpora cælum inter, & terram interjecta destruerentur, tamen Deus verè diceretur esse in illo spatio, quod corpore omni vacuum foret, ita Deus potest dici esse in spatio imaginario: deinde Deum esse in spatiis imaginariis extra mundum, nihil aliud est quàm Deum ita diffusum existere, ut nulla possint creari spatia, quantumcumque magna, quin ipsis de facto sit major, ipsisque correspondere valeat, sine vlla sui nova extensione, & mutatione intrinseca.

Confirmatur 1. Diffusio illa partium virtualium est perfectio aliqua: ergo Deo denegari non debet. Prob. ant. in rebus quantis diffusio corporea est aliqua perfectio, eoque major, quòd pluribus locis præsentes esse possunt: ergo extensio virtualis Deo tribui debet, quia detractis imperfectionibus, quæ extensioni formali insunt, est perfectio melior ipsa, quàm non ipsa. Confirmatur 2. Deus vnam

terram, eamque immotam cum hominibus seruet, aëre, & cælis penitus destructis, utique homines erunt in spatiis imaginariis: ergo à pari Deus.

Porro ut hæc sententia melius stabiliatur, divina immensitas concipienda est, velut diffusio divinæ entitatis vndeque infinita, per quam Deus infinitè excedit limites totius mundi, habetque in se, & ex se quidquid requiritur, ut intimè præsens sit quibuslibet corporibus extra mundum producibilibus.

Item immensitas illa vel sumitur radicaliter; hoc est, prout includit exigentiam, & absolutam necessitatem omnimodæ diffusionis, & ita est perfectio simpliciter simplex: vel sumitur pro actuali immensitate, & sic non est perfectio simpliciter simplex, & essentialis Deo, quia vel sumitur inadæquatè pro qualibet divisibili, & partiali præsentia aptitudinali, respectu spatiorum creabilium, vel adæquatè pro tota illa diffusionem infinita; si primo sensu, non est melior ipsa, quàm altera quælibet; si secundo, illa quoque non convenit Deo semel sumpto, sed infinities veluti replicato; at perfectio simpliciter simplex est, quæ enti, ut vni semel sumpto convenit.

Denique dum Deus dicitur extra cælos, hoc sensu dicitur, quòd Deus extra cælos per se ipsum formaliter habeat situm intrinsecum, & diffusionem suæ substantiæ interminatam, eique æquivalentem, quam concipimus habere spatia imaginaria: vnde cum Deus extra cælos est, non est reipsa in alio, si nullum ei correspondeat corpus, sed in se ipso: sicut si lux diffunderetur infinitè extra cælos, nec ulli corpori responderet, haberet tamen per se formaliter, & in se ipsa extensionem formā-

lem, per quam immobiliter manens, & situ suo intrinseco invariato, responderet intimè corporibus in infinitum producibilibus.

Ex hac sententia ita constituta, quatuor colligi possunt. 1. Immobilitas loci explicari vtrūque potest per ordinem ad partes virtuales immensitatis divinæ. 2. Videtur creatura non posse esse nullibi, quia implicat contradictionem creaturam esse aliquam, quæ non respondeat alicui parti virtuali divinæ immensitatis. 3. Deus est primum spatium, primūque omnium locus, ita vt nihil sit vacuum respectu illius, aut inane; aliàs si vacua corporibus spatia non replet, non haberet quoque suam magnitudinem continuam, sed divisam. 4. Deus non tantum præsens est rebus per potentiam, & operationem, sed etiam per præsentiam substantialem, & coexistentiam suæ entitatis; ita vt si per impossibile Deus non produceret aliquam creaturam, & ea tamen existeret, præsens ipsi foret, non contactu actionis quasi vivo, ac spiranti, sed contractu substantiæ quasi mortuo.

Nec dicas 1. nihil esse extra cælos, in quo possit esse Deus, quia spatia imaginaria nihil sunt: at in nihilo nihil esse potest. 2. rem vnā esse in alia, esse illam ei esse præsentem: at Deus non potest esse actu præsens spatiis imaginariis, quia spatia imaginaria deberent Deo vicissim esse actu præsentia. 3. hanc diffusionem pugnare cum Dei simplicitate, & mente SS. PP. Nam responderetur ad 1. Deum esse in se ipso, non in loco imaginario propriè, seu esse ibi, vbi sunt spatia imaginaria; itaque Deus non est in spatiis imaginariis, tanquam in loco reali, & positivo, sed tanquam in loco imaginario; sicut Angelus, qui esset in hac schola, si destrueretur

aër illius, diceretur esse in vacuo. Ad 2. concedunt illius sententiæ fautores, vacuitatem illam interminatam suo modo esse Deo præsentem, sicut privatio lucis, quæ est de nocte in aëre, est actu præsens aëri, ita vt sit verum dicere, vbi est aër, ibi est privatio lucis; deinde alii respondent subtiliùs negando spatia imaginaria debere esse Deo præsentia, quia præsentia requirit realem vtriusque coexistentiam: at Deus dicitur existere in spatiis istiusmodi duntaxat per sui existentiam, quòd de se totum habeat requisitum, vt coexistat alteri cùm ponetur. Ad 3. esto, magnitudo formalis, quæ propria est corporum, & compositio ex partibus formalibus pugnet cum simplicitate, & incorporeitate Dei, certè magnitudo virtualis, & compositio ex partibus virtualibus non pugnat, quia non tam est compositio, quàm perfectio quædam, quâ Deus præstare potest citra compositionem id omne, quod corpora præstant propter compositionem: vnde immensitas divina cogitanda, vt extensio infinita, penetrabilis sine partibus realiter distinctis, ac separabilibus, quâ Deus non metaphoricè tantùm, extrinsecè, & in obliquo, sed propriè, intrinsecè, & in recto dicatur, & sit verè extensus. Denique S S. P P. pugnant contra eos, qui Deo magnitudinem formalem, non virtualem tribuebant.

§. III. *Affertur altera sententia, & probatur.*

VNICA OB-  
SERVATIO. **O**PERATIO agentis spectari  
potest, vt abstrahit ab operatione creata, vel increata; deinde vt est creata, vel

increata in specie ; hinc

Nascitur triplex quæstio ; prima , an Dei præsentia saltem aliqua , hoc est , secundum virtutem , rectè ex illius operatione inferatur. Secunda , an ex ratione operationis divinæ , ut divina est , bene colligatur ejusdem præsentia , non tantum secundum entitatem , sed etiam secundum substantiam , & quidem per locum intrinsecum , ita ut operatio divina sit medium infallibile , & principium intrinsecum ejusdem præsentia in rebus secundum substantiam. Tertia , an Deus sit actu infinitè diffusus extra cælos.

I. A S S E R T I O. Ex natura operationis , ut sic ; rectè colligitur præsentia Dei in rebus , quas producit , si non suppositi , at saltem virtutis. Prob. Præsentia virtutis , vel suppositi , est aliqua præsentia : ex operatione , ut operatio est , rectè infertur præsentia vel virtutis , vel suppositi ; nullum enim agens agit in distans ex Aristotele 6. Phys. tex. 10. *Movens* , inquit , & *motum debent esse simul* : ergo &c. 2. Omnis actio vel alligatur ad subjectum , ut generatio , accretio , alteratio , & motus localis ; vel non pender à subjecto , ut creatio : utraque requirit præsentiam aliquam agentis cum subjecto , in quod agit : ergo ex natura actionis rectè infertur præsentia aliqua agentis cum re in quam agit. Pr. minor 1. de actione subjecto alligata ; agens , & subjectum se habent , ut actus , & potentia , quia agens continet in se eminenter , vel formaliter actum , ad quem subjectum deducit : at omnis actus perficiens potentiam , sive subjectum , exigit cum eo conjunctionem vel subjecti , vel suppositi , vel virtutis , ut patet in causa formali , & finali ; prima enim debet esse præsens præsentia substantiæ omni-

bus subjecti partibus , quas informat : finalis autem debet esse præsens , saltem objectivè : ergo cùm efficiens sit actus quidam subjecti , id est , actu , & quodammodo subjectum , exigit utique præsentiam aliquam , sicut causa formalis , & finalis ; hinc Aristoteles docet in libris de generat. contactum quemdam requiri inter agens , & patiens ; & 9. Metaph. affirmat actum , & potentiam ex natura rei simul esse. Nec refert quòd causa efficiens sit actus extrinsecus ; nam saltem exigit conjungi modo quodam extrinseco.

Prob. eadem min. de creatione. Cùm enim prima causa creat , tunc ponit extra se , tenetque effectum actu , quem veluti intra se antea continebat potentiâ ; at nihil potest teneri actu , nisi à præsente ; hinc fit , ut dum causa producit effectum , dicatur illum attingere , metaphorâ ductâ à contactu corporis. Deinde effectus non potest prodire à causa physicè , nisi ab ea physicè pendeat , & quidem actu : at dependentia physica , & actualis non potest intelligi , nisi à causa præsente profluat. Idem dixeris de conservatione , quæ est continuata rei productio : omnis autem productio est quædam veluti manutenentia , quâ causa effectum tenet in rerum natura.

I I. A S S E R T I O. Ex natura operationis divinæ , ut divina est , rectè colligitur præsentia Dei in rebus , non tantùm secundùm virtutem , sed etiam secundùm substantiam , & quidem per locum intrinsecum , ita ut valeat hæc consecutio , Deus hîc operatur : ergo hîc est præsens per essentiam , & substantiam. Ita D. Thomas , Caiétanus , & Alensis , &c. Prob. 1. ex D. Paulo , cap. 17. Act. Apost. ubi Deum probat nobis esse præsentem , quia *in ipso*



ipſo vivimus, movemur, & ſumus; item Pſalm. 138. ſi aſcendero in calum, tu illic es; ſi deſcendero in infernum, ades; rationem ſubjungit, etenim illuc manus tua deducet me, & tenebit me dextera tua: ergo ideo Deus erit mihi præſens in cælo, & damnatis in inferno, quia circa ipſos aliquid operabitur. 2. Ex D. Thom. in 1. diſtinct. 37. art. 2. in corpore: *Essentia divina non eſt in creaturis, niſi in quantum illis applicatur per operationem, & ſecundum quod operatur in re, dicitur eſſe in re per præſentiam ſecundum quod oportet operans aliquo modo præſenſe eſſe: & quia operatio non deſerit virtutem divinam, à qua exit, ideo dicitur eſſe in re per potentiam; & quia virtus eſt ipſa eſſentia, ideo conſequitur, ut in re ſit per eſſentiam.* Ex his ſic argumentor: omne agens debet eſſe junctum patienti, conjunctione operationis: conjunctio operationis non eſt ſine conjunctione virtutis, vel ſuppoſiti, ſeu ſubſtantię: at in Deo virtus agendi non diſtinguitur à ſubſtantia: ergo ex operatione Dei, rectè inferitur ejusdem præſentia ſubſtantialis. Prob. 3. efficacius: operatio agentis creati aliquam requirit præſentiam vel virtutis, vel ſubſtantię cum re, in quam agit: ergo operatio agentis increati poſtulat præſentiam perfectiſſimam cum effectu, hoc eſt, cum rebus creatis: at præſentia perfectiſſima duo requirit, nempe ut ſit ſubſtantialis, & intima: ergo utrâque virtute pollet operatio agentis increati.

Confirmatur: Unio præſentię cauſæ cum effectu oritur ex dependentia effectûs à cauſa: ergo quod major erit dependentia, eò erit major unio præſentię: at ſumma eſt dependentia effectûs creati à cauſa increata: ergo ſumma unio præſentię: ergo



substantialis, & intima, hoc est, major, quàm quælibet accidentalis unio, aut substantialis formæ cum subiecto: & verò illam intimitatem cum causis secundis inde habet Deus, quòd sit agens per essentiam, sicut est ens per essentiam: ex quo fit, ut existat peculiari modo, & maximè intimo, sicut ens per essentiam exigit existere in ente participato.

4. Ut Deus habet perfectissimum modum essendi, ita & operandi: at Deus habet esse intimè præsens rebus creatis quibus inest, aliter non haberet modum perfectissimum essendi: ergo ut habeat perfectissimum modum operandi, debet esse intimè præsens rebus creatis, hoc est, præsentia suppositi.

III. A S S E R T I O. Deus non est actu infinitè diffusus per partes virtuales extra cælos. Prob. 1. ex D. Thoma, in 1. dist. 37. q. 2. art. 3. ubi ait immensitatem divinam fundari in aliqua operatione, per quam Deus dicitur esse in rebus: per hoc Deus replet omnia loca, quod dat esse omnibus locatis, quæ replent omnia loca: vnde sic arguo, Deus non est per immensitatem, nisi ubi operatur: Deus non operatur actu extra cælos: ergo non est actu diffusus extra cælos. 2. Per extensionem virtuales destruitur Dei immensitas, cum partes illius immensitatis negantur esse ubique: partes virtuales immensitatis divinæ non essent ubique, quia sicut duæ formæ ubicantes non possunt esse simul, ita nec partes duæ virtuales, quæ duo ubi fundant.

Respondent, partes illas virtuales esse idem realiter, adeoque esse ubique realiter. Contrà: sunt ubique realiter: ergo nemine cogitante, ubi est una pars, ibi est altera: ergo facit idem ubi, quod altera: ergo sic tollitur extensio ab immensitate

divina, quia quæcumque faciunt idem ubi, nemine cogitante, eundem habent locum: ergo non faciunt maiorem extensionem, quàm si vna earum tantummodo esset: unde sequitur partes immensitatis esse tantum instar puncti ante operationem mentis, & in nostra tantum cogitatione residere.

3. Vbi non est fundamentum actu virtualis extensionis, ibi non est actu virtualis extensio; extra cælos non est fundamentum actu virtualis extensionis divinæ, quia fundamentum virtualis extensionis divinæ, est formalis extensio infinita: extra cælos non est infinita formalis extensio, quia daretur infinitum actu in magnitudine: ergo nec virtualis.

4. Nemo potest concipere virtualem extensionem sine corpore formaliter extenso, cui res formaliter extensa, licet indivisibilis realiter, tamen æquivalet.

5. Deum habere partes virtuales, vel est denominatio intrinseca, vel extrinseca; non primum, quia Deus non habet partes virtuales, nisi per respectum ad spatia realia: ergo superest, ut sit denominatio extrinseca petita à corpore extrinseco: ergo Deus non habet partes virtuales infinitas actu, nisi per ordinem ad spatia realia infinita actu.

6. Ducantur ab hoc puncto divinæ immensitatis duæ lineæ ad angulos rectos se intersectantes, quæ in infinitum abeant, sicut ipsa immensitas; hinc sic arguo: inter geminas illas lineas, quæ quadrantem circuli complectuntur, interjacet spatium infinitum clausum terminis, quod manifestam contradictionem implicat. Deinde sequeretur ex eo, quadrantem circuli inter duas lineas interjectum, æqualem esse toti spheræ, aut minorem; si primum, ergo pars erit æqualis toti; si secundum, ergo ille quadrans superabitur

à tota sphæra : ergo finietur : ergo tota quoque divinitatis sphæra finita erit , quia triplò tantùm major erit illo quadrante.

**I V. A S S E R T I O.** Deus est præsens loco per operationem , quatenus locum sibi facit operando , ejusque operatio est ei ratio existendi in loco : hæc assertio sequitur ex dictis. Prob. vel Deus est præsens loco per partes virtuales , vel per operationem ; non per partes virtuales , ut mox probatum est : ergo per operationem. Porro circa operationem Dei in loco quinque pronuntiata accipe.

**I.** Deus non est actu , nisi ubi operatur actu.

**I I.** Deus est ibi virtute , & potentiâ , ubi potest operari ; & ita est extra cælos virtute , & potentiâ.

**I I I.** Deus habet ex vi suæ immensitatis , ut omni loco actuali necessario actu præsens sit absque sui mutatione , quia incipit esse præsens loco per operationem : at per actionem transeuntem agens non mutatur , sed mutat.

**I V.** Fundamentum proximum divinæ immensitatis est operatio Dei externa , quia operatione primum posita , aut sublatâ , ponitur , aut tollitur præsentia divinæ essentiae in rebus : ut ergo fundamentum proximum præsentiae divinæ per scientiam cum rebus , est actus divinæ cognitionis , res omnes cum intellectu divino uniens , & illi objectivè præsentem reddens ; sic operatio externa est fundamentum præsentiae divinæ substantialis proximum.

**V.** Attributum immensitatis distinguitur ab omnipotentia , conceptu inadæquato , quia omnipotentia est virtus faciendi omnia , includens præsentiam substantialem in rebus , quatenus esse infert ; immensitas verò est vis existendi substantialiter in rebus , per operationem omnipotentiae , ut

locorum productricis : itaque immensitas oritur ex omnipotentia , vt ex virtuali causa , & in ea includitur , sicut æternitas habere dicitur pro causa virtuali , divinam immutabilitatem , & in ea includi. Hinc immensitas differt ab omnipotentia , vt minus universale à magis universali ; omnipotentia enim dicit potentiam cuiuslibet rei productricem ; immensitas verò potentiam locorum productricem , sicut æternitas potentiam temporis effectricem.

### §. IV. *Diluuntur objecta.*

**O**BJICES 1. in 2. assert. Si per impossibile Deus non esset mundi conditor , adhuc conciperetur præsens rebus ipsis per essentiam : ergo operatio externa non est fundamentum illius præsentiæ.

Resp. nego ant. Nam ex hypothese quòd tollatur Dei operatio , tollitur unio illius essentiæ cum creatura , quia essentia Dei non est in creatura , nisi quatenus illi applicatur per operationem.

Objicies 2. Non potest probari Dei præsentiæ ex operatione , nisi operatio , vt operatio , requirat præsentiæ Dei priorem naturâ egressu ipsius operationis ab operante : at non prærequirit , vt patet in actione , quâ Deus mundum produxit ; talis enim actio non potuit prærequirere præsentiæ Dei in mundo , cum ab ea mundus fluxerit.

Resp. nego maiorem , quæ vt in creatis agentibus valeat , certè non valuit in Deo creante ; afferunt enim non causam pro causa. Ratio enim allata non est vera ratio , cur Deus præsens sit rebus , sed ista , quòd operatio Dei sit ex natura sua unio

dependentiæ actualis , & physicè patientis ab agente : ergo ubi reperitur patiens , seu effectus à causa patiens , ibi reperitur contactus causæ , & effectus : quare nego ad præsentiam requiri duorum præexistentiam ; sufficit enim coexistentia , quia relata sunt simul naturâ ; hinc cum per operationem res producitur , non prærequiritur præsentia agentis in illa re , sed constituitur illa præsentia per operationem , tanquam per rationem fundandi relationem præsentia ; itaque operatio Dei supponit quidem priorem omnipotentiam , at non supponit præsentiam.

Objicies 3. Prius est esse alicubi , quàm ibi operari : ergo Deus jam est extra cælos , quia ibi potest operari.

Resp. 1. nego ant. Deus enim locum sibi facit per operationem , séque in mundo constituit : quare ante mundum conditum Deus erat nullibi , sed in se , & apud se habitabat , juxta illud :

*Dic ubi nunc esset , cum præteritum nihil esset ?*

*Tunc erat in se se , quoniam sibi sufficit ipse.*

Resp. 2. dist. ant. In rebus corporatis , concedo : in Deo , nego.

Instabis 1. Prius est esse , quàm agere : ergo prius est esse hîc , quàm agere hîc.

Resp. nego consequ. Est enim in hoc enthymemate fallacia accidentis , quia  $\tau\theta$  esse in antecedente sumitur substantialiter , in consequente verò accidentaliter ; nam prius est esse , quàm agere , quia prius est substantia , quàm operatio ; at non est prius esse hîc , quàm agere hîc , respectu Dei , licet sit vera propositio de corporibus. Ratio disparitatis est , quòd corpora sint in loco per contactum molis , & præsentiam ab eorum operatione distin-

etiam, & prærequisitam ad operationem corporis, quia non potest agere ex loco distante; denique retorqueo argumentum: prius est esse corpus, quàm contactum corporis: ergo prius est corpus esse hîc, quàm contactum corporis esse hîc, hæc conclusio falsa est ex adversariis fatentibus, corpus esse hîc per contactum.

Instabis 2. Si Deus per operationem rebus est præsens, nullibi erat ante mundum conditum: at quod nullibi est, nullo modo videtur esse, nisi sit ipse primus locus, & primum spatium, atque ita existat in se ipso: ergo cùm Deus ante mundum conditum, non esset nihil, nec esset in aliquo à se distincto, dicendus est ante mundum fuisse in se ipso, adeoque esse primus locus, & primum spatium, in quo omnia erant futura: at non potuit esse primus locus, nisi aliquam habeat extensionem: ergo &c.

Resp. dist. Deus ante mundum conditum nullibi erat, id est, non erat alicubi positivè, concedo: non erat in se ipso, subdistinguo: positivè, concedo: negativè, nego; porro cùm Deus dicitur esse in se ipso, illud explicatur negativè, id est, non est in vlla creatura, sicut dicitur esse à se, id est, à nulla causa. Ad minorem, vera tantùm est de iis rebus quæ sunt propriè in loco, cujusmodi sunt corpora, non de iis, quæ sunt tantùm in loco improprie, vt Deus.

Objicies 4. Si daretur creata causa infinita, posset operari in remotum spatium, seu distans: ergo & Deus.

Resp. 1. nego antec. 2. Dato antecedente, nego consequentiam; cùm enim Deus sit ens perfectissimum, sibi quoque vindicat modum operandi

divinum : ergo requirit præsentiam suppositi , non tantum virtutis.

Instabis : Præsentia causæ creatæ ad passum ex ejus limitatione oritur.

Resp. transeat. Quid inde ? ergo Deus , in-  
quiunt , utpote illimitatus non requirit præsen-  
tiam , ut agat , nego conseq. Agens se habet ad ef-  
fectum , ut perfectivum ad perfectibile , adeoque  
requirit unionem vel virtutis , vel suppositi : unde  
cum Deus sit agens perfectissimum , requirit præ-  
sentiam perfectissimam , hoc est , suppositi.

Objicies 5. in 3. assert. Ex Concilio Ephesino , di-  
vina natura est omni termino , & loco etiam ima-  
ginario superior : ergo Deus est in spatiis imagi-  
nariis.

Resp. dist. ant. Superior virtute , & potentiâ ,  
concedo : actu diffusionis , nego ; nempe Deus est  
potentiâ in spatiis imaginariis , quia potest ex se  
correspondere cuilibet corpori creabili in illis spa-  
tiis , & sibi in iisdem locum facere per operatio-  
nem.

Objicies 6. Cum Deus aliquid novi produceret  
extra cælos , esset ubi antea non erat : ergo muta-  
retur.

Resp. dist. ant. Ubi antea non erat , acquirendo  
extensionem , nego : exercendo operationem ,  
concedo ; at agens operando non mutatur : itaque  
hic corrigenda est idololatria nostræ imaginatio-  
nis , ut vocat Augustinus , hoc est , usus phantas-  
matum , quibus trinam Deo dimensionem tribui-  
mus.

Instabis 1. Ut unum coexistat alteri extenso , de-  
bet extendi : Deus rebus extensis coexistit : ergo  
&c.



Resp. dist. majorem : Vt coexistat per contactum molis , concedo : per contactum virtutis , nego ; at Deus non coexistit per contactum molis , sed virtutis.

Instabis 2. Præsentia divina non est indivisibilis : ergo plus quàm puncto responderet : ergo coextenderetur.

Resp. dist. ant. Non est indivisibilis extrinsecè , concedo : intrinsecè , nego ; denominatur enim extrinsecè diffusa , non diffusionem sui , sed effectûs , ob relationem effectûs cum virtute causæ producentis.

Instabis 3. Ergo Deus instar puncti fingendus.

Resp. Nec instar puncti , nec instar corporis fingendus est , quia punctum est initium lineæ , & corpus trinè dimensum ; sed vt mens , vt voluntas , præsertim autem vt omnipotentia , quæ per suam operationem apta est intimè præsens esse rebus.

Objicies 7. Deus saltem loco moveretur , si mundus in inani moveretur.

Resp. nego sequelam , sed tantùm alio , atque alio loco mundum conservaret.

Instabis 1. Saltem moveretur per accidens , sicut anima ad motum corporis.

Resp. nego paritatem , quia Deus non est loco circumscriptus , sicut anima , aut Angelus , sed extra omnem locum assignabilem potest Deus existere per potentiam : at quicumque extra locum est , locum deferere non potest : ergo nec moveri ; moveri enim est deferere locum vnum , & alium acquirere.

Instabis 2. Non potest explicari , quomodo Deus sit extra mundum per potentiam.

Resp. vt concipias , non ipsa vis imaginandi , sed pura mentis acies in subsidium vocanda , quæ re-



præsentet tibi omnipotentiam Dei, ut causam in actu primo, aptam per se efficere alium, atque alium mundum: ergo quæ virtute sua exuperet, excedâtque istiusmodi effectum: sic dicimus objectum excedere intellectum, dum ex parte attingitur ab intellectu; prædicatum latius patere subiecto, cum univ ersalius est: ergo à pari causa dici potest esse extra effectum suum, cum non exierit conatum suæ virtuti adæquatum, hoc est, retinet aliquid actûs primi, quod effectui non impendit, adeoque est extra terminos effectûs.

Hinc explicabis Aristotelem, dum ait intelligentiam esse super extremum cælum, nempe virtute, & potentiâ, quatenus prima intelligentia potest operari etiam extra cælum, aut si accipis de Angelis, dices cum D. Thoma lect. 21. hoc sensu intelligentias esse supra cælum, quia phycas mutationes à cælo non patiuntur, sicut corpora inferiora.

Objicies 8. Creentur duo mundi à se longius distiti; tunc Deus erit in utroque: ergo dividetur localiter à se ipso.

Resp. nego consequ. Non enim dividitur localiter à se ipso, qui in omni loco existit, & extra omnem locum est majestate potentia.

Instabis 1. Quod est præsens utrique mundo, & non existens in medio, dividitur à se ipso.

Resp. dist. Si sit medium, concedo: si non sit, nego; at supponitur non esse medium inter utrumque mundum: quare sequitur tantum operationem Dei transeuntem esse divisam, non Deum.

Instabis 2. Ergo Deus non erit incircumscriptus, quia non magis extendetur, quam mundus.

Resp. dist. Secundum actionem transeuntem,

esto, secundum substantiam, nego; non enim Deus mundo circumscribitur, sed ejus operatio.

Objicies 9. Ut se habet æternitas ad omnia tempora, ita immensitas ad omnia spatia: Deus est extra omnia tempora per virtualement extensionem æternitatis: ergo est extra omnia loca per extensionem virtualement immensitatis.

Resp. nego minorem, sed est extra omnia tempora per indivisibilem prorsus, & immutabilem naturam, prout est productrix omnium temporum; ut ergo æternitas non habet partes fluentes virtualiter distinctas; ita nec immensitas habet partes stabiles virtualiter distinctas.

Objicies 10. Deus in Scripturis dicitur excelsior cælis.

Resp. distingo potentiâ, & virtute, quæ possit se præsentem facere novis semper in infinitum spatiis creatis, ipsa producendo, concedo: actu diffusionis virtualis, nego; hinc D. Cyrillus in Thesauro, lib. 6. *Deus est omnium locus non corporeo modo, sed tanquam opifex.* Et S. Fulgentius lib. de fide ad Petrum, cap. 9. *Firmissimè tene, & nullatenus dubites Deum esse immensum, virtute, non mole.*

Instabis 1. August. 7. Confess. ait se concipere Deum instar maris, quod spongiam in se immersam ita penetrat, ut circumfluat.

Resp. Se ipsum explicat lib. 2. de serm. Dom. in monte, c. 5. *Vbiq; præsens est, non locorum spatiis, sed majestate potentia.* Deinde in libris Confess. suos refert errores, dum esset in hæresi Manichæorum, & postmodum subjungit: *Hæc cogitabam, & errabam;* en claram solutionem. Confirmatur ex epist. 57. ad Dardanum, cujus argumentum est,

quomodo Deus ubique sit ; sic enim respondet ; ubique scilicet , nusquam est absens , in se ipso autem , quia non continetur ab iis , quibus sit præsens , tanquam sine eis esse non possit. Tum hortatur Dardanum sub finem epistolæ , cum de immensitate divina cogitat , ne Deum cogitet cum aliqua diffusionemolis : Averte , inquit ; mentem ab omnibus imaginibus corporis , quas humana cogitatio volvere consuevit ; subinde causam reddit : *Non sic sapientia , non sic iustitia , non sic denique charitas cogitatur.*

Objicies II. Supponamus per impossibile , Deum desinere operari in hac schola , eamque conservare ; tunc non destruetur Dei immensitas , quia attributum absolutum potest intelligi non intellectu operatione ; at immensitas est attributum absolutum.

Resp. dist. minorem : Est attributum absolutum respectivè ad perfectiones personales , esto : ad operationes externas , nego ; est enim relativa aliqua tenus ad extrà , si non relatione sui , saltem relatione operationis , quia immensitas Dei constituitur per omnipotentiam , prout ad majora , & majora corpora se extendit : quare destruitur per illam hypothese immensitas Dei formaliter , & consequenter ipse Deus. At ubi Deus erat ante mundum ? Respondet Tertullianus ad Praxeam : *Ante omnia erat solus ipse sibi mundus , & locus.* Respondet August. in illud Psalm. *Qui habitas in cælo , In se habitabat , & apud se erat Deus :* dicitur tamen Deus primus locus rerum omnium , sed metaphoricè , quia sicut in loco naturali res omnes conservantur , & quiescunt ; sic in Deo , id est , Dei virtute omnia conservantur , & æternantur.

Obijcies 12. Si Deus non est præsens corporibus per suam substantiam, est ab iisdem absens per suam substantiam: consequens Scripturæ repugnat passim inculcanti non longè abesse ab vnoquoque nostrum, in ipso nos vivere, moveri; & probatur sequela, quod non est præsens alicui, necessariò est absens, seu distans ab eo, quia distantia est carentia præsentia.

Resp. nego sequelam; nec enim Deus per suam substantiam præcisè est præsens, aut absens à corporibus, quia hæc prædicata conveniunt tantum iis rebus, quæ sunt propriè in loco; at Deus non est propriè in loco: sic Angelus nec est similis in colore, aut dissimilis corpori colorato; aut certè si Deus dicitur absens, negativè dicitur absens, non privativè, id est, non habet præsentiam, cuius non est capax; Deo enim convenit tantum præsentia metaphorica, & per operationem, non propriè dicta, & per diffusionem virtualem.

#### §. V. De loco spirituum creatorum.

**D**VPLEX est de loco spiritus creati celebrior sententia in scholis. Prima docet esse in loco per substantiam affectam ubi interno, vi cuius coexistit spatio extenso, adeoque per diffusionem quandam virtualem. Secunda, quæ tribuitur D. Thomæ, pugnat esse in loco per operationem: v.g. animam rationalem esse in loco, quatenus habet habitudinem ad corpus, quod informat, & in quod agit; Angelum esse in loco per ordinem ad passum, in quod agit, putà cum Angelus movet solem, dicitur esse in loco per motum, quem soli imprimit.

Prima nititur his rationibus. 1. non potest explicari, quid Angelus in cælo empyreo ad extrâ operetur, quid legio dæmonum in corporibus obsessis. 2. dum Angelus in cælum ascendit, debet esse in loco per successivam operationem: itaque, dum cælum empyreum attinget, debet quidpiam agere in ipsum, etiam quâ parte solidum est; ecquid autem agit? motum producit, inquis: at immobile est: ergo movere ipsum non potest: ergo superest ut Angelus sit in loco per ubi internum definitivum; posito enim ubi interno, & affigente ipsum huic scholæ, intelligitur præsens huic scholæ.

Dices 1. Ut Angelus sit in loco, requiritur contactus: at Angelus non tangit locum per ubi internum: ergo non est in loco per ubi internum. 2. Deus est in loco per operationem: ergo & Angelus. 3. Ubi Angelicum vel haberet partes formales, vel virtuales: neutrum dici potest: ergo &c.

Ad 1. dist. Requiritur contactus propriè dictus, nego: metaphoricus, & analogicus, concedo; deinde non opus est ut Angelus tangat locum per ubi internum, sed sufficit quod per illud constituatur formaliter in loco; & verò duæ quantitates, quæ se tangunt per suas ultimas superficies, sunt in loco per suas vbicationes.

Ad 2. negatur paritas; Deus enim non est in loco per operationem per se, sed tantum per accidens, quatenus mundus indiget operatione Dei ad sui procreationem, conservationemque.

Ad 3. sufficit ubi Angelicum habere partes virtuales, tum quia non est de conceptu primario rei spiritalis habere partes integrantes, & extensivas: tum quia modus sequitur naturam rei modificatæ: at spiritus est indivisibilis realiter: ergo & illius vbicatio definitiva.

Secunda sententia stabilitur his argumentis. 1. si spiritus per virtuales diffusionem esset in loco, deberet Angelus v. g. dici longus, latus, & profundus; quia quod coextenditur longo, lato, & profundo, idem sit tale oportet: at Angelus coextenderetur longo, lato, & profundo: ergo &c. sed respondetur sufficere extensionem virtuales, non formalem requiri. 2. Non posset intelligi continuatio extensionis Angeli, nisi intelligeretur replicari substantia Angeli, perinde ac intelligerentur replicari puncta in quovis indivisibili spatii, & ita responderet loco extenso: at hoc fieri non potest, quia quælibet replicatio punctorum non facit extensionem, nec punctum additum puncto facit majus. Respondetur, negando paritatem, quia puncta, si mathematica sint, nec habent partes reales, nec virtuales; Angelus autem, quamvis realiter sit indivisibilis, & uniusmodi, tamen virtualiter dividiuus est, ac multiplex.

Ex hac doctrina quatuor inferuntur, 1. dari potest substantia creata spiritalis, quæ nullibi sit, ex hypothesi quod non operetur: 2. Angeli sunt in cælo per productionem alicujus qualitatis luminosæ, quæ ad illorum ornatum conferat, sicut dæmones sunt in inferis per contactum passivum quo patiuntur ab igne, aut ab alio corpore affligente. 3. moveri dicitur spiritus successivè in loco per actionem successivam, quam exerit in corpora vicina, adeoque est impropriè, & per accidens in loco, sicut movetur impropriè, & per accidens. 4. anima rationalis est præsens corpori per operationem, idemque est animam informare corpus, atque operari in corpore, juxta illud Platonis docentis, animam rationalem non aliter esse præsentem corpori, quàm

aurigam currui, aut vectorem navi, quibus verbis hic subest sensus, ut auriga non est in curru, nisi ad eum agitandum, sic anima non inest corpori, nisi in eo agendo quidpiam.

#### A R T I C V L V S I V.

##### *De corporibus in vno, aut pluribus locis.*

**V**T locus idem potest spectari in ordine ad plura corpora, sic idem corpus in ordine ad plura loca, in quibus replicetur; hinc nata duplex quaestio; prima quidem, quomodo fiat corporum penetratio in eodem loco; secunda verò, an idem corpus replicari possit, & esse simul in diversis locis.

##### *§. I. De penetratione corporum.*

**V**NICA O-B-DUPLEX est penetratio corporum; altera per modum potentiae, quae dicitur penetrabilitas; altera per modum actus, quae penetrationis nomen retinet: primam negat impenetrabilitas, secundam, impenetratio; sed ut facilius intelligatur, quid sit penetratio, videndum antè quid sit, quantitatem esse impenetratam.

**I. A S S E R T I O.** Quantitas non est formaliter se ipsa impenetrata. Prob. quia alias ne divinitus quidem penetrari posset, quod enim se ipso tale est, aliter esse non potest.

**II. A S S E R T I O.** Quantitas non fit impenetrata per positivum influxum, quo una quantitas aliam efficienter ab vno loco expellat. Prob. quia quanti-



tas ex se non est activa. 2. nulla est necessitas illius entitatis distinguendæ. 3. ea dote carerent corpora gloriosa, quæ tamen juxta Theologos proprietates sibi connaturales non amittunt.

III. **ASSERTIO.** Quantitas redditur formaliter impenetrata per negationem penetrationis, quam postulat ex natura sua, ita D. Lugo disp. 5. de sacram. Euchar. num. 10. & Arriaga in Physic. disp. 14.

Prob. 1. Quantitas sufficienter concipitur impenetrata per negationem penetrationis, seu existentia alterius corporis in eodem loco, quem occupat, sicut intellectus sufficienter intelligitur incapax videndi Deum per negationem capacitatis. Ratio à priori est, quòd in omnibus formis oppositis effectus secundarii, & expulsio formæ oppositæ, sæpè non distinguantur à negatione illius formæ: sic expulsio caloris à frigore, est formalis negatio caloris in subiecto frigido, quæ tollitur per introductionem caloris in idem subiectum, in quo erat frigus. 2. Si per aliud redderetur formaliter impenetrata quantitas, maximè per vbi circumscriptivum: at illud non sufficit, quia manente eadem quantitate, & eodem vbi circumscriptivo, Deus potest aliud corpus in eodem loco constituere, & ita fiet penetratio; non enim amittunt vocationes circumscriptivas corpora quæ penetrantur, quia alicubi existunt, utpote extra causas posita.

IV. **ASSERTIO.** Impenetratio actualis est immediate in quantitate extensa per vbi circumscriptivum: ita Suares Lusit. & Compt. Prob. 1. negatio frigoris in aqua calida non recipitur immediate in calore, sed in aqua, licet beneficio caloris adveniat: ergo à pari negatio penetrationis recipitur



immediatè in quantitate , licèt ratione vbi circumscriptivi quantitati accidat.

2. Quælibet privatio recipitur immediatè in eo , quod formam oppositam recipit , vt patet inductione per omnia privationum genera : at quantitas per suum vbi extensa , recipit formam negatam sive penetrationem , non verò ipsum vbi. Ratio est, quòd solæ quantitates propriè penetrantur , non autem ipsa vbi , quæ licèt simul existant in eodem loco , non dicuntur tamen propriè se penetrare ; non enim duorum quorumlibet coexistentia in loco dicitur penetratio , aliter cum Deo diceremur esse penetrativè , & quantitas cum substantia corporea , cum qua est in eodem loco.

Colliges ex dictis , vt duo corpora penetrantur , non opus esse , vt aliquid positivum ab illis tollatur , sed satis esse , si tollatur negatio penetrationis.

Objicies 1. Per id quantitas fit formaliter impenetrata , per quod locum formaliter occupat : at formaliter locum occupat per vbi circumscriptivum.

Resp. nego maj. Nam occupare locum , & esse impenetratum , sunt duo effectus formaliter diversi , qui proinde diversas causas formales exigunt ; primus oritur ab vbi circumscriptivo , secundus à negatione penetrationis.

Instabis 1. Vbi circumscriptivum quantitatis distinguitur essentialiter ab vbi circumscriptivo materiæ : at non est aliud discrimen , quàm quod vbi circumscriptivum quantitatis aliud corpus expellit : ergo.

Resp. nego minorem , & aliud discrimen affero , quòd nempe vbi quantitatis occupet locum , exi-

gendo proximè impenetrationem ; vbi verò materiæ remotè tantùm exigat ; hinc impenetratio oritur ab vbi quantitatis , vt à conditione , sine qua non debetur proximè quantitati.

Instabis 2. Substantia non fit independens à subiecto inhæſionis per negationem : ergo nec quantitas penetrata per negationem.

Resp. nego conſeq. Aliud enim eſt negatio phyſica , aliud negatio logica : quæ fundant negationem logicam , denominantur talia per ſuam eſſentiam , vt incorporeum : quæ autem fundant phyſicam , non ſunt talia per eſſentiam : at ſubſtantiæ independentia à ſubiecto inhæſionis eſt negatio logica , phyſica verò impenetratio.

Instabis 3. Impenetratio eſt potentia ad reſiſtendum penetrationi : ergo conſiſtit in aliquo poſitivo.

Resp. nego ant. Sola enim impenetrabilitas eſt potentia ad reſiſtendum , non poſitivè quidem , ſed tantùm negativè.

Objicies 2. Impenetratio debet fundari in eo immediatè , per quod quantitas occupat locum , penetrationi reſiſtendo ; id autem præſtat per vbi circumſcriptivum : ergo ſecluſo vbi circumſcriptivo tollitur reſiſtentia.

Resp. nego maj. Sed in eo proximè fundatur per quod recipit penetrationem , nempe in quantitate , licèt requirat vbi circumſcriptivum , vt conditionem , ad fundandam impenetrationem , ſicut calor eſt conditio , ſine qua non datur in aqua negatio frigoris , & tamen negatio frigoris non recipitur immediatè in calore , ſed in aqua.

Instabis : Impenetratio fundatur immediatè in eſſentia quantiratis , vt eſt negatio , ſed negatio

immediatè fundata in essentia, non potest ab illa divinitus separari : v. g. negatio lapidis fundata immediatè in essentia Socratis à Socrate : ergo &c.

Resp. dist. min. si logica sit, concedo : si physica, nego ; duplex quippe negationis species in essentia fundatæ ; prima negat formam, quæ non potest advenire subjecto, quin ejus essentiam, aut proprietatem logicam destruat ; secunda non negat ipsam formam essentiæ logicæ peremptricem subjecti, sed tantum essentiæ physicæ delettricem : prima divinitus tolli nequit, secunda potest : sic negatio informari, quæ esset divinitus in materia conservata absque forma, fundaretur immediatè in ipsa essentia ipsius materiæ physica, possetque ab ea separari.

### §. II. *Quomodo fiat penetratio corporum.*

I. OBSERVATIO. PÉNÉTRATIO est duorum corporum quantorum in vno proprio, & adæquato simplici loco simul positio. Dixi corporum quantorum, quia penetratio non est propria substantiarum, sed quantitatum, ut patet in sanctissimo Eucharistiæ sacramento, in quo solæ quantitates panis, & vini remanent, séque extrudunt ab eodem subjecto.

II. OBSERVATIO. Duplex penetratio ; lata, & stricta ; lata est corporis tenuioris insinuatio in poros, & insensibiles meatus alterius corporis crassioris, & sensibilibioris : sic aqua penetrat spongiam, & aër corpora nostra. Secunda est duorum corporum secundum totam soliditatem, & substantiam, mutua præsentia in vno loco : de secunda hæc disputatur, non de prima.

I. A S S E R T I O. Penetratio strictè sumpta non potest dari naturaliter. Ita Aristoteles 4. Phys. tex. 26. & 1. de anima, tex. 69. ubi probat lumen non esse corpus, quia totum aërem pervadit, & repugnat duo corpora simul esse in eodem loco. Prob. 2. experienciâ: nullum corpus, licet magno impetu in aliud incurrat, ipsum tamen penetrare potest: ergo non potest dari penetratio naturaliter. Ratio est, quia quantitas ex se naturâque suâ est repletiva loci, adeoque aliud corpus ab eodem loco, in quo est, rejicit, non efficienter quidem, quia quantitas non est actiosa, sed per naturalem incompossibilitatem. 3. Nullum corpus naturaliter potest esse in duobus locis: ergo nec duo corpora in eodem loco.

Objicies 1. In ferro candenti, ignis penetrativè ponitur cum ferro, 2. panis in aquam injectus penetrat aquam, 3. dum in scyphum cineribus plenum aqua infunditur, aquam simul capit, & cineres, 4. si nummos aureos in aquam vase conclusam superinfundas, nihil supereffluit.

Resp. 1. talibus experimentis probari tantum popularem, & imperfectam penetrationem; corpora quippe vndeunque porosa sunt: quare ad 1. resp. intra poros ferri substantiam ignis intromitti. Ad 2. aquam simul cum cineribus idcirco ab eodem vase capi, tum quia magis comprimuntur partes crassiores cineris, & evolant tenuiores: tum quia aqua in poros cinerum se insinuat. Ad 3. injectis nummis ipsam aquam sua gravitate comprimi, & addensari, aut saltem intumescere, tantumque per tumorem occupare loci, quantum cessit in fundo. Porro non effluunt partes aquæ, quia inter se amant unionem, fugiuntque accitatem labrorum,

Et verò si labra ipsa madefacias , effluet statim aqua , injectis nummis.

Instabis 1. Virtus , quâ duo corpora resistunt corpori , est finita : ergo potest superari ab vno Angelo , aut à pluribus simul.

Resp. dist. Est finita in entitate , concedo : in modo , nego ; certè restitutio visûs est finita in entitate , nec ideo potest fieri ab Angelo , quia supernaturalis est in modo ; at omne supernaturale excedit naturam totius vniversi , Angelus autem est pars vniversi.

II. ASSERTIO. Perfecta penetratio potest dari supernaturaliter ; hæc assertio est contra Durand. in 4. q. 6. Pr. 1. quia nulla est contradictio , 2. duæ partes vnus corporis possunt esse simul in eodem loco , vt patet in sanctissimo Eucharistiæ sacramento : ergo etiam duæ quantitates totales simul esse possunt in eodem loco. 3. Deus potest impedire effectum formalem secundarium formæ physicæ , vt patet in contrariis ; sed impenetratio est effectus secundarius quantitatis : ergo potest diuinitus impediri. Certè non est de essentia quantitatis , quòd actu repleat locum , & corpus aliud excludat , sed quòd loci repletiva sit , cui tanquam naturalis proprietas , & physica adiungitur expulsio alterius corporis , quæ à Deo perinde tolli potest , atque repletio actualis.

Confirmatur ex Script. & Theol. 1. exemplo Christi , qui Matris vterum penetravit sine divisione , sicut radius crySTALLUM penetrat ; non enim ab extremo ad extremum sine medio transiit , quia Christi nativitas propriè dicit egressum ex vtero Matris ; at transitus ab extremo ad extremum , non est propriè egressus , sed instantanea mutatio. 2. Ingressus est ad discipulos , januis clausis , prodiit-

que è sepulcro non per poros, angustosque meatus; quomodo enim corpus iuxta mensuræ, ita se in angustum adducere potuisset, ut per ejusmodi angustias irreperet? ergo penetrando lapidem sepulcri.

Objicies 1. Si duo corpora se penetrarent, una materia haberet duas formas, unum accidens esset in duobus subjectis.

Resp. nego sequelam, quia quælibet forma ei tantum materiæ inhæret, cui unitur ut forma.

Instabis: Saltem duæ animæ spirituales se penetrarent in eodem corpore.

Resp. nego propriè se penetrare, quia penetratio est corporum quantorum, non spirituum; deinde si duæ animæ ponantur penetrativè in eadem materia, una per modum unionis eidem alligabitur, non altera.

Objicies 2. Duæ partes quantitatis successivæ, v. g. duæ horæ ejusdem diei, etiam divinitus, non possunt esse simul: ergo nec duæ partes quantitatis permanentis.

Respondeo disparitatem esse, quia successiva non possunt esse simul permanentes, secus autem est de rebus permanentibus.

Objicies 3. Implicat quantitatem non habere effectum suum formalem: impenetratio est effectus formalis quantitatis: ergo &c.

Resp. dist. majorem: Primarium, concedo: secundarium, nego; at negatio penetrationis, per quam quantitas est formaliter impenetrata, est effectus secundarius, quem licet naturaliter quantitas exigat, cum tamen non removeat formam destructivam illius essentiae logicæ, aut proprietatis, divinitus auferri non repugnat.

**III. ASSERTIO.** Ut duo corpora, aut duæ partes quantitatis sint penetrativè, non opus est alterutrum amittere naturalem extensionem, sed satis est si alterutrum donetur supernaturali extensione, non repugnante cum extensione naturali alterius corporis in eodem loco.

Prob. quia extensio corporis vnius circumscriptiva non pugnat necessariò cum qualibet extensione circumscriptiva alterius quantitatis etiam supernaturali, sed tantùm cum extensione naturali: ergo si corpus vnum donetur extensione supernaturali, poterit aliud corpus secum admittere; hinc corpora Beatorum, quæ beneficio subtilitatis suæ, partes singulas inter se penetrativè, aut cum aliis corporibus ponere possunt, videntur eâ dote ornata, quæ sit productrix extensionis supernaturalis in loco, in quo est alia quantitas extensa, & quæ etiam partes ejusdem corporis sui intra se invicem ponere possit.

*§. III. De eodem corpore in pluribus locis posito.*

**I. OBSERVATIO.** **I**DEM corpus potest esse in loco vel **VATIO.** circumscriptivè, vel definitivè; hinc duplex quæstio. Prima, an idem corpus possit esse in duobus locis, in vno definitivè, in altero circumscriptivè. Secunda, an in utroque simul definitivè, aut simul circumscriptivè.

**II. OBSERVATIO.** Non est hîc quæstio de locis communibus, & inadæquatis, sed adæquatis, & propriis; nemo enim dubitat corpus idem posse esse cum alio in schola.

**I. ASSERTIO.** Idem corpus non potest esse  
eodem



eodem tempore, in duobus locis adæquatis naturaliter. Prob. experiētiā; corpora enim se ab eodem loco semper expellunt.

I I. A S S E R T I O. Idem corpus potest divinitus esse in vno loco circumscriptivè, & in altero definitivè. Prob. dogma fidei est contra Calvinum, corpus Christi esse in cælo circumscriptivè, & sub speciebus Eucharisticis definitivè: ergo idem corpus potest esse in vno loco circumscriptivè, & ut contentum locale, & in altero definitivè, & ut contentum substantiale, existens totum in qualibet parte.

I I I. A S S E R T I O. Idem corpus potest esse divinitus in duobus locis definitivè. Prob. Christus est realiter præsens speciebus consecratis per ubi definitivum: at species consecratae sunt in diversis altaribus: ergo idem corpus potest esse simul definitivè in pluribus locis.

I V. A S S E R T I O. Idem corpus potest esse divinitus in duobus locis adæquatis circumscriptivè. Probatur 1. quia non implicat contradictionem: 2. Idem corpus potest esse in vno loco circumscriptivè, in altero definitivè: ergo & in multis circumscriptivè; non enim magis repugnat idem corpus poni in duobus locis extensè, quàm inextensè; immò majus est miraculum poni inextensè, quàm extensè, & modo sibi connaturali: at fides docet corpus Christi simul esse in multis locis inextensè: ergo potest simul esse extensè, & circumscriptivè. 3. Non magis repugnat idem corpus duobus in locis poni circumscriptivè, quàm duo corpora extensa esse in eodem simul loco: at duo corpora extensa possunt divinitus poni in eodem loco: ergo &c. 4. Quia non sequitur idem esse,



& non esse, sed tantum idem multis simul locis comprehendi, seu habere diversa ubi circumscriptiva; satis enim est, quod Deus det rei replicatae alterum ubi specie diversum, nec opus est actione aliquâ, per quam res substantialiter producat. Certè res eadem potest nativis suis viribus se in multis locis successivè absque vlla productione suæ substantiæ constituere, productio duntaxat altero ubi à priori diverso: ergo Deus potest simul dare diversa ubi eidem substantiæ, quæ creatura potest sibi dare successivè; quo in casu actio productiva illius ubi, non reproductiva, sed adductiva erit, quâ res eadem adducetur, & quasi extendetur ad alterum locum. Iuxta hanc doctrinam corpus in duobus locis positum conservatur per unicam conservationem substantialem, quia nihil substantiale producit: ubicatio autem quælibet per actionem novam conservatricem servatur.

### §. I V. *Diluantur objecta.*

**O**BJECTIONES I. Si idem corpus posset esse circumscriptivè in pluribus locis, idem corpus simul esset in loco, & non esset.

Resp. nego sequelam, sed tantum idem corpus multoties existeret in variis locis.

Instabis I. Idem esset unum, & non unum; nam corpus quod est à se ipso divisum, non est unum, quia unum debet esse indivisum.

Respondeo distingo: Idem esset unum, & non unum, diverso respectu, concedo: eodem respectu, nego. Ad probationem, dist. quod est divisum à se secundum locum, & non est secundum substantiam, est divisum localiter, concedo: en-

titativè, nego; at corpus esset divisum tantùm ratione loci; non entitatis, & substantiæ; nempe per replicationem corpus fit quasi virtualiter, & æquivalenter multiplex per ordinem ad locum, licèt idem sit entitativè; quia idem præstat quoad multiplicationem in loco, ac si foret realiter, & formaliter multiplex: itaque est vnum substantialiter, & non vnum localiter.

Instabis 2. Quod est Romæ, substantialiter divisum est ab eo, quod est Parisiis: corpus degens Parisiis potest Romæ replicari: ergo corpus Romæ replicatum dividetur substantialiter à se ipso, vt erit Parisiis.

Resp. dist. maj. Quod est Romæ, divisum est substantialiter, si aliud sit substantialiter, concedo: si sit idem substantialiter, nego: porrò idem est planè corpus substantialiter, quod est Romæ, & Parisiis, licèt ratione loci, dicatur divisum localiter.

Instabis 3. Corpus circumscriptivè replicatum esset æquale locato, & non esset; esset, vt supponitur, quia circumscriberetur; non esset autem, quia esset aliquid locati extra locum.

Resp. dist. Esset aliquid locati extra locum, si replicatum sit, concedo: si non sit replicatum, nego; habet autem vi replicationis, vt non tantùm primo loco circumscribatur, comprehendaturque, sed alio etiam loco terminetur.

Instabis 4. Esse circumscriptivè in loco dicit non esse alibi.

Resp. nego; sed dicit tantùm corpus circumscribi, vel ambiri, seu terminari hîc, quatenus est hîc per talem ubicationem, quod non excludit alibi circumscribi, & terminari posse idem corpus, qua-

tenus ibi est per aliam vocationem.

Instabis 5. Saltem locus esset major re locatâ.

Resp. dist. Non replicatâ, concedo : replicatâ, nego ; rei enim locatæ respondebit locus major, & major, prout replicabitur in hoc, aut in isto loco.

Objicies 2. Res eadem non potest simul esse in diversis temporis partibus : ergo nec in diversis locis.

Resp. disparitatem esse, quod tempus sit essentialiter successivum, ac proinde duo diversa tempora simul esse non possint, saltem permanenter : at duo loca simul tempore existere nihil vetat.

Objicies 3. Sequeretur saltem duo loca esse simul, quod absurdum est. Prob. ea sunt simul, & vnum inter se, quæ vni tertio sunt eadem : at essent eadem vni tertio, hoc est, simul cum corpore replicato : ergo essent simul & vnum.

Resp. dist. maj. Quæ sunt simul præsentia vni tertio adæquatè sumpto, concedo : inadæquatè sumpto, nego ; locus enim Parisinus esset præsens corpori habenti vocationem Parisinam, Romanus autem habenti vocationem Romanam, adeoque duobus æquivalenti.

Colliges, Deum posse corpus constituere in locis diversis, producendo in eo diversas vocationes per actionem aliquam accidentalem, quæ ad diversum vbi terminetur, unde illa actio non est propriè nova productio substantialis, sed mera replicatio ; ut enim qui transit à loco ad locum, non producit se substantialiter, in eo loco ; ita dum corpus ab vno loco ad alterum transit, non relinquendo priorem, & diversa loca divinitus occupat, non producit substantialiter, quia non sunt diversæ productiones substantiales, sed accidentales tantum.

per quas variz vicationes in eo producantur. Sic Christum volunt Theologi non tam produci substantialiter in Eucharistia, quàm in ea poni per novum vbi sacramentale, quod antea non habebat, quod tamen non impedit, quominus illa actio, quâ Christus sub speciebus panis ponitur, transsubstantiatio, transmutatio, & conversio dicatur, quia ad id sufficit, quòd substantia corporis Christi in locum alterius substantiæ prorsus desinentis succedat; itaque Christi corpus dicitur produci, non simpliciter quidem, & de novo, sed produci sub speciebus, quatenus corpus Christi vnitum speciebus, facit aliquòd totum sacramentale, dum accipit præsentiam localem.

Objicies 4. Pars esset major toto; nam si totius pars multoties replicaretur, plus spatii occuparet, quàm totum ipsum.

Resp. nego sequelam; vel enim esset major magnitudine substantiæ, quod falsum; pars enim illa replicata non plus substantiæ haberet: vel magnitudine extensionis, quod dici non potest respectivè ad totum, quia tunc pars replicata haberet suam extensionem ibi distinctam ab extensione totius, & ita extensio ejus esset major, sed tunc non esset pars extensionis totius.

Objicies 5. Illud corpus replicatum vel haberet eadem accidentia, vel diversa. Ut respondeam, sit

### ARTICVLVS III.

*Quenam prædicata convenient corpori replicato.*

I. OBSERVATIO. **P**RÆDICATA alia sunt essentialia, & à subiecto inseparabilia, alia ac-

cidentalialia, & separabilia; accidentalialia, alia absoluta, & independentia à loco, tam in fieri, quàm in facto esse; alia relativa, & dependentia à loco, seu ab agente extrinseco, vel in fieri, vel in facto esse.

II. OBSERVATIO. Quæstio est de prædicatis, quæ corpori in locis diversis circumscriptivè posito congruant.

III. OBSERVATIO. Hic corpus spectatur ex connaturali ejusdem exigentia, non per ordinem ad Dei omnipotentiam; nemo enim nescit accidentia multa, quæ insunt corpori in vno loco, posse divinitus ab ipso abesse in altero.

Certa sunt duo. 1. Nullum corpus potest existere in multis locis; absque prædicatis essentialibus, quæ ipsum ubique comitantur. 2. Accidentia, quæ essentialiter pendent à loco, tum in fieri, tum in facto esse, cujusmodi est ubicatio, productio ubicationis, & relationes indidem fluentes, vni tantum loco affixa sunt; nec possunt aliò divinitus transferri, ut patet; at

I. ASSERTIO. Corpus in diversis locis constitutum necessariò sequuntur prædicata absoluta à loco: v. g. si Petrus sit Lutetiæ, & Romæ, utrobique connaturaliter voluntatem, & intellectum eundem numero habebit. Prob. quia rem necessariò comitantur, & sunt absoluta à loco: ergo connaturaliter debent corpori in diversis locis posito inesse.

II. ASSERTIO. Accidentia absoluta à loco quodammodo contradictoriè opposita, cujusmodi sunt assensus, & dissensus circa idem, non possunt eidem corpori simul convenire. Prob. quia accidentium illorum repugnantia non est in ordine ad locum, siquidem duo homines penetrativè posui,

possunt assentiri, & dissentiri eidem objecto.

Objicies : Homo replicatus tam æquivaleret duobus distinctis, quoad assensum, & dissensum de eodem objecto, quàm æquivaleret positus in diversis temporibus : sed idem homo in diversis temporibus positus, potest assentiri primâ horâ, & secundâ dissentiri : ergo &c.

Resp. disparem esse rationem, quòd assentiri, & dissentiri sint prædicata dependentia à tempore, non à loco. Et verò idem homo eundem occupans locum, potest eidem objecto assentiri, & dissentiri successivè, non autem eodem tempore ; hinc Petrus Romæ replicatus, non potest hîc amare aliquod objectum, & illud idem Romæ odisse, quia per duas vicationes non redditur subjectum duplex, vel maioris virtutis, sed tantùm informatur duplici præsentia locali.

III. **A S S E R T I O.** Corpus in duobus locis positum, connaturaliter recipit in utroque accidentia independentia à loco. Prob. quia unio ejusmodi accidentium cum suo subjecto est independens à loco. Confirmatur, quia Concilium Tridentinum docet sess. 13. c. 3. Christum in sanctissimo Sacramento habere omnes suas partes inter se connexas, eâ connexionem, quâ inter se junguntur in cælo, vi naturalis illius connexionis, & concomitantia: ergo corpus replicatum in alio loco, debet habere connaturaliter accidentia sibi connexa, & à loco absoluta. Et verò si successivè illa loca peteret, in quibus replicatur, secum illa ubique accidentia haberet : ergo ibidem replicatum debet eadem necessariò habere, non necessitate absolutâ quidem, sed consequente, & hypotheticâ.

I.V. **A S S E R T I O.** Res quæ pendent in fieri ab

agente extrinseco , non multiplicantur necessarium ad agentis replicationem in multis locis , prout sunt in fieri , licet connaturaliter in facto esse illi convenient : v. g. Petrus , qui Romæ , & Lutetiæ existit , dum Lutetiæ ad focum calefit , calefit tantum ab igne , prout est Lutetiæ , licet idem ille calor , prout est Romæ , connaturaliter reproduci debeat. 2. Quamvis comedat Lutetiæ , non tamen comedit , ut est Romæ , licet ubique æqualiter nutriatur. 3. Si post cœnam , in qua Christus corpus suum consecravit , & Apostolis manducandum dedit , servatus fuisset panis consecratus , Christus sub illis speciebus fuisset moriturus , dum in cruce mortuus , quia mori est prædicatum absolutum à loco , significatque solutionem à corpore , plagas tamen non accepisset , quia vulneratio pendet ab agente extrinseco dividente continuum.

Colligēs , si Petrus Romæ existens ferret pondus suis viribus par , nihil ampliùs ferre posse Parisiis , nisi à Deo divinitus corroboraretur. Item si hîc lethaliter vulneraretur , connaturaliter Romæ expiraturum ; si hîc peccaret , Romæ peccatorem denominandum.

Dixi connaturaliter expiraturum , quia fieri posset divinitus , ut anima hîc vnita corpori , Romæ vniri desineret ; non tamen diceretur mori , quia mori est simpliciter , & ubique desinere vivere , non tantum desinere hîc : unde si materia replicaretur , animâ non replicatâ , aut ejus vnione , tunc materia non esset corpus mortuum , tum quia non haberet formam cadaveris : tum quia mori est simpliciter , & ubique non ampliùs vivere.

Objicies 1. Corpus ageret in distans : v. g. dum calefit Romæ , corpus Lutetiæ sentiet calorem :



ergo ignis Romæ existens , calefacit Lutetiæ : ergo agit in distans.

Resp. 1. calorem produci in corpore Romæ ab igne extrinseco , quem Deus Romæ productum , huc quasi deferret , producendo tantum aliam præsentiam localem illius caloris ; posito enim primo miraculo , quod corpus existat hic , & Romæ , connaturaliter accidentia , quæ Romæ habet , si absoluta sint , debet quoque habere Lutetiæ : quare nego ignem , qui Romæ calefacit , Lutetiæ calefacere , quia ignis hic existens , non dat calori illam præsentiam , quam Lutetiæ habet , sed solus Deus.

Resp. 2. esto , ignis Romæ existens producat calorem qui est Parisiis , nego ideo agere in distans ; licet enim corpus , prout existit Parisiis , distet ab igne Romano , tamen prout existit Romæ , est præsens igni comburenti , quod sufficit , ut dicatur non agere in distans , sicut anima rationalis , quæ est in capite , & in pede , non dicitur distare à pede , licet caput distet à pede.

Objicies 2. Si saxum hic , & apud Antipodas existens , hic magno impetu sursum tollatur , non tamen eundem recipiet impulsus apud Antipodas , quia si reciperet , moveretur ; impetus enim suum ubique habet effectum : at non potest moveri apud Antipodas violento motu ; quia moveretur ad terminum , ad quem impetus dirigitur apud Antipodas : sed impetus apud Antipodas dirigitur ad centrum terræ , ut ad terminum : ergo saxum non violento impetu apud Antipodas , sed naturali motu moveretur : atqui ille impetus est independens à loco : ergo aliquod accidens independens à loco non replicatur.



Resp. Licet impetus sit ex se independens ab hoc loco , ordinatur tamen ad ponendum mobile in hoc loco ex directione illius , qui saxum projicit : quare non debet poni impetus in utroque loco , quia frustra apud Antipodas poneretur , cum ibi motum efficere nequeat. Ratio est , quod impetus alligatus sit ad faciendum motum secundum lineam impressionis.

V. A S S E R T I O. Corpus replicatum , supposito miraculo , potest moveri in vno loco , in alio quiescere , aut in diversas partes moveri.

Prob. quia corpus ratione replicationis in duobus locis est æquivalenter duplex in ordine ad prædicata localia : ergo potest in vno loco moveri , & in altero quiescere , aut moveri motibus in speciem contrariis.

Objicies 1. Ergo idem corpus moveretur , & non moveretur.

Resp. dist. Moveretur inadæquatè , ut est Parisiis , & non moveretur , inadæquatè , ut est Romæ , concedo : moveretur adæquatè , nego ; certè anima , moto pede , & reliquo corpore quiescente , non movetur adæquatè , sed inadæquatè , ut est in pede. Idem dixeris de corpore per replicationem virtualiter multiplici.

Objicies 2. Idem moveretur motibus contrariis ; illi enim sunt motus contrarii , qui sunt ejusdem , eodem tempore , ab oppositis terminis ad oppositos , per eandem lineam spatii ; sed corpus talibus motibus moveri posset , ut si quis existens hîc simul , & Romæ , Româ Parisios , & Parisiis Romam proficiscatur.

Resp. 1. idem posse objici de corpore Christi , quod sub duabus hostiis existens , ab oppositis al-

taribus reciprocè referatur. 2. Nego maiorem, quia requiritur ad motuum contrarietatem, ut corpus sit tantum in vno loco, adeoque non replicatum; at supponimus corpus replicatum, quod proinde duobus corporibus æquivalet quoad prædicata localia.

Sex colliguntur ex dictis. 1. Posset exercitus integer vno ictu confici, si constet ex homine sapius replicato. 2. Aliquis posset emori, vbi nulla esset mortis causa, dum alibi admoveatur. 3. Si quis Romæ in igne esset, & Parisiis in glacie, tunc in utroque loco tepidus foret, id est, partim calidus, partim frigidus, modò ignis, & glacies forent æqualis virtutis in agendo; secus actio fortioris superaret. At miraculum est, quòd homo mediis in ignibus temperato calore utatur. Resp. ita est, sed de miraculis agimus. 4. Si idem homo replicatus, ambulando sibi occurreret, non se ipsum penetraret, quia necesse esset ut partium aliquarum diversarum, putà anteriorum cum posterioribus daretur penetratio; nam dum sibi occurrerent, dextera vnus rangeret sinistram alterius. 5. Si pestiferum aërem in vno loco hauriret, quamvis non hauriret in altero, amitteret tamen naturalem temperiem, & consensum qualitatum, ideoque ægrotaret. 6. Homo etiam millies replicatus non plus virium haberet, immò probabilius vires ejusdem minuerentur ob multiplicationem; virtus enim dispersa, nisi corroboretur, debilior fit.



## DISPUTATIO SECVNDA.

*De vacuo.*

**D**ISPUTATIONI de loco maximè affinis est disputatio de vacuo ; cùm enim oppositorum eadem sit scientia perinde ac relatorum , privativè autem opponantur locus , & vacuum , postulat ordo doctrinæ , ut explicatâ loci naturâ , quid sit vacuum , breviter videamus.

## ARTICVLVS I.

*De natura , & existentia vacui.*

**T**RIA hoc articulo quærenda , 1. quid sit vacuum : 2. an detur , aut saltem dari possit naturaliter : 3. cur natura vacuum fugiat , & quâ porro virtute id præstet.

§. I. *Quid sit vacuum.*

**V**NICA OB-**V**ACVVM sumitur latè , & strictè. **V**etè ; latè est quodlibet corpus , quod aut sensibili corpore , aut certè eo caret , quod continere debet : sic dolium vino exhaustum , vacuum dicitur , licèt aère plenum : strictè iterum duplex , negativum , & privativum ; negativum est spatium quoddam imaginarium nullo termino circumscriptum , in quo tamen corpora produci

queant , seu est id , quod nec corpus vllum continens , nec contentum dicit , vulgò inane dici solet : privativum , est locus carens corpore , de quo hîc potissimùm agitur : quare sit

VNICA ASSERTIO. Vacuum definitur ab Aristotele , locus carens corpore , seu locus nullo corpore actu repletus , aptus tamen repleri. Dicitur I. locus , quia vacuum dicit duo , vnum materiale , quod vacuum est , nempe corpus continens ratione superficiei , quod actu non est repletum , aptum tamen repleri ; alterum formale , nempe carentiam corporis , quo repleri exigit ; hinc vacuum in recto dicit aliquid positivum , superficiem scilicet corporis ambientis , in quo distinguitur à spatio imaginario , seu inani ; inane enim est negatio cujuslibet corporis , sed non conclusa aliquo corpore ; vacuum autem est locus , in quo non est corpus , sed esse potest , & debet : à nihilo , quia nihilum est negatio entis , in qua nec est corpus ; nec esse potest ; in obliquo autem dicit aliquid privativum , seu negativum , hoc est , absentiam corporis , in quo discrepat à pleno ; plenum enim est actu repletum corpore , vacuum duntaxat potentiâ ; patet inde , cur ab Aristotele dicatur text. 61. *quapropter & vacuum videtur aliquid esse , quia & locus ;* nam ratione partis materialis , seu superficiei continentis est aliquid reale , licet formaliter sumptum sit carentia corporis.

§. II. *An detur vacuum in natura , aut naturaliter dari possit.*

QVADRVPLEX est sententia de existentia vacui. Prima Democriti , & Epicureorum ,

qui docebant in corporibus dari quædam vacuola; quorum ope facile rarefiant, & condensentur, quam Gassendus tueretur. Secunda Cartesii huic è regione opposita, pugnat ne divinitus quidem vacuum, & inane dari possit. Tertia docet vi agentium corporatorum dari non posse, virtute tamen angelicâ fieri posse. Quarta, eâque maximè communis est, nullius agentis naturalis vi, & efficientiâ, sed divinâ duntaxat vacuum induci posse.

V N I C A A S S E R T I O. Vacuum nec est in natura, nec naturaliter esse potest, saltem virtute agentium corporatorum. Ita Aristoteles text. 62.

Probat<sup>ur</sup> 1. Illud non datur in natura, nec dari viribus naturæ ipsius potest, à quo natura maximè abhorret: natura maximè abhorret à vacuo: ergo non datur in natura, nec viribus illius dari potest. Probat<sup>ur</sup> minor, ab eo maximè abhorret natura, ad quod fugiendum, graviora corpora attollit, aut sustinet à lapsu, levia deprimit, aut ab ascensu prohibet, solida perfringit, conjuncta dissociat, disjuncta consociat, &c. hæc omnia præstat natura metu vacui: ergo maximè abhorret à vacuo. Probat<sup>ur</sup> minor variâ, ac multiplici experienciâ.

1. Si tubus in aquam ex parte immittitur, aërque ipso inclusus à parte superiori attrahatur, aqua illico ascendet, etiam renitente ipsâ gravitate, & deorsum ferente; hinc ex radice montis aqua in oppositam partem per cacumen, beneficio tubi, sæpius traducitur: at non alia de causa, quàm ne detur vacuum: ergo non datur vacuum in natura.

11. Ex dolio quod vino plenum sit, infernè perforato vinum non antè effluit, quàm foramen superne aliquod fiat, quo aër intus raptim subire possit.

III. Franguntur tormenta bellica, nisi dum globus vi pulveris accensi protruditur, excutiturque, aër pari celeritate in locum ejus per foramen subeat.

IV. Latera follium nullis viribus diduci possunt, nisi prius aperto infernè orificio, aëri liberior pateat ingressus.

V. Vas plenum aquâ, si obturato orificio congelatur, frangitur illico, ac dissilit; cur autem, nisi metu vacui, aquâ se condensante, & quasi in angustum adductâ?

VI. In cucurbitis major sanguinis copia attrahitur, appposito circum frigido corpore, ob condensatum aërem, qui antea per accensas intus candelas rarefiebat; sed hæc experientia, perinde ac quinta rem non evincunt; non quinta quidem, 1. quia si vas æneum sit, non testaceum, vtrique non frangitur. 2. quia licet apertum manserit orificium, tamen frangitur, ac dissilit; causa itaque illius fractionis est, quod partes nimio frigore constringantur, adeoque dissociantur inter se; sexta verò nihilo valentior est, tum quia cucurbita ligno applicata, nec attrahit lignum, nec frangitur eadem: tum quia causa alia afferri potest, cur caro elevetur, nempe ipsâ igne cucurbitæ incluso calefactâ, porisque apertis, humor rarefit, & intumescit; itaque carnem attollit: tange vel digito ferrum ignitum, statim caro illius intumescet à calore ferri se in partes carnis insinuante, & humores rarefaciente.

Ratio duplex afferri solet; prima petitur ex dependentia hujus mundi inferioris à superiori, quam ex principiis Philosophi 1. Meteor. cap. 2. sic informo: *mundus hic inferior est quodammodo con-*

*tinuum lationibus superioribus , ut omnis hujus vis , & virtus inde gubernetur : vacuum continuaram illam partium vniversi seriem , & consensum , quem fovet mutua inter se corporum societas , tolleretur ; vim , & virtutem , hoc est , cælestes influxus , quibus mundus inferior conservatur , & viget , penitus interciperet : ergo vacuum natura non patitur.*

Confirmatur ex eodem Aristotele , qui 2. de anima , tex. 74. Democritum carpit aientem , si medium inter oculum , & rem visam esset vacuum , nos illam , licet minimam , longiusque distitam visuros. Hoc , inquit Aristoteles , fieri non potest , quia visio , & omne sentire fit per quandam passionem : at si esset vacuum , nulla passio posset in sensu excitari. Cur autem ? quia illa passio fit in visu per receptionem speciei visibilis ab objecto ad potentiam vsque transmissam ; per vacuum autem nihil posset ad sensum deferri , *ideoque vacuo facto , nedum exquisitè , sed omnino nihil videretur ;* hinc sic arguo , per vacuum nec passio perfectiva , quæ minima est , esse potest , neque species visibilis deferri : ergo multò minùs vis superiorum corporum in hæc inferiora per vacuum diffundi poterit.

Dices , licet rectis lineis influxus cælestes in partem vacuo suppositam non descenderent , tamen obliquè , & indirectè posse deferri ; sicut sol in terras nostras non desinit influere , quamvis iis directè non incumbat. Contrà sic vrgeo : natura , quantum potest , rectis lineis agit , & quàm brevissimâ tendit viâ ; non sic autem ageret inducto vacuo , & ita vis illi inferretur.

Secunda ex vnitæte totius vniversi ducitur , possi-



ris tribus principiis. 1. princ. Natura sui est potissimum conservatrix ; tunc autem se conservat, cum est maximè vna : tunc est maximè vna, cum habet partes perfectè vnitas, vigétque tandiu, quandiu vnionem illam tuetur. 2. princ. Divisio tollit vnitatem partium ; hinc natura divisioni partium suarum omni conatu resistit, nihilque non molitur, vt integritatem seruet. 3. princ. Vacuum est vulnus quoddam totius naturæ, quo partes illius dissociantur inter se, & perfectam vnionem amittunt : vnde consequens est, sicut animal, vt se à vulneribus seruet incolume, viribus totis vulneranti resistit, nihilque non agit, quo ictus illius exeat : ita mundum vacuo toto conatu obsistere ; hinc corpora, privatas licèt inimicitias exerceant, sintque moribus dissimillimis, relictis tamen privatis dissidiis, cum imminet vacuum, conspirant vnà ad profligandum communem naturæ hostem, bonoque totius etiam cum dispendio proprii, ac privati consulunt.

### §. III. *Diluuntur objecta.*

**O**B I E C T I O N E S I. Nisi sit vacuum in natura, non dabitur motus localis, aut dabitur penetratio naturaliter ; nam si omnia sunt plena, dum vnum corpus mutat locum, transit in eum locum, in quo jam corpus erat : ergo vel corpus illud destruetur, vel erit ibi simul cum corpore adveniente, & sic erit penetratio.

Resp. cum Aristotele, cap. 10. tex. 61. posse fieri motum secundum locum, licèt omnia sint plena, quia dum res vna transit in alterius locum, cedit loco suo res altera, & antè propellitur, vel à tergo

raptim subit, vel certè condensatur.

Instabis : Ergo morâ vel muscâ , omnes orbis partes movebuntur.

Resp. nego ; nam aëris successio in locum corporis , quod cedit loco suo , fit plerumque per rarefactionem , quatenus idem aër priùs antea addensatus , ut illud corpus admitteret , eodem recedente , latiùs se fundit , majorémque locum rarefactus occupat ; hoc quippe elementum mobilis idèò , & cedentis naturæ est , ut aliorum corporum vacuitates raptim repleat.

Objicies 2. Duo marmora perfectè plana divellantur ex æquo in instanti , dabitur vacuum in medio utriusque , quia aër non nisi successivè intrò subire potest.

Resp. ob hanc ipsam rationem , ab invicem in instanti divelli non posse , sed tantùm successivè , cum marmor superpositum alteri rectè propellitur , altero manente immoto ; deinde vix fieri potest , ut duæ tabulæ alicujus magnitudinis ita affabrè lævigentur , complanenturque , ut inter eas se se contingentes nullus aër interjiciatur.

Instabis : Dum vas frangitur metu vacui , non potest aër vno instanti inter partes se insinuare , sed tantùm successivè : ergo datur vacuum.

Resp. nego conseq. Licet enim fractio celerrimè fiat , fit tamen in tempore , adeòque successivè , & ita priùs per partes aliquas viciniore vasis fracti aër penetrat.

Objicies 3. Detur in centro terræ vacuum vnius digiti , nihil mundo officiet , quia nec partium mundi continuationem , nec influxum impedit.

Resp. nego posse dari ; nam admissio minori vacuo , fieri quoque posset majus , cum major vir-

tus non requiratur ad faciendum magnum vacuum, quàm parvum, utpote quæ sint ejusdem rationis, & ita in multis mundi partibus vacuola multa fieri possent, aut etiam majora, unde grave ipsius naturæ damnum, discissis partibus, oriretur.

Objicies 4. Nisi dentur spatiola vacua, non potest explicari quomodo aqua congelata, non minùs spatii, quàm antè occupet.

Resp. explico, nempe aqua congelata quosdam halitus calidos intus admittit, qui ad præsentiam contrarii magis inter se uniti, & dilatati, ipsam quoque aquam dilatant: sic dum fit accretio in viventibus, distributo in singulas partes alimento, cedit eidem alimento poros subeunti quidam humor subtilis, & spiritus, qui in meatibus erat.

Objicies 5. Nisi detur vacuum, posset eadem lampas semper ardere, oleo semel infuso; repleatur enim oleo, & ita obtureretur, ut nulla parte aëris ingredi possit, &c. Confirmatur: in sepulcro filix Ciceronis reperta est post multos annos lampas accensa, quæ tamen ad primum aëris ingressum illico extincta est, quasi non antea luceret, nisi quia in loco subterraneo non poterat consumi totum oleum, nec ignis, qui corpus est rarissimum, extingui, quin necessariò fieret aliquod vacuum.

Respondet 1. Cardanus, qui artem illius lampadis construendæ tradit, fieri posse, ut semper ardeat, sed minùs probabiliter. Quare resp. 2. tunc oleum ab igne rarefactum iri, quantum natura patietur, & postmodum extinguendum ignem, immò & vas frangendum. Adde quòd in ipso oleo multæ sunt particule minùs viscosæ, adeoque incapaces

formæ ignis, quæ cæteris pereuntibus, remanebunt, magisque calefactæ majorem occupabunt locum, & sic facilè ignis exstinguetur metu vacui.

Ad exemplum, respondeo fortè extitisse exhalationem intus clausam ad concipiendum ignem idoneam, quæ statim exarsit ad primum aëris ingressum; unde fossiores repentini ignis aspectu, nec admodum eruditi, putarunt lampadem ad sua usque tempora arsisse. Denique tradit Cardanus apud antiquos genus quoddam liquoris fuisse, quod viscosum maximè ac lentum nutriendæ diutiùs flammæ, nullo alio alimento superinfuso, aptissimum foret: quare hoc exemplum sententiam firmat.

Objicies 6: Contrarium si alterum naturâ est, necesse est & alterum esse naturâ, ex Aristotele 2. de cælo, tex. 18. at datur in natura plenum: ergo & vacuum; deinde ex propositione de tertio adjacente, rectè infertur propositio de secundo adjacente: v. g. *homo est albus: ergo homo est*; at hæc propositio, *vacuum est locus privatus corpore*, est propositio de tertio adjacente: ergo hæc de secundo adjacente bene infertur, *vacuum est*.

Respondeo ad 1. pronuntiatum Aristotelis valere tantum in contrariis perfectivis, non in privativis; hinc non valet, *datur summum bonum: ergo summum malum*. Ad 2. esto, id valeat in materia contingenti: at non valet in materia necessaria, quia verbum tunc abstrahit ab existentia; itaque non valet, *Adam est homo: ergo Adam est*. Porro hæc propositio, *vacuum est locus privatus corpore*, est in materia necessaria, quia vacui essentiam definiendo explicat.

§. IV. *Diluitur gravis objectio.*

**P**ETITVR ex famosa Rotomagensium Medicorum experientia. Impleatur, inquit, hydrargyro tubus vitreus quatuor pedes longus, cuius extremum vnum sit sigillo hermetico obturatum; deinde quâ parte tubus idem aperitur, hydrargyrum infundatur: tum orificium illud, per quod hydrargyrum infusum est, appresso digito claudatur, & in aliud hydrargyrum subiecto vase contentum sic immergatur, vt tubus ad perpendiculum erectus, vasi incumbat, ac postea tubo sic suspenso, & eundem situm retinente digitus subducatur, quo pars inferior tubi obstruebatur; tunc magna pars hydrargyri descendet ex tubo in vas suppositum, & cum altero hydrargyro intra vas inferius contento miscebitur; deinde assurget aliquantulum, tandemque post aliquot librationes, ac subsultus, in inferiore parte tubi subsistet ad altitudinem 27. pollicum, aut circiter, relictâ superiori parte vacuâ; hinc sic arguit Gifardus: in parte superiore tubi datur vacuum, vel corpus aliud ab hydrargyro: nullum aliud corpus assignari potest, quod in ejus locum subeat: ergo in illa parte datur vacuum.

Eadem experientia fieri potest in aqua, sed quia minoris est gravitatis, quàm hydrargyrum, retinebitur in tubo ad altitudinem plus quàm quatuor pedum, antequam supra se vacuum relinquat.

Resp. I. nego dari vacuum in illa superiori parte tubi, i. quia fit transmissio luminis per partem illam, vt patet, admotâ candelâ: at lumen non transfunditur, nisi per medium: ergo non est va-

cuum in illa parte. 2. Potest in illa parte sonus naturaliter excitari, si quod parvum tintinnabulum incluseris; at sonus non transmittitur per vacuum. 3. Vbi est rarefactio, & condensatio, ibi debet esse aliquod corpus; at in parte superiori tubi fit condensatio, & rarefactio; nam si linteum calidissimum complicatum tubo applies, ad inferiorem tubi partem aliquantulum descendet hydrargyrum, rarefacto nempe corpore, quod est in superiore tubi parte; sin verò frigidum apponas, hydrargyrum paululum ascendet, quia condensatum est corpus, quod vacuitatem tubi replebat. 4. Si in ea tubi parte inclusa sit carpionis vesicula, tunc mirum in modum intumescet: vnde patet illo spatio contineri aliquod corpus tenuissimum rarissimumque. At quodnam illud est?

Quidam docent impleri, aëre rarefacto, qui in poris vitri latebat: alii subtilissimo æthere, qui per vitri poros ex aëre crassiore hydrargyri pondere ac nisu secretus, atque attractus sit. Omnium optimè, qui volunt repleti substantiâ tenuissimâ ex Mercurio erumpente, & subvolante ad implendum vacuum: porrò substantia illa vel est spiritus Mercurialis, vel tenuissimus subtilissimûsque humor, qui ex Mercurio humido effluit, & intra tubi concavitatem dilatur. Certè si quis Mercurium aliquandiu manu tractet, habeâtque in ore nummum aureum, licet nullas hydrargyri partes evolare sentiat, brevi tamen nummum albescere, totumque hydrargyro oblini videbit. Deinde postquam infusum est hydrargyrum, majores aëris bullæ sursum extruduntur, & plurimæ minores ipsi tubo adhaerentes, & intra hydrargyrum remanentes observantur, quòd debiliores sint, quàm vt corpus spissum

celeriter perrumpere valeant. Age verò si minores aëris partes illæ emergere ex hydrargyro non possunt ; quantò minùs vapor tenuissimus , halitusque subtilior , quo hydrargyrum abundat , poterit exhalare , nisi vi quâdam majore exprimatur , extrahaturque ? vis autem illa adhibetur , cùm hydrargyrum nativo pondere , quod per se se grave est , à tubo ex vna parte impervio , defluit ; tunc enim metu vacui , Mercuriales spiritus , aliique vapores tenuissimi hydrargyro permixti , crassioribus partibus se se expediunt , sursumque evolant celerrimè , ut locum ab hydrargyro descendente relictum statim occupent , oppleantque.

Non tamen negaverim aëris quippiam tum per poros vitri intromitti , tum qui intercludebatur in poris hydrargyri eundem sursum ascendere : tum per idem extremum tubi per quod hydrargyrum in vas subjectum defluit , irrepere aliquas subtiliores aëris partes. Certè hydrargyrum , utpote mobile , includit multos spiritus , qui ejusdem descensu præcipiti excientur , & à partibus tenacioribus extricantur. Patet quippe experienciâ , nullum adeo densum corpus esse , quod non aliquibus poris præditum sit , ut observare licet ope perspicilliorum magnitudinem objecti augmentum. Hæc responsio optima , quia omnes apparentias experimenti explicat.

1. In tubo duorum pedum non descendit , in tubo quatuor pedum descendit , quia in tubo duorum pedum exigua hydrargyri copia non satis virium habet , ut spiritus Mercuriales , & vapores contentos , dilatationi resistentes dilatet , & explicet , ad superiorem tubi partem replendam : quare non descendit metu vacui ; at contra in tubo quatuor pedum , hy-



drargyrum, utpote abundantius, adeoque potentius, id suo pondere præstare potest.

I I. In tubo 4. pedum consistit ad altitudinem 27. pollicum, quia non potest amplius dilatare spiritum illum, vaporémque Mercurialem. Quemadmodum si quis ex data syringe embolum extrahat, non poterit extrahere, nisi ad certum spatium, quia inclusus aër non potest ulterius dilatari.

I I I. Quando ad superficiem hydrargyri vasculo contenti, tubus extollitur, ideo resorbetur hydrargyrum in partem superiorem tubi, quia tunc hydrargyro prævalet spiritus, & vapor Mercurialis, se ex illa, in qua erat, violenta dilatatione ad statum naturalem reducens: quemadmodum si quis syringem, recluso foramine, suspenderet è laqueari, & alligato emboli capiti pondus appenderet sufficiens ad extrahendum syringis embolum ad aliquod spatium, postea verò aliquid de pondere detraheret, statim embolus resorberetur in syringem, aëre se ad statum naturalem, ex quo per vim abstractus fuerat, reducens.

I V. Cùm facto experimento, apponitur tubo semipleno digitus ad os inferius, sentitur digitus abstrahi, & exugri, quia spiritus Mercurialis, dum nititur se constringere, attrahit, quantum potest, hydrargyrum, & digitus attrahitur ab hydrargyro; sicut quando ex data syringe retrahitur violenter embolus, manus retrahi se sentit ab embolo.

V. Cùm tubus inclinatur ad horizontem, aliquid hydrargyri resorbetur in partem superiorem, quia tunc inclinatum minus roboris habet ad dilatandum spiritum Mercurialem, quam cùm perpendiculare est; tunc enim illi spiritus graviori pondere expediti contrahunt se & minus spatii occupant;  
vnde

vade consequenter ascendit hydrargyrum, vt locum illorum repleat, sicut ramus arboris graviori pressus pondere, manet inflexus, licet contra naturam: at mediâ parte ponderis detractâ, assurgit illico, vt ad naturalem situm propius accedat, secumque pondus alligatum attollit.

V. I. Quando tubus longior est, perinde res peragitur ac in tubo 4. pedum, quia servatur proportio; quod enim maior tubus, eò plures continet hydrargyri spiritus, qui ad vacuitatem replendam sufficiant.

Dices: Nonne mercurius habet alios spiritus, quos expirare possit ad replendum totum tubum, & ita defluet totum hydrargyrum in vas suppositum?

Resp. non satis esse, si expirent illi spiritus, nisi etiam dilatentur; at mercurius in tubo superstes, non potest dilatare spiritus plures iis, quos reipsâ dilatat, quia non habet satis virium adversus reliquos spiritus dilatationi resistentes.

Quidam rationem hanc reddunt, cur hydrargyrum in tubo inferiori consistat, nec defluat totum, quia columna aëris hydrargyro vase concluso incumbens tantum ponderat, quantum hydrargyrum tubo contentum: vnde suspensum manet hydrargyrum in tubo, non quod ab aliquo corpore superiori attrahatur, sed potius ab alio impellatur, cum quo perfectum æquilibrium facit. Confirmant ex eo, quod si in altissimis Arvernix montibus illud experimentum fiat, minus descendet hydrargyrum, quàm si in valle fiat, eò quod aëris columna, quæ à cælo vsque ad hydrargyrum vase inclusum extenditur, minor sit breviorque in monte, quàm in valle, adeoque hydrargyrum

minùs deprimat. Contrà tamen, si fiat experimentum in specu vndique clauso, aërique impervio, tunc columna aëris hydrargyro incumbentis brevissima erit, & tamen tantum descendet hydrargyri, quantum si in patenti fieret, ut fatentur experti: ergo brevior, aut longior columna aëris non est causa, cur magis, aut minùs descendat. Porro quòd in montibus descendat magis, non facit aëris columna, sed aër crassior, aut levior, qui cum per hydrargyri lapsum sit comprimendus, magis, aut minùs pro majori, aut minori densitate illi resistit; hinc multi observarunt, plus descendere Florentiæ, quàm Parisiis; plus Parisiis, quàm in Suetia, quia licet hæ regiones æqualem habeant distantiam, adeoque par vbique sit aëris columna, tamen aër per descensum hydrargyri constipandus, paulò tenuior est in Italia, quàm in Gallia, & in Gallia, quàm in Suetia: ergo minùs resistere debet descendentì hydrargyro in Italia, quàm in Gallia.

#### §. IV. *Quà virtute natura resistat vacuo.*

I. OBSERVATIO. NATURA multis modis fugit vacuum, i. per immobilitatem corporis, & inseparabilitatem, ut dum corpus è loco non movetur, nec ab alio separatur: v. g. cum liquor è vase non effluit, nisi supernè aëri pateat aditus, aut cum latera follium compressa, clauso orificio, divelli nequeunt. 2. Per motum violentum localem levium, aut gravium, cum levia descendunt, ascendunt gravia: sic aqua per fistulam, aëre per superiores partes attracto, in altum movetur. 3. Per rarefactionem, cum densiora ra-

refiunt, sic in cucurbitis caro intumescit. 4. Per contractionem corporum, qui modus cum sit omnium violentissimus, raro in natura reperitur, quæ quantum potest, mediis utitur minus violentis.

II. OBSERVATIO. Corpora spectari possunt, vel ut entia quædam particularia, vel ut partes universi, quæ naturali quâdam inclinatione propendent in bonum totius conservandum, ut dum ignis ascendit metu vacui. Porro uterque motus singulis partibus universi naturalis est; primus quidem naturalis est rei, ut spectatur secundum peculiarem inclinationem: secundus, prout est pars universi.

Quæritur hîc, quæ sit causa efficiens motûs illius corporum levium, & gravium, qui sit contra inclinationem naturalem.

Quatuor sententiæ; prima refundit in gravitatem, & levitatem, tanquam principium proximum; secunda in Deum; tertia in corpus attrahens; quarta in qualitatem ad id rebus à Deo concessam.

VNICA ASSERTIO. Principium motûs, qui sit ad impediendum vacuum, naturale, & intrinsecum, est qualitas distincta à gravitate, & levitate, singulis rebus in ortu indita.

Pr. I. ex refutatione aliarum sententiarum; primæ quidem, quia eadem qualitas haberet motus oppositos, & ita se ipsam destrueret; quomodo enim gravitas eodem tempore sursum deorsumque idem corpus aqueum raperet: secundæ verò, quia non opus est ad Deum recurrere, quandiu causa secunda suppetit: tertiæ demum, quia 1. quæro quomodo corpus superius trahit inferius, nisi per qualitatem rapacem? 2. Si trahit, quomodo cor-

pus attractum se patitur ab eo divelli, cui iungebatur ? 3. Cur potius dicas corpus vnum attrahi ab altero, quàm illud alterum sponte sequi, cùm non minoris ipsius intersit, quàm alterius fugere vacuum ?

Nec dicas, fugere vacuum rem quamlibet per se ipsam, hoc est, per substantiam propriam; ut enim non est actiuosa in particulari, nisi mediantibus qualitatibus, aut receptiva, nisi mediante quantitate, ita nec ad bonum commune conducit, nisi sequestrâ qualitate; debuit enim Deus tribuere rebus singulis qualitatem motûs ad bonum vniuersale tendentis effectricem, sicut iisdem indidit qualitates propriorum motuum effectrices, ac boni particularis procuratrices.

Porro qualitatibus illius dos est duplex; prima, per se est indifferens ad motum corporum in quamcumque loci differentiam, quia datur tantùm à natura contra vacuum pro rerum exigentia: secunda, tandiu quiescit, nec aliarum qualitatuum functionibus obest, quandiu periculum vacui non imminet; vbi autem imminet, tum strenuè obstitit, ignem deprimat, terram, & aquam attollit, solida corpora perfringit, utpote valentior quâlibet particulari qualitate.

Objicies 1. Illa qualitas esset infinita; posset enim quodcumque corpus attollere.

Resp. nego sequelam, sed est tantùm superioris ordinis ad qualitates motrices singulorum corporum, quia est ad bonum vniuersi; aliæ verò ad privatam cuiusque corporis bonum. Certè anima rationalis non est infinita, licet sit ordinis superioris ad bruta.

Instabis 1. Nulla qualitas corporibus innata, ac

permanens ad tam varios motus sufficere potest.

Resp. nego ; Quidni enim qualitas boni publici procuratrix corpora in omnem loci differentiam modò tardiùs , modò velociùs moveat , sicut potentia motrix hominem in omnem loci differentiam moyet , aut magnes per qualitatem occultam ferrum in quamlibet loci differentiam trahit ?

Instabis 2. Illa qualitas vel permanenter corporibus inesset , vel transeunter.

Respondeo , permanenter inesse , nec tamen vires antè exercere , quàm metus vacui imminet : quare nec otiosa est in subjecto , nec inanis , quia aliquando operari potest , & debet ; otiosa enim , aut inanis dicitur virtus , quæ , dum natura exigit , non erumpit in actum.

Instabis 3. Illa qualitas , si corporibus inexistet , semper ageret , etiam vacuo non imminente , quia ageret ex impetu naturæ , adeoque necessario.

Respondeo , nego semper agere ; ad probationem , distinguo , agit ex impetu naturæ , semel determinata à causis secundis , concedo : non determinata , nego ; porrò determinatur ad impediendum vacuum illa qualitas , cum actione agentis naturalis corpora trahuntur aliqua , quorum in locum nulla succedunt : sicut gravitas statim atque est extra sphæram , gravitat in aëre , & deorsum nititur , licèt in centro placidissimè quiescat.

Objicies 2. Quælibet res per qualitates sibi proprias tendit in bonum universi : ergo frustra est illa qualitas universalis.

Resp. dist. ant. Quælibet res tendit per se primò ad bonum universi , nego : per accidens , & secundariò , quatenus tendit ad bonum proprium , quod est pars universi , concedo ; at qualitas , quæ va-

cuum impedit, per se primò procurat bonum v-  
niversi.

## A R T I C V L V S II.

*De virtute vacui effectrice, & motibus, qui  
sunt in vacuo.*

**Q**UÆSTIO esse potest de virtute humana, an-  
gelica, & divina.

§. I. *Quâ virtute induci vacuum possit.*

I. A S S E R - **V** A C U U M virtute humanâ fieri non  
T I O. potest. Prob. experientiâ: videmus  
enim adhibitis quibusque machinis ita corpus ab  
alio separari, vt in ejus locum succedat semper  
aliud.

.II. A S S E R T I O. Virtute quoque angelicâ va-  
cuum fieri non potest. Ita D. Thomas. Pr. ex prin-  
cipiis allatis: vacuum est vulnus vniuersi, cui toto  
conatu resistit: ergo virtus angelica naturalis, cum  
sit membrum vniuersi, illius virtutem, quâ vacuo  
obstitit, superare non potest: & verò mundus non  
est Angelis subjectus, juxta illud ad Hebr. 1. *Non  
enim Angelis subjecit Deus orbem terra*: ergo nihil  
moliri possunt Angeli, nisi Deo permittente. 2. Si  
Angeli virtute fieret vacuum, vtique fieret vel ob-  
sistendo motui, quo corpus vnum ita movetur na-  
turaliter, vt illi alterum succedat, vel impediendo,  
ne metu vacui corpus frangatur; at id ipsum  
posset hominum virtus auctior, adhibitis præser-  
tim machinis, quod tamen experientiæ repugnat.

Accedit D. Thomas, q. 16. de malo, art. 10. ad



ult. *Licet*, inquit, *dæmones possint movere aliquam partem terra, non sequitur quòd possint movere totam terram, quia hoc non est proportionatum naturæ ipsorum, ut mutant ordinem elementorum mundi.* Hic vides ex D. Thoma 1. dæmones non posse virtute sua naturali ordinem elementorum mutare: ergo nec Angeli boni possunt: 2. non posse universam terram movere, *quia hoc non est proportionatum eorum naturæ, mutare ordinem elementorum mundi*: at inducere vacuum, est mutare ordinem elementorum mundi: ergo nec Angeli, nec dæmones vacuum virtute propriâ inducere queunt. Et sanè penes eum duntaxat esse debet, mutare ordinem naturæ, qui est illius author: at Deus est solus author naturæ; *Quem enim, ait Iob, constituit Deus: alium super terram, aut quem posuit super orbem, quem fabricatus est?*

Denique Angelus vi sua efficere non potest, ut accidentia sint sine subiecto, aut duo corpora se penetrarent: ergo nec inducere vacuum; vis enim, quâ accidens avellenti à subiecto resistit, aut quâ corpora obsistunt simul ponenti, non videtur maior eâ, quâ natura vacuo obnititur.

Objicies 1, Angelus potest cessare à motu locali, & sic interibit universum: ergo potest vacuum inducere.

Resp. nego conseq. quia ex antecedente sequitur tantum Angelum posse negativè universo nocere, quatenus id non faceret, quod requirit conservatio universi; at vacuum inducendo, noceret universo positivè. Certè ut desinat cælos movere, satis est, si non agat: ut autem noceat, vacuo inducto, luctandum illi est contra naturam validiùs obsistentem, cujus pars cum sit, conatum illius vincere non potest.

Objicies 2. Natura corporea subditur Angelo ; quoad motus proprios cujusque rei : ergo quoad motum , quo fieret vacuum.

Resp. nego conseq. Quia Angelus est pars universi ; at pars non est validior toto.

Instabis 1. Angelus potest movere totam terram , aliis juvantibus : ergo & parvulum vacuum facere in centro terræ.

Resp. 1. anteced. negari à D. Thoma mox citato. Resp. 2. nego conseq. quia motus terræ repugnat tantum particulari ejusdem inclinationi ; vacuum autem generali inclinationi. Deinde licet non impedirentur cælestes influxus , vacuo in centro terræ factò , saltem cum terra sit secundum omnes suas partes æquè gravis , nulla pars ejus est , quæ non tendat in centrum : ergo toti globo terræ vis inferretur , quia impediretur ne descenderet usque ad centrum. 3. Partes ejusdem manerent aliquatenus divisæ ; quæ tamen debent esse prorsus consociatæ ad syderum efficientias excipiendas. 4. Non posset esse actio mutua partis in partem per lineam rectam , quam viam , utpote brevissimam , natura affectat.

Instabis 2. Angelus potest arcam in inani supra cælos extructam vacuum deferre intra orbem : ergo sic vacuum inducere.

Resp. dist. conseq. Sic vacuum inducere per accidens , ratione vacui in arca inclusi , transeat : per se , nego ; sic enim partes universi per accidens tantum disjungeret , non per se.

Instabis 4. Inductio vacui est effectus finitus : ergo non superat virtutem Angeli.

Resp. dist. Finitus in substantia , concedo : in modo , nego ; penetratio corporum finita est in

entitate, nec tamen ideo fieri potest ab Angelo.

Instabis 5. Singuli Angeli particulam terræ sumant, poterunt totam deferre in concavum lunæ: ergo perturbare ordinem vniversi; & ita nocere bono communi.

Resp. dist. conseq. Bono communi, quod resul-  
tet ex bonis particularibus, nempe ex multarum  
terræ particularum bono privato, transeat: quod  
resultet ex actione, quæ secundum se, & ex specie  
sua tendat ad bonum commune, vt commune est,  
nego; at virtus, quâ vacuo resistitur, est superio-  
ris ordinis, quia spectat ad bonum commune.

Instabis 6. Quid si illi Angeli suam quilibet par-  
ticulam terræ extra mundum deferrent, quæ va-  
cuo obsistit, tunc vacuum induceretur?

Respondeo, ideo non posse deferre, ob arctissi-  
mam partium mundi connexionem, quam nul-  
lum agens creatum, cum periculum vacui immi-  
net, tollere potest; aut certè si defetrent, tunc  
aqua, & aër rarefierent.

Instabis 7. Illa virtus, est virtus motrix: ergo  
ejusdem generis cum potentia motrice Angeli.

Resp. nego conseq. Licet enim sit ejusdem gene-  
ris remoti, non est ejusdem proximi, & imme-  
diati.

§. II. *An saltem divinâ virtute vacuum  
induci possit.*

**N**E G A T Cartesius parte 2. principiorum Philo-  
sophiæ, num. 17. posse virtute divinâ induci  
vacuum, his nixus principiis.

1. Natura spiritûs est cogitare; corporis verò in  
longum, latum, & profundum extendi: quare

nec mens sine cogitatione, nec corpus sine actuali extensione existere etiam divinitus potest, quia nihil potest esse sine sua essentia.

11. Quare 1. substantia corporea idem est realiter cum sua quantitate, 2. nullos habet mundus suæ extensionis terminos; cum enim supra cælos spatia sint indefinitè extensa; & aliunde nulla extensio sit sine corpore, utique supra cælos substantiam corpoream indefinitè extensam esse necesse est; immò nec major, nec minor hic mundus fieri potest, nec plures mundi à Deo condi potuere: denique nec vacuum ullum est, nec per divinam omnipotentiam dari potest. Ratio ex illius principiis ducitur, quia spatium, quod vacuum omni corpore supponimus, est extensum: ergo ibi vacuum esse non potest, quia ubi est extensio, ibi est & corpus, cum extensio, & substantia corporea idem omnino sint. Hæc Cartesius, quæ quàm sint à communi sensu, & ratione aliena, jam ex parte ostendimus. 1. parte Physicæ, disp. 3. de forma subst. art. 1. §. 3. Quare sit

V N I C A A S S E R T I O. Vacuum divinâ virtute dari potest. Probatur: vacuum est locus carens corpore: potest dari divinâ virtute locus carens corpore; quidni enim Deus possit omnia corpora intra sphaeras cælestes contenta destruere; tunc istud spatium erit locus carens corpore, itaque & vacuum. Probatur minor: locus carens corpore est locus nullo corpore repletus, aptus tamen repleti; tale erit illud spatium, quia intra concavam sphaerarum cælestium superficiem, nullum planè erit corpus, & tamen poterit corpus non vnum tantum, sed multiplex illa superficie contineri: ergo potest dari divinitus locus carens corpore.

Confirmatur 1. Deus enim potest hoc momento destruere totum ignis elementum, quod est supra aërem sub concavo lunæ, & cæteris elementis, ne rarefiant, illudque adeo vacuum impleant, concursum denegare, quo in casu locus ille remanebit omni corpore vacuus. 2. Vacuum opponitur pleno: potest aliquid nullo esse plenum corpore: ergo & vacuum dari.

Respondet Cartesius, licet Deus possit destruere corpus physicum intra vasis capacitatem contentum, nullo alio, quod physicum sit, corpore suffecto, tamen adhuc contentum iri intra istud vas corpus mathematicum, seu extensionem in longum, latum, & profundum, adeoque non fore tunc vacuum.

Contrà 1. ex suppositione mea, ibi ubi erat ignis, nullum est corpus reale, siquidem ignem supposui destructum: ergo nulla extensio realis, quæ supponit corpus reale, immo idem est cum substantia corporea. 2. Fatente Cartesio, nullum manet corpus physicum: ergo nec vllum corpus mathematicum. Probatur consequentia: corpus mathematicum est extensio in longum, latum, & profundum à materia abstrahens: non potest dari ejusmodi extensio abstrahens à materia, quia ex principiis Cartesii essentia substantiæ corporeæ est ipsa extensio, adeoque ubicumque est extensio, ibi & substantia corporea esse debet, & vicissim. 3. Vel corpus mathematicum distinguitur realiter à corpore physico, vel non; si primum, ergo antequam corpus physicum destrueretur, erant duo corpora simul penetrata intra amplitudinem corporis continentis, nempe corpus physicum, & corpus mathematicum; si secundum, ergo pereunte corpore

physico, perire quoque debet corpus mathematicum. 4. Iam principium illud, quo contendit Cartesius, quantitatem cum substantia corporea esse idem, evertimus. 5. Si destructo corpore physico, manet corpus mathematicum, sitque etiam extra celos diffusum, quidni dicatur etiam ante mundum conditum, fuisse ibi corpus mathematicum, ubi jam est mundus, quo quid absurdius?

Objicies 1. Vacui inductio est univèrsi perturbatio quædam, & deordinatio: ergo non potest fieri à Deo.

Resp. dist. ant. Respectu substantiæ creatæ, concedo: respectu Dei, nego; cum enim Deus supremus sit totius naturæ dominus, nihil facit inordinatum, cum ea præter morem utitur ad ostendendam omnipotentiam.

Objicies 2. Dato semel vacuo, erit corpus, & non corpus; non erit, ut supponitur; erit autem, quia extendetur in longum, latum, & profundum, si quidem vas vacuum adhuc metiri possumus.

Resp. dist. Erit latum, longum, & profundum, privativè concedo: positivè, nego; eatenus enim diceretur tale, quatenus habebit privationem corporis lati: quare non erit propriè corpus, quia non erit trinè dimensum positivè, realiter, & actu, sed aptitudine tantum, & potentiâ.

Instabis 1. Corpus illud carens contento corpore, haberet distantia latera, & non distantia; distantia quidem, quia cujussibet corporis cavi latera distant, & corpus illud esset cavum, quia esset capacitas intermedia inter utrumque latus; non distantia verò, quia nullum corpus medium interjiceretur.

Resp. Latera saltem distarent adhuc negativè, li-

eēt non distarent positivè actu per medium corpus interjectum. Ratio est, quia licet nullum corpus positivum actu interjiceretur, tamen semper aptitudine, & potentiâ interjiceretur: at non opus est actu corpus interjici ad duorum corporum realem distantiam, sed satis est si inter ipsa immota, & easdem vocationes retinentia, corpus aliquod interjici possit; deinde per curvam lineam positivam poli ipsius cæli post inductum vacuum mensurari possent: ergo per curvam lineam positivè distarent. Deinde ut duo sint actu divisa, sufficit privatio unionis: ergo ut duo sint actu distantia, sufficit privatio contiguitatis.

Instabis 2. In vacuo est aliqua extensio: ergo & corpus, saltem mathematicum.

Resp. dist. Est aliqua extensio potentiâ, & imaginaria, esto: positiva actualis, nego; unde in illo non erit quoque corpus mathematicum reale, & positivum, sed imaginarium, & per mentem abstractum à materia.

Instabis 3. Privatio debet esse in medio positivo: nullum est medium positivum inter latera corporis vacuum ambientis: ergo &c.

Resp. hinc privationem sumi non exactè, sed pro negatione, cui annexa est exigentia, & aptitudo, quæ non est tamen ibi, ubi est negatio; exigentia enim est in corpore, intra cujus latera est vacuum; negatio verò in ipso vacuo: quare corpus vacuum, cum sit pars universi, exigit utique unionem suam cum aliis partibus: ergo exigit vacuum tolli, non à sua substantia, in qua non est, sed à loco interjecto inter sua latera: sic quantitatem dicimus terminatam, quatenus habet negationem ulterioris extensionis. Porro quatenus terminata, duo dicit,



1. exigentiam vltterioris extensionis, 2. negationem ejusdem; cùm autem hæc vltterior extensio quantitati terminatæ addetur, non recipietur in eadem parte, in qua est exigentia vltterioris extensionis, sed in parte, quæ potest superaddi, & quæ verè non existit.

### §. III. *De motu in vacuo.*

**Q**UÆSTIO hîc esse potest de moribus, sive qui ab intrinseco petuntur, vt alteratio, & augmentatio, generatio, & corruptio: sive qui ab extrinseco, vt in projectis. Quare sit

I. **OBSERVATIO.** Motus localis multiplex; primus est progressivus, qui proprius animalis: secundus projectorum: tertius naturalis gravium, & levium, vel deorsum, vel sursum.

II. **OBSERVATIO.** Vacuum aliud totale; quod inane dicitur, vt si v. g. nulla res præter Deum existeret: aliud parziale, vt si daretur vacuum in schola, de quo hîc agitur, retinétque nomen vacui.

I. **ASSERTIO.** In vacuo partiali, motus, qui ab intrinseco petitur, fieri potest. Prob. quidni enim stupa contingens ignem, ab eodem calefiat, comburatúrque? quidni aqua calida se ad nativum frigus inibi reducat? hinc si quis bene pastus in vacuo collocaretur, & Deus vitam ipsi servaret (nam defectu aëris non posset in eo naturaliter respirare) in eo statu nutriri posset ex alimento sumpto, immò & augeri.

II. **ASSERTIO.** Motus progressivus, quo vnum corpus ab alio divelleretur, non posset in vacuo fieri: si v. g. aliquis pedibus pavimento affixus,

& toto reliquo corpore in vacuo positus sit.

Prob. quia deambulando, pedes à pavimento dissociaret: at non potest fieri dissociatio pedum à pavimento, quia vacuum induceretur; corpus enim separaretur à corpore, nullo in ejus locum succedente; hinc ex pleno non potest projici lapis intra vacuum, etiam ab Angelo. Item emissæ ex tormentis bellicis in illud vacuum globi hærent ad extimas partes pleni, nec vacuum subirent. Nec dicas, tunc unum vacuum confectum-iri, altero destructo, nam id naturaliter fieri nequit, quoties corpora dissociantur; hinc corpus in vacuo in duas partes dividi non posset, nec quisquam calamo scribere, quia partes corporis per divisionem desinere esset contiguæ, & calamus à charta divelli deberet, fursúmque attolli, & ita amitteret contiguitatem cum charta.

III. ASSERTIO. Motus vectionis in vacuo fieri potest; quidni enim Angelus lapidem secum per vacuum deferat?

IV. ASSERTIO. Motus animalis progressivus fieri etiam naturaliter posset, dummodo mobile à pavimento non divelleretur, quamvis alterum in locum illius non sufficeretur. Prob. quia animal in vacuo virtutem motricem servaret incolumem, nec medio indigeret, ut ipsam exerceret, nec aliunde per ejusmodi motum fieret separatio corporis ab alio; hinc posset homo v. g. os apertum claudere, manum elatam deprimere.

V. ASSERTIO. Fieri etiam potest ab Angelo motus projectionis. Prob. 1. quia nihil impediret, 2. quia posset deferri lapis in vacuo fursum versus, vel ab Angelo, vel à manu ab aliis partibus divulgatus: ergo posset impelli, quia impetus est loco de-

ferentis, & quasi vicarius projicientis, quem sibi substituit.

V I. A S S E R T I O. Motus gravium, & levium, potest fieri, etiam naturaliter, in vacuo partiali. Præ omne corpus grave, quod est intra mundum, & pars quædam illius, si à suo toto avellatur, appetit per vim naturalem uniri suo toti, & in centrum rendere: talis est ille lapis in vacuo partiali positus. Dixi in vacuo partiali, non totali, quia cum in vacuo totali non sit centrum, nec deorsum, nec sursum, ibi non est finis, aut terminus motus gravium, aut levium: ergo nec naturalis, quia cessante fine, cessat motus ad finem.

V I I. A S S E R T I O. Motus gravium, & levium, qui fieret in vacuo, non esset instantaneus.

Probatur: Omnis motus localis est successivus: motus, qui fieret in vacuo, esset motus localis: ergo successivus, adeoque non instantaneus. Majoris probatio petitur ex multis capitibus, 1. ex mobilis ipsius extensione; cum enim mobile habeat partes extensas in ordine ad locum, non potest una illius pars eundem simul locum occupare cum alia: ergo dum una pars incipit occupare terminum aliquem motus, nondum pars altera eundem occupare potest, sed in proxima parte temporis occupabit. 2. Ex distantia terminorum; cum enim terminus à quo, non sit immediatus termino ad quem, sed medium habeat interjectum actu, vel potentiâ, utrique mobile non potest simul, & semel in utroque reperiri, sed prius in uno, & posterius in altero existere debet. 3. Ex medii resistantia; quod enim medium rarius, è celerior motus; quod autem densius, è tardior, quia plus resistit medium densum, quàm rarum. 4. Ex fini-

ta virtute moventis, quæ pro majori, aut minori robore celerius, aut tardius movet. 5. Ex natura motus, & ubi fluentis, quæ ambo, etiam sublatâ medii resistantiâ, successivè produci debent. Denique ex qualitate contraria, quæ inest mobili, resistitque motui contrario: sic qualitas lapidi sursum projecto impressa, eidem primum relabenti obsistit, motumque tardat, quia vis illius nondum penitus exhausta, sicut qualitati eundem lapidem sursum tollenti innata gravitas lapidis obnititur; hinc

Sic arguo, & assertionem confirmo: Si lapis moveretur in instanti, vel cum est in termino à quo, vel cum est in termino ad quem, vel cum in neutro est termino, sed inter utrumque. Non cum est in termino à quo, quia nondum incipit moveri: non cum est in termino ad quem, quia lapis à motu quiescit: non cum in neutro est termino, quia inter duo instantia debet pars temporis dividua intercipi; duo enim instantia non magis possunt sibi esse immediata, quàm duo puncta: ac proinde inter instans A, quo lapis est in termino à quo, & instans B, quo est in termino ad quem, interjacet aliqua duratio, seu pars temporis dividua, cui motus lapidis respondet, adeoque successivus est.

Denique sit vacuum à concavo lunæ ad terram usque, in quo columna à terra ad lunæ usque concavum pertineat, juxta quam lapis demittatur; tunc si motus lapidis fiat in instanti, lapis ille licet perexiguus, simul respondebit, & adæquabitur toti columnæ, vel non adæquabitur; primum fieri non potest: ergo superest, ut ei successivè respondeat, priusque sit juxta unam partem; deinde

juxta alteram : & ita deinceps , donec columnam emensus , ad terram pervenerit.

Colliges ex dictis , licet ex mediâ resistantia petatur successio motûs , non tamen ex ea , ut ex causa adæquata peti , sed ex aliis principiis v. g. ex oppositione terminorum , ex virtute determinata , & limitata moventis , ipsiusque motûs indole , qui cum sit fluxus quidam , & tendentia à quodam , per quoddam , in quoddam , hoc est , à termino à quo , per medium , ad terminum ad quem , successionem ex natura sua includit.

#### § IV. *Diluuntur objecta.*

**O**B I E C T I O I. Ibi nullus fit motus , ubi nulla vis cælestium corporum : in vacuo nulla vis est cælestium corporum : ergo nullus est motus.

Resp. dist. maj. Nullus motus intrinsecus generationis , aut corruptionis , transeat : nullus motus localis gravium , aut levium corporum , nego ; quis enim credat influentias cælestes ad motum localem usque eò necessarias , ut sine illis fieri nequeat , lapis in medio aëre hæreat pendulus ?

Instabis I. In vacuo nec est deorsum , nec sursum : ergo nec gravia , nec levia in eo moveri debent.

Resp. dist. antecedens : In vacuo non est sursum , aut deorsum , ratione ipsius vacui , esto : ratione corporum , quæ sunt intra , vel extra vacuum , nego ; quamvis enim partes vacui secundum se spectatæ , & inter se collatæ non sint superiores , aut inferiores , tamen comparatæ cum corporibus adjacentibus , respectu corporis in vacuo existentis habent rationem superioris , & inferioris , sicut

partes orbis aliæ sunt sursum, aliæ deorsum.

Instabis 2. In non ente motus fieri non potest : vacuum est non ens : ergo motus in eo esse non potest.

Resp. dist. minorem : Vacuum est non ens simpliciter, vt chimæra, nego : secundum quid, concedo ; est enim ens virtute, & potentiâ, quia potest corpore aliquo repleri.

Objicies 2. Corpus in vacuo constitutum, non esset amplius pars vniuersi : ergo non ferretur amplius gravitate sua ad terram, aut levitate ad concavum lunæ.

Resp. dist. ant. Non esset amplius pars vniuersi actu componens, concedo : potentiâ componens, nego ; haberet enim semper inclinationem tendendi versùs ea corpora, quibus affinius esset.

Objicies 3. Omnis motus fit ad locum : in vacuo nullus est locus : ergo nec motus.

Resp. dist. maiorem : Ad locum internum, concedo : ad locum externum, subdistinguo : actuale semper, nego : possibile saltem, concedo.

Objicies 4. Corpus, quod moveretur in vacuo, efficeret novum vacuum ; relinqueret enim vacuum sibi susceptum in spatio, à quo exiret.

Resp. dist. Efficeret vacuum, dissociando corpora, nego : non dissociando corpora, concedo ; corpus enim in vacuo positum, jam se junctum esset ab aliis vniuersi partibus, nullumque adeo faceret ipsarum divortium, sed novum vacuum faceret, vetere sublato, & ita damna lucris compensaret, vnde maneret idem vacuum æquivalenter.

Objicies 5. Aristoteles tex. 64. & sequentibus, negat motum in vacuo fieri posse : ergo ex mente illius motus in vacuo fieri non potest.

Resp. dist. ant. Negat ex hypothesi sententiæ veterum, qui medium, ut conditionem ad motum prorsus necessariam requirebant, concedo: absolute, & ex rei veritate, nego.

Instabis: Corpus in vacuo existens non distaret ab aliis corporibus, adeoque non deberet ad illa moveri; non distaret autem, quia nullum medium haberet interjectum.

Resp. Licet non haberet medium actu interjectum, habiturum tamen potentiâ, posset enim interjici aliquod corpus, quod sufficit.

Objicies 6. in 7. assertionem, ubi nulla est resistentia, actio fit in instanti, ut cernere est in illuminatione aëris: in vacuo nulla est resistentia: ergo motus fit in instanti.

Resp. dist. majorem: Vbi nulla est resistentia, nec repugnantia, concedo: ubi non est resistentia, & est aliqua repugnantia, nego; at in vacuo, licet nulla sit resistentia ex parte medii, aliqua tamen est repugnantia, tum ex parte motus ipsius, tum ex parte terminorum inter se oppositorum, & dissitorum, quæ repugnantia non reperitur in illuminatione aëris, aut creatione substantiæ Angelici v. g.

Objicies 7. Ut se habet vacuum ad plenum: ita motus factus in vacuo ad motum factum in pleno: nulla est proportio inter vacuum, & plenum; illud enim est non-ens, hoc verò ens: ergo nec proportio inter motum factum in vacuo, & motum factum in pleno: at si motus factus in vacuo, successivus foret, inter utrumque proportio esset: ergo debet esse instantaneus.

Resp. distingo minorem: Nulla est proportio inter vacuum, & plenum, quoad resistentiam me-



dii, concedo: quoad distantiam terminorum, nego; unde sequitur, licet nulla sit proportio inter motum factum in vacuo, & motum factum in pleno, ratione resistentiæ, esse tamen aliquam ratione distantiae terminorum, adeoque ratione successionis, quæ ex incontinentia terminorum, ut cum D. Thoma loquar, oriri solet.

Nota tamen cæteris paribus, motum gravium, & levium in vacuo celeriores fore, quam in pleno, quia non resisteret medium in vacuo, resisteret autem in pleno: quare dum dixit Aristoteles motum impossibilem esse in vacuo, quia foret instantaneus, eò quod non esset mediæ resistentia, id non ex propria mente, sed ex veterum Philosophorum, in quos agebat, sententia dixit; est enim argumentum ad hominem, hoc est, ad veteres Philosophos, qui totam motus determinationem in velocitate, & tarditate à resistentia mediæ petebant: unde rectè arguit contra eos, motum gravium, & levium, si daretur in vacuo, fore instantaneum.

Quæres, quinam motus in vacuo totali, seu in inani fieri possent?

Resp. 1. circularem divinitus, immò & naturaliter fieri posse; quid enim impediat Angelum, quominus corpus aliquod sphericum in totali vacuo nativâ virtute circumagat?

\* Resp. 2. motum gravium, & levium, qui rectus sit, quibusdam videri impossibilem, quia in puro inani non est locus sursum, aut deorsum, cum in eo centrum nullum sit; quibusdam tamen videtur possibilis, saltem divinitus, quia tunc esset motus ad novum ubi internum.

Resp. 3. mundum totum, ut nunc est, non posse

moveri motu recto, saltem naturaliter, licet divinitus possit. Ratio est, quod Empyreum sit immobile, utpote sedes Beatorum; certè in Apocalypsi cælestis Ierusalem dicitur in quadro posita; quadrata autem figura immobilitatem arguit.

Objicies: Si corpus posset moveri motu violento in inani, deberet totus mundus moveri, ad saltum unius hominis, quia tunc aër factæ capite saltantis divisioni resistit, & aliunde mundus in inani positus, non resistit motui, quia nec resistit mundi gravitas, nec medii resistantia.

Resp. nego sequelam, quia vis motrix hominis minor est resistantia mundi quietem propriam, tanquam suum bonum, quantum in ipso est, conservare nitentis.

Instabis 1. Ingens butyri massa in inani non divideretur à sagitta, sed ante sagittam moveretur: ergo à pari mundus moveretur à saltante.

Resp. nego conseq. Massa enim illa non tantum resisteret, quantum sagitta impelleret.

Instabis 2. Singuli Angeli, applicando vires, saltem movebunt mundum.

Resp. nego: Quia Empyreum est immobile naturaliter; & verò cum corpora alia sint mobilia, ut sol, alia motum habeant quieti admixtum, ut elementa, & mixta; debuit Empyreum esse prorsus immobile, aut certè si ad aliquod spatium moveretur, nemo tum adverteret.

Quæres 2. An si lapis inciperet moveri in inani, semper moveretur? Respondent aliqui tandem impetum à lapidis gravitate corrupendum, non ut lapis aliquo recideret, quia tunc nullus terminus foret, quò recidere posset, sed ut quiesceret; gravitas enim duo præstat lapidi, primum, ut si à

centro avellatur, moveatur deorsum; secundum, ut quiescat: ergo sicut impetum corrumpit, ut lapis deorsum feratur, ita debet corrumpere, ut lapis aliquando quiescat, cum motus deorsum fieri nequit, ut contingeret in inani: quare tunc lapis merè quiesceret, quia motus perpetuus frustrà foret in corpore; gravitas enim corporibus à natura ideo data fuit, ut vel in locum suum redeant, si ab eo avulsa sint, vel in eodem quiescant, ubi ipsum attingere: vel certè si non sunt in loco, nec locus sit ad quem tendant, ut merè quiescant. De loco, & vacuo tantum, jam de tempore.





# PARS QVINTA PHYSICÆ VNIVERSALIS,

AD LIBRVM QVARTVM ARISTOTELIS.

*De duratione, & speciebus illius.*

**I**NTER nativas entis physici affectiones numerantur duratio, & tempus, seu quod idem est, durare, & esse in tempore: quare de iis disputat Philosophus hoc libro quarto à textu 87. vsque ad finem, cuius ut vestigiis insistam, sit

---

DISPVATIO VNICA.

*De duratione.*

**D**URATIO genus est, tempus illius species; species non antè intelligitur, quàm genus ejusdem probè notum sit: itaque priùs de durationis natura, quàm de temporis ipsius indole agendum nobis est.

ARTI-

## ARTICVLVS I.

*Natura durationis, & species.*

**T**RIA hîc de duratione examinanda , 1. quid sit : 2. quotuplex : 3. quomodo à re durante distinguatur.

§. I. *Quid sit duratio.*

I. OBSERVATIO. **D**URATIONIS notio duplex est ;  
VATIO. **D**alia quid nominis , alia quid rei.

II. OBSERVATIO. Duratio quid rei sumi potest vel absolutè , vel connotativè , & cum respectu ad aliud.

I. ASSERTIO. Duratio quid nominis tralatitiè dicitur à duritie corporis , quâ perseveranter resistit rebus molestis , & arduis ; Aristoteli quando.

II. ASSERTIO. Duratio absolutè spectata definitur permanentia rei in esse ; connotativè autem ratio existendi in tempore vel reali , vel imaginario , seu coexistentia rei cum tempore , aut forma , per quam res est existens in hoc tempore potiùs , quàm in alio , fuisse in præterito , esse in præsentî , fore in futuro : coexistisse hesternæ diei , coexistere præsentî , & coexistura crastinæ , plus , vel minùs durare dicitur ; hinc

Duratio interna cujusque rei creatæ partim convenit cum vbi , partim discrepat. Convenit 1. quia sicut habet ubicatio ex se , ut faciat rem esse alicubi independenter ab extrinseco spatio , etiam imaginario ; quoad nos autem dependenter ab extrinseco aliquo spatio imaginario , aut reali : ita duratio fa-

cit rem esse aliquando secundum se absque vilo tempore extrinseco ; quoad nos per respectum ad aliquod tempus reale , aut imaginarium. 2. Sublato vbi interno , res non amplius intelligitur esse in hoc loco : sublata item hac duratione internâ , aut certè æquivalenti , res non potest amplius intelligi durare in hoc tempore. Discrepat autem tum quòd diversum ab vbi prædicamentum constituat : tum quòd omnis duratio rei creatæ successivâ sit , vbi autem non modò fluens detur , sed etiam permanens.

### §. II. *Quotuplex sit duratio.*

**P**RIMA partitio durationis est in durationem rei spiritualis , & in durationem rei materialis , quarum rursus subdivisio multiplex , pro diversa specie rerum tum spiritualium , tum corporatarum.

Secunda relativè ad substantiam , & accidens , fit in durationem rei substantialis , & rei accidentalis , quarum quoque diversæ species pro diversa indole terminorum.

Tertia est in durationem rerum successivarum , quæ non totæ simul permanenter existunt , sed jugiter fluunt , cujusmodi est motus , & in durationem rerum permanentium , quæ secundum se totas existunt , & non per partes post partes , sive duratio ipsarum sit indivisibilis , cujusmodi est Dei æternitas , sive sit mutabilis , & successivè fluens , ut duratio interna Angeli , & hominis , aut tempus.

Quarta rei permanentis fit in æternitatem , ævum , & tempus. Ratio est , quia res vel ita perstat in suo esse , ut omnem mutationem tum quoad substan-

tiam, tum quoad accidens respuat; vel accidentalem admittat, non substantialem, vel vtriusque capax sit; si primum, est æternitas; si secundum, est ævum; si tertium, est tempus. Prima est, cum perfecta immutabilitate, tertia cum perfecta mutabilitate, secunda est mixta: prima est Dei vnus, secunda creaturarum substantiarum incorruptibilium, cuiusmodi sunt Angeli, anima rationalis, & materiæ primæ: tertia entium corruptibilium; prima caret initio, & fine; secunda habet initium sine fine; tertia initio, & fine clauditur. De prima, & secunda hîc pauca strictim delibo: de tertia, articulo sequenti fusiùs agam.

### §. III. *Quid sit æternitas, & ævum.*

I. OBSERVATIO. **Æ**TERNITAS sumitur tum negativè, tum positivè; negativè sumitur, quatenus negat initium, & finem, seu quatenus dicit negationem mutationis, tum à parte antè, tum à parte post; positivè, quatenus in se continet omnem durationem possibilem, vel ut alii volunt, quatenus concipitur extensionem habere existentiae infinitam; ut autem æternitatis ideam qualemcumque informes, sit

1. Propositio: Dens est verè æternus. Prob. 1. ex Aristotele 12. Metaph. c. 7. *Φαμὸν δὲ τὸν θεὸν εἶναι ζῶον αἰδίδον, ἄριστον: ὥστε ζῶν καὶ αἰὼν συνεχῆς, καὶ αἰδίδος ὑπάρχει τῷ θεῷ; τὸτο γὰρ ὁ θεός: dicimus Deum esse viventem, æternum, optimum; itaque vita, & ævum continuum æternumque est in Deo; id enim est Deus. Et lib. 2. de cælo, cap. 3. *θεὸς ἐνέργεια, ἀθανασία; τὸτο δ' ἐστὶ ζῶν αἰδίδος: Dei operatio est immortalitas; hoc autem est vita sem-**



*piterna : 2. ex Scriptura, Psal. 110. Tu autem idem ipse es, & anni tui non deficient : & Iacobi 4. Ego Deus, & non mutor, ex quibus sic arguo, Deus semper idem est, & immutabilis : ergo caret durationis initio, & fine ; igitur æternus.*

Probatum ratione, 1. Deus est ens absolutè necessarium, quia si omnia essent contingentia, possent actu non esse ; si possent actu non esse, possent non esse possibile ; dato enim quòd nullum esset, nullum esse posset ; non enim esse posset à se, quia quod non est, non potest esse causa sui productrix, nec ab alio, quia nullum esset aliud ; ex quibus rectè inferitur, ergo Deus est necessariò, itaque æternus. 2. Deus est primum ens, à quo sunt omnia, & quod est supra omnia : ergo tempus est ab ipso, & ipse est supra tempus, adeoque æternus.

11. Propositio : Æternitas definitur à SS. PP. 1. duratio principii, & finis expers : 2. perfecta immutabilitas : 3. uniformitas essendi : 4. momentum stans : 5. à Boëtio 5. de consol. Philosoph. interminabilis vitæ perfecta, & tota simul possessio. Dicitur 1. possessio, ut firmitas, & immutabilitas divinæ existentiae significetur. 2. Perfecta, hoc est, independens, inamissibilis, nihilque imperfectio- nis in se continens. 3. Tota simul, quia in æternitate nulla est successio ; nec enim dantur in Deo partes ullæ, quæ fuerint, aut futuræ sint, aut non sint, sed totum ejus esse, quod fuit, aut erit, est, unde in Deo est perpetuum hodie ex Augustino. 4. Vitæ, & quidem substantialis, quia enti perfectissimo convenit vita substantialis, denique interminabilis, hoc est, initio, & fine carentis ; hæc definitio est omnium perfectissima, quia complectitur reliquas æternitatis notiones, & ex ea proprie-

rates æternitatis concluduntur ; hinc patet discrimen multiplex æternitatis ab aliis durationibus.

1. Aliæ durationes pendent à Deo , æternitas à nullo ente pendet. 2. Nulla duratio creaturæ essentialiter est inamissibilis , quia quælibet creatura à Deo annihilari potest ; vna æternitas ex se amitti non potest. 3. Nulla duratio creata est possessio omnis perfectionis , æternitas contrà. 4. Alia quælibet duratio stare potest cum aliqua successione subjecti , saltem quoad aliquam cognitionem , volitionem , & vocationem ; æternitas excludit à subjecto suo successionem quoad omnem intrinsecam perfectionem , quia in æternitate nec est præteritum , nec futurum. 5. Duratio creata , vt multis placet , dicit in obliquo tempus imaginarium successivum , vnde duratio rei permanentis creatæ dicit successionem in obliquo ; æternitas constituit Deum præsentem , quantum est in se , omnibus temporum differentiis ; at

Quæres , an æternitas Dei admittat partes virtuales , quibus possit priori , & priori in infinitum tempori respondere ; an verò explicari debeat per ordinem ad productionem temporis , ita vt æternitas nihil aliud sit , quàm omnipotentia Dei , vt est productrix temporum , sicut immensitas nihil aliud est , quàm omnipotentia Dei , vt est productrix locorum.

Respondeo , qui immensitatem Dei explicant per partes virtuales intrinsecas , cohærenter ad sua principia , æternitatem per partes etiam virtuales intrinsecas explicare debere , quia sic est major consensus doctrinæ ; qui autem immensitatem virtute operandi loca definiunt , ipsam æternitatem virtute temporum opifice definire quoque

debere. Hanc sententiam D. Augustinus insinuat lib. ix. de civit. c. 5. *Quemadmodum*, inquit, *inanes sunt hominum cogitationes, quibus infinita imaginantur loca, cum locus nullus sit præter mundum: sic inaniter cogitant homines tempora vacantiæ ante creationem mundi, cum nullum sit tempus ante mundum.* Accedit Boëtius lib. 2. de Consol. prosa sexta, ubi negat Deum conditis rebus antiquiorem videri debere temporis quantitate, sed simplicis proprietate naturæ. Quid quòd S. S. PP. cum æternitatis mentionem faciunt, partium illius nusquam meminere, ipsæque Augustinus hanc quæstionem, cur mundus non sit prius conditus, vanitatis accusat, quia nullum est tempus ante mundum, & adverbium *antè*, significat tempus. Denique probatur à pari: non possunt admitti partes extensionis permanentis in divina immensitate sine imperfectione, quia una est extra alteram: & illa extracitas est radix extensionis actualis: ergo à pari admitti non possunt partes extensionis successivæ in æternitate, quia una conciperetur esse post alteram ob impossibilitatem reciprocam, quæ est radix successionis. Ad hæc, quis concipiat durationem infinitam constantem partibus, & infinitum extensum, aut partes durationis sine mutabilitate?

Dices esse tantum mutabilitatem virtuales, & partes virtuales, quæ excludunt imperfectionem. Contrà i. mutabilitas virtualis, licet concipiatur, & sit sine formali imperfectione, certè nunquam est sine virtuali imperfectione, sicut nec partes virtuales: at quælibet imperfectio Deo convenire non potest. Postremò si Dei æternitas habet extensionem infinitam partium intrinsecarum, &

virtualiter distinctarum antecedenter ad existentiam creaturarum, potuit etiam dari verus, & realis fluxus durationis creaturæ, sive temporis ab æterno, quam suo loco refellemus; hinc

Colliges 1. in duratione divina nullum esse ordinem prioris, & posterioris, nisi per denominationem extrinsecam petitam ab ordine prioris, & posterioris intrinseco creaturis, quas Deus producit. 2. Deum non aliter esse præsentem temporibus, quàm sua actione, quâ producit tempora, sicut nec præsens est locis, nisi per actionem ipsorum effectricem. 3. Deum non esse priorem mundo per diffusionem virtuales partium æternitatis, quarum una antecedit mundum, altera eidem coexistat, tertia ipsi superfit, si destruat, sed prioritate tantum virtutis, quo sensu intelligendus est D. Augustinus, cum libro 11. Confess. c. 13. respondet Deum præcedere tempora, & mundum celsitudine æternitatis semper stantis. 4. Propriè in æternitate nihil dari prius, aut posterius, si quæstio sit de prioritate reali, at non repugnat prioritate rationis dari, vel datum fuisse aliquo æterno aliud in signo rationis prius: sic scientia Dei, licet realiter prior sit, præcedatque omnes creaturas, à quibus proinde realiter non pender, tamen in signo rationis illis est posterior, & aliquatenus pender quoad determinationem objectivam, quia scientia præsupponit objectum scibile.

Objicies 1. Deus potuit creare mundum priusquam creavit: ergo debet admitti aliquod tempus, cujus respectu sumitur illud prius, & posterius; non tempus imaginarium, quia fictitium, ergo reale increatum, hoc est, æternitas, quæ partes alias aliis priores habeat.

Resp. dist. Deus potuit mundum prius negativè creare , id est , non pender ab ullo tempore , ut creet mundum , sed pro nutu suo produxit , concedo : prius positivè , quasi fuerit prius , nego ; hinc dum Deus dicitur esse ab æterno , sensus est quòd de eo affirmari existentia semper potuerit , quòd nunquam inceperit esse : denique quòd nullum potuerit existere tempus , quod ipse non produceret : quare definiri potest æternitas , potentia Dei productrix temporum , sicut immensitas potentia Dei effectrix locorum.

III. Propositio : Æternitas est quid positivum , tum quia definitur nomine positivo , nempe per possessionem , cui annexa est carentia terminorum : tum quia est omnipotentia , ut est temporum effectrix.

IV. Propositio : Duratio substantiarum incorruptibilem , dicitur ævum , seu æviternitas. Convenit rebus iis , quæ semel creatæ , postulant à Deo semper conservari , licèt absolutè annihilari à Deo possint ; ævum differt ab æternitate , quia perpetuum duntaxat est à parte post : à duratione rerum corruptibilem , quòd hæc ex natura sua deficere possit , & debeat ; illud minimè.

#### §. IV. *Quomodo duratio distinguatur à re durante.*

UNICA OB- QVÆSTIO hîc instituitur tan-  
SERVATIO. Q tum de duratione rerum crea-  
tarum ; nam æternitas est idem cum divina essen-  
tia.

I. ASSERTIO. Duratio distinguitur formaliter ab existentia rei. Probatur , quia utriusque sunt

diversi conceptus objectivi ; existentia enim dicit tantum formaliter positionem rei actualem extra causas , duratio verò quandam permanentiam inesse.

II. **A S S E R T I O.** Duratio distinguitur realiter à re durante , & tempore externo. Probatur 1. à pari , seu argumento ad hominem : ita se habet duratio ad rem durantem , & tempus , sicut vbi ad rem locatam , & locum : vbi distinguitur realiter à re locata , & loco , vt jam confecimus : ergo duratio distinguitur realiter à re durante , & tempore. Major probatur : ideo datur vbi realiter distinctum à re locata , & loco , quia res est indifferens , vt sit hîc , vel alibi , adeoque determinari debet per aliquam formam accidentalem ipsi superadditam , quam præsentiam localem dicimus : at Angelus v. g. de se indifferens est , vt existat hodie , vel cras , in hoc , vel alio tempore : ergo debet determinari per aliquam formam intrinsecam sibi superadditam , quæ duratio dicitur.

Negant paritatem adversarii , quia Petrus v. g. & hic locus possunt existere actu , nec tamen Petrus erit in hoc loco , sed in alio : vnde rectè infertur , Petrum esse formaliter in hoc loco potius , quàm in alio per vbi distinctum ab entitate Petri , & entitate loci ; contrà autem Angelus , & hic dies non possunt simul existere actu , quin Angelus duret hoc die : vnde malè infertur Angelum durare hac die per aliquid distinctum ab entitate Petri , & entitate huius diei.

Contra 1. Sicut potest existere res locata , & locus extrinsecus , licet in illo non constituatur : ita potest , & existere res durans , & tempus , in quo durat , & tamen in illo non durabit ; fac enim Deum

heri destruxisse corpus , quod hodie existit , utri-  
que fuisset illud corpus , & dies hodierna , & tamen  
in illa non durasset : ergo hoc quod est corpus illud  
hodie durare , est aliquid distinctum ab entitate  
illius , & hodiernæ diei. 2. Adamum existere hoc  
tempore , vel dicit tantum existentiam Adami , &  
existentiam temporis , vel aliquid tertium ab utro-  
que distinctum ; primum dici non potest , quia fuit  
existentia Adami , & diei hesternæ , & tamen Ada-  
mus non existit hesternâ die : ergo secundum dici  
debet , & ita duratio distinguitur realiter à re duran-  
te , & tempore.

Respondent , non sufficere existentiam Adami ,  
& diei successivam , sed simultaneam requiri , hoc  
est , debere simul sumi Adamum , & tempus , in  
quo durat , non unum post aliud. Contrà , sic urgeo ,  
1. quæritur hîc tantum , an duratio sit aliquid præ-  
ter entitatem rei durantis , & temporis , in quo  
durat , etiam secundum suam entitatem , & speci-  
ficativè consideranti : ergo non debet sumi simul ,  
& reduplicativè. Quemadmodum ut videas , an præ-  
sentia localis sit forma realiter distincta à re locata ,  
& loco , non est sumenda res locata cum loco ex-  
trinséco , sed præcisè secundum suas entitates ; de-  
inde tollatur omne tempus extrinsecum , adhuc  
Adamus durabit ex hypothesi , quòd Deus ipsum  
conserve : ergo non per coexistentiam ad tempus ,  
sed per durationem modalem dicitur durare Ada-  
mus. 3. Ludunt ambiguitate vocis istius , *simul* , ad-  
versarii ; cùm enim aiunt , Petrus potest existere  
simul cum hoc loco , absque eo , quod sit in hoc  
loco , vocem illam , *simul* , non sic accipiunt , ut  
per eam simultaneitatem localem significari ve-  
lint , ipsamque adeo vocationem localem inclu-



dat, per quam Petrus huic loco affigitur; at cū aiunt, non potest Petrus simul existere cum hodierna die, quin existat hodierna die, vocem hanc, *simul*: ita interpretantur, vt simultaneitatem temporis designet, atque adeo durationem temporis includat, per quam Petrus hodiernæ diei alligatur: quare sic formanda est comparatio, vt sit legitima. Sicut Petrus potest existere simul tempore cum isto loco, absque eo quòd sit in isto loco: ita potest existere simul localiter cum isto tempore, absque eo quòd duret isto tempore: & sicut Petrus non potest existere simul localiter cum isto loco absque vbi interno, ita non potest existere simul cum hoc tempore, quin duret hoc tempore. Quod vt clariùs fiat, temporis præteriti verba subjiciamus: potuit Petrus, & tempus aliquod extitisse absque eo quòd Petrus illo tempore extiterit; extitit enim primus annus mundi, & Petrus tantum millesimo: ergo Petrum extitisse in aliquo tempore, dicit aliquid ab vtriusque entitate distinctum. Item futurus est Antichristus, & annus proximus, nec tamen Antichristus futurus est anno proximo: ergo Antichristum futurum anno proximo, includit aliquid distinctum ab entitate Antichristi, & anni proximi; quid autem aliud præter durationis modum?

Probarur 2. Deus faciat, vt motus omnis quiescat, & interim vivat Petrus; deinde motus incipiat: in illa hypothèsi Deus non poterit dicere, quanto tempore duraverit tota illa motuum interruptione; vel enim dicet, metiendo durationem illius per ordinem ad partes virtuales æternitatis, vel ad tempus imaginarium, vel ad motum aliquem possibilem; primum dici non potest, quia probabiliùs nullæ sunt, deinde sunt posteriores in

ratione partium virtualium actu re durante ; non enim sunt partes nisi per assignationem , assignatio porrò non fit nisi per durationem formalem extrinsecam : ergo prius est aliquam rem creatam durare , quàm esse partes virtuales in ipsa Dei æternitate : ergo diurnitas illius durationis non potest peti à partibus virtualibus æternitatis , quæ licet darentur , essent tamen naturâ posteriores ipsa duratione formali rei creatæ , nec possent naturam illius durationis , nisi à posteriori nobis indicare. Non secundum , 1. quia tempus imaginarium ad summum est tantum tempus possibile , durare autem est denominatio realis , actualis , & intrinseca rei duranti : ergo non potest peti ab aliquo extrinseco possibili. Et verò si per impossibile , nihil extrinsecum rei duranti possibile foret ; dummodo intelligatur cum suo esse , & in illo perseverare , intelligetur formaliter durare ; non quòd illa perseverantia idem sit cum re durante , sed quòd per formam in se receptam duret intrinsecè ; deinde illud tempus imaginarium quod aliud esse potest , quàm plures durationes in infinitum possibles : at illæ durationes eodem semper modo se habent , si-ve Angelus v. g. producat prius , si-ve non : ergo illum semper eodem modo denominabunt durantem , quod falsum. Ratio est , quòd detur tota entitas Angeli , quocumque modo producat , & tempus imaginarium eo quo potest modo existens ; cur igitur modò dicitur plus , modò minus durasse ? Non tertium , 1. quia cum diversi motus in velocitate sint possibles nunc temporis , non est potior ratio , cur sint nunc per respectum ad hunc motum possibilem , quàm ad alium ; deinde motus , qui est possibilis hodie , est quoque cras possibilis : ergo

per ordinem illum res non potest dici durare potius hodie, quam cras: ergo Deus non poterit definire quantum duraverit, nisi admittatur ille modus durationis.

III. **A S S E R T I O.** Modus durationis distinguitur realiter ab actione, per quam res durans exit à causa sua.

Probat<sup>ur</sup> 1. quia actio productrix est indifferens, ut sit horâ primâ, vel secundâ; Angelus enim, qui hodie creatur à Deo, potest eadem omnino actione post annum produci; duratio autem essentialiter facit rem esse nunc, non aliàs: ergo actio rei productiva realiter distinguitur ab ipsius duratione.

2. Ipsa actio durare potest, non se ipsâ: ergo per durationem à se distinctam. 3. Si duratio idem sit realiter cum actione productiva; quidni à pari ipsa entitas durationis dicatur munere frigoris, aut caloris, albedinis, vel nigredinis defungi; ita ut hominem esse nunc hîc, & esse frigidum, aut calidum, nihil aliud sit, quam certâ quâdam actione modali à Deo fieri, quæ hoc ipso alia foret, quod aliquid horum mutaretur. 4. Actio sæpius est permanens, duratio autem rei creatæ semper successiva, nam sit

- IV. **A S S E R T I O.** Duratio rei creatæ est realiter successiva. Probat<sup>ur</sup> 1. Illud est successive, cuius partes aliæ aliis succedunt sine vlla interruptione, & mora: tales sunt partes durationis creatæ: v. g. Angeli, cuius durationis est aliquid hodie, quod non erat heri: ergo duratio rei creatæ est realiter successiva. 2. Nisi duratio rei, etiam permanentis, putâ Angeli, successiva sit, Angelus semel durans, à Deo non poterit destrui, seu annihilari, quia per eandem omnino durationem duraret heri,

hodie, cras, & ita per totam æternitatem, à parte pòst: ergo Angelus semel durans, necessariò deberet coexistere toti æternitati divinæ; haberet enim illud omne, per quod formaliter æternum durare posset; sicut si detur Angelo ubicatio, huic scholæ indivisibiliter coextendens, necesse est Angelum toti scholæ correspondere: at repugnat perfectissimo Dei dominio, rem semel à se productam non posse quovis momento destruere. 3. Duratio est essentialiter modus, à quo res habet, ut duret hodie, cras &c. implicat autem aliquam creaturam habere hodie suam durationem, per quam cras durabit, vel duravit heri; secus distingui non possent in ea fuisse, esse, & fore; hæc enim omnia ab una eadémque forma peterentur, quod creaturæ ex natura sua defectibili repugnat.

Dixi durationem rei creatæ successivam esse; non Dei ipsius; cum enim duratio Dei sit ipsa æternitas, æternitas autem tota simul sit, immò & ipse Deus, nullam successionem admittit; & quemadmodum Deus est necessariò, & ubique, ita nec est indifferens, ut sit nunc, & aliàs, sed per suam entitatem necessariò semper est.

Colliges ex dictis, 1. rem non durare formaliter per suam entitatem absolutè, aut relativè sumptam, sed per modum realiter distinctum: 2. cum duratio rei definitur permanentia rei in esse, non eo sensu dici, quòd ipsa duratio eadem indivisibiliter permaneat, est enim successiva, sed hoc sensu dici permanentiam, quod vel rei permanentis aliquando sit, vel quod per eam res intelligatur perseverare in suo esse, licèt ipsa jugiter fluat. 3. Res etiam successivas, v.g. motum circularem cæli, aut motum localem habere suam durationem, quia ejus-

modi motus de se indifferens est, vt fit in hoc, vel illo tempore, adeoque determinari debet per modum durationis ad existendum in hoc potius tempore, quàm in alio; vnde sequitur tempus præteritum, si materialiter sumitur, posse diuinitus reproduci, quamvis formaliter sumptum, hoc est, pro duratione motus ipsius, nec reproduci, nec redire possit. Nec dicas, ad præteritum non datur potentia; nam dist. id est, id quod est præteritum non potest non esse præteritum, concedo: id est non potest reproduci, subdistinguo, si formaliter sumitur, concedo: si materialiter, nego. 4. Ipsam durationem perinde atque actionem, quâ producitur, non durare per aliam durationem distinctam, sed duratio se ipsâ durat formaliter, actio autem illius productrix per terminum suum; hinc res aliæ dicuntur durare formaliter per durationem quasi per terminum, per actionem durationis effectricem causaliter, & quasi per viam, & medium.

### §. V. *Diluuntur objecta.*

**O**B I I C I E S I. in 2. assertionem, ex eo præcisè, quò intelligo Angelum A nunc existentem; sublato quolibet alio, intelligo nunc durantem: ergo superfluous est modus durationis realiter distinctus ab entitate Angeli, & temporis præsentis.

Resp. nego consequentiam; cùm enim intelligo Angelum A nunc existentem, non vnâ Angelii existentiam ab ipsa duratione præcisam, sed simul cum illa durationem intelligo: quemadmodum dum intelligo Petrum hîc existentem, non ipsam tantum Petri entitatem, & loci, sed ipsum etiam

vbi internum intelligo, à quo habet formaliter, vt sit hîc præsens.

Objicies 2. Ab eo res quælibet habet, vt existat nunc, à quo habet, vt existat : habet ab existentia sua formaliter, vt existat : ergo ab eadem habet, vt duret.

Respondeo, nego maiorem : Duo quippe includit existere nunc ; alterum substantiale, nempe existere, quod est effectus formalis existentiae : alterum accidentale, nempe nunc, quod est effectus formalis durationis : sicut Petrum existere hîc duo importat, primum, existere, secundum, hîc : primum confert existentia : secundum ipsum vbi internum.

Instabis : Existentiâ rei relativè spectatâ ad tempus, facit rem durantem : ergo non opus est recurrere ad modum durationis.

Resp. 1. nego antecedens, quia res, sublato quolibet tempore externo, adhuc durat, potestque plus, vel minus durare : ergo superest alia duratio, deinde tempus externum est mensura durationis meæ : ergo præter tempus illud datur duratio distincta. Resp. 2. dato antecedente, nego consequentiam, quia existentia rei relata ad tempus externum, dicit fundamentum relationis ; illud porro fundamentum est ipsa duratio.

Objicies 3. Esto : duratio distinguatur à re durante in primo instanti productionis rei, certè insequentibus instantibus distinguere non debet ; ideo enim requiritur in primo instanti productionis, quia est indifferens, vt existat in illo potius tempore, quàm in alio ; at insequentibus instantibus purâ in secundo, & tertio, non est indifferens ; ex hypothesi enim quod præfuerit in instanti præce-

denti, & subinde conservetur secundum substantiam, non potest nisi secundo, tertio, aliisque consequentibus instantibus conservari: v. g. sumamus Petrum, quem suppono à Deo productum in instanti A durasse; sic argumentor, antequam Petrus idem concipiatur durare in instanti B proxime sequenti, debet prius concipi secundum suam entitatem post instans A, saltem in aliquo priori naturæ, cum per illam suam entitatem sit causa materialis durationis sequentis in instanti B: at hoc posito conceptu objectivo Petri existentis post instans A, censetur determinatus ad existendum in instanti B; ita ut etiam divinitus non possit in illo non existere.

Respondeo, nego hypothesim, ut jacer; Non enim in instanti sequenti B, in quo res liberè conservatur, & durat, debet, pro priori naturæ, concipi entitas illius post instans A præcedens, sed tantum existens absolutè, & secundum se, sive ut alii loquuntur, cum indistantia negativa, quatenus non concipitur positivè distans ab instanti B, ita ut nullo modo concipiatur instans præcedens A, quo posito, remanet res indifferens, ut duret, vel non duret in instanti B: ergo debet determinari per durationem ad instans B.

Objicies 4. in 3. assertionem: Omnis modus debet proportionari rei modificatæ: duratio est modus rei durantis; res autem durans aliqua est permanens, & tota simul: ergo & duratio illius debet esse permanens, & tota simul. 2. Datur præsentia localis, quâ res existit tota in toto loco, & tota in singulis loci partibus: ergo & possibilis aliqua duratio, per quam res duret indivisibiliter, hoc est, existat tota in anno, & tota in singulis illius parti-



bus successivis, & dividuis, & quæ proinde indivisibilis in se, tota simul, & permanens.

Resp. ad 1. distinguo majorem: Modus debet esse proportionatus rei entitativè, & quoad omnia, nego: quoad aliqua, & quantum opus est, ut ab illo res modificetur, & determinetur in suo genere, concedo: unde duratio successiva proportionatur rei permanenti, non quidem secundum proprium existendi modum, sed quoad vim determinandi ad hanc potius differentiam temporis, quam ad aliam. Ad 2. dispar ratio est, quod datâ vocatione indivisibili, nihil sequatur absurdi; datâ autem ejusmodi duratione, res futura sit indefectibilis intrinsecè, ipsaque duratio in quolibet instanti sequenti annihilari à Deo non possit, quod supremum Dei dominium destruit.

Quæres hîc, quibus rebus distinctæ durationes convenient?

Respondeo iis omnibus rebus convenire, quæ durare possunt diversis ab invicem temporibus, cujusmodi sunt materia, & forma substantialis, sive spiritalis illa sit, sive materialis: 2. accidentia omnia realia, quæ à substantia distinctione majoris realitatis distinguuntur, ut quantitas, & qualitas: 3. modi, ut actio, unio, vbiatio, si excipias actionem, cujus terminus est ipsa duratio, & vbiatio ipsa, quâ duratio constituitur in loco.

### A R T I C V L V S I I I.

*De tempore, seu de duratione externa  
rerum corruptibilium.*

**T**EMPORE nihil communius, sed nihil explicatu difficilius, ut meritò D. Augustinus dixe-

rit lib. II. Confess. cap. 14. *Quid est ergo tempus ? si nemo ex me quærat, scio, si quærenti explicare velim, nescio* ; illius naturam animo informamus quidem, estque frequens in omnium ore, sed non pari facilitate explicamus. Ne tamen difficultatis metu, hanc quætionem prætermisisse dicamur, quinque de tempore examinabimus ; primum quidem, an sit : secundum, quid sit : tertium, quotuplex : quartum, ex quibus componatur : quintum, quænam sint in tempore.

### §. I. *An dêtur tempus reale.*

I. A S S E R. **D**A T V R tempus reale. Probatur **x. T I O.**

**Q**uod desinere potest, est aliquid reale : tempus aliquando desinet ; nam ex Apocalypsis cap. I. *Iuravit Angelus, quòd tempus non erit amplius.* 2. Tam certum est dari tempus, quàm certum est dari motum ; tempus enim est mensura motûs : datur motus, & quidem perennis, cujus partes continuâ successione fluant : ergo & tempus. 3. Tempori conveniunt proprietates reales, nempe esse longum, vel breve, sicut convenit motui esse tardem, aut velocem ; hinc Philosophus ait somnum dormientibus brevem videri, quia à somno excitati finem præteritæ vigiliæ, & initium sequentis, non enumeratis intermediis, connectunt.

Vt solvas argumenta, memineris tempus sumi vel ut est actu mensurans, vel ut est potens mensurare ; ut actu mensurans, pender à mente motum cum motu comparante : ut potens mensurare, duplici modo sumitur, 1. ut est certæ extensionis, quæ apta sit ad mensurandos alios motus, & ita reale est : 2. ut certis terminis jam circumscribitur,

destinatúrque ad alios motus mensurandos, & ita pender ab anima: sic vlna in esse longitudinis non pender ab intellectu, at in esse vlnæ pender.

Objicies ex Aristotele text. 131. tempus pender ab anima, ita vt si intellectus esset impossibilis, tempus esset impossibile: ergo tempus non est ens reale, sed rationis.

Resp. distingo ant. Tempus, vt est actu mensurans, pender ab anima, concedo: vt est aptum mensurare, nego antecedens, & consequentiam.

Objicies 2. Illud non existit, cuius partes non existunt: partes temporis non existunt, quia præteritum non est amplius, futurum nondum est, præsens autem non est pars temporis, vtpote aliquid indivisibile, tempus verò est quid continuum.

Respondeo 1. hoc argumento probari, quòd non detur motus, qui tamen sensibus percipitur. Resp. 2. partes temporis existere non permanentes quidem, & ratione sui præcisè, sed fluenter, & ratione totius, in quo sunt; hinc id quod jam effluxit, est & quod futurum est, jam est, sed fluenter, & in toto v.g. hora in die, dies in mense, mensis in anno, &c. Sed de his postea.

### §. II. *Quid sit tempus.*

**V**A R I Æ fuerunt de natura temporis veterum Philosophorum sententiæ, quas Philosophus textu 93. recenset: Plato motum vniuersi definiebat: Pythagoras sphæram mundi: Stoïci motum simpliciter omnes ad temporis naturam minùs aptè: quare vt natura illius innotescat, sit

**I. OBSERVATIO.** Licèt tempus non sit formaliter motus, ipsi tamen multum affine est, 1. quia

non potest cognosci sine motu ; hinc qui dormiunt , quia inter dormiendum ad motum non attendunt , statim à somno , nisi aliunde sciant , numerant tempus , quo primùm indormierunt , immediatè continuum tempori quo surgunt , vt jam observavi ; hinc etiam tempus colligimus ex motu solis , aut alterius corporis , vnde infert Aristoteles , si semper esset eadem rerum facies , non posse cognosci tempus : 2. ambo habent prius , & posterius ; motus quidem ratione magnitudinis , quæ priùs decurritur per partes viciniores , quàm per remotiores ; tempus verò propter motum habet prius , & posterius , ideòque dicitur mensura motûs ; certè quærenti , quandiu ambulaverim , respondere soled , per horam , &c. Rectè igitur Aristoteles pronuntiat tex. 96. quamvis tempus non sit motus formaliter , tamen non sine motu esse.

I I. OBSERVATIO. Ad perfectam mensuram tres conditiones requirunt Philosophi , 1. vt sit homogenea rei mensurata , 2. vt sit certæ , ac determinatæ quantitatis : 3. vt sit communis , adeòque notissima.

I I I. OBSERVATIO. Numerus duplex distinguendus , alter abstractus , sive numerans , vt binarius , & ternarius ; alter concretus , seu numeratus , aut numerabilis , vt duo , tres homines. Numeratus vel est discretus re ipsâ , qui ex rebus realiter divisis , separatîsq; coalescit , vt numerus decem hominum : vel est per mentem tantùm discretus , quia rebus perenni serie inter se continuatis , ac sola mente secretis convenit , vt numerus viginti vlnarum in panno nondum diviso.

I. ASSERTIO. Tempus rectè definitur , numerus motus secundùm prius , & posterius , ita

Aristoteles 4. Phys. c. 11. Dicitur 1. numerus non abstractus, & numerans, sed concretus, & numeratus ex 4. Phys. tex. 100. *Tempus autem*, inquit, *numerus est, non quo numeramus, sed qui numeratur.* Item non accipit numerum re ipsâ discretum, sed solâ cogitatione, quia ait numerum esse earum rerum, quæ realiter inter se cohærent, & sola cogitatione sejunguntur. 2. Motus, nempe cujuslibet successivi, quia fit in tempore, quanquam hîc per motum Aristoteles intelligit præsertim motum cæli, putà primi mobilis, vel solis, quia illis congruunt conditiones mensuræ communis; motus enim syderum est certissimus, constantissimus, omnibus denique notissimus; hinc reliquarum rerum durationem per motum solis metimur, dividimusque motum cælestem in annos, dies, horas, quadrantes, & minutias: motus item solis percurrentis totum zodiacum, incedendo super eclipticam, annus dicitur constans 365. diebus, 6. horis, & aliquot præterea minutiis: spatium verò, quo decurrit signum vnum zodiaci, constans triginta gradibus, dicitur mensis; hora denique spatium dicitur 15. graduum æquatoris, quos intra horam sol decurrit. 3. Secundum prius, & posterius, ut significetur per tempus non quaslibet partes motûs quocumque modo sumptas esse mensurabiles; tempus enim non metitur partes internas motûs in ordine ad subiectum, cui insunt; non enim metimur per tempus, quàm longè motus extendatur, qui à capite animalis ad ejusdem pedes pertinet, sed partes motûs, quatenus applicant mobile ad partes spatii viciniore, ac remotiores. Ratio enim prioris, & posterioris convenit motui dependenter ab extrinseco, nempe à magnitudine spatii; nam

cūm motus sit mobili intrinsecus, & divisibilis pro variis partibus mobilis, ita ut vna pars motus sit in vna parte animalis, v. g. in capite, alia in pede; istiusmodi partes mobili intrinsecæ non conveniunt secundū prius, & posterius ratione partium intrinsecarum mobilis, quia simul motus est in capite aliisque partibus, sed ideo conveniunt secundū prius, & posterius, quia applicant ipsum mobile certæ cuidam parti spatii decurrendi, cui parti dum applicatur motus, ac præsens sit, non potest simul, & semel applicari iisdem partibus, quia mobile non potest esse simul; & semel in duobus locis. Itaque motus habet partes priores, & posteriores in ordine ad spatium; priores quidem, quatenus applicat mobile viciniore parti spatii, quod decurritur; posteriores verò, quatenus applicat idem mobile remotioribus partibus ejusdem spatii; hinc tempus non mensurat motum secundū partes intrinsecas, hoc est, ut sunt simul in mobili eodem tempore, sed secundū partes relativè sumptas ad spatium, id est, quatenus habet aliquid prius, & posterius. Ratio est, quia tunc cognoscitur tempus, cūm percipitur motus, ut habet partes priores, & posteriores; nam partes motus, quatenus simul sunt eodem momento in mobili, non me deducunt in cognitionem temporis. Et verò dum cælum moveretur, partes, quæ simul recipiuntur in variis cæli partibus, adeoque simul existunt, non pertinent ad tempus, quia in subducendis temporibus, partes motus simul existentes non curamus, sed partes tantū successivas, quæ proinde ad tempus pertinent; itaque dum Aristoteles ait tempus esse numerum motus secundū prius, & posterius, significat tempus illud ex-

ternum , quo reliquas durationes metimur , esse partes alicujus motûs successivi numeratas ; cum enim homines certam durationum mensuram habere vellent , motum cælorum , utpote notissimum æquabilissimûmque secundum partes priores , & posteriores dividerunt , quas sic divisas numeratasque appellarunt annos , menses , &c. Vnde tempus describit lib. 4. mensuram motûs primi mobilis ; cum enim primi mobilis circulatio in priores , & posteriores partes , easque numeratas dividatur , apta est proximè , ut sublunarium rerum motus omnes metiatur.

Objicies 1. Tempus est quantitas continua : numerus est quantitas discreta : ergo tempus non est numerus.

Resp. dist. antecedentis 2. partem : Numerus numerans est quantitas discreta , esto : numerus numeratus , & objectivus quilibet , nego ; duplex quippe numerus numeratus , seu materialis : pro diversa ratione rerum numerabilium ; aliæ enim sunt continuæ : sic tres vlnæ panni sunt quid continuum , & perpetua serie connexum : aliæ discretæ , ideòque numerus materialis , & objectivus alius continuus , discretus alius ; tempus autem est numerus continuus ex Philosopho , tex. 108.

Objicies 2. Tempus est numerus , & ens tantum in anima ex Augustino : ergo non est quid reale.

Resp. dist. Est ens in anima tantum , si formaliter sumitur , esto : si materialiter , nego ; sic enim est à parte rei , ut numerabile , licet secundum esse formale pendeat ab intellectu.

Objicies 3. Tempus est etiam numerus quietis.

Resp. dist. Per accidens , & secundariò , quatenus quæ per se conveniunt habitui , privationi ejusdem

per



per accidens accommodantur , concedo : per se primò , nego ; sic enim motui convenit , cuius est rem metiri secundùm prius , & posterius.

Objicies 4. Prius , & posterius motûs definiuntur per tempus , quia intelligi non possunt , nisi per respectum ad tempus : ergo malè definitur tempus per prius , & posterius , quia fit circulus.

Resp. nego ant. Nam prius , & posterius ipsius motûs , prout ponuntur in definitione temporis , non sumuntur , quatenus respiciunt tempus , sed quatenus magnitudinem spatii spectant , ideòque nullus est circulus ; itaque ex dictis tempus adæquatè spectatum connotat animam , non quidem actu numerantem , quia datur tempus , quamvis nemo numeret , sed potentem numerare.

Objicies 5. Mensura debet esse maximè nota : tempus non est motu notius : ergo non est mensura.

Resp. dist. maiorem : Mensura activa , esto , passiva , nego : quare licèt tempus cæleste non sit notius motu cælesti , cuius passiva mensura est , notius tamen est motibus particularibus , quorum est mensura activa.

### §. III. *Quæstiones de natura temporis solvuntur.*

**P**RIMA , an definitio Aristotelis sit essentialis. Resp. si per numerum , radicem mensuræ intelligis , esse essentialem ; sin autem rationem passivæ mensuræ accipis , à qua motus dicitur formaliter mensurabilis , non esse essentialem , quia mensurabilitas non est de essentia temporis.

Secunda , an tempus sit mensura activa , aut pas-

siva. Resp. esse per se passivam, 1. quia tempus est numerus non quo numeramus, sed qui numeratur: 2. quia est quantitas, at non est de ratione quantitatis, ut aliud extrinsecum actu mensurer, sed ut habeat partes extra partes, quibus fiat apta mensurari.

Tertia, quanam sint proprietates temporis. Resp. alias habere, ut numerus est, alias, ut continuum. Quatuor assignat Aristoteles: prima est, quod tempus contineat omnia motui subjecta: secunda, ut dicatur multum, aut paucum, quia numerus est: longum, aut breve, quia continuum; non dicitur tamen velox, aut tardum, quia velox, aut tardum mensurantur tempore: tertia, ut sit mensura quietis per accidens: quarta, sicut tempus est numerus, & mensura motus per se, ita motus vicissim ipsius temporis potest esse mensura, sed per accidens; hinc dicimus quempiam abfuisse vnâ die à domo, quia confecit illâ die decem leucas.

Quarta, an tempus distinguatur à motu realiter. Resp. tempus internum distingui à motu, ut modum à modo, patet ex dictis.

Quinta, an tempus sit vnum. Resp. 1. tempus commune esse vnum numero, quia est motus primi mobilis: 2. particulare esse vnum specie non numero; non numero quidem, quia multi sunt motus particulares numero; specie verò, quia duratio non sequitur motum secundum specificam durationem talis motus, putà alterationis, vel motus localis ad hunc, vel illum terminum, sed secundum rationem prioris, & posterioris, id est, quatenus motus omnes sunt successivi.

Sexta, quotuplex sit tempus. Resp. aliud esse internum, quod est duratio successiva rei intrinseca:

aliud externum, quod adhibemus ad alterius corporis motum metiendum, sic fluxu clepshydræ lectionem metimur. 2. Aliud commune, aliud proprium, commune est motus solis, aliorumque syderum, quo, veluti mensurâ extrinsecâ, utuntur gentes singulæ ad alias durationes metiendas: tum quia ex D. Thoma, motus cæli idem apud omnes est, & omnia ambiens, adeoque facile dignoscitur: tum quia facilis est partitio illius in annos, & menses: tum quia est æquabilis, utpote motus lationis; hinc alias mensuras durationis extrinsecas, v.g. horologium sciotericum, non antè ad metiendam durationem aliam adhibemus, quàm mensurata ipsæ sint ad solis motum: quare motus cæli est velut naturalis mensura reliquorum motuum; proprium cuiuslibet peculiare est. 3. Aliud artificiale, ut motus horologii, quo scholæ durationem metimur: aliud naturale, ut motus solaris, qui ad alios motus metiendos aptissimus, quia notissimus; hinc sicut datur motus externus, & vniuersalissimus locus motus, nempe supremum cælum: ita datur tempus vniuersalissimum, tempus temporum, regula omnium temporum, ac motuum inferiorum, nempe motus cælestis.

#### §. I V. *Quibus partibus constet tempus.*

**T**EMPUS alii ex puris instantibus componunt, alii ex partibus sine fine dividuis.

**I. A S S E R T I O.** Tempus non constat ex instantibus, sed ex partibus infinitè dividuis. Prob. 1. ex Aristotele: *Id quod sentimus fluere*, inquit, *inter duo instantia, tempus est*: ergo tempus non constat ex puris instantibus.

Prob. 2. ratione : 1. Tempus est species quantitatis continuæ , quæ dividitur in permanentem , & successivam : ergo non constat ex puris instantibus individuïs , quia omne quantum est essentialiter dividuum in plura divisibilia ; hinc ex Aristotele quantum est divisibile in ea , quæ insunt , quorum quodlibet est hoc , & aliud , id est , nulla est pars , quæ non sit quanta , ac proinde secari infinitè non possit.

2. Tales sunt partes temporis , quales partes motûs : partes motûs non sunt individuæ , & insecabiles : tales quippe sunt , quales sunt partes spatii : partes spatii sunt in infinitum dividuæ : ergo & partes motûs. Major probatur , quia tempus est mensura motûs , sicut motus est mensura spatii : at mensura , & mensuratum sunt quid homogeneum.

3. Si tempus constaret puris momentis , vel essent plura in eodem tempore , vel vnicum ; non plura , quia explicari non posset , quomodo perirent illa instantia , vel enim perirent , tum cum sunt , & ita simul esset tempus , & non esset : vel instanti proximè sequenti , quod dici non potest ; nam sequens instans vel esset immediatum cum primo instanti , & ita se penetrarent , sicut in quantitate permanenti , vel esset mediatum , & ita medicaret pars aliqua inter utrumque instans , pars , inquam , temporis , in qua existeret illud nunc secundum prius , & posterius , quia coexisteret parti habenti prius , & posterius , & quia in omni parte sunt infinita nunc , sicut in omni parte quantitatis permanentis sunt infinita puncta , sequitur illud nunc existere simul cum infinitis aliis nunc , sive momentis , quod est impossibile ; non enim potest simul esse , nisi vni-

cum præsens , seu nunc.

Non vnicum ; nam si esset vnicum instans in omnibus temporis partibus , sequeretur ea , quæ facta sunt tempore belli Trojani , etiam nunc fieri , vt rectè arguit Aristoteles.

Confirmatur : Quomodo enim instans additum tempori , faceret tempus longius , cùm in instanti nulla sit longitudo ? vt enim inextensum additum inextenso , non facit extensum. : ita nec in continuo successivo instans , vtpote indivisibile , additum instanti , quòd idem individuum sit , non facit extensum.

Disparitatem afferunt , quòd in continuo permanente , partes sint simul , in continuo successivè pars post partem , & ita facit longius , & extensum eo ipso , quòd vna pars est post alteram.

Contrà : Perinde vniri debent partes inter se in ente successivo , ac in permanente , vt faciant extensum , si id excipias vnum , quòd in permanente partes stent ipsæ simul , in successivo jugiter fluant : at in permanente indivisibile non vnitur indivisibili : ergo nec in successivo. Deinde illa instantia vel sunt interrupta , vel immediata , non interrupta , tum quia tempus est continuum : tum quia si quid medicaret inter duo momenta interrupta , maximè tempus , & quidem in infinitum divisibile sine instantibus intermissis : ergo datur tempus infinitis partibus constans , in quo nullum erit indivisibile , seu instans : ergo idem dicendum de aliis temporis partibus ; non immediata , quia vel essent simul secundùm aliquid sui , vel secundùm se tota totaliter se tangerent ; non primum , quia in instanti non est pars , & pars ; non secundum , quia sic se penetrarent.

Hinc momentum non est tempus, nec pars temporis, ne minima quidem, & quemadmodum inquit D. Basiliius hom. 1. in Hexam. p. 9. ὡς ἡ ἀρχὴ τῆς οὐδοῦ οὐ πῶς οὐδὲς, καὶ ἡ ἀρχὴ τῆς οἰκίας οὐκ οἰκία: οὐ πῶς καὶ ἡ τῆς χροῖου ἀρχὴ οὐ πῶς χρόνος, ἀλλ' οὐδὲ μέρους τὸ ἐλάχιστον: quemadmodum principium via via non est; neque principium domus est domus: ita neque principium temporis est tempus, aut pars minima temporis.

II. ASSERTIO. Nulla sunt instantia continuantia in tempore, aut terminantia realiter à partibus corporis distincta. Prob. 1. Partes continui permanentis non vniuntur, aut terminantur punctis realiter distinctis: ergo nec partes temporis instantibus; ut enim punctum non potest vnire partem vnā cum altera, quia est indivisibile, ita nec instans partem temporis secabilem cum altera parte divisibili, utpote indivisibile.

2. Sumo instans in tempore, & quaero, quid illi immediatè succedat, an instans purum, & ita deinceps; at id jam refutatum, an pars aliqua divisibilis? certè non; vel enim succederet priori instanti secundum aliquid divisibile sui, vel secundum aliquid indivisibile; primum dici non potest, quia indivisibile, ut indivisibile est, divisibili vniri non potest: ergo secundum dici debet: ergo immediatè post instans, tota pars illa simul durat: ergo in tempore sunt mera instantia, siquidem pars, quæ existit, & seorsim ab aliis existit, nec longius, quàm instans durat; fateor tamen in tempore dari instantia negativa, quæ sint instar terminorum, & sectionum, actu quidem in principio, & fine temporis, in medio autem tantum potentiā. Quare perinde explicabis instantia, & momenta

in continuo successivo tum continuantia, tum terminantia, atque puncta continuantia, & terminantia in continuo permanente.

I. Vt in quantitate permanente, punctum continuans est ipsa entitas, quatenus potest non extendi ulterius, sed tamen ulterius extenditur: ita momentum continuans est tantum pars ipsa durationis, quatenus potest non extendi ulterius, sed tamen extenditur.

II. Vt in permanenti quantitate punctum terminans est ipsa quantitas, quatenus habet negationem ulterioris extensionis: ita momentum terminans est pars temporis, vt habet negationem ulterioris extensionis.

III. Vt in quantitate permanenti pars, & punctum sunt eadem realiter entitas, quæ pars dicitur, vt sumitur divisibiliter, punctum verò, vt sumitur indivisibiliter: ita instans, & tempus sunt eadem entitas, quæ dicitur tempus, dum divisibiliter sumitur; momentum verò, vt sumitur indivisibiliter, hoc est, quatenus nullam exigit certam, ac determinatam durationem, breviorē omni certa assignabili: vel vt alii explicant, quatenus motus est simul in diversis partibus mobilis.

### §. V. *Diluuntur objecta:*

**T**RIA solutionum principia, antequam argumentis occurrā, statuo.

I. Continui successivi partes sunt simul, non simultaneitate permanentiæ, quæ soli continuo permanenti convenit, sed simultaneitate fluxûs, seu continuationis successivæ, quæ nihil requirit præter non interruptionem partium.



11. τὸ *nunc*, sumitur vel divisibiliter, vel indivisibiliter; divisibiliter quidem, cum sumitur pro parte temporis aliqua determinata, ac dividua, ut cum dicimus, *nunc est hora nona*, &c. nam nunc sic acceptum non opponitur præterito, & futuro. Ratio est, quia cum dicimus, *nunc fuit hora nona*, verum est aliquam horæ nonæ partem esse præteritam, & aliquam futuram; & verò τὸ *nunc*, jungitur præterito, & futuro ex Aristotele: sic dicimus, *Petrus nunc exiit, aut nunc veniet*, ubi τὸ *nunc*, sumitur pro parte temporis, non quæ fuit præsentem, si præsentem sumitur indivisibiliter, sed pro parte, quæ fluxit, aut fluxura est: ergo fluere præsentem, licet voce tenus significet solum præsens, tamen re ipsâ importat præteritum, & futurum, quia omnis fluxus involvit prius, & posterius: indivisibiliter verò, quatenus tempus potest jam sistere fluxum, & interrompere, & sic est præsens: non realiter quidem, sed æquivalenter.

111. Partes in ente successivo possunt dici existere vel ratione sui, vel ratione totius, quod componunt; ratione sui existerent, si præteritum, quæ præteritum, aut futurum, quæ futurum, jam nunc essent; at existunt ratione totius, quod componunt, seu ratione partis præsentis, putà quadrantis, horæ, mensis, &c. eum qua totum continuum faciunt: sic dies hesternus dicitur nunc fluenter existere ratione mensis, quem componit, mensis ratione anni, annus ratione sæculi; licet annus, quæ præteritus, non amplius sit, & quæ futurus, nondum sit. Quare non valet consecutio à partibus, ut sunt in toto, ad partes ratione sui, nec à nunc divisibiliter sumpto, ad idem indivisibiliter acceptum. His observatis,

Objicies 1. Quidquid existit nunc, est præsens : præsens est indivisibile, seu instans : ergo quidquid existit temporis nunc, est indivisibile, seu instans. Prob. minor, quidquid existit nunc temporis, est totum simul : quod est totum simul, est indivisibile, seu instans, quia quod successivum est, non potest esse totum simul, utpote dividuum in partes priores, & posteriores.

Resp. dist. min. Quidquid existit nunc temporis, est totum simul, simultaneitate fluxûs, & non interruptionis, concedo : simultaneitate permanentiæ, nego : quippe nunc temporis, quod existit, est pars temporis successiva, putà quadrans horæ, quæ existit fluenter, diciturque præsens in ordine ad aliud, cui correspondet.

Instabis 2. Quod est divisibile in tempore, non existit nunc totum, sed tantum id, quod nunc est : at quod nunc est, nec præteritum est, nec futurum : ergo &c.

Resp. 1. dist. majorem : Non existit nunc totum permanenter, concedo : fluenter, nego ; nam hora nona nunc existit fluenter. Resp. 2. dist. minorem : quod nunc est indivisibiliter acceptum, concedo : divisibiliter acceptum, nego.

Instabis 2. Præsens, ut præsens, non est præteritum, nec futurum : ergo non est divisibile in præteritum, & futurum.

Resp. dist. Præsens indivisibiliter acceptum, concedo : divisibiliter acceptum, nego.

Instabis 3. Sequeretur inde futurum tempus, & præteritum nunc existere.

Resp. dist. Ratione totius, in quo existunt partes horæ, aut diei, concedo : ratione sui præcisè, nego ; nam partes illæ præteritæ, aut futuræ, non ha-

bent rationem præteriti, aut futuri comparativè ad hanc horam, sed tantùm ad priores horas, vel futuras, & sic præsens dies plures horas continet comparativè ad invicem præteritas, aut futuras, non verò comparativè ad hunc diem, in quo potiùs debent dici successivè præsentès; ut enim præsens dies, idem est, ac partes ipsius collectim sumptæ, ita partes illæ debent æstimari præsentès successivè.

Instabis 4. Ex August. præsens in tempore, nullo spatio tenditur.

Resp. dist. Præsens indivisibiliter, & virtualiter sumptum, concedo: divisibiliter, & realiter sumptum, nego; & ita explicabis D. Damascenum, dialect. cap. 33. *Habent*, inquit, *particula temporis communem terminum copulantem ipsas, scilicet nunc*; ibi enim sumit nunc virtualiter, ut æquivaleret instanti. De temporis instanti virtuali sic loquitur Augustinus lib. 11. Confess. c. 15. *Si quid intelligitur temporis, quòd in nullas jam, vel minutissimas momentorum partes dividi possit, id solum est, quod præsens dicatur: quod tamen ita raptim à futuro in præteritum transvolat, ut nullà morulà extendatur; nam si extenditur, dividitur in præteritum, & futurum.*

Instabis 5. Si partes temporis existerent in toto, possent vniri inter se: at non possunt vniri inter se, quia extrema simul habere non possunt, simul autem extrema habere non possunt, quia simul non existunt.

Resp. saltem simul existere simultaneitate fluxûs, quod sufficit, ut vniantur inter se fluenter, sicut simultaneitas permanentiæ sufficit inter partes, quæ uniuntur permanentè.

Instabis 6. Voces istæ *simul*, & *fluenter* se destruunt.

Resp. dist. Simul permanenter, concedo: simul fluenter, nego; aut si voles, dist. si per τὸ *simul* intelligas id quod opponitur divisioni, & interruptioni, nego: si aliter, transeat, nempe hoc ipso partes ejusdem motûs, qui fit sine quiete, & interruptione, habent unionem inter se, quam simultaneitatem fluentem dicimus, quâ inter se continuantur, quia continuatio nihil requirit præter non interruptionem.

Instabis 7. Quod est non ens, non potest vniri cum eo, quod est ens: præteritum est non ens, quia desit: futurum est non ens, quia nondum est, præsens verò est ens: ergo præteritum, & futurum non possunt vniri continuativè cum præsentī.

Resp. dist. majorem: Quod est non ens, ratione sui, & est ens ratione totius, in quo continetur, non potest vniri cum præsentī, nego: quod est non ens, tam ratione sui, quàm ratione totius, concedo; at præteritum, & futurum, licet ratione sui præcisè, sint aliquo modo non entia, tamen ratione totius sunt entia successiva: sic sunt viginti quatuor horæ in die.

Instabis 8. Præteritum non est nunc existens: præsens est nunc existens: ergo non vniuntur.

Resp. dist. primam partem antecedentis: Præteritum non est nunc existens, ratione sui, & quâ præteritum, concedo: ratione præsentis, seu totius successivi, quod est fluenter, nego: sic dicitur existere annus millesimus sexcentessimus sexagesimus septimus.

Instabis 9. Præteritum, & futurum debent etiam existere ratione sui, vt vniuntur præsentī, quia

propositiones de tertio adjacente, non sunt veræ, nisi veræ quoque sint propositiones de secundo adjacente; hinc propositio ista, *Petrus est doctus*, non est vera, nisi hæc vera sit, *Petrus est*: ergo à pari non est vera propositio ista, præteritum vnitur præsentī, nisi hæc vera sit, præteritum est, & existit actu.

Resp. dist. conseq. Nisi vera sit hæc propositio, præteritum est, saltem ratione totius fluentis, cui proinde successivè sit continuum, concedo: ratione sui, nego; hæc enim natura est entis successivi, ut partes etiam præteritæ, & futuræ existant in fluxu, & complexione alicujus temporis: sic omnes partes horæ, dum Petrus currit, simul existunt, simultaneitate fluxûs, & non interruptionis.

Instabis 10. Vel vnirentur partes se ipsis, vel per aliquid medium.

Resp. se ipsis vniri hoc ipso, quòd se sequantur immediatè; nam cum pars B existit fluenter post partem A, & quidem immediatè, non potest non esse vnita parti A. Ratio à priori est, quia homogenea sibi immediatè applicita sunt eadem entitas, tum in permanentibus, tum in successivis.

Instabis 11. Si non produceretur pars A, nisi post quietem partis B, non vniretur parti B: ergo ut pars A vniatur parti B, debet dari modus vnionis.

Resp. dist. ant. Non vniretur defectu existentia ipsius post partem B immediatè sequentis, concedo: defectu entitatis modalis à partibus temporis distinctæ, nego. Quare ad vnionem partium successivarum A, & B requiritur tantum, ut tunc cum existit pars A, pars B simul fluenter existat absque interruptione.

Instabis 12. Partes præteritæ non magis vniuntur

præfenti, quàm fi stillante perpetuò aquâ, & exiftente posteriori guttâ, priores annihilentur: at guttæ annihilatæ non facerent aquam vnâ cum aqua exiftente: ergo nec præteritum facit vnum tempus cum præfente.

Resp. dift. minorem: Ratione fui, concedo: ratione totius aquæ, quam componunt, nego: fic fluuius, qui præterfluit Parifios, idem eft, qui fuit ante centum annos per continuationem fucceffivâ aquarum; partes itaque horæ hoc ipfo vniuntur immèdiatè, quòd fe confequantur in eadem parte motûs, eodémque mobili.

Objicies 2. Saltem in tempore non daretur pars prima, aut vltima, & fic non poffet incipere, aut finire, quia inceptio, & definitio horæ, v.g. fit per initium, & finem ejuſdem.

Resp. 1. dift. Non daretur pars prima, aut vltima, abſolutè, concedo: comparativè, nego; nam primus quadrans eft prima pars horæ, & quartus, vltima. 2. Tempus propriè definit, & incipit extrinſecè. 3. Ad id ſufficiunt instantia negativa, quæ ſunt horæ vel ſectiones, vel termini.

Objicies 3. Tempus non eft reale: ergo non conſtat partibus ſine fine dividuis. Prob. ant. illud non eft reale, cujus corruptio tanto tempore durat, quanto durat productio; at temporis, v.g. horæ corruptio tanto tempore durat, quanto productio: ergo tempus non eft reale. Prob. major, quia aliàs idem ſimul eſſet, quia produceretur, & non eſſet, quia corrumperetur.

Resp. dift. maiorem primì ſyllogiſmi, in rebus permanentibus, concedo: in ſucceſſivis, nego; hæc quippe natura quantitatis ſucceſſivæ, vt partes habeat perenniter fluentes, aliæque adeo nativi-

tatem suam ex aliarum interitu hauriant : ergo in tempore totali aliqua fiunt , & aliqua corrumpuntur , ideòque simul gignitur , & interit , sed inadæquatè. Ad prob. dist. idem simul esset , & non esset , secundùm diversas partes , concedo : secundùm easdem , nego ; nam hora non erit secundùm tertium quadrantem , aut primum , dum secundus fluat.

Objicies 4. Angelus creatur in instanti : ergo verè datur instans reale in tempore.

Resp. dist. ant. Id est , Angelus fit totus simul , & non per partes , concedo : id est , creatio Angeli durat per instans reale , nego ; nisi fortè intelligas de instanti negativo , & reali , nempe huic propositioni , creatio Angeli est indivisibilis , potest subesse duplex sensus ; primus , Angelus fit totus simul , quia non constat partibus , quarum una priùs fiat , deinde altera , & hic verus est. Secundus , Angeli creatio durat tantùm per momentum positivum , & reale , quòd à partibus dividuis temporis sejunctum fit ; & hic falsus , quia nullum datur instans in tempore , nisi virtuale. Et verò docent adversarii nunquam esse duo instantia immediata in tempore , adeòque impossibile esse , ut Angelus immediatè postquam productus est , desinat esse , sed necesse est , ut per aliquod tempus conservetur : ergo ut actio ejus productiva aliquandiu duret , necesse quoque est.

Instabis 1. Angelus totus simul creatur : ergo illius creatio , prout distinguitur à conservatione , potest esse in instanti.

Resp. dist. conseq. In instanti negativo , & æquivalenti , concedo : reali , & positivo , nego ; ut enim globus perfectus dicitur tangere planum in



puncto negativo, & virtuali, quia non commensuratur plano, ipsūque tangit, vt negat vltiorem extensionem: ita creatio, cū temporis partī reali non possit commensurari, nam tempus est essentialiter successivum, creatio, inquam, Angeli tota simul dici potest fieri in instanti negativo, nempe in sectione temporis. Sed sicut non potest existere virtuale punctum separatum à partibus diuis globi, cui identificatur: sic non potest existere id quod dicitur prima duratio Angeli, distinctum realiter à secunda duratione.

Instabis 2. Ergo saltem Angelus non posset à Deo ita creari, quin aliquandiu eundem conservaret: at hoc repugnat perfectissimo Dei dominio, qui potest ad libitum rem creatam destruere.

Resp. datā maiore, nego minorem; licet enim Angelus fiat in instanti virtuali, tamen ex hypothesi, quod Deus illum creet, tenetur ipsum aliquandiu conservare, minori tamen semper, & minori tempore, prout libuerit; & verò si in instanti prorsus indivisibili crearet, & in instanti immediatē sequenti destrueret; continuum successivum constaret ex indivisibilibus immediatis, quod falsum.

Instabis 3. Non potest dici quantum temporis conjungi necessariò debeat cum prima Angeli creatione: ergo illa creatio conjungi non debet cum aliquo tempore divisibili.

Resp. nego consequ. An potest dici, quantum globi præcisè debeat existere, vt contactus ille fiat indivisibiliter? & tamen non inde sequitur nihil globi existere debere, vt fiat ejusmodi contactus: ergo licet ægrè definias, quantum temporis cum prima creatione Angeli jungi debeat, non tamen inde

sequitur, nihil temporis cum ea conjungi debere. Ratio est, quia licet utrumque fiat in sectione globi, & temporis, necessariò tamen sectio identificatur ei quod secatur: at quod secatur, divisibile est in infinitum: ergo ejus pars minor in infinitum sumi potest; hinc Deus non potest dicere, volo ex globo illud præcisè producere, quod ad ejus contactum cum plano requiritur, sed debet dicere, tantam partem globi divisibilem producere volo: ergo à pari dicere non potest, volo Angeli solam primam productionem ponere; sed potius, volo Angelum conservare tanto temporis spatio: itaque nihil Deus producere potest, quod ab eo aliquandiu non conservetur, quia productio non potest dari à parte rei realiter instantanea: ergo dividi potest in duas partes, quarum altera dicatur prima productio, altera conservatio.

Instabis 4. Omnia entia pendent tantùm à suis causis naturalibus in prima sui productione, non in conservatione: ergo prima illa productio est instantanea.

Resp. dist. conseq. Instantanea virtualiter, concedo: realiter, nego; eo enim sensu dicuntur tantùm pendere à suis causis naturalibus, in prima sui productione, quòd exiguo admodum tempore ab illis pendeant; si compares cum aliis rebus, quæ suis à causis jugiter pendent, quia saltem conservatio illorum effectuum ab ortu remotior, à causis naturalibus non pendet.

Colliges ex dictis, cur dixerit Seneca lib. 6. Natural. quæst. *Fluit tempus, & avidissimos sui deserit: nec quod futurum est, meum est, nec quod fuit, in puncto fugientis temporis pendet.*

§. VI. *Quanam sint in tempore.*

**T**R I A sunt in tempore , 1. differentia temporis , 2. momenta , 3. quæ tempore ipso durant.

I. A S S E R T I O. Ea sunt propriè in tempore , quorum esse mensuratur , continetur , & patitur à tempore. Prob. quia tempus est mensura motûs.

II. A S S E R T I O. Motus primò , & per se est in tempore. Prob. quia mensura definienda est per primum mensurabile : at motus est primum mensurabile temporis ; quid enim est tempus , nisi mensura motûs ; hinc ex Aristotele , tex. 118. quies in tempore tantùm est per accidens , motus per se : *quoniam* , inquit , *tempus est mensura motûs , est etiam mensura quietis ; sed per se motûs , quietis per accidens* , id est , secundariò , quòd ipsa quies sit privatio motûs.

III. A S S E R T I O. Ea absolutè dicuntur esse in tempore , quæ habent habitudinem ad motum. Pr. quia motus est per se in tempore : ergo ea sunt maximè in tempore , quæ sunt motui maximè affinia. Porro triplex potest esse habitudo ad motum quoad rem præsentem , vel subjecti , quod motum recipiat , vel causæ efficientis , quæ motum producat , vel termini , qui claudat ; hinc

IV. A S S E R T I O. Deus , & substantiæ incorruptibiles non sunt propriè in tempore , quia non mutantur , quæ tales , à tempore : 2. quæ sunt in tempore , debent contineri , & superari à tempore , tum quia potest sumi tempus majus eo , quo ipsa durant : tum quia omne mensuratum superari potest à sua mensura sæpiùs reperita : *Necesse est* , in-

quit Philosophus tex. 116. *omnia, quæ sunt in tempore, contineri à tempore, sicut & alia quacumque in aliquo sunt, ut ea, quæ sunt in loco, continentur à loco.* Quare manifestum est, ut addit sequenti textu, ea quæ semper sunt, quatenus semper sunt, non esse in tempore, quia ea tempus non continet, neque eorum esse meretur, quod quidem inde fit apertum, quia nihil inde patiuntur, hoc est, non consenescent, nec corrumpuntur à tempore: unde sic arguo, quod non continetur in tempore, nec superatur, aut patitur à tempore, non est propriè in tempore: Deus, & substantiæ incorruptibiles tales sunt: ergo &c.

Objicies 1. Intelligentiæ habent operationes transcurrentes: ergo possunt mensurari à tempore: 2. sunt existente tempore: ergo in tempore.

Ad 1. resp. esto, sint in tempore per operationes, si quas habeant tempore mensurabiles: at nego per substantiam esse in tempore. Ad 2. nego consequentiam; ut enim non sufficit aliquid esse, existente loco, ad hoc, ut sit in loco, aliter Imperator Turcarum esset in hac schola, quia existit, existente hac scholâ, ita ut aliquid sit in tempore, non satis est, quod sit, existente tempore, sed debet aliquid pati à tempore.

Colliges 1. quæ habent ordinem ad motum, esse tantum in tempore secundariò, & per accidens propter habitudinem, quam habent ad motum, vel ut privatio ipsius, sicut quies, vel ut subjectum, ut lignum v. g. vel ut terminus, quemadmodum forma per motum producta, vel ut causa efficiens.

Colliges 2. partes temporis, nempe præteritum, præsens, & futurum, esse in tempore, ut partes in toto, momentum verò, seu instans virtuale, sive

negativum , vt terminum in re terminata , & finita , motum denique per se , vt mensuratum in mensura ; porro momentum definitur terminus quantitatis successivæ , quia momentum est punctum temporis : ergo vt punctum terminans in quantitate permanente definitur terminus quantitatis permanentis : ita momentum temporis est terminus quantitatis successivæ ; at

Quæres , quomodo instans corrumpatur , & definat ?

Respondeo definere in se ipso per ultimum suū esse , quod non ita accipiendum est , quasi tunc cū habet ultimum esse , re verā non sit ; hoc enim quod ultimò est , necessarium est esse , sed quia ita tunc est , vt immediatè , pòst non sit futurum.





# PARS SEXTA

## PHYSICÆ

### VNIVERSALIS,

AD RELIQUOS

PHYSICÆ VNIVERSALIS LIBROS.

*De motu.*



**H**Æc pars Physicæ permagni est ad Philosophiam, ipsiusque naturæ intelligentiam momenti; vno siquidem motu administro, natura omnia operatur, perficitur, munere suo, cui destinata est, defungitur, suum denique finem assequitur, juxta pronuntiatum Philosophi, *natura vivit motu*. Deinde materia, & forma, de quibus fusè in libro 1. & 2. egimus, intelligentiæ cælestes, ipsa denique suprema causa ipso motu investigantur, ac deprehenduntur, ideòque in illius tractationem nobis cum Philosopho magno studio incumbendum est.

## DISPUTATIO VNICA.

*De natura motûs in communi.*

**M**OTVM dari aliquem, ita sensibus ipsis exploratum est, vt nulla probatione indigeat, ipsâque vel vnus deambulationis experienciâ illius existentia nullo negotio astruatur; at ejus naturam, distinctionem, contrarietatem, principia, affectionesque varias explicare non ita facile: quare naturam illius in genere, variâsque species primùm vniversim explicabimus; tum quid sit motus localis, inquiremus. Et quoniam præter motus naturales dantur motus quidam violenti, cuiusmodi est motus projectionis, causam motûs projectorum investigabimus, quibus subinde nonnullas de primo motore quæstiones subnectemus.

## ARTICVLVS I.

*Natura motûs explicatur.*

**I**N motu spectatur 1. natura, deinde species, 3. distinctio, 4. vnitas, denique contrarietas, quæ omnia, vt plenius intelligantur, sit

§. I. *Quædam observantur.*

1. **M**OTVS, qui & mutatio dicitur, est transitus ab vno ad aliud; hinc in omni motu



adæquatè , & relativè spectato quatuor spectantur, 1. subjectum motûs , quod mobile dicitur : 2. terminus à quo : 3. terminus ad quem : 4. causa efficiens motus , seu movens : v. g. dum fit motus alterationis in ligno caloris effector , subjectum , seu mobile est lignum ; terminus à quo , frigus expulsum , vel privatio formæ caloris , terminus ad quem , calor de novo productus ; causa efficiens, ignis.

11. Movens est id à quo est motus , mobile in quo est motus ; motus enim non est in movente, sed in mobili ; hinc movens , ut tale non mutatur , sed mutat : terminus à quo id à quo incipit motus : terminus ad quem , in quo desinit môtus. Termini à quo , & ad quem plures duobus dari nequeunt , quia opponuntur immediatè : quare si plures videantur , vel non sunt totales , vel non sunt ultimi , vel non intrinseci , vel non per se , & primò intenti. Porro terminus totalis , ultimus , intrinsecus , per se , & primò intentus , vulgo dicitur adæquatus : non totalis , non ultimus , non intrinsecus , non per se , & primò intentus , dicitur inadæquatus. Item termini motûs sunt inter se oppositi interdum contrariè , semper privativè , seu negativè , quia terminus à quo vel nudè negat terminum ad quem , vel si contrarium ponat , adhuc oppositum terminum ad quem nihilominus negat : sic frigus simul , & non est calor , & qualitatem ponit contrariam calori ; tamen abjectio termini à quo , & acquisitio termini ad quem non sunt duo diversi , sed vnus idémque motus , sicut susceptum iter Lutetiâ Lugdunum , non est geminum iter , sed vnum , quamvis sint duo termini , vnus à quo , alter ad quem.

III. Motus sic accepti non vna est species ; fit enim ad esse substantiale , vel accidentale , quo sensu intelliges illud pronuntiatum Aristotelis , *quidquid movetur , ab alio movetur* , id est , quidquid producitur , ab alio , non à se ipso , producitur ; & ita motus idem est ac productio , vt sic : 2. prout idem est , ac mutatio , quæ fit à naturali agente , cuius terminus est forma substantialis , aut accidentalis : sic corpus mutatur per formam substantialem , aër per illuminationem , oculus per visionem. Hæc iterum mutatio vel est instantanea , quâ forma tota simul producitur , talis est productio formæ substantialis in materia jam disposita , talis illuminatio aëris : vel successiva , cum ad aliud fit transitus cum successione , & fluxu , vt dum calor expellit frigus : porro in mutatione instantanea terminus à quo prior est naturâ termino ad quem , in successiva autem prior tempore.

IV. Quædam sunt actu tantum , quædam potentiâ tantum , quædam actu simul , & potentiâ ; actu tantum est Deus ; potentiâ tantum materia prima ; actu simul , & potentiâ res multæ creatæ , v. g. lignum inflammabile est actu lignum , potentiâ ignis , lignum actu calidum est potestate frigidum.

V. Res creata iterum spectari potest in triplici statu , 1. vt est simpliciter in potentia ad aliquid : ita lignum , quod ab igne non attingitur , est in pura potentia ad ignem : 2. prout est in actu perfecto , possidetque actum de novo acquisitum , veteri deperdito : sic lignum postquam actu conversum est in ignem , est in statu perfecto ignis , ad quem antea erat in potentia. 3. Vt est in medio statu , id est , cum habet actum , qui relinquit aliquid potentiæ ; potentiam , quæ admittit aliquid

actûs : v. g. cùm lignum concepit ignem , éstque in via ad acquirendum calorem : hic medius status dicitur aliquibus potentia proximè proxima , quia non longè abest ab actû perfecto , vel potiùs movetur ad actum perfectum ; cùm enim res est in potentia , nondum intelligitur moveri ; cùm est in statu perfecto , jam mota est , nec ampliùs moveri intelligitur : itaque tunc tantum moveri dicitur , cùm est in statu medio , seu in tendentia ad terminum. His positis , sit

### §. I I. *Definitur motus.*

I. A S S E R - **T** RES motûs definitiones affert Philo-  
T I O. sophus lib. 3. Physic. Prima habetur c. 2. tex. 16. motus est actus mobilis , prout mobile est. Secunda c. 3. tex. 23. motus est actus ejus , quod agere , & pati potest , quatenus tale est. Tertia cap. item 2. tex. 6. sic exprimitur , ἡ τῆς δυνάμεως οὐτος ἐντελέχεια , ἡ τοῦτον , κίνησις ὅτι : *motus est actus entis in potentia , prout tale est , seu prout in potentia est.*

Dicitur 1. actus , id est , forma , in quo convenit cum aliis actibus physicis ; forma enim substantialis est etiam actus , sed perfectus ; motus autem actus imperfectus , per quem potentia , quâ aliquid moveri potest , in actum reducitur , quia ab eo , quod est posse moveri , ad ipsum moveri transit. 2. Entis in potentia , id est , mobilis , seu subjecti , cui potentia passiva inest ad actum imperfectum , & eo mediante ad actum vltiorem perfectum : v. g. in ligno calefactibili est potentia ad calefactionem , & mediante calefactione ad ipsum calorem. 4. Prout in potentia , quarum vocum hic sensus facilis

facilis, & obuius, motus non est quilibet actus mobilis ipsius; non enim est actus corporis, quod est mobile, nec actus viventis, si est corpus vivens, sed est tantum actus entis in potentia, qui huic tantum potentiae respondet: v. g. calefactio est actus corporis calefactibilis, quatenus calefactibile est, non quatenus est durum, densum, &c. Alter sensus est, motus est actus mobilis, non prout moveri præcisè potest, nec prout jam motum est, sed prout movetur, & tendit à termino à quo ad terminum ad quem; mobile enim non censetur in esse, seu in statu perfectò, nisi sit in ipso termino: v. g. calefactibile non est perfectè completum, nisi sit calidum, & calefactum: itaque quamvis per calefactionem ad hunc terminum tendat, illa tamen est quasi via non ad calefactionem, ipsa enim est in actu, seu actus viæ, adeoque imperfectus, sed ad esse calidum, quod est actus perfectus, per quem calefactibile exigit necessariò compleri.

Ex hac definitione tria colliguntur. 1. Motus nec est actus perfectus, nec omnino potentia, sed actus κατὰ π, secundum quid, seu imperfectus, qui potentiam perfectè non satiet, & ulterius semper tendat. Verbo dicam, est aliquid actûs, & aliquid potentiae; actûs quidem, quo lignum v. g. calefactibile actu calefit: potentiae autem non ad ipsum calefieri, seu ad viam, sed ad esse calidum, seu ad terminum: vnde cum motus dicitur ab Aristotele. ἀτελής, perfectio, non absolutam intellige, sed inchoatam, cui nempe ultima quasi manus, ultimus terminus desit.

11. Partim est ens, partim non ens; ens quidem, quatenus est actus: non ens, quatenus est actus imperfectus, seu in potentia; hinc Plato in Dialogo

de ente, motum ad genera non entium revocavit.

III. Quilibet motus includit prioritatem, & posterioritatem vel naturæ, vel temporis, & proinde aliquam successionem instantium vel naturæ, vel temporis. Patet ex definitione; quod enim partim est in actu, partim in potentia, prioritatem includit vel naturæ, vel temporis. Qui prioritatem naturæ requirunt tantum, pugnant quemlibet motum, etiam instantaneum, cujusmodi est generatio substantialis, aut illuminatio aëris, hac definitione contineri. Quamvis enim in instantaneis, fieri, & factum esse sit in eodem instanti temporis, tamen in aliquo priori naturæ prius est fieri, quam factum esse, quia fieri est veluti via, factum esse terminus: qui autem prioritatem temporis his vocibus innui volunt, motum concipiunt, tanquam successivam, & continuam alicujus formæ acquisitionem, quæ secundum partes paulatim per motum acquiritur: sic calefactio aquæ est motus propriè dictus, quia est acquisitio successiva caloris, seu actus aquæ, quæ paulatim calefit, & estque in potentia ad novam partem aliquam caloris, quatenus ad eam continuè pergit: & ita ab hac definitione motus momentaneas mutationes excludunt, quibus forma nondum perfecta acquiritur; hæ enim sunt quidem actus rei potentiam habentis ad perfectiorem formam, non tamen ad eam paulatim progredientis, ut observant Conimbricenses q. 1. in lib. 3. Arist. art. 1. Ad hæc, motus est mutatio de subjecto in subjectum; est enim actus entis, id est, subjecti existentis: ergo generatio substantialis formaliter sumpta non est motus ab Aristotele definitus. Certè quod propriè movetur, debet esse, antequàm moveatur: at homo antequàm gene-

retur, non est, & dum generatur, fit ex non ente. Ita illi; in hac sententia terminus ad quem motus semper dividuus est, vel in partes, vel in gradus, item & successivus.

Quæritur, an ex mente Aristotelis, definitio motus conveniat mutationibus tam instantaneis, quàm successivis? Ratio dubitandi est, quia text. 6. traditam motus definitionem exemplis generationis, & corruptionis illustrat. *Vt alterabilis*, inquit, *quatenus alterabile*, *alteratio*: *augmentabilis autem*, & *oppositi decrescibilis*, *augmentatio*, & *decrementum*: *generabilis autem*, & *corruptibilis*, *generatio*, & *corruptio*: *eius verò, quod fertur, latio*. Et text. 17. eundem motum expendens, exemplum addit de generatione hominis. Accedit D. Thomas, lect. 2. & 7. *Accipit*, inquit, *hinc motum Aristoteles communiter, pro mutatione, non autem strictè, secundum quod dividitur contra generationem, & corruptionem*. Et lib. 5. ad text. 7. ait: *Aristoteles lib. 3. Phys. ubi motum definivit, accipit nomen motus secundum quod est commune omnibus mutationibus*. Aliunde videtur idem Aristoteles generationem à definitione motus expungere text. 7. & 8. impossibile est, id quod non est, moveri: ergo impossibile est generationem esse motum, quia per eam fit quod non est.

Respondeo probabiliùs ex mente Aristotelis, definitionem motus, etiam mutationibus instantaneis convenire, tum quia loco mox citato exemplum generationis, & corruptionis attulit: tum quia in mutatione etiam instantanea ipsum fieri ratione, & naturâ prius est, quàm factum esse, ipsâque generatio rem genitam necessariò antecedit, sicut illuminatio lucem productam; & ita dici

potest *actus entis in potentia ad formam*.

Ad authoritatem Aristotelis, respondeo, dum generationem negat esse motum, ibi sumere motum strictissimè, ut includit successionem temporis, generationem autem formaliter, ut est productio formæ substantialis, quæ tota simul fit; nam si sumitur præsuppositivè, id est, ratione alterationis, potest dici etiam motus strictissimus.

Objicies 1. Motus, ut hîc definitur, est successivus; est enim actus entis in potentia, prout in potentia: in generatione, & corruptione formaliter acceptis nulla est successio: ergo generatio, & corruptio non sunt motus. Major patet, quia cum motus subjectum constituat partim in actu, partim in potentia, utique innuit partem aliquam perfectionis recipi in subjecto, & aliam expectari; mutatio autem instantanea totam simul perfectionem inducit. 2. Motus est actus imperfectus: generatio non est actus imperfectus; nam eodem instanti, quo est generatio, tota forma subjectum sibi vendicat, & ita res est in actu perfectò.

Ad 1. dist. minorem, in generatione, & corruptione formaliter acceptis, nulla est successio secundum prioritatem temporis, esto: secundum prioritatem naturæ, nego; fieri enim prius est naturâ, quàm factum esse, quod sufficit.

Ad 2. Generatio formaliter sumpta est etiam actus imperfectus. Ratio est, quia est mutatio, quæ ex natura sua est alicujus, & ad aliquid; & verò ex lib. 2. Physic. tex. 14. *Generatio est via ad naturam*, adeoque actus imperfectus. Nec dicas ibi sumi generationem præsuppositivè, seu ut est terminus præviæ alterationis; nam loco antè à me citato generationem in exemplum motûs à se definiti affert



Aristoteles, prout condistinguitur ab ipsa alteratione, cujus ibidem expressè meminit. Adde quòd generatio, & corruptio substantialis sunt physicæ considerationis, adeòque nisi comprehendantur hac motûs definitione communi, debuit Aristoteles speciali definitione explicare, quod tamen non fecit.

I I. A S S E R T I O. Sex sunt species motûs hîc ab Aristotele definiti. Ita Aristoteles tex. 6. jam citato. Nempe generatio, & corruptio, augmentatio, & decrementum, alteratio, & latio, quibus adduntur à multis tensio, & compressio, item motus intentionales, sensus, intellectus, & appetitus. Unde Aristoteles monet lib. 3. Physic. tot esse species motûs, quot sunt species entis (intellige de motu communiter sumpto.)

I I I. A S S E R T I O. Motus secundùm communem rationem sumptus, non est univocus, sed tantùm analogus. Ita interpretes Græci, Alexander apud Simplicium, Themistius, Philoponus, quos sequitur Averroës, præsertim ad tex. 4. hujus libri, ubi sic habet: *Et intendebat declarare, quia motus non dicitur univocè, sed secundùm prius, & posterius; sed tamen tales definitiones intrant in artibus demonstrativis.* Probatut ratione: tales sunt motus, quales termini, ad quos terminantur, & à quibus unitatem, ac speciem sumunt; sic enim se habet motus, ut ea, in quibus est, quia non est extra res: in terminis motûs nihil est univocum; alii enim sunt substantia, ut in generatione, alii quantitas, ut in accretione, alii qualitas, ut in alteratione, quibus nihil univocè convenit: ergo motus non est univocus. Deinde omne genus, & species univoca directè continentur aliquo prædi-

camento : motus per se , & directè nullo prædicamento continetur , sed ratione duntaxat termini reducitur : ergo non est genus univocum.

Quæres , an definitio motûs conveniat motui circulari , violento , & artificioso ?

Respondeo 1. convenire motui circulari ; licet enim id quod movetur circulariter , ut cælum , secundum se totum non dicatur esse in potentia ad alium locum , dicitur tamen esse in potentia secundum partes.

Respondeo 2. non propriè convenire motui violento , & artificioso ; non violento quidem , quia ei propriè convenit motui , cujus natura est principium : natura non est principium motûs violenti , quia fit contra inclinationem naturalem mobilis ; non artificioso autem , quia artificialia formaliter , ut talia , non sunt entia naturalia. Potest tamen hæc definitio utrique accommodari , quia mobile est aliquatenus in potentia naturali ad illos motus ; ad violentum quidem , ratione materiæ ; ad artificiosum verò , quia potentia illius aliquatenus est naturalis ad formam artificialem , prout naturale opponitur supernaturali.

### §. III. De distinctione motûs propriè dicti à mutatione , ejûsque partitione.

I. ASSE R-**M**OTVS propriè dictus fit de sub-  
TIO. jecto in subjectum. Ita Aristoteles lib. 5. Phys. c. 1. tex. 9. *Quoniam autem motus omnis mutatio est quadam , & tres sunt , quas diximus , mutationes , è quibus generatio , & corruptio , quæ contradictione tenentur , motus non sunt , ea duntaxat mutatio , quæ è subjecto est in subjectum ,*

*motus sit necesse est.* Porro per subjectum intelligitur subjectum affirmationis, λέγω δὲ τὸ ὑπαικείμενον, τὸ καταφάσσει δαλούμενον; dico autem subjectum, quod affirmatione declaratur: omnis quippe mutatio fit à quopiam in quodpiam, id est, ab vno termino ad alterum terminum; fit enim vel ex termino negativo in positivum, & est generatio, vel ex termino positivo in negativum, & est corruptio, & ita vtraque est à termino contradictorio in contradictorium, vel ex termino positivo in positivum, seu de subjecto in subjectum, id est, de subjecto affirmationis in subjectum affirmationis, & est motus; hinc duo colliguntur. 1. Triplex est species mutationis, prima est à subjecto in non subjectum, secunda à subjecto ad non subjectum, tertia à subjecto in subjectum; nam quarta, quæ est à non subjecto in non subjectum, non est species mutationis, quia omnis mutatio est inter terminos contradicentes, vel contrarios, quæ oppositio non est inter terminos vtrinque negativos, seu non entia.

II. Motus propriè dictus à mutatione, & generatione substantiali distinguitur; à mutatione, quòd hæc sit inter terminos privativè oppositos; à generatione substantiali, quòd hæc sit à non esse simpliciter ad esse simpliciter, hoc est, à materia prima, quæ est simpliciter non ens, quòd non sit ens simpliciter actum includens, sed pura potentia; motus autem sit à termino positivo, cui annexa tantùm sit aliqua negatio esse accidentarii, putà non albi; dum enim ex non albo fit album, est motus propriè dictus, quia non fit à non subjecto, sive à non albo per se ad album, sed prout est à subjecto, nempe ab homine, cui privatio accidit, ideòque

fit ab homine non albo ad hominem album ; unde ait Aristoteles non album posse moveri per accidens , quia non album potest esse homo ; hinc motus propriè dictus est inter terminos contrarios , qualis est inter qualitates , quæ sub eodem genere maximè distant , sive sint termini positivi , inter quos est latitudo aliqua vel graduum , ut inter summè calidum , & frigidum : vel qualitatis mediæ , ut inter album , & nigrum , inter quæ color cæruleus interjicitur : vel extensionis , ut inter quantum unius cubiti , & quantum sex cubitorum , &c.

II. A S S E R T I O. Motus, ut physicè distinguitur à mutatione instantanea , includit successionem aliquam. Probat , quia motus propriè dictus versatur inter terminos positivos , & contrarios : ergo ut aliquid motum per se terminet , requirit quandam latitudinem , quæ nonnisi successivè ob incompossibilitatem naturalem terminorum , percurri potest : itaque mobile motu propriè dicto , tanquam fluido quodam progressu, ad perfectionem formæ naturaliter tendit , ita ut partem illius post partem acquirat , in quo est ratio formalis successionis ; nam in mutatione instantanea forma tota simul acquiritur ; at

Quæres , utrum successio sit absolutè de essentia motûs ?

Respondeo probabilius non esse , quia successio à motu divinitus separari potest ; potest enim Deus efficere , ut aqua simul amittat frigiditatem , & calorem acquirat ; at motus ille distinguitur à mutatione , cujus essentia in eo posita est , ut sit inter terminos privativè oppositos ; hinc nec continuïtas est de essentia motûs absolutè ; ut enim non est de essentia motûs , quod habeat partes post partes ,

ita nec de essentia illius, quòd partes posterioribus sine interruptione, & fluxu continuato succedentes habeat.

Objicies: Via, & tendentia ad formam non potest intelligi sine successione: motus est via, & tendentia: ergo &c. 1. Motus distinguitur essentialiter à mutatione per successionem: ergo includit successionem in suo conceptu. 3. Nisi successio esset de essentia motûs, motus successivus posset fieri in instanti, quod absurdum. 4. Successio est de essentia motûs localis: ergo est de essentia motûs in genere.

Resp. ad 1. nego maiorem; mutatio enim est tendentia ad formam, & tamen successionem non includit: itaque motus ut sic dicit tantum in conceptu suo acquisitionem novæ formæ, & abjectionem antiquæ, seu transitum à termino positivo contrario ad terminum positivum contrarium, quod divinitus in instanti peragi potest. Ad 2. dist. motus distinguitur essentialiter physicè à mutatione per successionem, concedo: essentialiter metaphysicè, nego; licet enim ex natura rei motus sit successivus, tamen absolutè potest citra successionem fieri. Certè si Deo attemperante concursum suum sol produceret lumen suum successivè, productio lucis non esset motus, sed vera mutatio, quia esset inter terminos privativè oppositos. Ad 3. dist. motus specificè, & materialiter successivus, posset fieri in instanti, concedo: formaliter, & quatenus successivus, nego; motus enim, qui à parte rei est successivus, potest divinitus fieri in instanti. Ad 4. dato antecedente, nego consequentiam; quod enim convenit speciei ratione differentiz, non tribuitur generi. De natura motûs tantum, jam de partitione.

V N I C A O B S E R V A T I O. In motu quinque spectanda, 1. id quod movet, 2. id quod movetur, 3. id in quo est motus, tanquam in mensura, quod est tempus, 4. terminus à quo, 5. terminus ad quem; motus enim est actio moventis in mobili ab uno termino ad alium facta in tempore; hinc

Prima partitio motûs ex parte mobilis, & moventis, est in motum per accidens, & motum simpliciter ratione tantum partis, & motum per se simpliciter secundum se totum: tunc movetur mobile per accidens, cum ad alterius motum movetur: sic Musicus inter ambulandum movetur per accidens, & homo in navi sedens. Movetur simpliciter ratione partis, quod secundum aliquam sui partem, quæ motum in se immediatè recipiat, movetur, ut dum homo movetur secundum manum, aliis partibus immotis. Movetur per se simpliciter, quod nec ad motum alterius, nec ratione tantum partis, sed secundum se totum movetur, ut dum lapis deorsum fertur.

Movens per accidens est, quod non movet, nisi motum ab alio: sic reticulum pilam movet per accidens, quia movet ad motum brachii. Dicitur movere simpliciter ratione partis, quod movet tantum secundum aliquam sui partem: ita homo projiciens lapidem, dicitur manu movere lapidem, quia manus movet. Movet per se simpliciter, quod nec ad motum tantum alterius, nec ratione tantum partis, sed secundum se totum movet: ita tota manus lapidem movet.

Secunda partitio ex parte temporis, est in motum velocem, & tardum; motus velox est, quo vel æquali tempore majus spatium, vel æquale spatium minori tempore acquiritur; tardus verò ð

contrario ; velocitas , quâ motus dicitur velox , & tarditas , quâ dicitur tardus.

Tertia partitio ex parte sui , in continuum , & interruptum ; continuus est , cujus partes aliæ aliis succedunt , sine vlla interruptione , & mora : interruptus , cujus partes quiete aliquâ , & morâ dividuntur.

Quarta partitio ex parte termini ad quem , fit in motum accretionis , alterationis , & lationis : quare fit

III. A S S E R T I O. Datur per se motus ad quantitatem , qualitatem , & vbi , adeoque datur triplex species motûs strictè sumpti , nempe accretio , alteratio , & latio , seu motus localis. Ita Aristoteles lib. 5. Physic. cap. 1. & 2. Probatur argumento positivo , ac primò quidem ad quantitatem , quia cum vivens augetur , augmentum fit à minori quantitate ad majorem : repugnat enim subjectum accretionis esse simul sub utroque termino : ergo successivè ab vno ad alium transire debet : sic plantæ , & animalia paulatim augentur , & à minori extensione ad majorem successivè tendunt. 2. Ad qualitatem , dum paulatim intenditur , subjectumque efficit alterum : sic manus igni admota , successivè acquirit alios , atque alios gradus caloris , expulsis gradibus frigoris. Ratio est , quòd calor vno instanti non possit superare resistantiam frigoris. 3. Ad vbi , quia per motum localem spatium decurrendum est , cui mobile simul adæquari non potest. Confirmatur : duplex ad motum propriè dictum ex Aristotele conditio requiritur ; prima , formæ prædicamentorum ad quæ datur motus , contrarietatem servare debent , quia motus fit à contrario ad contrarium : secunda , forma per mo-



tum subiecto adueniens, debet mutare subiectum : at formæ trium prædicamentorum, de quibus modò, servant inter se contrarietatem, & subiecta, quibus accidunt, immutant, vt patet inductione: ergo ad hæc tria prædicamenta datur motus.

Probaturn 2. argumento negativo : datur motus per se ad aliqua prædicamenta ; non ad alia, quàm ad hæc tria. Non ad substantiam, quia substantiis non inest per se contrarietas ad motum requisita; in earum enim productione nulla reperitur latitudo motu percuttenda ; nec intensiois, quam non ferunt, nec extensionis, quia non per se quantæ, sed tantum per accidens; nec spatii, vt patet. Non ad relationem, situm, quando, & habere, quia per se non fiunt ; sunt enim tantum vel quidam modi, vel denominationes resultantes ex positione aliarum rerum, ad quas motus per se terminatur. Non ad actionem, & passionem, quia sæpè non distinguuntur realiter à motu, ac proinde ad illas non magis potest dari motus, quàm ad ipsum motum.

Objicies 1. Motus est inter terminos contrarios: parvum, & magnum, qui sunt termini accretionis, non sunt contrarii: ergo accretio non est motus. 2. Lux producitur in instanti, quamvis intensiois, & remissionis capax sit: ergo latitudo graduum ad successionem qualitatibus non sufficit. 3. Ex Aristotele 7. Physic. c. 4. vna generatio est velocior, & tardior, quàm alia: ergo generatio est verus motus, ac proinde datur motus ad substantiam.

Respondeo ad 1. Licet parvum, & magnum non sint termini strictè contrarii, sunt tamen oppositi inter se, hoc est, impossibiles in ea ratione, quâ sunt termini, quod sufficit. Ad 2. transeat to-

rum ; non enim ob vnā graduum latitudinem motus est successivus , sed ob resistantiam contrarii paulatim superandam. Ad 3. distinguo , generatio vna est velocior , & tardior alterâ , ratione præviæ alterationis , quæ ad ipsam generationem subiectum disponit , concedo : ratione sui , nego ; itaque generatio successionem dicit præsuppositivè , non formaliter.

§. IV. *De motu relato ad mobile , & terminum ad quem.*

**D**V o hîc de motu quæri possunt ; primum , an distinguatur à mobili , & termino : secundum , in quo subiecto recipiatur.

I. **A S S E R T I O.** Motus distinguitur formaliter à mobili , & termino. Patet , quia fundat diversum conceptum objectivum , habetque diversam definitionem.

II. **A S S E R T I O.** Motus distinguitur realiter à termino per eum producto. Probatum : illa distinguuntur realiter , quorum vnum perstat , alio desinente : desinente realiter motu , perstat terminus illius : v. g. desinente accretione , superest quantitas , destructâ calefactione , adhuc remanet calor : ergo motus distinguitur realiter à termino , saltem distinctione minoris realitatis. Confirmatur : motus est fieri termini , at fieri rei est modus illius.

Obijcies. I. Fieri rei non distinguitur realiter à re , quæ fit : motus est fieri ipsius termini : ergo non distinguitur realiter à termino.

Respondeo , distinguo antecedens : fieri rei non distinguitur realiter à re , distinctione maioris realitatis , seu vt res à re , concedo : distinctione mi-

noris realitatis, seu vt modus, nego.

Instabis: Motus potest esse sine termino, vicissimque terminus sine motu: ergo motus distinguitur à termino, vt res à re. Probatur antecedens: dum calefit lignum, datur motus antequàm summus calor productus sit in illo: ergo datur motus sine termino.

Resp. dato secundo antecedente, distingo illius consequens, datur motus sine termino sibi non proportionato, concedo: sibi proportionato, nego; vt enim motus totalis semper habet terminum totalem sibi respondentem: ita motus partialis terminum parialem.

Objicies 2. Motus ex Aristotele non est præter res, ad quas terminatur: ergo motus non distinguitur realiter à termino.

Respondet Toletus ex Græcorum interpretatione, sensum Aristotelis hunc germanum esse, motum non reperiri extra res, eò quòd in mobili recipiatur. Respondet 2. D: Thomas, sensum esse, quòd motus non sit alterius generis, quàm res, quæ per motum acquiruntur, quia motus reducitur ad idem prædicamentum, ad quod res pertinent, quæ per motum acquiruntur: vt calefactio ad prædicamentum qualitaris, accretio ad prædicamentum quantitatis, &c.

III. A S S E R T I O. Motus est subjectivè in mobili. Probat ex Aristotele lib. 3. Physic. c. 2. *κίνησις ἐντελέχεια τῷ κινητῷ, ἢ κινητόν*: *motus est actus mobilis, quatenus mobile est*. Probatur ratione: motus vel est in movente, vel in mobili: non in movente, quatenus tale est, quia movens, quàm movens, non movetur, sed movet: vnde primus motor movet omnia non motus tum actu, tum

potentiâ , quia nec actu movetur , nec est potentiâ mobilis. Deinde terminus motûs est in mobili : v. g. quantitas per accretionem parâta , est in re auctâ , tanquam in subiecto , calor per calefactionem productus in re calefacta , motus localis in animali , quod movetur : ergo motus est per se in mobili , non vt movens est , sed vt mobile est. Dixi per se esse in mobili , quia per accidens est aliquando in movente , cùm idem est movens , & motum , ipsûmque movens operatur immanenter : sic aqua , cùm se ad nativum frigus reducit , est movens simul , & mobilis ; movens , quâ frigus producit ex se per emanationem , mobilis , quâ recipit ; hinc motus mobile intrinsecè semper mutat , quia in mobili semper recipitur , à quo distinguitur , saltem vt modus.

Objicies : Tam motus denominat movens , quàm mobile : ergo est in movente.

Resp. nego consequentiam ; est quidem communis actus utriusque , sicut visio est communis forma , quæ denominat videntem , & visum , sed vnum extrinsecè , alterum intrinsecè ; hinc motus est actus moventis , quatenus est ab eo , vt à causa efficiente ; & est actus mobilis , vt est in eo , tanquam in subiecto.

## §. V. De unitate motûs.

I. OBSERVATIO. TRES numerantur unitatis , & diversitatis gradus , genericus , specificus , & numericus.

II. OBSERVATIO. Unitatis duplex principium ; alterum intrinsecum , quod est differentia illius essentialis : alterum extrinsecum , quod non

constituit unitatem rei , vt principium intrinsecum , sed est id , à quo , licèt extrinsecò , res ita pender , vt non possit suam unitatem , nisi per ordinem ad ipsum habere : sic potentia , & actus specificantur ab objectis extrinsecis , habéntque differentiam intrinsecam dependenter ab illis , quæ sunt differentia , quasi extrinsecæ.

I. A S S E R T I O. Unitas motûs generica suprema petitur à mobili , & ab utroque termino univèrsim. Probatur : omnis motus ex natura sua est transitus ab vno ad aliud in subiecto : transitus non potest intelligi sine termino à quo , termino ad quem , & subiecto : ergo &c.

Objicies : Motus genericè sumptus dicit ordinem essentialem ad mobile , & utrumque terminum : ergo & motus quilibet specificè sumptus.

Resp. distinguo consequens : motus quilibet specificè sumptus materialiter , & identicè , seu ratione generis , sub quo continetur , concedo : formaliter , & reduplicativè , hoc est , ratione speciei , vt species est , nego ; potest enim res genericè sumpta ad aliud referri , licèt non referatur specificè , seu ratione differentia specificæ.

II. A S S E R T I O. Unitas motûs generica subalterna petitur à termino ad quem , sive à prædicamentis , in quibus reperiuntur termini , ad quos fit motus. Probatur ex Aristotele lib. 5. Phys. c. 4. tex. 31. *γένεσι μὲν ἓν μίαν κατὰ τὰ γήματα τῆς κατηγορίας* : unus quidem genere est motus ex categoria figuris : hinc motus , qui sunt unius ejusdemque prædicamenti , sunt unius generis subalterni : v. g. omnes mutationes locales sunt unius generis , quia omnes sunt in prædicamento ubi. Omnes similiter alterationes , quia sunt ad qualitatem , &c. hinc se-

quitur, eos motus, qui tendunt ad terminos diversorum prædicamentorum, genere inter se distinguui, cuiusmodi sunt alteratio, & augmentatio, &c.

III. **ASSERTIO.** Specifica vnitas motûs petitur quoque à termino ad quem; ita vt illi motus sint ejusdem speciei, qui sunt ad eosdem specie terminos: sic Aristoteles lib. 5. *Physic.* ait omnes dealbationes esse ejusdem speciei, quia singulæ sunt ad speciem qualitatis atomam, putà ad albedinem; denigrationem verò, & dealbationem esse tantùm vnus generis, non speciei, quia sunt ad vnâ categoriam qualitatis; alterationem denique, & accretionem esse diversi generis, quia sunt ad diversas categorias, quantitatis nempe, & qualitatis.

Objicies: Motus rectus, & circularis, licet sint ad vnum specie terminum, non tamen sunt vnus, ejusdemque speciei: ergo falsum est duos motus, qui sunt ad eundem terminum, esse ejusdem speciei.

Respondeo, transeat antecedens; sequitur hinc tantùm speciem motûs non sumi à termino ad quem materialiter, sed formaliter sumpto; porro lationis terminus formaliter sumptus, non vnâ dicit loci entitatem, sed modum etiam, quo attingitur, vt tradit Aristoteles 5. *Physic.* c. 4. tex. 32. Quare cùm linea recta, & circularis non sint ejusdem speciei, hinc consequens est lationes ad eundem terminum tendentes, specie quoque differre, si vna fiat per lineam rectam, altera per circularem.

Instabis: Ergo species motûs sumitur tantùm à medio, quia vbi diversum est medium, diversus quoque specie motus est, licet terminus idem sit.

Respondeo non id sequi, quia cùm terminus, ut est formaliter terminus, modum, quo attingitur, includat, & motum terminet, pro diversitate mediorum, diversi quoque sunt termini formaliter, & ita ab illis sumitur species motus.

III. A S S E R T I O. Vnitas numerica motus requirit unitatem mobilis, temporis, & termini ad quem. Ita Aristoteles lib. 5. tex. 34. & sequentibus. Vnitas mobilis, seu subjecti requiritur, quia motus debet esse continuus: at motus, qui fiunt in diversis subjectis, non possunt esse continui. Defectu hujus conditionis, motus, quo movetur Petrus, & Paulus ad eundem numero terminum, eodem tempore, est motus numero diversus. Vnitas termini, quia à termino petitur essentia motus; deinde cùm motus distinguatur tantum modaliter à forma per ipsum producta, sitque fieri illius, pro varia distinctione formæ, distingui quoque debet. Defectu hujus conditionis, non est idem numero motus, quo idem Petrus movetur ad diversa vbi. Denique vnitas temporis, quia motus, qui fit temporibus interruptis, continuus esse nequit. Defectu hujus conditionis, motus, quo movetur Petrus ad eundem numero terminum, distinctis temporibus, est quoque numero distinctus. Vnitatis motoris non meminit Aristoteles, quæ tamen requiri videtur, quia motus est actus moventis, adeoque si diversum est movens totale, debet quoque esse diversus motus, sicut per distinctam actionem effectus à Deo solo producit ab ea actione, quâ Deus eundem produceret cum causâ secunda. Non tamen motoris meminit Aristoteles, quod motus ut sic, dicat tantum tendentiam subjecti ad formam, adeoque videatur abstrahere à movente, licet ad



vnitatem illius materialiter spectatam, vt est idem cum actione, pertineat.

Monet Aristoteles tex. 35. subjectum ejusdem numero motûs debere esse vnum per se, non secundum accidens, quia subjectum, quod est tantum vnum per accidens, eodem tempore potest moveri diversis motibus: v. g. Petrus albus, qui est vnum per accidens, potest simul ambulare, & nigrescere.

Objicies 1. Dum aliquod vivens è turri cadens, medio in aëre emoritur, vnicus est motus, & tamen non est idem mobile: ergo non requiritur vnititas mobilis.

Resp. esse idem, saltem inadæquatè secundum materiam, & quantitatem: vnde si motus continuus sit, erit tantum motus continuus materiæ; quantitatis, & aliorum accidentium, quæ sub vtraque forma manent; at non erit motus continuus formarum, quia motus animæ rationalis non potest continuari cum motu formæ cadaveris; idem enim accidens non potest recipi in distinctis subjectis, aliàs migraret de subjecto in subjectum.

Objicies 2. Si quis vivens ambularet sponte, & ambulando moreretur, ita tamen vt Angelus motum continuaret, esset idem numero motus.

Resp. nego eundem fore realiter motum, quia in hac hypothesi esset diversus motor totalis.

Objicies 3. Si lapis caderet in centrum terræ, & magno impetu pelleretur, ferretur extra centrum terræ; deinde ad illius centrum revolveretur, quæ in hypothesi, esset duplex motus, & tamen esset idem terminus.

Resp. in hac hypothesi, fore duplicem motum; motus enim, quo extra centrum ferretur, esset violentus; aliter verò, quo rediret, foret naturalis,

& ita duplex esset, sicut terminus esset duplex æquivalenter.

§. VI. *De contrarietate motuum, & quietum.*

**M**O T U S comparari possunt inter se ratione contrarietatis, vel cum quiete, vel quies cum quiete; hinc multiplex nascitur quæstio; prima, unde petatur motuum contrarietas, & quinam inter se contrarii sint; secunda, an idem moveri possit motibus contrariis; tertia, an motus cum quiete opponatur, aut quies cum quiete.

I. **ASSERTIO.** Motuum contrarietas petitur ab oppositis terminis ad quos; ita ut dicantur motus contrarii, quorum termini ad quos sunt oppositi. Probatur inductione: dealbatio, & denigratio sunt motus contrarii, quia sunt ad terminos oppositos, nempe ad nigredinem, & albedinem: item motus sursum, & deorsum, quia termini, ad quos tendunt, sunt oppositi. Ratio est, quia rerum oppositio sequitur earum speciem: at specificatio motuum petitur à terminis ad quos.

Dixi à terminis ad quos, non à terminis à quibus, speciem sumi, 1. quia motus, qui petuntur à terminis à quibus diversæ rationis, possunt esse ejusdem speciei, quòd habeant terminum ad quem unum specie, ut motus ab albo in fuscum, & motus à nigro in fuscum: 2. ab eo sumitur contrarietas, à quo sumitur denominatio: motus non sumit denominationem à termino à quo, sed à termino ad quem: ita sanatio est motus in sanitatem, & ægrotatio motus in ægritudinem.

I I. **ASSERTIO.** Motus sunt privativè oppo-

fiti, qui sunt ad terminos privativè oppositos. Paret; nam illuminatio, & obtenebratio opponuntur privativè.

Porro hîc observandum motum vnum, respectu alterius, aliquando privativè, aliquando contrariè opponi: v. g. qui definit moveri motu recto, ut circulari moveatur, debet partim quiescere, partim moveri; quiescit enim motu recto, & movetur circulari: at quod quiescit à motu recto, habet privationem motûs recti.

Objicies in 1. affectionem: Major esset oppositio illorum motuum, si etiam opponerentur, ratione termini à quo, ut cùm vnus paries ex albo fit niger, & ex nigro fit albus.

Respondeo, distinguo: Major esset extensivè, & materialiter, concedo: intensivè, & formaliter, nego; contrarietas enim oritur ex termino specificante, cujusmodi est terminus ad quem.

Objicies 2. Motus aëris ex centro terræ super aquam, & motus ejusdem ex concavo lunæ in eundem locum, sunt motus contrarii, & ad eundem terminum: ergo motuum contrarietas non petitur à diversitate termini ad quem.

Resp. nego antecedentis partem ultimam, nempe illos terminos tendere ad eundem terminum; medius enim locus, in quem aër tendit in illa hypothesi, participat de contrariis sursum, & deorsum, sicut fuscum ex albo, & nigro communicat; at ex Aristotele, motus ex albo in fuscum, & ex nigro in fuscum sunt aliquo modo contrarii, quia motus ex nigro in fuscum est tanquam in album, & è contrà. Ratio est, quòd medium comparatum cum vno extremorum, induat rationem alterius extremi: ergo à pari locus ille natus aëris, compa-

ratus cum extremis, habet rationem vtriusque contrarii, nempe loci sursum, & loci deorsum, prout cum alterutro extremorum comparatur; & ita motus ex concavo lunæ, & ex centro terræ ad medium locum contrarii sunt, quia motus à concavo lunæ ad locum aëris, est tanquam deorsum, & ex centro terræ est tanquam sursum.

**III. ASSERTIO.** Idem mobile secundum idem, non potest naturaliter moveri motibus contrariis. Probat: quia idem mobile non potest naturaliter habere terminos motuum contrarios secundum idem, v. g. summum calorem, & summum frigus.

**IV. ASSERTIO.** Idem mobile potest moveri motibus contrariis secundum quid. Probat: quia idem subiectum potest calefieri simul, & frigesieri in gradibus remissis.

**V. ASSERTIO.** Idem mobile potest moveri motibus contrariis per accidens: sic qui vehitur navi ad Orientem, potest in eadem proprio motu ferri in Occidentem, quia primo motu movetur per accidens, secundo verò per se.

**VI. ASSERTIO.** Idem mobile potest moveri motibus contrariis secundum diversas partes. Probat: idem homo v. g. potest summè calefieri secundum partem dextram, & summè frigesieri secundum partem sinistram; sed hi motus non sunt strictè contrarii.

Objicies: Cùm quis vehitur navi in Orientem, & movet se in Occidentem, movetur motibus per se contrariis.

Resp. nego; Vel enim ille mutat locum, & ita re ipsâ movetur: vel tantum motitat pedes in eodem loco; si mutat locum, unico tantum motu

moveretur per se, aut versùs Orientem, aut versùs Occidentem; si enim moveretur velociùs in navi versùs Occidentem, quàm navis versùs Orientem, moveretur versùs Occidentem tantùm, sed non tantùm progreditur, quantùm progredederetur, si navis quiesceret; sin autem navis moveretur celerius versùs Orientem, quàm ille versùs Occidentem, tunc ille tantùm moveretur versùs Orientem, sed non tantùm progreditur, quantùm progredederetur, si ipse quiesceret. Quòd si navis ejusdem pedibus tantùm subducitur, semper manebit in eodem loco, pedes in ipso motitans, sicut dum fullo pedibus pannum subigit, pars panni semper aliqua ejus pedibus subducitur, aliâ successivè suffectâ. Verbo dicam, finge vel ad latus nautæ arborem, vel capiti perticam rectâ incumbentem; qui moveretur, vel ab arbore, & pertica sit distans, vel non; si non sit distans, non mutat locum, sed tantùm secundùm pedes moveretur; si sit distans, vel ad Occidentem, vel ad Orientem fertur, prout ab arbore, aut pertica versùs alteram partem longiùs progreditur.

VII. ASSERTIO. Motus, & quies privativè saltem opponuntur. Ita Aristoteles lib. 5. Physic. tex. 53. *ἀπλῶς μὲν γὰρ ἐναντίον κίνησις κινήσει; ἀντίκειται δὲ καὶ ἡ ἡρεμία, εἰρησις γὰρ ἐστὶ*: *contrarius enim simpliciter est motus motui; sed & quies opponitur, privatio enim est*; unde sic arguo, carentia motûs, & motus opponuntur privativè: quies est carentia motûs in subjecto apto moveri: ergo motus, & quies opponuntur privativè; sed quia duplex datur quies, altera in termino à quo, cùm mobile nondum motum est; altera in termino ad quem, cùm mobile jam motum est, sit

VIII. ASSERTIO. Motus non adversatur quie-

ti, quæ est in termino ad quem, sed quæ est in termino à quo. Probatur, quia motus ad terminum ad quem, est ipsum fieri, & veluti causa quietis in termino ad quem, quæ est veluti perfectio motûs ipsius, in quam tendit: at ipsum fieri, & causa quietis non adversatur propriè quieti; quies enim est motûs veluti effectus, nec via, & tendentia strictè opponitur perfectioni, ad quam tendit: ergo sola quies in termino à quo propriè opponitur motui, non quies in termino ad quem: v. g. quies in sanitate adversatur motui agrotationis, non quies in aegritudine: motui ex nigro in album contraria est quies, quæ est sub nigro: motus, quo ignis in sublime fertur, contrarius est quieti, quâ in loco infimo tenebatur, non quam in loco supero obtinet. Porro quies in termino ad quem definitur perseverantia rei in termino per motum acquisito.

Objicies: Quies est negatio motûs: ergo non est illius perfectio.

Respondet D. Thomas, quietem non esse meram negationem, sed perfectionem positivam, cui negatio annexa sit.

Instabis 1. Ex Aristotele 5. Physic. tex. 55. mutationi non opponitur quies, sed non mutatio: ergo à pari motui non opponitur quies, sed non motus. Item docet alibi motui cæli nullam opponi quietem: ergo motui, quâ motus est, non opponitur quies.

Resp. ad 1. velle tantùm Aristotelem, quòd mutationi non propriè respondeat quies, sed quasi quies, Aristoteli *ἀμεταβλησία*, *mutationum vacuitas*, quæ quieti aliquatenus similis; motui verò propriè quies, ideòque ipsi opponatur. Ad 2. esto;

esto : ibi enim Aristoteles agit de motu circulari ; nos hîc de motu recto agimus.

Instabis 2. Vnum vni tantum opponitur : at motui opponitur motus : ergo quies ipsi non opponitur.

Resp. dist. minorem : Motui opponitur motus contrariè concedo : privativè , nego ; quies autem opponitur motui privativè.

I X. A S S E R T I O. Quietes in locis contrariis, sunt contrariæ inter se , perinde ac motus , quibus ab eis , vel ad eas itur , inter se contrarii sunt ; quia, inquit Philosophus , est à ratione alienum , ut quietes , quarum motus inter se contrarii sunt , non inter se quoque mutuò pugnent ; porro motus inter se contrarii sunt , quorum termini inter se opponuntur ; hinc quies naturalis lapidis in centro mundi, opponitur quieti violentæ ejusdem lapidis in concavo Lunæ. De motu in communi tantum, jam de prima illius specie , seu de motu locali.

## A R T I C U L U S II.

### *De motu locali.*

**M**O T U S localis naturæ ordine , primus est inter motus propriè dictos , tum ratione communitatis , tum ratione originis ; ratione quidem communitatis , quia communis est omnibus corporibus , quæ naturâ constant ; ratione verò originis , quia reliqui motus ab eo , velut à causa oriuntur. Ita Aristoteles lib. 8. Physic. c. 7. tex. 55. *πρῶτον δὲ ὅσων κινήσειν , τῆς τε κατὰ μέγεθος , καὶ τῆς κατὰ πλάτος , καὶ τῆς κατὰ τόπον , ἣν καλεῖται φορὰν , ταύτην ἀναγκαῖον εἶναι πρῶτην* : Cum igitur tres

Tom. II. Phys. univers. Q



*sint motus, is qui in magnitudine, & is qui in qualitate, & is qui in loco, quem lationem nuncupamus; hunc esse primum necesse est.* Patet inductione, nam alteratio fieri non potest, nisi res alterans loco conjungatur cum re alterata, quia alterans educit de potestate in actum rem, in quam agit, atque ita non eodem modo erga illam affectum est: itaque ad agendum patiendumque sibi mutuò accedant oportet, quod lationis interventu fit. Accretio quoque non potest fieri sine motu locali, tum quia accretio alterationem supponit, tum quia accrescere nihil aliud esse videtur, quam relicto loco, & situ minori, majorem acquirere, sicut contrà decrescere, & minui, est relicto loco majori ad minorem reduci; quin etiam probat Aristoteles ibidem, motum localem naturâ, tempore, & dignitate cæteris esse priorem. Quare postulat ordo doctrinæ, ut de motu locali primum agamus, videamusque 1. an detur motus localis, & quid sit; deinde, an sit continuus, & successivus; 3. quotuplex sit; 4. quæ illius proprietates.

### §. I. *An sit motus localis.*

I. A S S E R-**D**A T V R verè motus localis. Ita Aristoteles contra Zenonem lib. 6. *Physic. tex. 19. & 77. ubi argumenta Zenonis adducit, ac diluit.*

Probatur 1. cum in natura vnum est contrarium, necesse est, alterum quoque adesse, ut docet Aristoteles 2. de cælo, tex. 18. Ratio est, quia contrarium dicitur respectivè; repugnat autem esse quidpiam respectivum, quin sit illud, quod respicit: at motus, & quies sunt contraria; quies enim est

privatio motûs ex 8. Physic. tex. 7. adeoque in sub-  
 jecto apto ad motum ; ergo si datur quies , datur  
 & motus. Certè aptitudo rerum ad motum inanis  
 semper , & supervacanea esse non potest , nec de-  
 bet : ergo res , quæ nunc quiescunt , aliquando mo-  
 vebuntur , aut saltem moveri possunt ex sese ; igitur  
 qui admittit quietem , astringit & motum ; hinc  
 Aristoteles tex. 23. lib. 8. Physic. pugnat eos gra-  
 vius peccare , qui negant motum , asseruntque  
 omnia quiescere , quàm qui negant quietem , sta-  
 tuuntque omnia perpetuo motu cieri. *Ferè autem ,*  
*inquit , & omnia dicere moveri , falsum quidem est ,*  
*minùs autem hoc prater methodum ; posita est enim*  
*natura in physicis principium sicut motûs , ita &*  
*quietis : tamen physicum magis est motus.*

Probatur 2. ipsâ experientiâ vel vnus deambula-  
 tionis ipsoque sensu : quare Diogenes vt argumen-  
 ta Zenonis labefactaret , cœpit inter disputantes  
 inambulare. Meritò itaque Philosophorum prin-  
 ceps Aristoteles lib. 8. Phys. tex. 22. τὸ μὴ οὖν πάντα  
 ἡρεμεῖν , καὶ τὰ τε ζῆται λόγον , ἀφέντας τὴν αἰ-  
 σθησιν , ἀρ' ὥς τ' ἂν ὅτι διαβολὰς : *omnia igitur in quie-*  
*te esse existimare , & sensu posthabito rationem ejus*  
*investigare cogitationis est hebetudo.*

Probatur 3. à causa tum finali , tum efficiente ;  
 finali quidem , res creatæ vbique simul esse non  
 possunt : ergo vt bono fruantur , quo carent , suô-  
 que fini conjungantur , motu locali opus habent ;  
 ab efficiente verò , non frustra datur potentia mo-  
 trix , tum in animantibus , tum in gravibus : ergo  
 & motus ; hinc sequitur etiam dari quietem , quia  
 motus est propter quietem.

Objicies 1. pro Zenone : Si aliqua res moveretur  
 loco , moveretur vel in loco , vbi est , vel in loco ,

vbi non est : neutrum dici potest : ergo non datur motus localis.

Resp. 1. nego maiorem ; utrumque enim falsum est, sed à loco, vbi est, ad locum, vbi non est, movetur. Et verò negari non potest, quin quidquid movetur, alicubi, id est, intra spatium aliquod non moveatur ; at locus corporis, quod movetur, non est spatium illud totum, sed pars ejus, quia quidquid movetur, non solum motum est, sed etiam movebitur.

Resp. 2. distinguo maiorem : Moveretur in loco, vbi est successive, & fluenter, concedo : vbi est permanenter, nego Ratio est, quia dum res movetur, dicitur moveri in loco maiori se ; dum enim movetur, vel est in spatio minori, vel aequali, vel maiori ; non in spatio minori, quia locatum naturaliter postulat locum sibi proportionatum, nec potest esse in minori spatio, nisi per penetrationem ; deinde moveri non posset, quia qui movetur, necessario percurrit spatium majus se. Non in spatio æquali, quia, ut ait Aristoteles, mobile deberet quiescere ; nam si dum movetur, aliquâ parte temporis est in loco sibi adæquato, illa pars temporis potest subdividi, dividatur ergo in duas partes, utique in parte temporis utraque, erit in eodem loco : ergo in eo loco quiescet ; tunc enim quidpiam quiescere incipit, cum nunc ita est, ac erat antea ; mobile quippe dicitur quiescere quod per aliquod tempus est in eodem loco, sicut motum esse, vel fuisse dicitur, quod sive nunc quiescat, sive moveatur, fuit prius in loco alio, quam nunc est, hinc

Quatuor inferuntur. 1. Quidquid movetur, motum est, quia si quod movetur, in eodem loco est,

in quo priùs erat, quiescit, adeoque non movetur, per definitionem quietis; si in alio loco est, motum est, per definitionem moti.

I I. Quod movetur, adhuc movebitur, quia quod movetur, locum, ubi est, relinquit; itaque alium acquirit; itaque movebitur.

I I I. Quod movetur, non est in vno loco per vllum tempus quantumvis exiguum, quia per definitionem quietis, quod est in aliquo loco, per aliquod tempus, quiescit (intellige permanenter.)

I V. Motus concipi non potest, quin concipiatur præteritum, & futurum tempus, saltem implicitè, quia quidquid movetur, movetur in tempore, quod includit præteritum, & futurum.

Instabis I. Motus debet mensurari locato, aliter daretur vacuum, si locus sit major locato, vel penetratio, si minor; ergo non potest mobile esse in loco majori se.

Resp. distinguo antècedens; Si sit in loco quiescendo, concedo; si successivè tantùm, quatenus replet locum se majorem successivè, & continuè, nego; mobile quippe dum movetur, est in loco per ubi successivum, & fluens, quod cùm ipsum in diversis locis collocet, spatium debet re locatâ majus esse.

Objicies 2. Saltem in motu locali idem simul movebitur, & quiescet; nam si supponis moveri id quod movetur circulariter, sic probo quiescere, illud quiescit, quod locum non mutat: quod movetur circulariter, non mutat locum: ergo non movetur.

Respondeo, distinguo majorem: Non mutat locum intrinsecum, nego; extrinsecum, subdistinguo, adæquatè, concedo; inadæquatè, nego;

partes enim corporis, quod movetur in orbem, mutant locum extrinsecum. Alia argumenta, quæ obicit Zeno, habes soluta parte 3. disp. 1. a. 2. §. 5.

## §. II. *Quid sit motus localis.*

I. A S S E R T I O. **M**O T U S localis definitur, actus mobilis à loco ad locum, continuo fluxu acquirendum. Dicitur 1. actus mobilis, in quo convenit cum aliis speciebus motûs, quæ fiunt in instanti : 2. à loco ad locum, quia corpus, quod movetur, relinquit locum unum, & acquirit alterum : 3. continuo fluxu acquirendum, in quo distinguitur à motu instantaneo, qui non includit successionem, motus autem localis fit cum successione. Clariùs describitur, continua, & successiva unius loci derelictio, & alterius acquisitio ; duo quippe sunt termini in motu locali perinde ac in aliis, nempe locus immediatè antè relictus, & locus continuo, & successivo fluxu primò acquisitus ; hinc si Petrus Parisiis existens, desineret ibidem esse, & simul inciperet esse Romæ, non diceretur moveri localiter, quia non acquireret locum Romanum, transeundo per medium, adeoque nec per motum localem, sed per annihilationem ejusdem Petri Lutetiæ, & novam illius creationem Romæ, aliòve modo à motu locali distincto ; hinc motus localis dicit ordinem ad spatium, seu medium, quod percurri debet.

II. A S S E R T I O. Causa materialis in qua, est ipsum mobile. Patet ex antè dictis, quia mobile per motum localem mutatur, recipitque in se motum, & ejus terminum intrinsecum, qui est ipsum ubi.

**III. ASSERTIO.** Causa efficiens motûs localis proxima, est qualitas innata, aut qualitas impressa. Probatur: quia motus naturalis exit immediatè ab innata qualitate, vt motus deorsum lapidis à gravitate; motus autem violentus à qualitate impressa corporibus projectis; quare definitur à nonnullis, mutatio loci continuo fluxu, ad exigentiam alicujus intrinseci, sive sit qualitas innata, sive qualitas impressa.

**IV. ASSERTIO.** Causa finalis proxima motûs, est locus internus, seu vbi; remota locus extrinsecus, perfectio ipsius mobilis, resolutio mixtorum, totius denique naturæ commodum. Patet prima pars; motus enim proximè terminatur ad ipsum vbi. Patet secunda, quia per motum corpus relinquit vnum locum externum, vt acquirat alterum à priori dissitum. Patet tertia, quia motus localis à natura rebus est concessus, vt earum indigentia, & imperfectioni subveniat; cum enim res naturales loco definiantur, opusque habeant aliquando re alibi existente, debent vtrique ad locum, in quo est, transire, quod fit motu locali administro, in quo à Dei perfectione deficiunt, qui cum sit immensus, non potest à loco ad locum transire, in quo priùs non existeret: lapis removeretur à centro suo? vt sese illi restituat, deorsum cadat necesse est: equus sitit? si absit aqua, sitim levare non potest, nisi vel hæc ipsi propinetur, vel ille accedat; at neutrum sine motu fieri potest. Patet quarta, quia per motum localem corpora resolvuntur. Patet denique quinta, quia natura, motu administro, omnia peragit opera.

§. III. *Solvuntur varia quæstiones de natura motûs localis.*

**M**ULTIPLEX quæstio hîc institui potest de natura motûs localis ; prima , an constet partibus sine fine dividuis : secunda , an sit continuus , & successivus , adeoque fieri non possit in instanti : tertia , an admittat indivisibilia , seu mutata esse realiter distincta , quibus ut fiat satis , sit

I. OBSERVATIO. Continuitas differt à successione. Ratio est , quod continuitas convenit iis rebus , quæ interruptæ non sunt , sive fluant , sive non ; successio autem iis rebus , quæ sunt in fluxu. Et verò illuminatio instantanea est continua , quia partes habet communi termino copulatas , nec tamen successiva est ; oratio autem vocalis successiva est , quamvis continua non sit , sed discreta , quia includit plures motus syllabarum sibi invicem succedentium , sed quiete interjectâ : ergo potest continuatio esse sine successione.


II. OBSERVATIO. Quod est punctum in magnitudine , momentum in tempore , id ipsum est in motu mutatum esse , quod Philosophis dicitur minimum motûs , quibusdâ Græcis ὀρμή , *impetus* , minùs forsan propriè ; sicut ergo in magnitudine punctum est principium , & finis lineæ ; in tempore momentum est principium , & finis præteriti temporis : ita in motu minimum , seu impetus est principium à quo motus incipit , & finis in quem definit.

I. ASSERTIO. Motus localis constat partibus sine fine dividuis. Probatur : motus localis constat vel punctis mathematicis , vel phycis , & infla-



ris , vel partibus infinitè dividuis. Non punctis mathematicis , quia mobile non potest moveri in instanti , quia quidquid movetur , partim est in termino à quo , partim in termino ad quem : punctum mathematicum non potest habere partem , & partem , cùm nullam partem includat virtualementem , aut realem : ergo motus non potest constare ex punctis mathematicis. Certè corpus quantumcunque sit , non potest totum simul à toto loco priore ita excedere , ut pars ejus non sit in parte , quæ sit utrique loco , relicto nempe , & acquisito communis , ut patet ex hac figura ;

A. G. B. I. E.



C. H. D. K. F.

fit enim corpus in loco A. B. C. D. non potest pervenire ad locum B. D. E. F. quin priùs sit in loco G. H. I. K. cujus pars G. H. B. D. sit communis utrique loco A. B. C. D. & G. H. I. K. & pars B. D. I. K. utrique loco G. H. I. K. & B. D. E. F. Non ex inflatis , quia quantitas permanens non potest constare ex punctis inflatis : ergo nec quantitas successiva , cujusmodi est motus.

II. A S S E R T I O. Morus localis est continuus , & successivus : ita Aristoteles. Probatur : motus , qui fit per partes priores , & posteriores , sibi sine interruptione succedentes , est continuus , & successivus : talis est motus localis : ergo est continuus , & successivus. Duæ sunt partes minoris ; prima , quod motus localis fiat per partes priores , & posteriores

secunda, quòd sine interruptione fiat.

Probaturs prima : per motum localem, spatium successivè percurritur : ergo in motu locali sunt partes priores, & posteriores ; secus partes illæ essent totæ simul, adeoque mobile esset simul in termino à quo, & in termino ad quem. Ut autem pateat, unde motus successio petenda sit,

Duo principia statuo. 1. Duplex quantitatis species, permanens, & successiva.

II. Id quod est in quantitate permanente extensio, id ipsum est in successiva successio : quare successio definitur extensio quantitatis, cujus partes simul non existunt permanenter : ergo cum extensio sit positio partium extra partes, vel partes sic poni possunt extra se invicem, ut una alterius interitum non postulet, sed simul existant : vel ita ut una existere non possit, nisi cum interitu alterius præcedentis ; prima est extensio corporum, secunda motuum.

Hinc duo consectaria. 1. Sicut extensio corporum ex eo oritur, quòd corpora constant partibus extra se positis impenetrabiliter : ita successio temporis, & motus ex eo nascitur, quòd constant partibus, quarum una ita postulat esse extra alteram, ut una cum altera stare permanenter non possit.

II. Successio in motu locali, pendet ex partibus spatii decurrendi, ut docet Aristoteles 4. Physic. *Magnitudo motus*, inquit, *nascitur ex magnitudine spatii* ; in alteratione autem successio petenda ex partibus qualitatis contrariæ producendæ ; nam forma, inquit, hoc est, qualitas, se habet ad alterationem, ut intervallum ad lationem. Denique augmentatio, & dilatatio partim ex motu locali, partim ex alteratione successionem suam repetit,

quia utrumque ad augmentationem , & diminutionem prærequiritur.

Probatur secunda pars. 1. Quia ex Aristotele 3. Physic. cap. 1. motus est de genere continuorum , idémque pronuntiat 5. Physic. tex. 39. omnem motum esse continuum , adeoque eum , qui simpliciter vnus est , id est , qui est vnus numero , debere esse continuum. 2. Fulmen è nube decidens , sine interruptione , & morulis movetur , vt patet ex celeritate , quâ res validissimas deturbat ; deinde si interrumpit , interciditque motum suum , vtique aliquantulum interquiescit ; jam quæro quot morulis interquiescat. 3. Patet exemplo rotæ aheneæ maioris , cui inseratur minor rota ; certè partes superioris circuli celerius movebuntur , inferioris verò lentius : suppono itaque à puero circumagi maiorem rotam , & duci lineam A , B , ita vt moveatur à puncto B , ad punctum C ; & sic argumentor , eodem tempore spatium majus lineâ rectâ conficit in circulo maiori , quàm in minori : ergo velocius mota est in circulo maiori ; jam quæro an morulam fecerit minor rota ; si nullam fecit : ergo tarditas in minori rota non oritur à morulis ; si fecit aliquam : ergo linea recta non mansit recta , sed curvatem contraxit in minori circulo , & mota est in maiori , quia linea A , B erat recta , adeoque si mota est in circulo maiori à puncto B , dum immota fuit , interquievitque in minori , non mansit recta , sed incurvata est. Age porro , quomodo linea A , B potuit in rota ahenea curvari digito pueri rotam moventis ?

Quæres , an motus localis sit continuus quolibet respectu ?

Respondeo vel quæris , an partes motus conti-

nuæ sint inter se in ordine ad partes subjecti, quæ sunt omnes simul v. g. in toto corpore hominis deambulantis, vel de partibus successivis in ordine ad spatium, an continuæ sint, & quomodo, hoc est, an aliquâ vnionè distinctâ inter se copulentur, an se ipsis.

Resp. ad 1. esse continuas relativè ad subjectum, qui vniuntur eodem modo, quo partes alterius accidentis naturalis.

Resp. ad 2. esse quoque continuas in ordine ad spatium, tum quia partes motûs, & temporis sunt ejusdem indolis, ratione continuitatis: tum quia homogenea si immediatè ponantur, continua fiunt: at partes motûs sunt homogeneæ, & immediatæ.

Denique respondeo, partes motûs se ipsis vniri absque vnionè realiter distincta; vel enim illa vnio esset permanens, vel successiva; non potest esse permanens, quia quod est permanens, non potest coexistere duabus partibus, quarum vna existat, alterâ non existente: non potest quoque esse successiva, quia haberet partes, quarum vna existeret, alterâ non existente; ergo non possent inter se vniri, quia vna non ampliùs existeret; at prius est esse, quàm vniri.

Duo sequuntur ex dictis. 1. Nulla dantur indivisibilia in motu continuantia, aut terminantia realiter à partibus distincta, sed negativa duntaxat; sufficiunt enim negativa, quæ sint sectiones, & termini motûs, perinde ac in tempore; partes enim motûs, cum existant fluenter, sunt aptæ vnum motum continuum facere, & vniri inter se, hoc ipso quòd quiete non interrumpuntur; & terminari, quòd non vlteriùs extendantur.

11. Nullus datur motus localis in instanti ad lo-

cum distantem, quia res eadem deberet existere simul in duabus partibus oppositis, nempe in termino à quo, & in termino ad quem: v.g. si granum milii moveretur in instanti à cælo in terram, simul esset in cælo, & in terra, & spatio interjecto: unde quod durat tantum in instanti, est incapax motus, quia non potest moveri localiter, nisi relinquat locum, & acquirat alium: sed primò acquirere locum, est primò esse in illo loco; & relinquere locum, est primò non esse in eo loco, nec simul est in utroque, quia idem non potest esse in duobus locis: ergo moveri nunc, seu hoc instanti, est primò acquirere novum locum, & primò relinquere priorem, quod supponit antè fuisse in loco nunc relicto, quod autem durat tantum vno instanti, non habet antè, nec post; hinc licet potentia Dei infinita sit, non potest movere corpus localiter in instanti, sed tantum velocius, & velocius in infinitum, prout se ad illud movendum determinare voluerit. Item dum illuminatur aër, illuminatio non fit per motum localem, ita ut quod lumen funditur in partes remotiores, priùs tempore extiterit in propinquioribus; sic enim accidens transiret de subiecto in subiectum, quod naturaliter fieri nequit; sed sol lumen simul tempore producit in singulis partibus aëris illuminati; ita tamen ut priùs naturâ producat in vicinioribus, quàm in remotis, quia in remotis attingit illud tantum mediantibus propinquis.

Dixi ad locum distantem motum non fieri in instanti, ne videar illam quæstionem metaphysicam attingere, an Angelus moveatur in instanti ad locum sibi contiguum.

Quæres 2. hîc, an possit dari motus localis conti-

nus intra spatium aliquod finitum , v. g. supra lineam pedalem , qui nunquam finiatur.

Respondeo , id posse contingere aliquando per accidens ; sit enim filum G , H , quod traducatur in infinitum successivè per longitudinem parallelæ A , B , novas utique semper designabit partes , & continuè descendet per lineam pedalem E , F ; nec tamen ad finem ipsius pervenietur ; aliàs parallela superior concurreret aliquando cum inferiori , quod est contra Euclidem. Dixi per accidens nunquam absolvendum ; nam motus localis , qui fit successivè de loco ad locum determinatum , finito tempore absolvitur , ut experientiâ constar.

### §. I V. *Varia species motûs localis.*

**P**RIMA partitio motûs est in motum per se , & motum per accidens ; motus per se tunc est , cùm res movetur proprio motu ac suo : motus per accidens , cùm res movetur ad motum alterius ; exemplum utriusque habes in homine , qui in navi existens , per se deambulat versûs Orientem , dum fertur per accidens motu navis in Occidentem. De motu per accidens , hoc est pronuntiatum Philosophi 5. Physic. tex. 6. *Motus per accidens non potest sub ertis regulis tractari , quia omnium est , & in omnibus.*

Secunda partitio fit in rectum , obliquum , & circularem ; rectus est , quo mobile fertur secundùm lineam rectam ; obliquus , quo per lineam obliquam ; circularis , quo circa centrum in orbem agitur. Porro differunt specie ex 5. Physic. c. 4. quia rectum , & obliquum differunt specie ; minima enim mutatio in figuris mutat speciem , formaliter

nempe, & mathematicè, ratione figuræ; materialiter enim, & physicè loquendo, potest idem numero motus continuus, prius rectus paulatim obliquari, & circulariter fieri.

Duplex affectio motûs circularis comparati cum motu recto. 1. Motus circularis prior est motu recto. Ita Aristoteles 8. Physic. cap. 7. & 9. quia simplicius prius est mirûs simplici: motus circularis simplicior recto, quia non mutat terminos sicut rectus; illius enim termini sunt maximè connexi, hujus autem maximè disjuncti: at separatio terminorum importat compositionem.

11. Motus circularis perfectior motu recto, hæc affectio sequitur ex prima, 1. quia maximè continuus, 2. æquabilis, minûsque obnoxius anomaliz, 3. magis perpetuus, ac durabilis, utpote qui à medio fatigationem non ita patiatur, ut motus rectus. *Circulus*, inquit Philosophus, *nihil habet extra sese, super quo indigeat moveri, & suslineri, atque adco cum nihil habeat extra se, super quo suslineatur in motu, etiam nihil habebit extra se, à quo patiatur in motu, sive à quo motus ejus fatigetur, & interrumpatur.* Contra verò in motu recto omne id quod se movet, movet super alio, à quo potest motus iste variè impediri, & interrumpi; aliam præterea affectionem motûs circularis recenset Aristoteles lib. 1. de cælo, quòd nullus ei sit contrarius; non circularis, quia motus contrarii perfectè fiunt ad terminos contrarios: at in motu circulari non sunt termini contrarii, quia hic redit in se ipsum: non rectus, quia rectus solùm est contrarius motui recto, contrarietate nempe strictâ, quâ vnum est tantùm vni contrarium.

Tertia partitio fit in motum concentricum, &



excentricum ; concentricus servat eandem distantiam à centro : excentricus secus se habet , & modò magis , modò minùs à centro distat.

Quarta partitio est in naturalem , violentum , mixtum ex utroque , & præternaturalem ; naturalis fit à principio intrinseco , non renitente , sed conferente passo , vt motus ignis sursum. Præternaturalis fit ab extrinseco , indifferente passo , hoc est , nec exigente ; nec renitente : talis est motus circularis cælorum. Violentus fit ab extrinseco , renitente passo , cuius species multiplex ex 7. Physic. tex. 10. nempe pulsio , tractio , vectio , volutatio. Pulsio duplex , impulsio , cùm movens non deserit mobile , & expulsio , cùm deserit ; vectio fundatur in pulsione , tractione , & volutatione , sicut quod est per accidens , fundatur in eo , quod est per se ; tractio est motus ab alio ad se , aut ad aliud , cùm trahentis motio , quæ res continuas inter se distrahit , velocior fuerit ; volutatio coalescit ex tractione , & pulsione , quia necesse est id quod voluit , aliud quidem trahere , aliud pellerè , quia aliud à se abducit , aliud ad se adducit. Porro hos quatuor modos ad duos reducit Aristoteles nempe ad pulsum , & tractum , vt patet legenti textum.

De motu violento , hæc sunt pronuntiata. 1. *Vbi-  
cunque est violentia , ibi est renisus* , quia omnis violentia pugnat cum natura rei , quippe quæ sit ipsi contraria , ideòque ipsi res , quæ vim patitur , naturali impetu resistit vel actu , vt si quis alterum in carcerem rapiat , & renitente ipsius voluntate , & corpore reluctante : vel virtualiter , vt si quis dormientem occidit , in oppositum virtualiter niti dicitur.

11. *Nullum violentum perpetuum.* Ita Aristoteles

lib. 1. de cælo, cap. 2. & lib. 2. cap. 3. ubi ait, *nihil præter naturam esse perpetuum*, quia violentia est excessus recedens a statu rei naturali; si excedit simpliciter, tum patiens corrumpitur; si excedit secundum quid, tunc ipsum violentum corrumpitur: ergo neutro modo violentia est perpetua: quare pronuntiatum simpliciter intelligitur de violento simpliciter per se, & secundum totum.

III. *Violenter qui operatur, moleste operatur*, 3. Ethic. c. 1. quia operatur cum renisu naturæ; hinc *violenta non sunt, quæ quis delectationis causâ operatur*, 1. mag. Mor. nec violentum ullum est beatum, 1. de anim.

IV. Inter statum naturalem, & violentum datur medius: sic anima rationalis separata non est propriè in statu naturali, nec violento, sed præternaturali. Item motus cælorum circularis à naturali, & violento abstrahit.

Mixtus ex naturali, & violento oritur à principio partim intrinseco, partim extrinseco, cujusmodi est motus animalis progressivus, qui fit vel incedendo, vel natando, vel volando, vel rependo, de cujus natura, & causis agemus in libris de anima.

## §. V. *Affectiones motûs localis.*

**N**ON una est motûs localis affectio, siue comparatur cum aliis motibus, & tempore, siue absolutè; præcipuas affectiones hîc prosequimur.

I. Motus localis dicit partim ens, partim non ens, quia dicit mutationem ab esse, ad non esse, à non esse, ad esse, ab esse quod desinit, ad esse quod incipit; ita tamen ut utrumque dicat conjunctim, ideòque dicitur ab Aristotele actus imperfectus, & imperfecti.

II. Prior est naturâ , & dignitate cæteris motibus ; natura quidem , quia præsupponitur ad alios motus , & est quasi eorum principium , ut jam observavi ; dignitate verò , 1. quia id quod generationis ordine postremum est , perfectione id ipsum primum : rebus quæ gignuntur , motus ad locum ultimò convenit , ut in animalibus cernere est , quorum aliqua motu carent , ut quæ scopulis adhærescunt ; quæ verò moventur , non antè moventur quàm perfectionem obtinuerint , & membrorum firmitatem ; hinc *motus localis est integrorum , & perfectorum* ex 4. de cælo , tex. 24. 2. quia latio inter omnes motus minimè subjectum dimovet à naturæ suæ statu ; nec enim quantitatem mutat , ut accretio , nec qualitatem , ut alteratio , nec substantiam , ut generatio , & corruptio. 3. quia per motum localem res per se moveri dicuntur ; accretio enim fit ab alimento , alteratio sæpè lationem prærequirit ; latio autem per se absque alterius ope , & interventu administratur. Ita Aristoteles lib. 8. Phys. c. 7. tex. 58. 59. & 60.

III. Omnibus aliis motibus notior , tum ratione terminorum , tum ratione medii , & fluxûs : quare motuum alias species intelligere cùm volumus , cogitationem nostram ad motum localem reducimus , & cum eo comparamus. Et verò motus localis , præsertim rectus in oculos potissimùm occurrit , seque ipsis quasi inculcat ; hinc Aristoteles 3. Metaph. tex. 12. *In motu sunt omnia sensibilia.*

IV. Inceptio , & desitio rerum , velocitas motûs , & tarditas , de quibus ut agam fusiùs , sit

§. V I. *Quomodo res incipiant, & desinant.*

I. **D** V o s modos excogitarunt Philosophi ad explicandam inceptionem, & desitionem rerum; primus rebus successivis convenire dicitur, secundus permanentibus.

I I. Primus, quo res dicuntur incipere, & desinere extrinsecè, his vocibus exprimi solet: *nunc ultimò res non est, immediatè pòst erit*, en inceptionem extrinsecam: *nunc primò res non est, immediatè antea erat*, en desitionem extrinsecam: v. g. motus, & tempus dicuntur incipere per ultimum sui non esse, quatenus verum est dicere; nunc ultimò non est motus, aut tempus, sed immediatè pòst erit: desinere autem per primum sui non esse dicuntur; nunc primò non est motus, aut tempus, immediatè antea erat.

I I I. Secundus, quo res dicuntur incipere intrinsecè, & desinere intrinsecè, sic exprimitur; *primò res est, immediatè antea non erat*, en inceptionem intrinsecam: *ultimò res est, immediatè pòst non erit*, en desitionem intrinsecam: sic v. g. forma dicitur incipere intrinsecè, quatenus verum est dicere, nunc primò forma est, immediatè antea non erat; privatio autem illius dicitur desinere intrinsecè; quatenus verum est dicere, ultimò est privatio, immediatè pòst non erit; hinc

Vides inceptionem extrinsecam exprimi per ordinem ad instans subsequens, in quo res dicitur futura; inceptionem verò intrinsecam per ordinem ad prius instans, in quo non erat: item desitionem extrinsecam exprimi per ordinem ad prius instans, in quo res erat, & desitionem intrinsecam

per ordinem ad subsequens instans, in quo non erit amplius. His positis, fit

I. **A S S E R T I O.** Quidquid desinit, aut incipit intrinsecè, dici etiam potest incipere, & desinere extrinsecè. Probatur, quia si verè dici potest de re quæ incipit intrinsecè, nunc primò est, immediate antea non erat; videtur quoque posse dici, nunc ultimò non est, & immediate post erit. Ratio est, quia ante primum esse rei, est ultimum ejusdem non esse, eo nempe modo, quo esse potest: ergo in illo priori intelligi, & dici potest incipere extrinsecè. Sicut de re desinente intrinsecè dici potest: nunc ultimò est, immediate post non erit: sic de illa desinente dicitur, nunc primò non est, & immediate antea erat: ergo potest dici, quòd desinat extrinsecè.

II. **A S S E R T I O.** Quidquid incipit, ac desinit extrinsecè, dici quoque potest incipere, ac desinere intrinsecè. Probatur, quia eadem est proportio; nam sicut de re incipiente extrinsecè dici potest, nunc ultimò res non est, immediate post erit: ita attendentibus nobis ad illud immediatum instans, in quo non erat, verum est de illa dicere; hæc res primò est, immediate antè non erat, & ita dicitur incipere intrinsecè. Item quia de re verum est dicere, nunc primò non est, immediate antea erat, quod est desinere extrinsecè, nobis considerantibus illud immediatum instans, in quo erat, licet dicere, hæc res ultimò est, immediate post non erit.

III. **A S S E R T I O.** Res tum successivæ, tum permanentes, sive fiant pars post partem, sive totæ simul, possunt dici incipere intrinsecè per primum sui esse, & desinere intrinsecè per ultimum sui esse. Probatur, præsertim de successivis: in ali-

qua hora v. g. datur pars aliqua determinata assignabilis, puta, primus quadrans, quo hora incipit, siquidem est primum esse horæ, non absolute quidem, sed respectivè, quatenus ante ipsum nihil erat horæ illius, & post ipsum est aliquid horæ: ergo si sumatur primus ille quadrans, ratione illius, de hora dici potest; nunc primò hora est, & antè non erat: at hoc est incipere intrinsecè. Rursus in eadem hora datur quartus quadrans, qui est ultimum esse horæ, quatenus post ipsum, nihil illius horæ sequitur: ergo ratione illius quarti quadrantis de hora illa dici potest; nunc ultimò hora est, immediatè post non erit: ergo res successiva dici potest desinere intrinsecè.

Porrò dum dicitur primus quadrans, aut ultimus, non eo sensu dicitur, quòd uterque sit absolute indivisibilis, sed quòd ante primum quadrantem nihil sit illius horæ; non enim ad rationem partis alicujus requiritur, ut pars illa sit indivisibilis, sed satis est, quòd ante illam nihil sit totius. Et verò sicut caput potest dici prima pars hominis, non quòd individuum in sese sit, sed quòd antè, & supra caput nihil ejusdem hominis prorsus sit: ita à pari de primo quadrante horæ: ergo cum primus quadrans horæ illius incipit fluere, dici utique potest, nunc primò est, seu incipit hora, immediatè antè non erat. Item desinente quarto quadrante, dici potest, nunc hora ultimò est, immediatè post non erit; licèt enim quartus quadrans absolute dividuus in sese sit, tamen in ordine ad horam sufficit, ut post ultimum quadrantem illum, nihil supersit horæ illius: ergo hora dici potest desinere per ultimum, seu quartum quadrantem; tanquam per instans virtuale; hinc

Colliges duo. 1. Eodem modo potest explicari inceptio, & desitio quantitatis successivæ, & quantitatis permanentis; ut enim trabs intelligi potest incipere intrinsecè per primum pedem v. g. sed sumptum indivisibiliter, & per modum vnius, & desinere per ultimum pedem, eodem quoque modo sumptum, ita & hora, &c.

11. Stare potest in re desitio extrinseca cum inceptione intrinseca: v. g. primò non est privatio formæ, immediatè antè erat: primò est forma adveniens, immediatè antea non erat; hæc enim duo non se destruunt, quia nunquam privatio, & forma sunt in materia eodem instanti, sed immediatè antè fuit privatio, & nunc est forma. Item desitio intrinseca stare potest cum inceptione extrinseca: v. g. ultimò est privatio formæ, immediatè pòst non erit: ultimò non est forma adveniens, immediatè pòst erit. Contrà verò, ultimum esse rei pereuntis, & primum esse advenientis non stant in re simul, licèt per mentem non se destruant, quia res, quando ultimò est, est, & quando primò est, est quoque: ergo si hæc duo simul in re starent, eodem instanti reali possent esse forma, & privatio illius in eadem materia.

Objicies: Quadrans, qui dicitur prima pars horæ, dividi potest in semiquadrantes: ergo quadrans non est prima pars horæ, adeoque non potest incipere intrinsecè.

Resp. distingo consequens: Non est prima pars absolutè, & quatenus sumitur, ut totum quoddam conflatum ex partibus sine fine dividuis, concedo: ut sumitur relativè, tanquam prima pars horæ, ante quam nihil est prius in illa hora, nego; est enim id, ante quod nihil est illius horæ, & sic su-



mitur indivisibiliter, ut instans positivum, & virtuale.

Instabis 1. Nulla pars horæ assignari potest, ante quam non sit prior assignabilis: ergo non datur prima pars horæ.

Resp. dist. ant. Si hora sumitur absolutè, esto: si relativè, nego; nam primus quadrans horæ respectivè ad horam, est prima pars horæ, quia ante ipsum nihil est horæ, Deinde probat argumentum etiam in permanentibus nullam dari primam partem, quia nulla est pars tam exigua, quæ non sit infinitè dividua.

Instabis 2. Quæcumque pars temporis sumatur, in illa motus non est totus simul: ergo in illa parte non potest dici, talis est motus, & talis hora: ergo non potest incipere intrinsecè.

Resp. dist. anteced. In illa parte totaliter, & collectivè sumpta non est totus motus simul fluenter secundum aliquam sui partem determinatam, & aliquotam, nego: distributivè, & proportionaliter sumptâ, transeat; nam totus motus est simul fluenter in mense, licet non sit permanenter.

## §. VII. De velocitate, & tarditate motûs.

I. OBSERVATIO. MOTVS dicitur velox, & tardus respectivè, quia idem motus B comparatus cum motu C dicitur velox; collatus verò cum motu D, tardus; quare nullus est motus, quantumvis velox, qui tardus dici non queat, cum velociore collatus: nullus quantumvis tardus, qui cum tardiore comparatus, non dicatur velox.

II. OBSERVATIO. Motus velocior dicitur, quo plus spatii æquali tempore, vel æquale spatium

minori tempore conficitur ; tardior verò contrà , quo minùs spatii æquali tempore , vel æquale spatium longiori tempore decurritur : vnde velocitas peræquè ac tarditas explicari debet per ordinem ad locum simul , & tempus : sed hîc quæritur per quid velocitas , & tarditas motûs explicari debeat.

Quidam tarditatem motûs in eo positam pugnant , quòd interrumpatur nonnullis morulis , ideòque vnum motum altero velociorem esse , qui vel minoribus , vel paucioribus morulis interjicitur , quæ cùm minutissimæ per se sint , & imperceptibiles , sensuum operâ dignosci nequeant. Hanc sententiam sequitur Fonseca , licèt continuum ex partibus in infinitum diuisis componi putet.

Refellitur 1. quia potest sumi pars aliqua , quæ contineat in se alias infinitas , nullis morulis interruptas ; si enim quælibet pars ejusmodi morulas contineret , utique in toto motu nihil esset præter morulas ; sumo itaque illam partem nullis interceptam morulis , & sic arguo : illa pars morularum expers , comparata cum alia parte , potest esse velocior eâdem , aut tardior , licèt nullæ in illis morulæ intercipientur : ergo motûs velocitas , & tarditas non potest explicari per ejusmodi morulas. 1.

Refellitur exemplo lapidis deorsum cadentis , & à propria gravitate pulsî ; haud dubiè vnus movetur celerius altero , & tamen à nullo detinetur ; ut aliquandiu in medio aëre interquiescat : ergo in hac hypothesi major , vel minor tarditas , & celeritas non potest peti à morulis.

Nec dicas lapidem , qui tardiùs movetur , diutiùs ab aëre detineri , qui pro suis viribus divisioni aliquandiu resistit ; quia si aër aliquandiu resistit divisioni , resistet etiam , & postea huic divisioni. Pa-

tet

ter consequentia, quia lapis, qui deorsum truditur, non habet maiorem vim post duo instantia temporis, quibus interquievit, quàm post tria, aut quatuor: ergo si aëri priùs dividendo impar fuit, nec pòst dividet, cùm vires aëris ad resistendum non minuantur.

Nec dicas 2. aëri inesse tantùm vires ad resistendum per duo instantia contra gravitatem lapidis, quibus elapsis naturaliter cedit, sicut qui in Moraliis, alteri quidpiam petenti bis, terve resistit quidem, perseveranti tamen, & pertinaciùs deprecanti concedit; sed hæc responsio non valet, si motus supponatur fieri in vacuo: moveatur itaque deorsum in vacuo lapis molaris cum pluma; utique movebitur celerius ille lapis, quàm pluma, quo in casu tarditas major plumæ non poterit peti ex pluribus morulis interceptis, & à resistantia mediæ productis, quia nulla in vacuo mediæ resistantia. Denique refellitur experientiâ rotæ, cujus partes viciniores centro tardiùs moventur partibus à centro remotioribus, & in summa peripheria positis; nam si viciniores interquiescerent, dum remotiores jugiter moverentur, rota frangeretur, quod repugnat experientiæ.

Alii qui quantitatem ex punctis virtualiter extendis, & motum ex indivisibilibus determinatis, quæ Philosophi mutata esse appellant, componi volunt, ita tarditatem, & celeritatem explicant. Mobile, inquit, quod velocissimè movetur, acquirit in quolibet instanti totum proximum spatium nullo modo communicans cum priori; velociùs autem altero movetur, quòd singulis instantibus plus acquirit novi spatii, & minùs communicantis cum priori. Denique mobile minùs velox eodem instan-

ti acquirit quidem quodlibet punctum illius spatii novi, sed non adæquatè positi extra præcedens, sed cum illo communicans: v. g. Achilles moveatur celerius, quàm testudo, quia quolibet instanti plus spatii novi, & minùs cum priori communicantis conficit; unde fit, vt in fine horæ, licèt ambo semper moti sint; Achilles tamen plus spatii confecerit, quàm testudo. Ita inflatores, qui non negant etiam sæpè maiorem celeritatem vel tarditatem motùs ex paucioribus, vel minoribus, pluribus, vel paucioribus morulis interceptis desumi; rem totam explicant exemplo duorum Angelorum, quorum vnus singulis instantibus durationis in qua movetur, velocissimè moveatur, adeòque spatium acquirat nullo modo communicans, immediatè tamen vicinum cum eo, quod occupabat prius, alter autem moveatur ad spatium communicans.

Refutatur hæc sententia, 1. quia nititur fundamento ruinoso, nempe quantitatem componi ex punctis virtualiter extensis, & inflatis; hunc enim tumorem jam antè compressimus parte tertia. 2. Hæc sententia obscurum per obscurius explicat, nempe motum rerum corporatarum per motum ærum spiritualium. 3. Morulas admittit cum priori sententia, adeòque difficultates easdem habet solvendas; deinde in hac opinione, vt ens successivum sit continuum, debent partes illius sic vniri, vt vna ponatur immediatè post alteram in eodem subiecto; age porrò, si intercipiuntur morulæ, & quietes, quomodo vna post alteram immediatè erit?

Ad hæc, repugnat in instanti indivisibili acquiri spatium divisibile; quod enim est divisibile, debet acquiri successivè, adeòque in tempore; ergo in

eodem instanti acquiri non potest plus, vel minus spatii. Quid quòd corpus hominis posset in instanti deferere totum spatium, quod immediatè priùs occupabat, & aliud acquirere adæquatè divisum, idque immediatè proximum. Præterea indivisibile solum, & per se sumptum, posset moveri localiter; si enim potest moveri localiter unitum cum aliis, cur non etiam ab ipsis se junctum? at hoc est impossibile, quia cum motus localis sit successivus juxtà, & dividuus, non potest in indivisibili recipi. Denique posset saltem divinitus motus localis poni totus simul in re aliqua, quamvis res illa non moveretur localiter: at hoc implicat: ergo & illud unde sequitur. Probatur sequela majoris: sit aliquod indivisibile, putà lapis, quod ita moveatur in aliquo spatio per decem instantia temporis, ut pro instantium numero, in quibus movetur, acquirat decem præsentias locales, seu mutata esse, vnum post alterum: hac factâ hypothesi sic argumentor, potest Deus facere absolutè, ut illud mobile habeat simul, & semel in vno instanti omnes illas præsentias locales, si ipsum ponat simul in omnibus illis prædictis locis, & tamen non movebitur localiter: quare sit

VNICA ASSERTIO. Velocitas, & tarditas motus in principiis nostris, quibus continuum successivum componimus ex partibus infinitè dividuis, ritè explicatur per coëxistentiam successivam mobilis ad plures, vel pauciores partes spatii in ordine ad longius, aut brevius tempus. Ita Aristoteles 4. Physic. tex. 98 ubi definit motum velocem, quo plures partes spatii brevi tempore decurruntur: tardum verò, quo pauciores partes spatii longiori tempore conficiuntur, ταχὺ μὲν τὸ ἐν ὀλίγῳ πάλυ

κινῆμασι : βραδὺ δὲ τὸ ἐν πο. ὧ ὀλίγον : *velox quidem est, quod brevi tempore multum movetur; tardum verò, quod longo parum*; hinc velocitas respondet raritati, tarditas densitati. sicut ergo rarum est, quod habet parum materiæ sub magna dimensione; ratur verò, quod multum materiæ sub parva dimensione; ita motus velox, & tardus: v. g. moverur testudo in hora, moverur, & aquila; illa tardius, hæc velocius, quia minus spatii testudo eodem tempore conficit, quam aquila, licet utrumque semper continuè successivè moveatur: unde quoties est aliquid motus aquilæ, est etiam aliquid motus testudinis, minus tamen, eâ proportionem, quâ totus aquilæ motus superat motum testudinis. Probatur assertio sic explicata, quia hæc sufficiunt ad explicandam velocitatem, & tarditatem motus.

### §. VIII. *Diluvuntur objecta.*

**O**BIECTES I. Duo motus in spatio æquali habent partes æquales, quamvis fiant tempore inæquali: ergo sunt æquè veloces, ac proinde velocitas, & tarditas non petuntur à tempore. Probatur antecedens, duo illi motus non habent plures partes, quàm spatium decursum: ergo habent partes æquales.

Respondeo, concessio antecedente, & illius probatione, nego primam consequentiam, & subsumptum; velocitas enim, & tarditas non præcisè petuntur ex eo quòd motus tot, vel plures partes habeat, sed quòd tot habeat per respectum ad tale tempus, quod connotatur: quare si tollis tempus, utique velocitatem, & tarditatem tollis.

Objicies 2. Non potest explicari, quomodo duæ rotæ inæqualis magnitudinis, eidem axi insertæ, æqualem in plano lineam describant, & æquale iter eodem temporis spatio conficiant. Probatur factâ hypothesi: sint duæ rotæ eidem axi insertæ, vna major, altera minor, ita vt axis sit centrum vtriusque. Iam vtraque rota moveatur ad motum axis supra planum duplex, alterum superius minori rotæ subiectum, alterum inferius majori suppositum. Denique sit motus mixtus partim ex circulari, partim ex recto; hinc sic arguo: vtraque rota in suo plano æqualem lineam describit vnicâ circulatione, quamvis sint valde inæquales, quod tamen non fieret, si seorsim moverentur: quæro ergo cur superficies convexæ vtriusque rotæ, quamvis admodum æquales, æquali tamen longitudine in motu coæquantur? certè id fieri non potest, nisi vel quia pars aliqua maioris rotæ non tangit planum, vel quia pars minoris rotæ bis tangit planum, vel quia minor rota sæpius interquiescit, & pluribus morulis intercipitur, major verò paucioribus; primum, & secundum dici non possunt, quia ambæ moventur ad axis motum, adeoque diversimodè moveri non possunt: non tertium, quia morulas à motu rejecimus: ergo &c.

Respondeo, in sententia Aristotelis, hanc difficultatem faciliùs solvi, quàm in qualibet alia; cum enim geminæ illæ rotæ moventur, habentque idem centrum, ita moventur, vt vna per se moveatur, altera per accidens, hoc est, ad motum alterius. Porro quæ moveatur ad motum alterius, defertur ab illa quodammodo motu tractionis, vnde tantumdem spatii, atque illa conficit; contrà verò cum maior, & minor rota seorsim moventur, quia



utraque movetur per se, ideo æquali tempore, & velocitate major rota conficit majus spatium, minor verò, minus spatium.

At cur duæ rotæ habentes idem centrum, quod fit centrum per se rotæ A majoris, quæ per se movetur, & centrum per accidens rotæ B, quæ movetur per accidens ad motum rotæ majoris A, conficiunt æquale spatium æquali tempore?

Ratio est, quod utraque rota motu mixto ex recto, & circulari moveatur, omnis enim motus, quo rota, vel circulus movetur, progrediendo supra planum, mixtus est ex recto, & circulari, quia simul facit gyrum suum, & tandem ad terminum ad quem pervenit: itaque rota minor tardiùs movetur circulariter, quàm major, quia minorem circulationem conficit, eo tempore, quo major rota majorem; aliunde verò minor rota motu recto celerius movetur, quàm major, quia partes minoris propius accedunt ad centrum, quod in ejusmodi rotatione supra planum rectà ad terminum progreditur. Cum ergo rota minor tardiùs moveatur in orbem, recto autem celerius; & major rota moveatur celerius in orbem, rectà verò tardiùs, fit utrinque compensatio, & adæquatio, quâ fit, ut æquali tempore æquale spatium conficiant.

### A R T I C V L V S III.

*De motu violento projectorum, & de impetu.*

**Q**UÆRIT Aristoteles cap. 10. l. 8. quæ sit causa motûs violenti: quare ne quid ad hanc partem motûs desit, quærendum hîc, unde ortum habeat; & quoniam motus projectorum alius est di-

rectus, alius reflexus, 1. causam motûs projecto-  
rum vniversim quæremus, 2. de motu directo, &  
reflexo pauca subjiciemus, & quidem brevissimè,  
quia nullum violentum diuturnum est.

*§. I. Prænotanda quedam.*

1. **H**ic agitur de motu violento, tum quo mo-  
bile ad motum sibi contrarium tendit, vt  
grave sursum: tum quo mobile à principio extrin-  
seco supra exigentiam suam in locum celerius fer-  
tur, vt dum lapis deorsum manu protruditur.

11. De motu utroque est quæstio, quo ita cor-  
pora moventur per impulsione, vt tempore mo-  
tus sint omnino à projiciente diuisa, qui ideo dici-  
tur motus expulsionis.

111. Principium istiusmodi motûs duplex, re-  
motum, & proximum; remotum est projiciens,  
proximum hîc inquirimus.

Triplex est de principio immediato motûs pro-  
jectorum sententia; prima docet, aërem esse causam  
motûs projecti, accurrendo ad ipsum corpus à ter-  
go metu vacui, ipsûmque propellendo. Hanc sen-  
tentiam ita explicant Themistius in sua paraphrasi  
capitis noni in librum de insomniis, & Simplicius  
8. hujus operis ad tex. 82. vt velint à diversis aëris  
partibus se mutuò propellentibus, condensantibus,  
& rarefacientibus oriri. Dum enim projiciens mo-  
vet partes aëris sibi vicinas, iisque projectum com-  
mittit, remotiores propellunt, & in eas se velut  
exonerant; sicut lapis, dum in fluvium dejicitur,  
circulum efficit primò minorem, majorem deinde.  
Præterea aër condensatur ab anteriori parte, vt  
projecto corpori cedat, viamque sternat oppidò fa-

cilem , statimque ubi projectum transit , rarefit idem , ipsūque corpus projectum à tergo potentiùs impellit. Secunda ab impetu à projiciente producto moveri projecta pugnat. Tertia ex utraque temperata , ab impetu , ut causā præcipuā , & ab aëre , ut causā adjuvante , moveri projecta contendit.

I. A S S E R T I O. Aër non potest esse causa adæquata motus projectorum : ita Conimbricenses lib. 7. Physic. cap. 2. quæst. 2. art. 8. Toletus lib. 8. Phys. c. 9. tex. 86. Tellez part. 2. in Physic. disp. 39. Probat 1. quia aër accurrens metu vacui , supponit motum : ergo non facit ; fac enim non moveri projectum , tunc non erit metus vacui. 2. Cum fit motus reflexus , obice reperto , sæpè nihil est , quod moveat aërem motu reflexo , ut dum pila projicitur in reticulum ; tunc enim pertransit aër , & tamen pila celerrimè remittitur. 3. Sagitta validiùs intorqueatur in chartam bene tensam , extra longissimè feretur , licèt nihil ferè aëris per foramen ipsius chartæ introsubeat. 4. Quæ vis commoti aëris trochum circulariter agere potest ? præsertim cum illum manu pueri excipiunt , & in locum , in quo nulla tum aëris fit commotio , deportant , in quo tamen à motu non cessat ; quin etiam in ignem conjectus aliquandiu movetur. 5. Aër solet magis condensari ad anteriores projecti partes , puta sagittæ , quàm ad posteriores , & ad latus sagittæ appositas , quo in casu retardari potius debet projectum in motu , quàm juvari ; quod vel inde patet , quia sagitta in anteriori sui parte sæpè accenditur , propter aëris condensationem , cui alliditur per motum , licèt in posteriori parte ne incalascet quidem : ergo aër magis in anteriorem

projecti partem agit , quàm in posteriorem : ergo impulsus illius sagittæ non fit saltem adæquatè ab aëre , priùs quidem densato , tum se rarefaciente , & ad partes posteriores projecti accurrente. 6. Angelus in vacuo telum contorquere potest : at in eo nullus aër , à quo telum moveri possit : ergo superest , ut ab impulsu tum moveatur telum.

Confirmatur variis experimentis , 1. Suspende pilam è laqueari , deinde aërem , quàm citissimè poteris , commove , tum exiguus erit ejusdem pilæ motus. 2. Vibretur hasta viginti pedes longa , cujus pars posterior in acumen desinat , feretur per aërem magno impetu , quamvis aër ad partes posteriores affundi , & condensari vix possit , immò ipso potiùs hastæ acumine dividatur. 3. Sagitta , vento contrario perflante , ultrà fertur , quamvis aër in oppositas partes deferatur. 4. Si quis tabulâ lusoriâ pilam impellat , plus aëris impellit , quàm reticulo , & tamen ad minorem sæpè distantiam pila defertur. Denique rota , dum vehementer mora paulatim elanguescit , antequàm moveri desinat , in utramque partem semel , atque iterum agitur : at illa motuum contrarietas in aërem refundi non potest.

II. ASSERTIO. Causa proxima motus projectorum , & præcipua , est impetus à projiciente impressus : ita authores jam citati. Probatur : debet assignari causa proxima motus projectorum ; quidquid enim est , & antè non erat , habet causam distinctam , quia à se esse non potest : nulla alia causa immediata assignari potest præter impetum ; non aër , saltem ut causa adæquata , ut jam probatum est , sed ad summum , ut causa adjuvans : non qualitas innata , & permanens ; aliter motus pro-

jectorum esset ab intrinseco, & naturalis, non violentus: non ipse projector, quia licet sit causa ipsius imperiûs, non potest tamen esse causa proxima motûs, siquidem lapis etiam separatus à projiciente, adhuc movetur, potestque adhuc moveri, eodem destructo; & verò sicut impetus innatus est qualitas indita ab agente naturali in ortu, & permanens, ut gravitas lapidi: ita impetus adventitius ab extrinseco projectis imprimi debet. Deinde motus projectorum in fine tardior est, quia impetus, quo feruntur, paulatim debilitatur, & elanguescit, sicut corpus grave deorsum cadens, motum suum accelerat, ut patet in funependulis: ergo debet assignari causa hujus motûs velocioris; non gravitas lapidis, saltem proximè, quia causa necessaria subjecto applicata, & non impedita semper agit, & quantum potest, nec aliud quidquam extrinsecum: ergo ipse impulsus. Denique imprimitur impetus ipsi aëri, nec enim ipse sine vi impressa, commissâ sibi movere queat: ergo non minùs ipsi pilæ projectæ, quàm aëri ambienti imprimi poterit.

Dixi ab impetu oriri, ut à causa præcipua, quia non nego aërem aliquando esse causam adjuvantem, cum ex subita rarefactione raptim subit à tergo, ipsamque qualitatem adjuvat; hinc os bombardæ applicatum lorice ferreæ non perfodit, quam tamen perfoderet ex majori distantia, quia aër à tergo densatus confert ad emissionem glandis. Item projectum concitatiùs fertur, cum à projiciente paulum discessit, & in medio cursu est, quàm cum eidem conjunctum est, quia aër à tergo accurrens ordinatiùs pellit. Tamen post medium incipit impetus languescere, deficitque paulatim, donec pro-

jectum planè quiescat ; sicut motus viventium in medio velocior est , quàm in principio , vel in fine , ob maiorem copiam spirituum , qui effunduntur , & sub initium desides erant , & sub finem exhauriuntur.

§. II. *Pronuntiata quedam de natura, ortu, progressu, & interitu impetûs.*

**I**MPE TVS , qui dicitur etiam impulsus , & qualitas impressa , definiri potest , qualitas physica , effectrix motus in mobili , quod ab externo movente separatum , contra , vel præter naturam movetur. Dicitur qualitas ex genere suo , quia est affectus facilè mobilis à subiecto suo , tamen aliquatenus permanens , quia lapis projectus v. g. etiam separatus , movetur aliquandiu. 2. Physica , utpote distincta , & separabilis à suo subiecto. 3. Effectrix motus , quia est causa instrumentaria motûs , projector autem causa princeps. 4. Contra naturam , cùm motus est simpliciter violentus. 5. Vel præter naturam , cùm non est simpliciter violentus , sed mobile duntaxat movetur celerius , quàm exigat innatus impetus ; hinc distinguitur specie à gravitate , & levitate , quia hæ naturales sunt , illa violenta ; naturale autem , & violentum differunt specie. Ex hac definitione sequuntur hæc pronuntiata. 1. *Primo instanti quo est impetus, non est ille motus, cujus hic impetus est causa*, quia non potest esse motus , nisi sit locus prior relictus , & novus acquisitus : ergo si eodem instanti , quo est impetus , haberet motum , eodem instanti esset in duobus locis. 2. *Impetus primo instanti, quo est, non habet finem suum*, quia primo instanti non habet

motum : nec tamen ideo frustra est ; frustra enim tantum dicitur esse ille impetus , qui primo instanti , quo est , non potest habere motum.

I I. Impetus , licet exigat aliquem motum , tamen ex se indifferens est ad hunc , vel istum motum , donec accedat vel determinatio projicientis ad talent terminum , vel corporis reflectentis ad novam lineam , vel medii detorquentis ad lineam obliquam ; hinc

I II. Impetus non est simpliciter contrarius gravitati , & levitati , quia potest stare cum utraque tum in motu sursum , tum in motu deorsum. Habes exemplum in potentia motrice , quæ potest movere in omnem loci differentiam pro exigentia mobilis ; dicitur tamen contrarius secundum quid , & per accidens , vel ratione modi , cum movet ad eundem terminum , ad quem levitas , vel gravitas tendit ex se se , sed concitatus , quam exigat levitas , aut gravitas insita ; vel ratione termini , cum movet sursum corpus grave , vel corpus leve deorsum , & tunc destruitur ab alterutra qualitate , utpote sibi contraria.

Dices : principia motuum contrariorum sunt opposita : impetus est principium motuum oppositorum motui gravitatis , & levitatis : ergo &c.

Resp. dist. majorem : Principia per se , concedo : per accidens tantum , nego ; at qualitas impressa , sicut potentia motrix , aut virtus magnetica producant motum oppositum gravitatis , aut levitatis moribus per accidens , ratione causæ determinantis : unde impetus per se non imprimitur ad expellendum gradum aliquem levitatis , aut gravitatis.

I V. Impetus producitur , ut plurimum , cum motu locali. Patet experientia ; dum enim volumus



aliquem percutere, manum submovemus, attolimusque, quod majorem impetum imprimamus. Item qui fossam saltu superat, retrocedit, ut validiorem sibi effuso cursu impetum imprimat. Denique bombarda longior plûsque habens nitrati pulveris, longius globum propellit, tum quia fit motus rarior in pulvere copioso, tum quia fluxus globi per bombardam longiorem est diuturnior.

v. Potest tamen produci in instanti impetus ex natura sua, sicut lumen. Ratio est, quia non habet contrarium, nec est alterius qualitatis expulso, quæ resistendo productionem ejus retardet; deinde quidni Angelus immotus possit lapidi impetum imprimere, ipsûmque projicere: tamen per accidens, & ratione motûs concurrentis instar conditionis, producitur successivè, sicut lumen, cum corpus ei successivè objicitur. Prob. quia qualitas illa cum motu producitur: ergo successivè, ut patet ex conatu projicientis, qui minor sub initium, paulatim crescit: deinde si in instanti producitur, maximè in instanti separationis; at hoc dici non potest, quia ante instans separationis fuerunt alia plura, & plura in quibus produci potuisset.

Hinc sequitur, produci, antequàm projectum dimittatur è manu; 1. quia frustra motus diuturnior foret: 2. frustra ad saltum cursûs præmitteretur: 3. frustra funda rotaretur: 4. constat ipsum pondus in agitatione motus magis, ac magis minui; ita ut vix manum premat, ex câque videatur evolare: ergo ante instans separationis imprimitur projecto. Denique in instanti separationis vel producitur per motum, vel non: si primum: ergo non producitur in instanti, quia motus est successivus.

Objicies : Vel producitur qualitas per motum , vel non.

Resp. produci non per motum , vt actionem productivam , sed cum motu , vt conditione ; deinde potest produci ab Angelo sine motu ; non enim opus est motu , vt cælo impetum imprimat : deinde cum magnes per vim attractricem , aut expultricem , trahit ferrum , aut repellit , impetus iste sine motu prævio fit. Porro aliquando requirit motum localem tam ex parte imprimantis , quàm ex parte corporis ejus , cui imprimitur , vt cum quis hastam movet , projiciens enim movetur , simul & hasta.

Instabis : Manu tantillum quiescente , post motum multiplicem , perinde lapis decedit , ac si nullus motus foret prævius : ergo non producitur in manu qualitas impressa , sed in instanti separationis.

Resp. nego consequentiam ; ea enim est impetus illius natura , vt statim ac mobile cogitur quiescere , ipse intereat.

v r. Producitur in toto mobili secundum intentionem simul ; vt enim totum mobile movetur simul , ita proximam , & immediatam motus sui causam habere debet in singulis partibus , quare momento per totum mobile diffunditur qualitas , vt lumen per aërem.

Objicies : Impetus qui fit cum motu , intenditur successivè : ergo successivè extenditur.

Resp. nego consequentiam ; alia enim est ratio extensionis impetûs , alia intensiois ; nam intensio fit sæpè successivè cum motu , extensio in instanti.

Instabis : Ignis applicatus aliquibus subiecti partibus , agit in illas , licet non agat in omnes ; igitur & potentia motrix.

Dispar ratio est, quia vna pars potest calefieri, & resolvi sine alia; non tamen vna moveri sine alia, cui conjuncta est, nisi separaretur; ergo nec recipere motum sine alia; hinc

Pater, cur ingens corporis moles à debili potentia moveri non possit, quia non producit impetum in singulis partibus subjecti.

V I I. Successivè paulatim corrumpitur impetus, prout à projiciente projectum longius recedit; per accidens autem in instanti.

Probatur prima pars, quia desinit perinde ac sonus, qui per medium diffusus paulatim destruitur, defectu causæ conservantis, quæ juxta exigentiam ipsius naturalem impetum, perinde ac sonum desinit conservare; deinde gravitas naturalis lapidis projecti juvat illius interitum; non quòd aliquam impetûs adventitii peremptricem qualitatem producat, sed quòd motui violento resistat, nisu deorsum tendente.

Probatur secunda pars, quia mobile sistitur aliquando objectu manûs, aut parietis.

Objicies: Qualitas carens contrario, statim ac separata est à causa producente, vel interit, vel nunquam.

Resp. nego, ut patet in sono, qui licet contrario careat, non statim ab ortu emoritur, sed durat aliquandiu, propagatûrque per aërem; deinde licet de aliis qualitatibus concederetur, nego de impetu, quia non assequeretur finem suum, nempe motum ad certum spatium. Certè cùm motus ille sit violentus, non debet esse diuturnus, & tamen durare aliquandiu debet; ergo nec qualitas ejus effectrix durare semper debet, aliter non desineret motus; debet stare tamen aliquandiu, ut

projectum ad certum spatium propellat ; hinc impetus est qualitas aliquatenus permanens.

VIII. Motus reflexus projecti fit ab eadem qualitate , à qua motus directus , tum quia impetus pilæ impressus , poterat longius impellere , & adhuc sub ipsa reflexione durat in pila : ergo est causa motûs illius reflexi ; tum quia quò impulsus est potentior , eò longius pila resilit : tum quia paries non se movet , & impulsus non imprimitur , nisi à mōvente ; ideo enim manum retroducimus , vt lapidem longius jaciamus ; putem tamen pendere à corpore reflectente , vt à causa determinante per accidens , quatenus impedit motum directum. Ita tamen est causa per accidens , vt si corpus reflectens durum sit , maximè adjuvet talem motum , sin minùs , retardet : sic pila lanæ validius impacta vix resilit ; secùs verò si in lapidem incidat. Ex his , tres quæstiones solves.

Prima est , vnde anceps rotæ ad quietem aspirantis motus oriatur.

Resp. ex deficientis qualitatis impressæ cum gravioribus partibus rotæ vnum locum appetentibus conflictu , à quibus cùm non valeat qualitas caduca integram ampliùs circulationem extorquere , huc atque illuc agendo , quandiu vires aliquæ suppetunt , obtinet quidquid potest , donec totus impetus emoriatur.

Secunda , cur trochus , reducto fune , circumvolvatur , & longo primùm impetu , ac majore gyro oberret , modò subsiliat , modò stet , modò ebriorum more , titubet , & in omnes partes propendendo , circulariter feratur : denique per planum sub finem multo strepitu volvatur.

Resp. id à certa directione projicientis , virtu-

remque imprimantis, & à figura trochi adjuvante habere. 1. Magnos orbes conficit, deinde minores, quia funis trocho circumdatus, primò majores circulos, deinde minores conficit circa trochum: ergo cum majores primùm expédiantur, motumque imprimant, deinde minores; primi motus trochi, utpote correspondentes majoribus funis circulis, ideo sunt majores: qui autem subsequuntur, minores: sub finem iterum majores conficit, quia languescente impetu, prævalere incipit gravitas, unde trochus stare amplius rectus non potest, & dum superior pars inclinatur ad centrum, pars inferior obliquatur, unde circuli obliqui nascuntur.

Tertia, cur lapis in aquam conjectus, identidem emiceret, relabaturque, aquæ superficiem delibando.

Resp. id nasci ex impetûs indole, prout determinatur à projiciente. Porro si in corpus inciderit, quod illi obsistat, aliò reflectitur, ut motum suum liberè exercent; ita tamen ut ab eodem corpore obsistente in vnam potiùs partem, quàm in alteram determinetur; hinc cum aquæ densitas lapidis motui resistat, aliò reflectitur, at subinde decidit in aquam, tum ob determinationem primi projicientis in eam partem, quæ major est sæpè, quàm reflectentis, quod est quasi secundùm projiciens: tum ob gravitatem projecti, quæ, deficiente impetu, incipit prævalere, donec invento iterum obice resilit tandiu, quandiu non planè impetus emoritur.

### §. III. *Diluuntur objecta.*

**O**BIICES 1. De ea qualitate, nulla mentio apud Aristotelem. 2. Nullius est categoriæ.

Resp. ad 1. Licet Aristoteles impetus non meminisset, non ideo illum non esse admittendum; deinde ipsum his vocibus videtur innuere: *Potentia*; inquit, scilicet motrix, *quâ pollet projiciens, quasi vim impressam tradit utrique*, id est aëri sursum, & deorsum; quid autem intelligit Aristoteles per vim impressam, nisi impetum?

Ad 2. Revoco ad qualitatem, quia est dispositio facile mobilis à subiecto.

Objicies 2. Non potest explicari quomodo, & quando producat.

Resp. Quando mobile conjunctum est cum projiciente.

Instabis 1. Ergo deberet lapis in manu projicientis efficere motum.

Resp. nego, quia nondum determinata est qualitas ad motum in certam partem efficiendum; determinatur autem, cum mittitur à projiciente versus hanc partem non aliam.

Instabis 2. Cum producit in instanti ab Angelo immoto, non potest assignari principium determinativum.

Resp. determinari projectum vel à corporibus circumstantibus, vel à primâ causa, posita voluntate projicientis, tanquam conditione, ut faciat motum ad talem lineam juxta rerum exigentiam.

Instabis 3. Vel determinatur in instanti, vel in parte divisibili.

Resp. determinari in ea parte temporis quâ ultimo projectum est ipsi conjunctum.

Instabis 4. Vel illud ultimum in quo producit impetus, est divisibile, vel non.

Resp. in ea parte temporis, cum sit essentialiter divisibile, semper esse aliquid prius, & aliquid

posterius, adeoque non in instanti reali determinari, quia nullum est instans reale; deinde cum producatum cum motu, semper successivè produci-  
tur: ita tamen ut determinetur, cum projectum est ultimò conjunctum cum manu, quatenus de eo verum est dicere, nunc ultimò conjungitur cum manu, immediatè post conjunctum non erit.

Objicies 3. Pendeat à laqueari suspensus fune globus, tum aliquis manu ipsum pellat versùs vnum parietem, recidet in arcum, & ad oppositam partem sursum feretur; quæro causam illius impetûs, quo globus resilit sursum ad partem oppositam.

Resp. non dari causam illius impetûs per se, quo globus sursum resilit, sed dari per accidens, nempe gravitatem globi fune penduli: scilicet cum gravitas illa niteretur impetu deorsum ferri, & movere globum per lineam rectam, fit propter determinationem funis, quo globus sustinetur, ut quod imperus ille non potest efficere per lineam rectam, impediens fune, præstet per lineam circularem, & arcuatam: sic pila deorsum sponte cadens in pavementum, & sursum resiliens, habet pro causa impetûs remittentis gravitatem, quæ in descensu ipsum produxerat, & per accidens determinatur ad lineam sursum ab obice occurrente: unde gravitas, quæ per impetum, pilâ cadente, fecerat aliquatenus naturalem motum, facit per accidens in pila resiliente motum violentum.

Objicies 4. Sæpè qualitas impressa imbecillior est, ac remissior gravitate projecti: ergo ipsam superare non potest.

Resp. nego consequentiam; licet enim non habeat plures intensiōis gradus secundum multitu-



dinem , quàm gravitas corporis projecti , prævalet tamen , quia non pugnat cum gravitate per formalem contrarietatem , sicut frigus cum calore , nec est causa univoca motûs , sed æquivoca. Rem illustrabis exemplo qualitatis magneticæ , quæ in exigua mole , corpora multùm gravitatis habentia movere potest.

Objicies ; Non potest explicari , quomodo corrumpatur impetus.

Resp. Paulatim se ipso , ut sonum : tum ab impetu innato mobili , quatenus ipsi contrarius est.

Instabis 1. Impetus innatus est contrarius adventitio : ergo non corrumpit qualitatem.

Resp. dist. ant. Ratione entitatis , concedo : ratione termini , nego ; cùm enim impetus lapidis feratur naturaliter deorsum , adventitius verò lapidem sursum ferat , prævalet aliquandiu contra gravitatem , sed quia paulatim destruitur , inde fit , ut ad gradus æquales gradibus innati impetus veniat , & sic paulatim naturaliter se ipso desinat. Quin etiam dum lapidem deorsum celerius mover impetus , quàm gravitas ejus exigit , contrarius gravitati est , non ratione termini , sed modi , quia velocius movet lapidem ad terminum , quàm illius natura exigit.

Instabis 2. Ex Aristotele 2. de anima , æternitatem omnia appetunt : ergo illa qualitas non definit se ipsâ , quia tenderet in sui non esse.

Resp. ibi Aristotelem agere de actione perfectorum viventium , quæ per generationem sui similitum , conantur se perpetuare. Resp. 2. impetum desinere , defectu causæ finalis , & consequenter defectu causæ efficientis , quæ non debet conservare id quod incipit esse frustra in natura. Ad prob. dist.

tenderet in sui non esse, negativè, concedo: positivè, nego; dicitur enim tendere in sui non esse, quatenus non exigit longiorem durationem, non quatenus positivè inclinatur in non esse. Exemplum habes in sono, qui cùm sit caduca qualitas ex se se, paulatim evanescit, Deo se accommodante ejus imbecillitati, & paulatim concursum subrahente.

Objicies 6. Si rota, impetu accepto, moveretur in gyrum, non posset aquæ guttas, quibus aspergitur, circumquaque disjicere.

Resp. nego; ideo enim aquam sibi adhærentem rota disjicit, quia quò magis res movetur, eò maiorem impetum ad motum acquirit: ut ergo guttæ aquæ maiorem illam velocitatem, quam acceperunt ex motu rotæ, exæquent, concedunt ad peripheriam, ubi motus est velocior, tandèmq; ab ipsa peripheria separantur. 2. Quæ projiciuntur, ac separantur à rota circumducta, non per lineam omnino rectam, sed curvam aliquatenus, atque inflexam, ut advertit Cabeus, moventur, vel quia corporis, cujus antè motu agitabantur, motum, quantum possunt, retinent; vel quia cùm fortè per se vellent secundùm lineam rectam moveri, sicut movetur lapis è funda rotata violenter projectus, tamen gravitas aquæ deorsum trahit, facitque lineam aliquatenus curvam.

Objicies 7. Dum longior hasta evibratur, qualitas illa minùs esset intensa in partibus remotis, quàm in proximis, quia actio debet esse uniformiter difformis: ergo motus esset tardior in parte remotiore, quàm propinquiore, quod repugnat experientiæ.

Resp. hanc esse imperiû naturam, ut tantus producat in remoto, quantus in propinquo, si pars

remota tantum movetur, quantum proxima; servatur itaque motus æqualis secundum totam haste longitudinem, quia id exigit partium continuitas, inamò aliquando in parte remota major est illa qualitas in actu secundo, seu ratione motus, quem efficit, quam in proxima projicientis, ut patet in verticillo, cujus circumferentia celerius movetur, quam ea pars, cui manus digiti appliciti, imprimunt circumrotationem, dum unus digitus imprimit motum versus unum terminum, & alter versus oppositum; sed probabilius impetus ubique æqualis est entitativè, licet vires suas non æqualiter exerat circa partes centro viciniore, quia lentius moveri debent.

Objicies 8. Pila, licet à nemine projiciatur, resilit tamen, dum incidit in corpus reflectens: ergo impetus motus reflexi non producitur à projiciente.

Resp. in illa hypothese impetum à gravitate mobilis produci, quem juvat aëris intercepti inter corpus reflectens, & reflexum rarefactio. Porro longius resilit mobile incidens in corpus durius, quam in mollius, non quod durities sit causa impetus, sed tantum conditio.

Objicies 9. Vel est naturalis qualitas, vel ejusdem speciei cum aliis.

Resp. hoc sensu naturalem dici, quod fiat per actionem naturalem. 2. Singuli impetus sunt ejusdem speciei, quia ex se indifferentes sunt, ut in quamlibet partem mobile impellant. Porro motus projectorum velocior est aliquanto post principium, quam in principio, quia tunc ab aëre juvatur, qui magis agitur, minus resistit à parte anteriori, & copiosior à tergo accurrit. Item pila

emissa reticulo fortiùs vibratur , quam tabella , quia nervi reticuli per ictum pilæ adducti in partem posteriorem , dum statim vi magnâ ad pristinum statum se reducant , pilam majoris impetu propellant , sicut sagitta per funem arcus dum reducitur , longiùs remittitur.

#### §. IV. De motu directo, & reflexo.

I. OBSERVATIO. MOTVS directus est , quo mobile per se primò tendit in terminum; reflexus verò , per quem ex occurſu corporis mobile , vel directè versùs easdem partes remittitur , vel obliquè in alias distantes , juxta quantitatem anguli contingentix.

II. OBSERVATIO. Vterque oritur vel à principio intrinseco , vt in motu cordis , vel ab extrinseco , vt in motu lapidis.

III. OBSERVATIO. Duplex est quies ; privativa , quæ est cessatio motûs per aliquod tempus inter motum rectum , & reflexum : negativa , quæ est tantùm motûs discontinuatio sine quiete.

Quæritur hîc , an detur quies in puncto reflexionis , seu inter motum directum , & reflexum , sive privativa , sive negativa.

I. ASSERTIO. Cùm vterque motus est ab intrinseco , datur quies privativa , vt patet in motu cordis , quod naturaliter dilatatur , & constringitur cum aliqua interquiete ; & ita explicabit Aristotelem dum ait , inter motum directum , & reflexum quietem intercedere.

II. ASSERTIO. Inter motum directum , & reflexum datur quies , saltem negativa in puncto reflexionis , cùm motus sunt contrarii. Prob. quia

motus illi non possunt esse continui, possunt autem esse contigui, eo modo, quo duo plana sibi invicem applicata. Respondent eundem esse motum continuum, sed virtualiter multiplicem ob multiplices terminos.

Objicies 1. Si motus directus, & reflexus sunt contrarii, & immediati, habebunt extrema simul: ergo mobile simul movebitur motibus contrariis.

Resp. dist. ant. Habebunt extrema simul in tempore, & successivè, concedo: simul in instanti, & permanente, nego.

Instabis 1. Saltem motus solis ab Oriente in Occidentem, & vicissim, non essent continui, quia sunt contrarii.

Resp. nego: cum enim sol moveatur circulariter, docet Aristoteles 1. de cælo, cap. 3. motui circulari nullum esse contrarium.

**III. ASSERTIO.** Datur aliquando quies privativa in puncto reflexionis: v. g. cum lapis sursum projectus, deorsum deinde tendit, non relabitur, quin paululum quieverit, quia datur aliquod tempus, in quo impetus impressus à projiciente nec superat gravitatem projecti, nec ab ea superatur: ergo tunc mobile nec sursum, nec deorsum movetur. Quin etiam aër condensatus, seque versùs lapidem rarefaciens resistit: certè pileus filo suspensus, & velocissimè rotatus, lapidem intra concavitatem contentum sistit aliquandiu, & à lapsu retardat.

**IV. ASSERTIO.** Non semper datur quies privativa in puncto reflexionis; quis enim credat, si quis in lapidem molarem è cælo cadentem per longam syringen aquam embolo lentè impulsò continuè ejaculetur, hæsurum in aëre pendulum? at fieri id deberet, quia quælibet pars aquæ in lapidem

dem impacta, antè quiescere deberet, quàm relaberetur: ergo & impedire lapidis descensum. Quare aqua lapidi adhærens, ejus motu per accidens aliquandiu movetur.

Objicies 1. Mobile dum attingit corpus reflectens, debet ei coëxistere: ergo quiescere per aliquod tempus, vel per aliquod instans indivisibile.

Resp. dist. ant. Coëxistere successivè, concedo: permanenter, nego; aut certè fit in indivisibili virtuali.

Instabis 1. Ergo aliquod mobile est sine motu per instans.

Resp. dist. Per instans virtuale, esto: reale, nego.

Instabis 2. Ergo eodem instanti mobile ascenderet, & descenderet.

Resp. nego, quia in eo instanti, quo motus directus, & reflexus separantur, nec ascendit mobile, nec descendit, sicut nec quiescit, quia illa omnia in instanti fieri nequeunt, cùm instans sit sectio temporis, quæ motum directum, ac reflexum secernit, ad utrumque pertinet; directus enim eam includit, cùm spectatur cum negatione ulterioris extensionis, sicut & reflexus, cùm spectatur cum negatione ulterioris extensionis versùs eandem partem; sicut in quantitate bipedali punctum dividens potentiâ utramque medietatem, pertinet ad utramque, quia est utriusque sectio; pes enim eam includit spectatus cum negatione ulterioris extensionis, versùs eam partem; sicut alter pes, dum spectatur cum negatione ulterioris extensionis versùs eandem.

Objicies 2. Pila, dum reflectitur, producit in pariete albedinem, & calorem: ergo in aliquo tempore, ergo quiescit.

Resp. produci albedinem ex particulis cretæ à pila inibi relictis, dum fluenter applicatur corpori reflectenti, sicut calor oritur ex adhæsiōe aëris per pilam ad parietem attriti, dum fluenter pila ipsum comprimitt.

## A P P E N D I X

*De primo motore.*

**F**INIS totius Physicæ vnus est Aristoteli propositus, vt per operationes, motusque naturæ incognitionem primi motoris veniat, qui prima est, & princeps omnium motuum causa, cuiuslibet motus expers; ideoque postquam de motu egit, affectiones primi motoris prosequitur, quas strictim delibabo, quia opportunior erit de iisdem disputandi locus in Metaphysica.

I. A S S E R T I O. Primus motor est immutabilis. Probatnr ab Aristotèle sic: omne quod movetur, ab alio movetur: ergo si primus motor ab alio moveretur, non esset primus. Antecedens probatur inductione: in motu locali viventium, qui fit ab intrinseco, vis motrix distinguitur realiter à re mota; in elementis, motus dicitur esse à generante, qui ideo est causa principalis motuum, qui fiunt in elementis, quia producit formam, & illà mediante gravitatem, & levitatem; in projectis per vim motus violentus est à projectore, vt causa principali, & ab impetu, vt causa instrumentaria: at projector, & impetus distinguuntur realiter à projecto; in motu alterationis, lignum, quod alteratur ab igne, ab eodem distinguitur, sicut aër à luce, per quam illuminatur. Denique in motu accretionis



facultas nutritrix distinguitur à quantitate, in qua fit accretio. Hæc ratio procedit de motu sensibili, & physico.

Probatur 2. Quidquid movetur, est in potentia passiva ad motum: primo motori repugnat potentia qualibet passiva, quia est actus purus ex 2. Metaphys. tex. 30. unde continet tantum motum emittentem.

Prob. 3. Motus supponit carentiam perfectionis; nihil enim movetur, nisi ut acquirat aliquam perfectionem accidentalem; primo motori nulla deest perfectio: ergo non potest moveri; hinc nihil potest de novo intelligere, aut velle.

Objicies in 1. principium: Intellectus se ipsum mover, cor se se agit, & alias partes immixtione spirituum animalium: ergo movens non distinguitur realiter à re mota.

Respondeo ad 1. ibi Aristotelem loqui de motu physico, & corporato, ut jam observavi, quo cidentur corpora ex materia, & forma constantia, ac proinde dicunt distinctionem realem inter movens, & motum; forma enim, quæ est causa motus productrix, distinguitur realiter à materia, quæ est subjectum motus, vel potius totum, quod est causa movens, ut quod, saltem distinguitur partialiter à re quam movet. Resp. 2. intellectus non se movet propriè, sed homo, aut Angelus se movet per intellectum realiter distinctum, quod sufficit. Denique cor distinguitur realiter tum à facultate motrice, à qua immediatè movetur, tum ab anima, à qua mediatè, tum à cæteris partibus, quas movet.

II. A S S E R T I O. Perpetuus est. Hæc perfectio sequitur ex prima; cum enim primus motor im-

mobilis sit, æternus sit oportet, quia æternitas sequitur immutabilitatem, sicut tempus motum sequitur.

III. A S S E R T I O. Incorporeus est. Probatur, quia ex principio jam posito, nullum corpus movet non motum, ut patet inductione: primus motor movet omnia immotus. 2. Omne corpus est in potentia, ut dividatur: primus motor est actus purus; hinc spiritus est.

Dices: Aristoteles 2. Metaph. cap. 7. tex. 39. ita scripsit: *Φαυδὲ δὲ τὸ θεὸν εἶναι ζῶν αἰδίοι, ἀπείρον*: *Dicimus autem Deum esse animal sempiternum, optimum: animal corporeum est: ergo & primus motor.*

Resp. 1. cum D. Thoma, Alexandro, aliisque interpretibus, non ex sua mente Deum animal appellasse, idque vel inde patet, quod statim subijciat divinam mentem omnis concretionis expertem esse; sed ex vulgari hominum sermone, qui ut Deo vitam tribuerent, animal nuncupabant, quod vita in animalibus præsertim appareat. Deinde alii interpretes ζῶν, non *animal*, sed *vivens* reddunt.

IV. A S S E R T I O. Est unus ex 8. Physic. tex. 48. *Φανερόν ἐκ τῆς δὲ ὅτι ἀνάγκη εἶναι πέν, καὶ αἰδίοι τὸ πρῶτον κινεῖ*: *perspicuum verò ex hoc est esse, ut quod primum movet, unum aliquid sit, & sempiternum.* Probatur: motus continuus, & singula regularis à pluribus motoribus esse non potest, quia si simul movent, nullus est perfectus motor, sed omnes se habent instar perfecti motoris: ergo scorsim sunt motores imperfecti: si non movent simul; ergo quilibet eorum est quandoque movens, & quandoque non movens: ergo motus non est  
conti-

continuus, nec regularis : at motus vniversi continuus, & regularis esse debet : ergo & vnus motor. Confirmatur : si plures essent motores, daretur processus in infinitum.

V. ASSERTIO. Est immensus. Probatum ex Aristotele : nihil agere potest, vbi aliquo modo præsens non sit : primus motor non motus movet omnia : ergo sicut vbique est agens, ita vbique præsens. Hæc ratio supponit nihil posse agere in distans.

VI. ASSERTIO. Est infinitus in essentia. Probatum, quia est causa omnium possibilium : ergo debet continere eminenter omnem perfectionem possibilem, itaque esse infinitus.

VII. ASSERTIO. Est simplex. Probatum, quia summè perfectus, quidquid autem compositio-nem ex partibus admittit, multipliciter partium includit ; hinc totius dependentia à partibus. Item intelligens omnia, tum quia est purus spiritus, ergo intelligens : tum quia producit liberè quidquid producit, ergo & cognoscit ; omnis enim artifex agit ex idea operis. Denique omne amabile amare debet iuxta mensuram, quā est amabile, quia perfectio voluntatis sequitur perfectionem intellectus ; ex quibus facilè infertur, quòd sit sua beatitudo, & quidem summa, omniumque intelligentiarum, quia omne bonum possidet, & cognoscit, cognoscendo amat, amando delectatur, & gaudet ; nam ex 12. Metaph. tex. 39. motor primus immobilis perpetuò degit optimè.

Cognosce pariter, si sapis, quisquis hæc leges ; & ama motorem tam eximium. Ad hoc condidit naturam, opes eidem, iuxta & delicias iisdem asper-

sit, ut te ipse illecebris ad sui amorem proliceret:  
ad hoc te invitant res singulae creatae, quae ideo à  
primo illo motore exierunt, ut te quasi manu ad  
eundem reducant.



# FINIS PHYSICAE VNIVERSALIS.

*Ad maiorem Dei gloriam.*



<i>Pag.</i>	<i>Linea.</i>	<i>Errata.</i>	<i>Lege.</i>
32	4	indivisibilis	divisibilis
65	<i>penult.</i>	negationis	extensionis
89	6	partibus	punctis
119	12	illum.	illud
151	19	primum	secundum
163	8	esto	nego
167	8	nego	concedo
178	15	nec	&
216	4	actu &	actue
258	16	recto	recta
267	9	ascendit	descendit
343	14	à subjecto in nō	à nō subjecto in
365	15	motus debet	mobile debet
		mēsurari loco	mensurari loco
388	6	rarum	densum
398	17	intensionem	extensionem
470	4	majoris	majori



S V M M A P R I V I L E G I E  
Regis Christianissimi.

**C**AUTVM est auctoritate Regis, ne quis in  
ejus regno, aliisve locis ejus ditioni subje-  
ctis, intra decem proximos annos librum, qui sit  
inscribitur: Accurata totius Philosophiæ institutio  
juxta principia Aristotelis in plures tomos distri-  
buita ad vsum studiosæ juventutis, Authore P. I A-  
COBO CHANNEVELLE, Societatis I E S V  
Sacerdote, absque Edmundi Martini Parisiensis  
Typographi permissu excudat, aut vendat, à die  
publicationis exemplarium: qui secus fecerit, multa  
ei indicta, prout amplius in diplomate regio conti-  
netur, dato Parisiis die 4. mensis Martii 1666. &  
signato ex mandata Regis, M A B O V L. Quod &  
in acta Typographorum & Bibliopolarum Parisien-  
sium relatum est die 5. Martii ejusdem anni 1666.  
à SIMEONE PIGET Syndico.

Prima editio P H Y S I C Æ U N I V E R S A L I S,  
absoluta fuit die 11. Februarii 1666.

PAG 2006343









